

АСАРЛАР
ОЛТИ · ТОМЛИК

Абдулла Каххор

АСАРЛАР

ТҮРТИНЧИ
ТОМ

ҚУШЧИНОР
ЧИРОГЛАРИ

Р о м а н

Ғафур Ғулом номидаги бадиий адабиёт нашриёти
Тошкент — 1967

Редакция:
ИЗЗАТ СУЛТОНОВ, АСКАД МУХТОР
ПИРИМКУЛ ҚОДИРОВ

Ўзбек



ўшчинор чироғлари

БИРИНЧИ БОБ

1

— Казисан, қартасан, ахир, аслингга тортасан! — деди кампир омборни қулфлаётуб.— Энди жир битди-да! Битта кўйлак иккита бўлди! Увада, ислиқи тўн, чилвир белбоғнинг хумориси тутгандир!..

Сидиқжон қайнанасидан бу хилдаги таъналарни кўп әшишган, лекин сира гап қайтармаган эди, бу сафар заҳарханда қилиб:

— Ўзи тўймаганнинг салқити қорин оғритади, онажон, сиздан ортдию, бизга жир битдими! — деди.

Кампирнинг жиги-бийрони чиқди; омбордан олиб чиққан бир сават паҳтаси билан чиғригини кўтариб, вайсаганича, уйига кириб кетди.

Сидиқжон ўрнидан туриб кўча әшиги томон йўналган эди, айвонда кўз оғриқ боласини эмизиб ўтирган хотини тўхтатди:

— Тўхтанг, ажрим қилиб кетинг! — деди.

Сидиқжон ялт этиб хотинига қаради. Хотини, ранги ўчган, ўрнидан туриб болани беланчакка солди ва қаттиқ-қаттиқ тебратабошлади.

— Нима дединг? Ажрим қилиб кетинг? Мен бирон ёққа кетаётганим йўқ эди-ку... Ке-

тинг демоқчи бўлсанг, тўғрисини айта бер. Менинг бу уйда шу боладан бўлак илинжим йўқ. Бунинг ҳам ярми сеники. Кетгин деганингми бу?

— Раъйингиздан қайтсангиз қайтганингиз, бўлмаса мен... ота-онамни дейман!

— Ахир, менинг бу раъйимга отанг рози дедим-ку! Ўлгани йўқ, кечқурун келади. Сўра.

— Рози бўлсалар бўлаверсинглар, мен рози әмасман. Сидиқжон индамай кўчага чиқиб кетди.

Кампир уйда жоврар, қизини қарғар әди:

— Э, ўл итялоқ! Дайди итнинг тумшугини ёғ қилмай ўл! Итга берсанг ошингни, итлар ғажир бошингни! Кошки ўз бошини ғажиса!

Қизи товуш чиқармай куюниб йиглади. У ўз онасидан юрагига ништар бўлиб санчиладиган сўзни шу билан иккинчи марта эшитаётиди, илгари, ҳазилми-чинми, «боланг эрингга ўхшамайди» деган әди. Хотин кишининг юрагидан фарзанд доғи кетса кетадики, бундай гапнинг алами кетмайди. Энди «итялоқ» деяётибди. Бу гапни ғар ҳам кўтара олмас, тикка юлишар әди. Бироқ унинг тили қисиқ, айниқса мана бу ғурбат билан бошланиб, ғурбат билан тугаётган кунларда онасига сўз қайтариш әмас, рўпара бўлишга ҳам юраги безиллар әди.

Унинг тили қисиқ қилган гуноҳи шундай содир бўлган әди.

Бундан роса ўн йил бурун мана шу болохонадаги қазноқда тухум босиб ётган фарангি товуқ бирданига қоқолаб том орқасига — Собиржонқорининг боғига учиб тушди. Қиз девор ошиб унинг кетидан қувлади. Товуқ тутқич бермай, анҳор бўйидаги жингуллар остига кириб кетди. Қиз уни ушлаб олгани кўп уринди, жуда қийналиб кетди: қўлларига тикан кирди, юзи ва билаклари тирмаланди, роҳатибадан кўйлагининг этаги йиртилди. Ўша вақтда Собиржонқорининг қароли бўлган шу Сидиқжон анҳор-

нинг нариги ёғида анжир очаётган бўлиб, қизни кузатиб турган әди. Сидиқжон — қарол бола, бу — ўзига тўқ бир одамнинг қизи, икки орани ажратиб турган шундай зўр тоғни бир зумда талқон қилиб ташлайдиган «алланима бало» бир куч бор эканини ким билиби! Қиз аввал қўрқди, отаси унинг Сидиқжон билан сўзлашиб турганини әмас, боққа тушганини билса ҳам терисига сомон тиқади — бу хусусда отасининг қамчисидан қон томар әди; кейин, янги бир оламга кириб, отасининг қамчисини ҳам, жингул остида пусиб ётган курк товуқни ҳам унутди, Сидиқжоннинг шўхлигига қарши «ёмон экансиз» дейишдан бошқа сўз тополмади. Қизнинг ҳаётида бу ҳаддан ташқари катта ҳодиса әди; ҳам ваҳимали, ҳам «аллақандай ғалати» бу учрашув тўғрисида ўзининг сирдош ўртоқларидан биринга сўзлаганида, шундай зўр ҳодиса ҳақидаги гап биро пиёла чой ичиб бўлгунча тугаб қолганига ҳайрон қолди. Шундан кейин Сидиқжон боғда юрган чоғларида қўшиқ айтадиган бўлди. Бу қўшиқлар қизда ўзи ҳам нима әканини билмайдиган ҳислар уйғотар әди. Ҳавф-хатарга юзма-юз келиб унга чап бериш қандай яхши! Бир неча ой мобайнинда қиз ўзи хоҳлабми, ё Сидиқжон «асти қўймагани» учунми, боққа яна бир неча марта тушиб чиқди; ҳар тушганида шундай катта ишни мудом кўз-қулоқ бўлиб турган ота-онасига билдиrmай қилганига завқ қилар, ўзини бардамроқ ва ақллироқ сезар, шунинг учун яна тушгиси келар әди. Ҳазил-ҳазил билан бўлиб кетган бу ишнинг бутун даҳшати ўша йили кузда бадавлат бир хонадондан совчи келадиган бўлганда билинди. Қиз никоҳ ва унинг эртаси бўладиган бутун можарони кўз олдига келтириб, аммасининг оёғига йиқилди ва ўз қилмишига иқрор бўлди.

Кампир бу гапни эшитиб ҳушдан кетиб йиқилди. Қиз кечгача болохонадаги қоронғи қазноқда тешиқдан мўралаб, дор ёғочи остида жаллоднинг сиртмоқ солишини кутган маҳкумдай, тақдирга тан бериб, отасини кутди. Отаси

Эуннунхўжа келди. Бир лаҳза даҳшатли жимлик ҳукм сурди; кейин, онасининг йиғлаган, қарғаган товуши, отасининг йўтали әшитилди. Яна жимлик чўкди. Бу жимлик қизнинг бўйнига гўё сиртмоқ бўлиб тушди. Орадан хийла вақт ўтгандан кейин уйнинг әшиги ғийт өтиб очилди. Оёқ шарпаси болохонага томон келар, қиз тин олмай кутар әди. Қазноқнинг әшиги очилиб аммаси кўринди. У катта фалокат даф бўлганидан қувониб энтиккан бир товуш билан: «Шарофат, қизим, тур! Тур, қизим. Отанг гуноҳингдан ўтди!» деб шивирлади. Шарофат бу гапга ишондими-ишонмадими — билиш қийин әди. Аммаси ичкарига кирди ва уни қўлидан тортиб турғизди-да, «ўз қулогинг билан эшит» деб болохонадан олиб тушди ва имо билан дарчани кўрсатди. Шарофат шундан кейингина ўзига келди-ю. оёқ учida бориб дарчанинг ёнига чўнқайди. Онаси дам-бадам бурун қоқар, отаси хуноб бўлиб унга гап уқтирап әди: «Ўргатма, менга ақл ўргатма! Ақлим ўзимга етиб келган, бундан кейин ҳам етади. Мен бу мол-дунёни, ер-сувни қўлим билан топган әмасман, ақлим билан топганман. Сидиқжон bezot, Сидиқжон гадобачча... Тўғри, лекин замон, шуларники бўлса нима дейсан? Булар кеча оёғингни босган әди, бугун кўкрагингга оёқ босиб турибди, әртага бўғзингга оёқ қўяди. Уласан! Жон керакми? Жон керак бўлса ўлимга чап бериш пайдан бўл. Замон сенга боқмаса, сен замонга боқ!»

Эртасига онаси қуда томонга одам юбориб: «Қизимиз хоҳламади, ўзининг хоҳлагани бор, зўрлик билан иш қилишни замона кўтармайди», деди. Эуннунхўжа эса «меҳнат билан суюги қотган Сидиқжоннинг пешонасини силагим келиб юрар әди, қизим унга кўнгил қўйиш билан бошимни осмонга етказди» деб дарров тўй ҳаракатига тушди. Бу ҳодиса қишлоқда кўп кишиларни ҳайратга солди. Область газетаси бу ҳақда «Тушунган ота» сарлавҳали бир хабар босиб чиқарди.

Қиз орзу-ҳавас кўролмаган онасининг дашном ва зинхновларидан ўлар ҳолатга етганда, баҳтига, ер ислоҳоти бўлиб қолди. Ер ислоҳоти унинг тилини узун қилди, чунки Сидиқжон бўлмаганда Зуннунхўжанинг Тарновбошидаги шоликорлик ери ҳам кетар эди. Шундан кейин Сидиқжоннинг ўтмишини кампир бир қадар унутди, «ҳар иш худодан» деб қизини ҳам оқлади. Оила бошлиғи — Зуннунхўжа, рўзгорни кампир бошқаради, Сидиқжон далага ургулиқ ва гўнг әлтиб, ҳосил келтиради.

Йиллар мана шу хилда осойишта ўтар эди, яқин олти ой бўлдики, мана шу осойишталик бузилди ва бунга сабаб, кампирнинг гумонича, Сидиқжоннинг онаси эди.

2

Сидиқжоннинг онаси **Хадича** хола умрини хорлик-зорлик тортиб ўтказган ҳамма қишилардай тез қариган, лекин ҳамма қишлоқ қарияларидай кексаликка сўз бермайдиган, файратли, тетик, миннатли ошдан беминнат муштни афзал кўрадиган бир кампир бўлиб, бу ерга бир тош мўлроқ келадиган ўз қишлоғи Баҳрободда кичик ўғли Обиджон билан туар эди. Сидиқжон аввал, аравасоз устага шогирд, ундан кейин бу ерга келиб Собиржонқорига қарол бўлиб юрган вақтларида **Хадича** хола уни ўз қаноти остида ҳисоблар эди, ўғли Зуннунхўжага ичкуёв бўлгандан кейин ўрдак тухумини очган товуқдай бўлиб қолди, шунинг учун бу ерга жуда кам, йилда бир ёки икки мартагина келар эди.

Хадича хола бундан яқин олти ой бурун келганида бир қийиқ беҳи олиб келди. У кун оққунча ўтириди-ю, кейин, «кечга қолмай» деб жўнади. Сидиқжон уни кузатиб қайтиб келганида, ток остидаги эски сўрида сочилиб ётган беҳиларга кўзи тушди. Беҳи унга мунгайиб қараб турган-

дай туюлди. Сидиқжон ҳаммасини йигиштириб олди-да, айвоннинг токчасига әлтиб қўйди. Беҳи бу ерда унга гарифона назар ташлаб, «Мени бу ерга нега ҳам олиб келди, нега ташлаб кетди. Мени бу ерда ким ҳам қўлга олар эди» деб тургандай туюлар эди. Сидиқжон бирданига тўртта беҳи олиб еди. Унинг қўзига узундан-узоқ дала йўли, унда якка ҳорғин-ҳорғин қадам ташлаб бораётган онаси кўринди. Нега уни отдами, аравадами әлтиб қўймади? Аввали шуки, шунча йўлдан «болам» деб келган онасига нега «буғун ётиб қол» демади? У, юраги ғаш бўлди-да, отхонадан отни олиб чиқди, наридан-бери эгарлади-да, қайнанасининг «қаёққа!» деб вағирлашига қулоқ солмай, онасининг кетидан от қўйди; қишлоқнинг чиқаверишида унга етиб олди ва отга мингаштириб Баҳрободга олиб борди.

Сидиқжон уйда пича ўтириди-ю, энди қайтиб кетмоқчи бўлиб турганида Ўрмонжон келиб қолди.

Ўрмонжоннинг отаси Омон ака Сидиқжоннинг отаси Соҳибжон ака билан жуда қалин ўртоқ эди, икки ошна ўлиб кетгандан кейин Ўрмонжон билан Сидиқжон чинакам ака-уқадай бўлиб қолишган эди.

Ўрмонжон қишлоқ мактабида ўқиб хат-саводини чиқарди, сўнгра Самарқанддаги партия-совет мактабига ўқишга кетди, ўқишдан келиб, ер ислоҳотидан кейинроқ собиқ батраклардан ташкил топган колхозга раис бўлди, шу кунлари ва ундан кейин ҳам Сидиқжонни Баҳрободга олиб келишга, колхозга тортишга неча-неча ҳаракат қилди: тушунтириди, ваъда берди, яхши гапириб ҳам кўрди, ёмон гапириб ҳам кўрди — фойдаси бўлмади. Шундан кейин Ўрмонжон уни хушламайдиган, кўришганда сўзни қисқа қиласидиган бўлиб қолган эди. Бироқ у ҳозир, Ҳадиҷа холани йўлакай кўриб чиққани кирган бўлса ҳам, Сидиқжонни кўриб хийла ўтириди, нимагадир ғashi келаётгандай ундан кинояомиз ҳол-аҳвол сўради-да, «бой бўлиб болтанг йўқ, гадой бўлиб халтанг йўқ» деб заҳарханда қилди. Бу гапни

ҳазилга йўйиш учун Сидиқжон ҳам қулади. Бироқ унинг кулиши Ўрмонжоннинг рўйирост ғашини келтириди: «Нега куласан, ўзингдан кулаётисанми?— деди майин, лекин кишига қамчидан ҳам қаттиқроқ тегадиган бир товуш билан.— Агар ўзингдан кулаётган бўлсанг, аввало Зуннунхўжжанинг сандигида ётиб ақлинг могорлаб кетганидан кулгин. Ҳа, нега бақраясан? Ақлинг могор босмаганими бу? Ҳеч ўйлайсанми: қишлоқда, қишлоқларда шунча воқеалар бўлиб ўтди, бойлар, муштумзўрлар — бир томон, камбағаллар, батраклар — бир томон... Колхоз, кураш, ҳатто қон... нега? Ҳеч атрофиннга қарайсанми? Ўртоқларинг, ўзинг қатори қароллар, батраклар нима қилди, нима қилаётитпи? Нега сен ўз тўпингдан айрилиб қолдинг? Айрилганни бўри ер әди-ку! Онанг, умид билан бешигингни тебратган шу бечора онанг сендан нима кўрди? Бу ердаги ўртоқларинг сени, сен ювиндихўрни ҳамқишлоғимиз дегани ор қилишади!»

Ўрмонжон хўп ҳам тўлиб-тошиб юрган экан, юрагини роса бўшатди. Сидиқжон бошини қути солиб, ерга кириб кетгундай бўлиб «чурқ» этмасдан ўтириди.

Ўрмонжон ярим кечаси чиқиб кетди. Сидиқжон шу ерда ётиб қоладиган бўлди. Ҳадича хола ўғлига ичи ачиб, уни хижолатдан чиқариш учун у-бу деган бўлди. Бироқ унинг бу сўзлари ҳам Сидиқжонга оловли қамчидай тегаверди.

Сидиқжон кечаси билан киприк қоқмай чиқди. Ҳақиқатан, нима учун бугун кўраётган кунини Собиржонқорининг эшигида юриб кўрган кунларига солиштириб юрган экан? Нима учун бугун кўраётган кунини, масалан, ўша Собиржонқорининг собиқ аравакаши, ҳозир узоқлашиб қолган ўртоғи Ҳайдаралининг турмушига солиштирамапти?

Собиржонқорининг эшигида бирга ишлаб, ҳасратлашиб юрган вақтларида Сидиқжон уни сансирап, «Ҳайдар» дер

әди, қачондан бери уни сизлайдиган, ўзидан бир ёки икки ёш кичик бўлишига қарамай «Ҳайдарали ака» дейдиган бўлди? Сидиқжоннинг тўйида ичкарига, ҳатто ўз тенгқурлари олдига киргани ҳам тортиниб, ҳовлида ёш болалар орасида ўтириб ош еган ўша Ҳайдарали қачондан бери тўй-маъракада тўрга ўтадиган, қариялар, ўқимишли кишилар орасида ўтирадиган бўлиб қолди? Қачондан бери у газетхон, гапдон, самоварнинг тўрида ўтириб чой ичадиган ва Сидиқжоннинг тили келишмайдиган, ақли етмайдиган гапларни айтиб ҳаммани оғзига қаратадиган бўлди? Қачондан бери «Ҳайдарали Усмоналиев» ёки «ўртоқ Усмоналиев» бўлиб қолди?

Ҳақиқатан, нега қишлоқда бўлиб ўтган ва бўлаётган ишларга кўзини каттароқ очиб қарамапти? Ақлини могоф босгани шудир-да!

Шу-шу бўлди-ю, Сидиқжон яна ўз тўпига қўшилиш, шуларнинг кетидан бориш — колхозга кириш тараддудига тушди.

Сидиқжон эртаси Баҳрободдан қайтиб келиб бу ниятини Зуннунхўжага айтган әди, Зуннунхўжа: «Сиз менинг ҳам куёвим, ҳам ўғлимсиз, нима билан вақтингиз хуш бўлса шуни қилинг», деди.

Оилада осойишталикнинг бузилишига, фурбат бошланishiга мана шу сабаб бўлди. Шу важдан кампирнинг жағи яна очилди, Сидиқжоннинг ўтмишини, қизининг қилмишини яна таъна қила бошлади.

Бироқ Сидиқжон бу тўғрида Зуннунхўжанинг розилигини олганлиги учун кампирнинг вайсашларига чандон эътибор қилмай келар эди, бугун хотинининг «раъйингиздан қайтсангиз қайтганингиз, бўлмаса мен ота-онамни дейман» дейиши Сидиқжонни «она-болага Зуннунхўжани бир рўпара қилмасам бўлмайдиганга ўхшаб қолди» деган фикрга келтирди, шунинг учун хотинига бир нарса дейишни лозим топмай, кўчага чиқиб кетди.

Кечқурун жамоат жам бўлганда, газабдан кўкариб кетган кампир етти пуштидан қолган уч бойлам васиқани ўртага кўтариб урди.

— Мулла Шарофиддиннинг муҳри бор бу васиқаларда. Муллажон қозининг муҳри бор! — деди васиқаларни титкилаб. — Шундай васиқаларни инобатга олмай Қақирдаги ерни олди, жувон ўлгур исполком! Ҳудоё васиқа кўр килсин! Кошки ерни тузукроқ одамга берган бўлса — Абдураҳмонжонининг қаролига! Орият ер билан колхозга кириб, энди у киши ҳосилот! Ҳадеб ер беравергани ҳукуматнинг менга ўтказиб қўйгани йўқ. Ер берадиган одам ўзи топиб берсин!

Сидиқжон мўйловини бураб, кулемсиради ва ер остидан Зуннунхўжага қаради. Зуннунхўжа пешонасини биринки уқалади, сўнгра айвоннинг шипидаги қалдирғоч уясинга қараб:

— Унақа бетамиз одамнинг гапини гапирма, нега ер сенинг измингда бўлар өкан. Ер Сидиқжонники, хоҳласа — ҳукуматга беради, хоҳласа — қўриқ қилиб ташлаб қўяди,— деди.

— Ҳудо газаб қилган бандасини шу кўйга солади,— деди кампир висиқаларни тахлаётib,— наҳот киши ўз мулкига ўзи душман бўлса!

— Нега мен душман бўлар эканман,— деди Сидиқжон иложи борича мулоимлик билан,— ўйлаб гапираётисизми?

— Ҳа, бўлмаса жонингиз ачиганими бу? Еори белингиз қайшишиб топганингизда жонингиз ачир эди.

Сидиқжон қип-қизариб кетди ва Зуннунхўжага «гапирсангизчи!» деган мазмунда назар ташлади. Зуннунхўжа кампирнинг гапини гап ҳисобламаганини, бунга әътибор

қилмаганини кўрсатиш ва шу билан Сидиқжоннинг тафтини босиш учун ёлғондан эснади.

— Колхоз деса юрагинг ёрилади-я! Колхоз шундай нарсаки, хоҳлаган одам киради, хоҳламаган одам тўпписини яримта қилиб юра беради. Шунақами, Сидиқжон?

— Албатта, менинг бўйнимга бирор арқон солаётгани йўқ. Тушунган одам киради, тушунмаганлар кирмайди. Унсурларнинг гапига қулоқ солганлар ҳам кирмайди...

Сидиқжон «унсур» калимасини «ҳукуматга қарши» деган маънода ишлатар, бу ердагилар ҳам шу маънода англар эди; бу гапни кампирнинг тилини боғлаш ва, назаридда, дурустгина гап тополмай чулдираб ўтирган Зуннунхўжага луқма солиш учун айтди. Бироқ, Сидиқжоннинг кутганига қарши Зуннунхўжа қовогини солиб, тескари қарди ва:

— Ҳар кимнинг таъби бўлса колхозга кирмаган ҳам, кирма деган ҳам унсур бўлмайди!— деб тўнгиллади, бироқ бу билан Сидиқжонни ранжитиб қўйганлигини фаҳмлаб, кампирга ўшқирди:— Миянг борми ўзи, Сидиқжон колхозга киргани билан ер колхозга ўтиб кетмайди, ўртада бўлади!— деди.

Кампир васиқаларни кўтариб, вайсаганича уйга кириб кетди.

— Худоё тавба қилдим, бу қандай кун!.. Ё қудратингдан, бу қандай одам! Бу қандай одам әканки, ўз мулкини, ўзининг мулкини ўртага солади! Эртага хотинини ҳам ўртага солади бу...

Сидиқжоннинг ранги бўзариб кетди.

— Онажон,— деди титроқ босиб,— оғзингизга қараб гапиринг! Шу гапингизни бирор эшикса айбдор бўласиз! Мен даюс әмасман! Бунақа қўшмачилик сизлардан келади. Инъомжонга «қизимнинг кўнглини ол, әридан чиқариб сенга бераман» деган кишидан келади.

— Қайси Инъомжон?

— Қайси Йињомжон бўлар эди, тоғангизнинг ўрли!
Кампир дарчадан рўпара бўлди.

— Шундоқ деган бўлсам ажаб қилибман, хўп қилибман!— деди икки қўлини сонига уриб,— уйни уй қилган әрининг топишию хотиннинг кўрпа иши! Топиши-ку йўқ, борерни йўқотадиган эрга тушиб қолган қизим йўқ!

Зуннунхўжа, Сидиқжоннинг тарафини олган бўлиб, кампирга қараб кавуш отди; Сидиқжонга нимадир демоқчи бўлиб оғиз очган қизини бир тарсаки уорди; сўнгра Сидиқжондан ўпкараб, майин товуш билан гап бошлади:

— Сидиқжон, дейман, одам деганга андиша, юз-хотир деган нарса ҳамма вақт керак. Мен сизга уй бердим, жой бердим, вақтида туз бердим, пешонангизни силадим... Энди келиб-келиб, мени, онангизни қўшмачи десангиз дуруст бўлмас. Онангиз ўша гапни айтптими, айтмаптими — уни қўя беринг. Айтган бўлса — хотин кишининг миаси айниган кампирнинг гапи, айтмаган бўлса — бирон душманингизнинг ифвоси. Кампирнинг аҳмоқлиги ё бўлмаса душманингизнинг ифвоси учун мени шундоқ дейишга қандоқ тилингиз борди? Ҳайр, майли, одам жаҳла устида ҳар нарса дейди, мен бунга хафа бўлмайман. Тилинни тишлаб олган одам тишини суғуриб ташламайди. Мен бир нарсага ҳайронман: колхозга киришингизга мени рози, хотиннинг билан онангиз ҳам рози бўлганда олам гулистон эди; энди хотиннинг билан онангиз рози эмас өкан, шуларни хафа қилиш, орага совуқчилик туширадиган гапларга сабаб бўладиган ишни қилишдан нима фойда?

— Аввало шуки, дада, бошингни силаганман деб миннат қилишингизга сира-сира ўрин қолган эмас. Одамга андиша керак, лекин ундан ҳам илгарироқ инсоф керак.

— Хўш, хўш?

— Нима қиласиз гап ковлаб! Ундан кейин, бу гаплар ҳам орага совуқчилик солса солар-ку, лекин менинг кол-

хозга кириш ниятим совуқчилликни аллақачон солиб қўйган.

— Шундок бўлса нима қиласиз кириб? Кирманг!

Сидиқжон нималар демоқчи бўлиб икки-уч оғиз ростлаганидан кейин Ўрмонжоннинг гапи ёсига тушиб:

— Одам дунёга чўчқадай семиришу, битдай болалаш учун келмайди,— деди.

Зуннунхўжа унга ялат әтиб қаради.

— У нима деганингиз?

— Одамман деганим!— деди Сидиқжон Зуннунхўжанинг кўзига қараб.

— Сизни ким одам өмас деди?

— Мендан юз ўғирган бутун ёр-дўстларим, ўртоқларим, ёси бор одамнинг ҳаммаси айтади.

— Биз одам деб юрар әдик, ёсимиз йўқ өкан-да?

— Сизда бор эс ҳеч кимда йўқ. Эшакни яйдоқ миниб бўлмайди — йиқилади киши. Сизнинг одамсан деганингиз — менга тўқим урганингиз!

Зуннунхўжа ёлғондан қаттиқ кулди.

— Бундан чиқдики, биз золим бою сиз батрак өкан-сиз-да?

— Батракнинг ери бўлмайди. Сиз ер Сидиқжонники дедингиз-ку.

— Бўлмаса кимники?

— Меники, Одамсан деганингиз шу-да.

— Ер сизники деганимиз сизга тўқим урганимиз бўладими ҳали?

— Йўқ, тўқим уриб қўйиб, тўқим сеники деганингиз бўлади.

Зуннунхўжа не мاشаққат билан илжайди.

— Саводингизни анча чиқариб қўйишиптими?

— Ким?

— Билмасам. Домлангиз. Домлаларингиз.

— Менинг домлам йўқ, домлам — икки кўзим.

Зуннунхўжа нима дейишини билмай, бошқа йўлга ўтди.

— Қўйинг, Сидиқжон, бу гапларни қўйинг, ярашмайди... Бунақа хафачилик билан бўладиган ишга мен ҳам рози бўлмайман.

Сидиқжон бу ниятидан қайтмаслигини қандай қилиб икки оғиз гап билан айтишини ва шу билан гапнинг чўзилишига барҳам беришини билмай ўйланиб қолди. Зуннунхўжа унинг жим қолишига ўзича маъно бериб «рози эмасман деган гапни илгарироқ айтсан нима экан» деб ўйлади ва рози бўлмаслигининг оқибатини кўрсатиб писанда қилиш, шу билан Сидиқжоннинг тилини узил-кесил боғлаш учун:

— Болангиз бор! — деди.

— Яна нимам бор? — деди Сидиқжон, худди унинг жавобини қулоғи билан эмас, кўзи билан әшитадигандай, кўзларини катта очиб.

Сидиқжоннинг бу важоҳати Зуннунхўжанинг ўйини пучга чиқарди. У ҳозир курашда рақибини ёнбошга олиб отган, лекин рақиби тикка тушиб, ўзини ёнбошга олган кишининг аҳволига тушиб қолди; ўзини тездан ўнглаши ва шу ондаёқ ташаббусни яна қўлига олиши керак әди, шунинг учун Сидиқжондан баланд келишга тиришиб, жаҳл билан:

— Яна нима керак? — деди.

— Яна нимам бор?

— Кирмайсиз колхозга!

— Кираман!

— Кирмайсан!

— Кираман!

— Аҳмоқ!

— Аҳмоқ бўлмаганимда, шу аҳволга тушармидим!

— Галчани иззат қилсанг, чориги билан тўрга чиқади.

— Галча бўлмасам тўпимдан айрилармидим. Айрилганни бўри ер, дейдилар.

— Мен бўри бўлдимми?! Ит!

— Қуллуқ!. Биз ит бўлсак бўйнимиздаги тилла занжирингиз ўзингизга: янгичасига айтганда, мен қизингизни хоҳламайман, эскичаси керак бўлса — уч талоқ қўйдим!

Сидиқжон этагини қоқиб ўрнидан турди-ю, жадаллаганича кўча әшигига қараб кетди.

Зуннунхўжа ҳам, можарони дарчадан кузатиб турган кампир ҳам бу гапларнинг оқибати шундай бўлишини сира кутмаган эди. Зуннунхўжа шундай гандидики, нима бўлганини тушунолмай қолгандай, қизига қаради. Кампир беихтиёр «Шарофат!» деб юборди. Шарофат отасининг қарашидан ҳам, онасининг «Шарофат» дейишидан ҳам фақат бир маъно англади: иккови ҳам «қайтар» демоқчи эди.

— Тўхта,— деди Шарофат ўрнидан туриб,— кетадиган бўлсанг болангни олиб кет!

Сидиқжон тўхтади, хотинининг товушини әшитганида «болангни олиб кет» дегани әмас, унинг сенсирагани қулоғига кирди. Уни шу лаҳзагача ҳам бу уйга боғлаб турган бир нима бор әкан шекилли, хотини сенсирагандан кейин ҳеч нарса қолмади.

— Нима дединг? Болани олиб кетайми?

Сидиқжон унинг жавобини кутмасдан тўғри келди-ю болани беланчакдан олди ва бағрига босганича кўчага чиқди кетди.

Шарофат гаранг ҳолда аввал отасига, сўнгра онасига қаради; булардан бирон садо чиқмагач, оёқяланг ва бошяланг, Сидиқжоннинг кетидан чопди. Сидиқжон болани ҳамон бағрига босганича кўчанинг ўртасидан жадаллаб борар эди.

— Тўхтанг! Тўхтанг дейман!

Сидиқжон тўхтади, орқасига қаради.

— Нима дейсан?

— Беринг болани бу ёққа! Беринг бу ёққа!

Шарофат юрганича келиб болани Сидиқжоннинг қўлидан тортиб олди. Бола ингради. Шарофат болани олиб дарвозадан кириб кетгач, Сидиқжоннинг юраги «жив» ётди, кўзига келган ёшини тез-тев киприк қоқиб ютди-да, секин бурилиб, анча ергача бошини қўйи солгани ҳолда битта-битта қадам ташлаб борди, кейин жадаллади.

4

Сидиқжон Баҳрободга кечки пайт — пастқамликлардан, қалин дараҳтзор ва адир ораликларидан бошлангац шом қоронғиси борлиққа тарқала бошлагандан кириб келди. У мана шундай кечки пайтларда ҳамма вакт негадир умрини хазон бўлган ва шу хазон бўлган умрини гаридикда ўтказгандай сезар, юраги сиқилиб тарс ёрилиб кетгудай бўлар эди. Бироқ унда ҳозир бундай кайфиятдан асар ҳам йўқ, аксинча, болалиги ўтган қишлоқнинг одам сийрак кўчалари, тепаликдаги бақатерак, аллақаёқда бузоқ маъраши, анқиб кетган пиёздор ҳиди, чумчуқларнинг инга кириб кетар олдида чирқираши — ҳаммаси унга қачондир жуда-жуда ширин ўтган ҳаётини эслатаётгандай бўлди.

Ҳовлидаги кекса тутга чироғ шуъласи тушиб, унда нотайин бир кўланка кезар, ичкаридан «ширт-ширт» ётган товуш эшитилар эди. Сидиқжон әшикни қокқанда Хадича холанинг:

— Ким у?! Обиджон, қара! — деган товуши эшитилди-ю, ҳаял ўтмай, ўзи келиб әшикни очди.

Хадича хола ўғлининг келишини кутмагани учун гаранг бўлиб қолди; Сидиқжон ичкарига қадам қўйгандан кейингина ўзига келиб уни қучоқлади, йиглаб юз-кўзидан ўпди; сўнгра, шошиб-пишиб неварасини, келинини,

қудаларини сўради. Сидиқжон унинг ҳамма сўроқларига бир хилда қисқа-қисқа жавоб бериб, ўзидан ҳол-аҳвол сўраб илгари юрди. Ҳовлида қуртга барг қирқаётган укаси Обиджон новдалар орасидан ўқдек отилиб чиқиб унинг бўйнига осилди ва «акажон!» деб шундай қичқордики, аллақаерда ётган хўроз қақоқлаб юборди. Ҳадича хола, одатдагича, кеча ва ундан илгари қандоқ тушлар кўргани, бу тушларга кимлар қандай таъбир айтгани, ҳамманинг таъбиридан яна ўзининг таъбири тўғри чиққани, яъни Сидиқжоннинг келишини билганлиги тўғрисида тинмай жовраб супага қизил шолча ва янги лас кўрпача солди; қозон осилган ўчоқнинг олдига қумғон қўйди; сўнгра яна келинини, неварасини, қудаларини сўради. Обиджон акасининг ёнида ўтириб нима қилишини, нима дейишими билмас, дам-бадам унинг елкасини ушлар ва илжаяр эди.

Овқат устида Ҳадича хола қишлоқда бўлиб ўтган ҳамма катта-кичик ҳодисалар тўғрисида гапириб берди. Ўрмонжон Капсанчилар қишлоғидаги «Қўшчинор» колхозига партия ташкилотчиси бўлиб кетибди; колхозга Сидиқжоннинг холаваччаси Сатторқул раис бўлибди ва унинг хотини бирданига учта турибди, бу тўғрида газетада хабар чиқибди. Комилнинг ўғли ота-онасини Тошкентта кўчириб кетибди; қишлоққа Йўлдош ота Охунбобоев келиб кетибди...

— Охунбобоев суратларига ҳеч ҳам ўхшамас әканлар,— деди Ҳадича хола.

Обиджон бунга қўшилмади:

— Нега, ўхшайдилар-ку,— деди.

— Юзлари ўхшаса ҳам ўзлари ўхшамас әканлар. Мажлис қиласидилар, ваъз айтадилар дейишди. Ҳаммамиз бордик. Мажлис ҳам қилмадилар, ваъз ҳам айтмадилар; колхозни яхши қилиш тўғрисида йўл-йўриқ кўрсатиб бир соатча гапирдилару, кейин бошқалардан гап сўрадилар. Ҳамма гапирди.

Обиджон, худди бирор қитиқлаётгандай, қикирлаб;

— Сатторқул акамни бопладилар,— деди.

— Ҳа, раисни бопладилар. Сатторқул чиқиб «ундоқ қиласмиз, бундоқ қиласмиз» деб аравани қуруқ олиб қоча берган әди. Охунбобоев «қисир сигир кўп маърайди» дедилар. Бирам кулги бўлди. Сатторқул бирам уялди... Йўқ, колхознинг иши бу йил яхши бўлди. Сатторқул янги раис бўлса ҳам, шошмасдан кўкламни тизгинлаб олди... Ҳа, айтгандай, бу қуртни сўрамайсан... Сатторқул баҳорда қари-қартангларни йигиб, «бекордан ҳамма бе-зор, ҳеч бўлмаса бир қутигина қурт тутмайсизларми?» деди. Ҳамма кўнди. Етти киши бўлиб тўрт қути олдик. Омадимиз келган эканми, ё қурт тутишни соғиниб қолган эканмизми — бирам бўлиб берди, қани әнди териб тамом қилолсак? Ҳар қутидан етмиш саккиз килодан пилла чиқса бўладими. Сатторқул дарров районга маълум қилипти, райондан икки киши келиб ҳаммамизни кўрди, ўтқизиб қўйиб сўроқ қилди: суратларингни оламиз дейишиди. Кула-кула ўлибмиз. Қумринисо ўлгур «буришган, тиришган башарамизни кўргани ким ҳиқиллаб турган экан» деб қочиб кетди. Ҳеч қайсимиз ҳам олдирмадик. Лекин олиб кетди дейишиди... Колхоз мукофот берди. Ҳа, айтгандай, райондан ҳар қайсимизга бир кўйлакликдан атлас юборишиди. Роҳилабуви ўлгур, тикиб кийиб олса бўладими! Қари нарса... Бирам хунук кўринар экан. Мен уришсам, «умримда атлас киймаган әдим, етказганига шукур» дейди. Ҳар хил одам бўлади... Ҳа, айтгандай, бу иккинчиси... бир йилда икки марта қурт тутаётибмиз. Мана, бўлар экан, ўғлим, илгари билмас эканмиз. Лекин буниси унча ҳосил бермайди дейишиди. Агроном алланаси алланима бўлди депти. Ҳар қалай колхозга оламжаҳон пилла бердик. Яна берамиз. Анча нарса олдик. Мана, тўртта кўрпа, иккита якандоз қилдим. Қишлигимизни ҳозирдан ғамлаб олдик. Кийим-кечагимиз бўлди. Сенга

бир жўра беқасам олиб қўйдим. Ўша атлас ҳам турпти.

Сидиқжон пиёлага қараб-қараб тез-тез чой ҳўплар экан!

— Сотмабсиз-да, сотиш керак әди,— деди.

— Зориққанимиз йўқ, болам. Беш-үн танга пул ҳам орттириб қўйдим. Зориққан вақтимизда колхоз қарашган әди, қарзимизни уздик. Мен айтаман, болам, қўлимдан шунча иш келар экан, даданг ҳаёт вақтида нега «берсанг ейман, урсанг ўламан» деб ўтирган эканман! Сатторқул Обиджонга битта яхши этик берди. Бор, ўғлим, этигингни олиб чиқ, аканг кўрсин.

Обиджон этигини аллақачон олиб чиқкан әди, якта-гининг әтаги билан секин, худди синиб қоладигандай авайлаб артиб акасига узатди ва чироғнинг пилигини кўтариброқ қўйди. Сидиқжон этикни чироққа солиб устини, ичини кўрди. Обиджон унинг остига чертиб кўришини ҳам хоҳлар әди.

Кампир ўзининг тириклиги тўғрисида сўзлар экан. Сидиқжон, гарчи онасининг қийналмаганлигига хурсанд бўлса ҳам хижолат тортар, Зуннунхўжанинг уйидан чиқиб кетиши билан бир оз босилган алами тобора авж олар әди.

Хадича хола буни пайқамай, Сидиқжонни чарчаган гу-мон қилиб, дарров ўрин солиб берди.

5

Сидиқжон оилавий можаросини онасига ҳозирча айтмоқчи әмас әди, буни кайфиятидан ёки бирон гапидан билдириб қўймаслик учун эрталаб чойдан кейин ёр-жўраларини кўриб келиш баҳонаси билан уйдан чиқиб кетди; болалиги ўтган кўча, тор кўчаларни, қумлоқ анҳор бўйларини, сигир боқсан жойларини бориб кўрди; бу жойларни

ҳазин бир қўшиқни хиргойи қилиб кезар әкан, назарида, кўп замондан бери кўкрагида қатма-қат бўлиб ётган дард-ҳасрати шу қўшиқ билан чиқиб кетаёттандай бўлар эди.

У уйга хийла таъби очилиб қайтди. Кун оғиб, супага соя қайтган эди. Сидиқжон супага чўзилар экан, тутнинг каллагига қистириб қўйилган тунука печкани кўриб қолди.

— Ўҳў,— деди кулиб,— печка қўйганмидиларинг?

Хадича хола ҳам кулди.

— Ҳа, болам, Обиджонинг-да... Сатторқул аканг уйни янги турмуш қилди: оқлатди, дарчанинг ўрнига дераза қурди, печка олиб кирди. Қишлоқ одамига бирор бир нарсани бошлаб бермасин! Уни кўриб яна уч-тўрт киши ҳам шундоқ қилди. Обиджонинг шуларга таъсип қиласман деб мени хўп куйдирди-да! Бир куни қарасам дарчани бузаман деб болта кўтариб келаётитти. Ҳай-ҳайлаб болтани қўлидан зўрға тортиб олдим. Яна бир куни токчаларни шуваб ташлаймиз деб ўртоқларини бошлаб келипти. Косовни олиб бир қувдим. Қувишга қувдиму, ҳали-ҳали ичим ачииди: бола бечора нима гуноҳ қилипти? Кўрипти, ҳавас қилипти, ёмон нарсани ҳавас қилмапти. Янги турмуш уйни ким ҳавас қилмайди. Печка қураман деди, майли дедим. Қурдик. Қиши билан бекор турди, икки марта овқат пинширдик, холос, бошқа ёққанимиз йўқ. Сатторқул аканг уйни тузаттириб бермоқчи. Майли, ўшандада дераза ҳам қурсин, оқлатсин ҳам, токча жиннига ёқмаса шуватиб ташлай қолсин.

Кечқурун Сидиқжонни кўргани болалигидаги ўртоқларидан бири келди. У ўртоқ кўргани әмас, зўро баҳтсизликка учраган кишидан кўнгил сўрагани келган одамга ўхшаб гапирав әди. Гап қовушмади. Нимадан гап очилмасин, икки оғиз савол-жавобдан нарига ўтмади.

У кетгандан кейин Сатторқул келди. Сидиқжон уни

яқин икки йилдан бери кўрмаган эди. У Сидиқжон билан қўл учida сўрашиб:

— Хўш,— деди,— ишларинг қалай? Ҳеч келмайсан? Ичкуёв бўл, эвига бўл-да. Ё хотининг қўймайдими? Қўймаса айтмайсанми: сен менинг хотиним бўлсанг, мени хотин оладиган ўғил бола қилиб туқсан онам ўша ерда демайсанми?

Сатторқул шундоқ деди-ю, бу мавзуда ортиқ гапириши истамади шекилли, кампирга мурожаат қилди:

— Сидиқжон борида уйни тузатиб ола қолайлик, ўзи бош бўлсин,— деди.

Кампир ер остидан Сидиқжонга қаради.

— Фурсати бўлса майли...

Сатторқул лабидаги табассумини яшириш учун мўйловини бурар әкан:

— Фурсатинг борми, қайнатангдан, Зуннунхўжадан ёўраб келганимисан?— деди.

Сидиқжон қизариб кетди. У Сатторқулнинг таънадашномига жавобан сўнгги вақтларда ўз ҳолатини англаганини, шу сабабли Зуннунхўжа оиласидан буткул чиқиб кетганини, ўтган умрига афсус қилиб, ҳаётини бошқатдан бошлашга бел боғлаганини айтмоқчи бўлган эди, лекин бир нарсани андиша қилиб қолди: «ҳозир шундоқ десам мени масхара қилиб кулмасмикин?» деб ўйлади, шунинг учун эшитилар-эшитилмас:

— Менинг хўжайиним йўқ,— деб қўя қолди.

— Шундоқми?— деди Саттороқул калака оҳангода, лекин Хадича холанинг «бас, қийнама» деган мазмунда ёз қисишини кўриб, бошқа гапга кўчди.— Мен хисоблаб кўрдим, икки юз йигирма беш сўм чиқим бўлар әкан, колос.

— Ҳа, шунчалик гап әкану,— деди кампир,— шу вақтгача қилмаганимизни қара-я! Шугина чиқим билан бўлар әкан-ку!

— Шу вақтгача чиқимдан қўрқиб қилмай юрганимидингиз? — деди Сатторқул, — йўқ, гап чиқимда әмас. Шу дарча ҷолингиз ҳаёт вақтида ҳам қийшиқ әди, шуни тўғрилаб ўрнатгани пул керакмиди? Йўқ, пул керак әмас, кўчириб олиб бошқатдан ўрнатилса бўладиган гап әди.

— Ҳавсаласизлик,— деди кампир.

— Йўқ, холажон, ҳавсаласизлик ҳам әмас. Соҳибжон акам раҳматалик ҳавсаласиз одаммидилар? Йўқ! Ўрмонжон акамнинг бир гаплари сира-сира әсимдан чиқмайдиг: ҳамма иллат камбаражчиликда! Ўйинг куйгур бу камбағалчилик одамнинг ёруғ дунёдан бўлган умидини кемириб, зангдай еб ташлар әкан. Ёруғ дунёдан умидинг бўлмагандан кейин, дарчанг қийшиқ турди нима бўлдию, тўғри турди нима бўлди. Бунаقا нарсалар ҳаммаси дидга, орзу-ҳавасга боғлиқ. Дунёдан умиди бўлмаган одамда дид ҳам, орзу-ҳавас ҳам сувга уриб кетар әкан.

— Рост, болам, ҳақ гап.

— Ҳозир ҳам камбағалмиз,— деди Сатторқул давом этиб,— лекин бу камбағалчилик ёруғ дунёдан бўлган умидимизни әмас, ёруғ дунёдан бўлган умидимиз бу камбағалчиликни еб, кемириб ташлаётитпи. Шунинг учун одамларда дид, орзу-ҳавас бош кўтараётитпи. Тинчлик-омонлик бўлса, бир кун келиб, янги данғиллама иморатлар солиб ҳам, ҳозиргидай, «шунчалик гап әкан-ку» деймиз... Ҳўп, гап шу бўлмаса, Сидиқжон, ўзинг бош бўлиб тезроқ битириб олинглар.

Сатторқул кетди.

У кетгандан кейин Сидиқжон, ортиқ тоқат қилолмай онасига ёрилди, воқеани айтиб:

— Зуннунхўжанинг уйини елкамнинг чуқури кўрсин,— деди.

Бу гапни әшитиб, Ҳадича холанинг бошидан рўмоли тушиб кетди.

— Ўғлим, жон ўғлим,— деди ҳўплаган чойини «қилт»

әтиб ютиб,— нега бундоқ қилдинг? Үғлингни тирик етим қилма. Боланд туфайли ҳар қанча оғирчилик бўлса устингга ол. Бу қарз, болангдан қайтади.

— Мен аввал қарзимни узиб, кейин қарз бермоқчиман.

— Бу нима деганинг?

— Сиздан қарзимни узиб, кейин боламга қарз бермоқчиман.

— Йўқ, болам, мен сендан ўла-ўлгунча розиман. Мен тўғримда энди ташвиш тортмасанг бўлади. Мана, кўп қатори колхозда ишлаб турибман. Колхоз ҳам қатордан қолдирмай қарабиб турипти. Сен кўпроқ ўзинг тўғрингда, үғлинг тўғрисида ўйла, болам. Сизлар яшайдиган замон өнди келади. Мен бўлсам теракнинг учидаги оғтобдай гап; ҳазир борман, бирпасдан кейин йўқ.

Шу пайтда тўсатдан кўча эшиги тарақлаб очилди-ю, Зуннунхўжа ҳаллослаганича кириб келди. Сидиқжон бошини қуёйи согланича ўтириб қолди. Ҳадича хола уни қаршилагани югурди. Зуннунхўжа унга эътибор қилмай, ақлдан озган бир қиёфада тўғри Сидиқжоннинг олдига келди.

— Ўйимга ўт қўяман! Ўзимни осаман! Үғлим, жон ўғлим, мен сизни шу умид билан ўғлим деганимидим?

Сидиқжон пойгакка бир оз силжиб, уни тўрга таклиф қилди.

— Қани... юқорига...

— Йўқ, юринг, ўғлим, бас! Bas!..

Сидиқжон унинг кетида турган онасига қаради. Ҳадиша хола «хўп дегин, бор!» деб боши билан қайта-қайта ишора қилди. Сидиқжон ерга қараб:

— Чакки овора бўлибсиз... Сиз овора бўлманг деб «уч талоқ» деган эдим. Йўл йўқ. Шариат йўл бермайди,— деди.

— Йўл бор, ўғлим, шариат йўл беради. Уч талоқ деб

ўзига айтганингиз йўқ, менга айтдингиз. Ўзига айтсангів йўл йўқ әди.

Орага **Хадича** хола тушди. Ниҳоят, Сидиқжон ҳозир әмас, бир-икки кундан кейин борицгага ваъда берди.

Кампиринг қисташига қарамай, Эзуннўнхўжа ўтирма-ди, кетди.

— Болам,— деди **Хадича** хола узоқ жимликтан сўнг,— борасанми?

Сидиқжон илжайди.

— Кўр ҳассасини бир марта йўқотади!

— Колхозга кирасанми?

Сидиқжон чуқур хўрсинди.

— Сатторқул акам рўйхуш бермаяптилар-да...

Хадича хола хийла ўйланиб тургандан кейин:

— Гап битта Сатторқул акангда әмас, болам,— деди,— сенга ҳозир ҳеч ким ҳам рўйхуш бермас.. ески ўртоқла-рингдан айрилгансан, янги ўртоқ ортиrolмадинг... Элдан қолгунча эрдан қолган яхшироқ деб шуни айтса керак-да. Бу колхозни ҳозиргидай колхов қилгунча одамларнинг эси кетди. Тайёр ошга баковул бўламан десанг ҳамманинг ҳам кўзига хунук кўринасан. Кўзинг кеч очилди, болам, жуда жуда кеч очилди.

Сукут қилиб қолган Сидиқжон бирдан бошини кўтарди.

— Энди ҳамма умидим Ўрмонжон акамдан. Ўрмон-жон акамни қора тортиб бораман. У киши билан кейинги марта кўришганимда менга жуда қаттиқ гаплар гапиргандари өсингивда борми? Агар менга ичлари ачимаса ўша гапларни гапирмас әдилар.

— Майли, ихтиёринг... Ишқилиб пешонанг очилсин.

Сидиқжон онаси кутгандан ҳам ортиқроқ гайрат қилиб ҳаш-паш дегунча ёғоч, сомон, бўйра, тахта ва бошқа нарсаларни ташиб олди ва тездан уста солди. Қора ва қийшиқ дарча ўрнида Сатторқулники сингари қизил

деразани кўриб, орзуси ушалган Обиджон унинг остидан нари кетмас, дам-бадам ойнасини артар, ичкаридан ҳовлига худди янги бир оламни томоша қилаётгандай, зўр мароқ билан қарап әди.

Сидиқжон икки кундан кейин сафар ҳозирлигини кўриб, тушга яқин йўлга чиқди. Хадича хола болалик чоғидаги сингари унинг белига нон туғиб берди, пешонасидан ўпди, дуо қилди; ирим қилиб ўзи кузатгани чиқмади.

— Жон болам,— деди ҳовлининг ўртасида туриб,— хат юборгин, бизни хавотир қилма. Шукур, эл қатори әшигимиизга номер қоқилган. Ҳар қаердан бир юзу олтмиш учинчи деб хат ташласанг келади. Аҳмадалининг уйи бир юзу олтмиш саккизинчи. Унга ўғлидан ҳар ҳафта хат келади.

Уни Обиджон қишлоқнинг чиқаверишигача куэатиб қўйди. Обиджон бу можаролардан бехабар бўлса ҳам, акасининг бу кетиши илгариги кетишларидан әмаслигини сезар әди, шунинг учун хайрлашганда йиғламади.

6

Сидиқжоннинг нияти шу кетишда ҳеч қаерда тўхтамасдан тонг отгунча юриб бўлса ҳам Капсанчиларга бориши, тақдиридан шикоят қилиб Үрмонжонга зор-зор йиғлаш, ўшанинг қаноти остида ўз тўпига яна қўшилиш учун тинмай, ишдан ишни фарқ қилмай, жон-дили билан меҳнат қилиш әди. У ярим кечаси Бешсерка қишлоғига кириб борди.

Бешсерка қишлоғи маст уйқуда, фақат аллақаерда трактор тарилларди. Сидиқжон катта йўлдан анча четда, каттакон паҳмоқ бир дараҳт остида миљиллаб турган чироққа томон бурилди. Бу — қизил чойхона экан. Самовар ётган, бир чол чойнак-пиёла артар, ҳовуз бўйидаги

супада. кимдир хуррак отиб ухлар өди. Сидиқжон чолға салом берди. Чол унга қарайман деб қўлидаги чойнакни тушириб юборди. Чойнак синди.

— Қўл майиброқ, ўғлим, қўл майиброқ,— деди чол Сидиқжонни хижолатдан чиқариб,— мана шу ўнг қўл карахт. Ўнг оёқ ҳам... Келинг, ўғлим. Бемаҳалга қолибсиз?

— Ҳа, Капсанчиларга деб йўлга чиққан әдим. Баҳрободдан келаётисман.

Сидиқжон яна йўлга тушиш нияти борлигини айтмаса ҳам чол bemaxalda Капсанчиларнинг тўқайидан ўтиш хатарли эканини айтиб, бу кеча шу ерда қолишини, өрта саҳар йўлга чиқишини маслаҳат берди. Сидиқжон ичида хўп суюнса ҳам, ўзини чолнинг сўзини иккита қиласмилик учунгина қолаётган кўрсатишга тиришди: чол ўрин солиб бергандা ҳам анчагача бир пой өтигини ечмасдан ўйланиб ўтириди.

— Ечинг өтигингизни,— деди чол ўзиға ўрин солаётуб,— өрталаб барвақт уйғотаман. Бемаҳалда асти йўл юрманг. Сиздай йигитлик чоғимда бошимга бир кулфат тушди. Бувайдадан чиқиб, сиздай, bemaxalda қолдим. Saҳarga яқин Аччида кетаётган әдим, рўпарамдам йўлбарс чиқиб қолса бўладими! Толнинг тагида отиўлакда ётипди... Сочларим тикка бўлиб, өтларим жимиrolashiб кетди. Қайтай десам — қувади, ўтиб кетишининг сира ҳисоби йўқ. Турнир қолдим, билмадим, қанча турдим экан. Йўқ, толимгина, нариёқдан арава келиб қолди. Кейин билсам йўлбарс-пўлварс йўқ, ойдинда толнинг сояси экан. Қўрқмайман деб бўлмайди, ўғлим, шунаقا вақтда одамнинг юраги қинидаи чиқиб кетади. Чироқни ўчирайми?

— Майли,— деди Сидиқжон ва анчадан кейин сўради:— Тагингиз бувайдаликми? Уша бувайдалик Саидаҳорр әшон ўн бир яшар қизни булғаган, шарманда бўлишдан қўрқиб уни бўғиб ўлдирган экан; бир эшитдикки

қочипти деб, бир эшитдикки қўлга тушипти деб, шу нима бўлди экан? Ҳабарингиз йўқми?

— Саидаҳрор эшон? Саидаброр юзбошининг укасими? Бу воқеадан хабарим йўқ. Бувайдадан чиқиб кетганимга йигирма йилдан ошгандир, кўп ҳам бўлгандир. Ҳали айтдим-ку, Аччида кетаётib кўзимга йўлбарс кўринди деб, шу кетганимча қайтиб борган эмасман.

— Шунақами?

Чол ечиниб кўрпага кирди, анчадан кейин жавоб берди:

— Ҳа, Бувайданинг суви менга ҳаром бўлган эди. Хотин важидан.

— Хотин важидан? Хотинингиз ёмонмиди?

— Яхши хотин эди,— деди чол хўрсиниб,— бунинг воқеасини айтиб берса́м, тоңғ отгунча ҳам тугамайди. Бирор ёзса катта китоб бўлади.

— Яхши хотиндан ҳам одам қочадими?— деди Сидиқжон қизиқиб.

— Замона шум бўлгандан кейин шундоқ бўлар эканда! Расми, ёмон хотиндан қочилади, замона шум бўлса, яхши хотиндан ҳам қочар экан киши. У аввал акамнинг хотини эди. Акам, ҳали айтганим, Саидаброр юзбошининг хизматкори эди. Юзбошининг мол-дунёси бениҳоят кўп, кечалари уйини ўн иккита мерган қўриқлар эди. Уни «чилон» ҳам дейишар эди, билмадим, ўша вақтда нимага «чилон»¹ экан. Кунлардан бир кун мана шу уйини қуппа-кундуз куни — намозгар пайтида ўғри босди. Бу ўғрилар қизиқ: «Ойда, йилда бир келган меҳмонидан айрилмасин» деб ашула айтишади, «юзбошини ўғри босди, кела бер» деб бақиришади. Эрталаб эшитсак қўриқчи мерғанлардан биттаси ўлипти. Юзбошини галати қилишипти

¹ Ч и л о н — русча член, бирон ҳиссадор ширкатнинг аъзоси.

бир сандиқ тилласи бор экан, олиб чиқиб олдига қўйишипти, «еганингча егин, қолганини олиб кетамиз» дейишипти. Юзбоши еганича епти, ютолмай қолганидан кейин ўғрилар оғзиға зўрлаб тиқишипти.

Сидиқжон кулди.

— Ҳаммасини сизларга тутдим деса ўлар эканми?

— Ундоқ дейдиган одам эмас эди-да. Ҳулласи ит азобида ўлипти. Эртаси шаҳардан саллот чиқиб кўп одамларни, шулар қатори акамни ҳам ҳайдаб кетди. Қишлоқда «бу одамларни сўроқ қилгани ярим поишшонинг ўзи келар өмиш» деган овова тарқалди. Бир йил ўтди. Бир куни маҳалламизнинг элликбошини шаҳарга бориб келиб «аканг осилди, ўз кўзим билан кўрдим» деди. Азасини ўтказдик. Орадан бир-икки ой ўтгандан кейин волидамизга келин «элликбоши менга кўз тиккан, насибам ўшанинг насибасига қўшилган бўлса ўзимни ҳовузга ташлайман» деб йирапти. Ростдан ҳам сал вақт ўтмай, элликбоши барала киши қўйди. Келин совчи хотинларни ҳайдаб юборди. Энди унга ҳам қийин-да, ёш умри ўтиб кетаётитпи. Волидамиз шундай яхши келинни қўлдан чиқаргани кўзлари қиймади. Акамдан бир қизчаси ҳам бор эди. Нима қилиш керак? Расмимиз қурсин... мен никоҳлаб олдим. Яқин тўрт ойча умр қилдик. Умримда хотин кўрганим ҳам шу... Мен Абдурашид пахтафуруш деган бойнинг аравасини минар эдим. Бир куни пахта ортиб шаҳарга кетаётсам, Учкўприкда бир ошнам учраб «э, аканг тирик экан, шаҳарда кўрдим, келаётитпи» деб қолди. Акам — жигарим! Суюнаман! Лекин... энди унга қайси бетим билан рўпара бўламан!

— Хижолатлик бўлади, лекин акангиз хафа бўлмаса керак эди.

— Ана шу хижолатликни айтинг! Отдан шундай ўзими ни ташладиму, орқага қайтдим. Уйга ҳам қирмадим. Шу кетганимча кетдим. Ҳали йўлбарс тўғрисида гапирдим-ку,

шу ерга келтанимда қарасам Аччида кетаётнибман. Энди акам нима қилипти денг: Учкўприкка келганида бирор «хотинингни уканг никоҳлаб олди, уйга бормай қўя қол!» деган экан, у ҳам йўлни бошқа ёққа солдириб кетипти. Волидамиз бедом-дарак жетган икки ўғлининг дард-фироқида куйиб, ётиб қолиптилар. Акам шўрлик ўша келишида Сибирдан қочиб келган экан, қўлга тушадиган бўлганида «менинг сибири бўлишим шунчалик зарур бўлса қуруқ бўлмасин, бир гуноҳ қилай» деб, ушлаб бермоқчи бўлган аминнинг кўкрагига бир калла уриб ўлдирипти.

Сидиқжон ўрнидан туриб ёнбошлади.

— Сиз бу гаплардан бехабарсиз-да, албатта.

— Ҳа, кейин өшитганман. Ўша ийли баҳоргача ҳар қаерда ризқимни териб еб, баҳорда Авлиёотага кетиб қолганман. Акам яна авахта бўлгандан кейин ҳалиги әлликбоши мени ҳам «ўлди»га чиқариб, хотинга совчи устига совчи қўяверипти, ахири пўписа ҳам қилипти.

— Шунақа чиройли хотинмиди?

— Энди, эс-ҳуши жойида, қадди-қомати келишган, тан-жони соғ, куч десангиз битта ман-ман деган йигитнинг ишини баҳазур қиласидиган хотин әди-да. Элликбоши унинг ҳуснига маҳлиё бўлипти дейсизми, унга беминнат хизматкор керак... Шунақа қилиб, қарасак, әлликбоши қўймайдиган, юртнинг оғзи каттаси бўлганидан кейин ҳар нима қилиш қўлидан келади, «Майли, тегсам тега қолай, лекин бир шартим бор: шартим шуки, мен қизимни ўгай отанинг уйига олиб бормайман, отасидан қолган ҳовлини сотиб, шунинг пули билан бирон қариндошимга топшираман; агар хўп десалар, тузукроқ пул бериб ҳовлини олсин-лар», депти. Бунақа шарт әлликбошига албатта хуш ёқади-да! Дарров ҳовлини ўв баҳосидан анча ортиққа олипти. Хотин, бошқа нарсаларини ҳам сотиб тап-тайёр бўлиб турган экан, волидамиз билан қизини олиптию бир кечада зим-ғойиб бўлипти қолипти. Элликбоши у ёққа от

чоптирипти, бу ёқقا от чоптирипти — йўқ! Хотин ўз қишлоғига — элликбошининг қўли етмайдиган Найманга кетган экан. Найман Капсанчиларнинг этагида. Орадан яқин икки йил ўтгандан кейин Авлиёотага Бувайдадан бир одам бориб қолди. Ўшандан бу воқеаларни эшишиб, келиш ҳаракатига тушдим. У замонда, ўғлим, бизга ўхшаган одамларнинг тўрт танга орттириши қийин эди. То беш-тўрт танга орттириб йўлга чиққунимча яна уч-тўрт ой ўтди. Келдим. Келиб суриштирсам хотин Фармонқул деган бир кишига тегипти. Бу киши Капсанчилар қишлоғидан экан. Мен Авлиёотага жетмасимдан бурун шу атрофда мардикорчилик қилган эдим. У вақтда ўша Наймандан тортиб то Мирзаоролгача дарё бўйидаги ерларнинг кўпи Абдувақъос эшон, Шокиржон бойвачча, Абдусамад қори, Тангриқул ҳожи деган бойларга, бутун қишлоққа дарёдан сув чиқарадиган водокачкалар алланима деган князга қарап эди. Дарё бўйида князнинг каттакон боғи бўлиб, князъ ҳар йили баҳорда бола-чақаси, ўн саккизта ити билан келиб, кузакда кетар эди. Мана шу бойларнинг ерларини әгадиган деҳқонларни капсанчилар дейилар эди. Қишлоқнинг оти ҳам шундан чиқкан. Булар очдан ҳам ўлмайдиган, қорни ҳам тўймайдиган қул қатори одамлар эди. Капсанчилар деганининг маъноси шуки, ҳосилдан бойлар ерининг ҳақини, князъ сувининг ҳақини олгандан кейин пешона тери тўккан деҳқонга капсан қатори бир нарса қолар эди, холос. Хўш... Нима деёпган эдим?

— Хотин теккан киши Капсанчилардан экан.

— Ҳа, Фармонқул Капсанчилардан экан. Тўғри уйига боргани истиқола қилиб, бир болани юбордим. «Мен фалончи бўламан, онамни олиб кетгани қелдим» дедим. Такяда ўтириб энди битта чой ичиб бўлган эдим, қотмагина бир йигит келиб: «Қурбон ака сиз бўласизми?» деди. «Ҳа, мен бўламан» деган эдим, сўрашди. Фармонқулнинг ўзи экан, йўқ деганимга қўймасдан ҳовлисига судради.

Ҳовлисига судрашидан, «менинг ким әканлигимни бил-
мас әкан, хотин яширипти» деб ўйлаган әдим. Йўқ, билар
әкан: йўлда «энди хафа бўлмайсив, тақдир шу әкан» деди. Ҳовлиси дарё бўйига яқин Қўғазор маҳалласида әкан.
Мени тўғри уйига бошлаб кирди. Волидамиз бетоб ётган
әканлар, мени кўриб ҳушдан кетдилар. Ўзларига келиб
кўзларини очганларидан кейин Фармонқул она-болани
холи қўйиб чиқиб кетди. Бўлиб ўтган ҳамма воқеани воли-
дамиз йиғлаб-йиғлаб гапириб бердилар, «энди бўлар иш
бўлди, у дунё-бу дунё мени рози қиласман десанг, шу хо-
тинни рози қил» дедилар. Бечора хотиннинг тортган
азобларини айтиб берсалар одамнинг юрак-бағри әзилиб
кетади. Хотин шу хилда азоб тортиб, менга уч йил кўз ту-
типти. Ахир бир куни волидамиз йиғлаб,— юзидан-кўзидан
ўпиб, «энди бас, қизим, ҳаммамизниң ҳам иззатимишни
жойига қўйдинг, өрга тег» дептилар. Шундан кейин хотин
эрга тегипти. Бирпасдан кейин Фармонқул, унинг кетидан
хотин қизини етаклаб кирди. У мендан қочмади. Ҳаммамиз
ўтирибмиш, қани энди биронтамиздан садо чиқса!.. Ҳайри-
ят, ҳалиги қиз бор әкан — гапга кавшар бўлди... Кеч кирди,
Такяга борай десам Фармонқул қўймади. Шу ерда қолдим,
Волидамиз, хотин қизи билан уйда ётишди. Фармонқул
икковимиз ташқарида ётдик. Уйқу келмади. Ўтиб кетган,
ҳозир ҳаммамизни ҳам хижолатга қўйган иш тўғрисида
Фармонқул уэр тариқасида бўлса ҳам гап очарникин деб
хавотирда әдим, йўқ, у ҳам шундай хавотирда әкан шеки-
ли, капсанчилардан сўз очган әдим, дарров илиб кетди.
Кейинги йилларда капсанчилар ерни ташлаб кета берган
әкан, бойлар орларини арzon-арzon ижарага беришипти, шу-
нақа арzon беришиптики, ер талаш бўлиб кетипти. Ижара
шартининг яхшилигини айтинг: ер қанча кўп олинса, шунча
арzon ва узоқ муҳлатга берилади; ижара ҳақи ҳам нақд
әмас, деҳқон бойларга вексель берадиу ерни қанча муҳлат
билан олган бўлса қарзни шу муҳлат ичida кам-кам узади.

Фармонқул ҳам ҳовлиқиб ўн йил муҳлат билан ер олипти, вексель берипти. Ўша йили капсанчилар жуда-жуда курсанд бўлишипти. Бироқ янаги йилга бу мурувватнинг миси чиқипти: бойлар бу ишни князъ билан тил бириткириб қилишган экан. Князъ сув пулинни уч баравар ошириб юборипти. Капсанчилар гулу кўтаришган экан, князъ «шаҳардан саллот чақираман» деб босипти. Фармонқул шундан ҳасрат қилди, «илгари ҳам бир нав экан, ерни ташлаб ҳам кета олмайман, Тангриқул ҳожига вексель берганман» деб йиглагундай бўлди.

Сидиқжон қайнатаси Зуннунхўжанинг «сиз менинг ҳам куёвим, ҳам ўғлимсиз» деганини әслаб, кулиб қўйди.

— Нега куласиз? — деди чол.

— Ҳаммаси бир хил бўлар экан!.. Гапира беринг, ота!..

Чол давом этди:

— Шунаقا қилиб, уч кун туриб қолдим. Тўртинчи куни жавоб сўрасам, хотин ҳовлининг пулинни олдимга қўйиб, «мана бу омонатингиз, онамни бўлса то тузалмагунларича сизга бермайман» деди. Бечора шунча азоб тортиб бўлса ҳам ҳовлининг пулига тегмаган экан.

Чолнинг товуши ўзгарди, ўпкаси тўлди шекилли, бирпаст тек қолиб, кейин гапирди:

— Пулни олмадим, минг марта розиман, сизга она ғутидай ҳалол бўлсин, деб ўзига қайтариб бердим. Волидамизнинг майларини сўрасам, у киши: «Мени шу аҳволда қаерга ҳам олиб борасан, аввал бирон бошпана топ; олиб кетганингда ҳам неварамдан узоққа олиб кетмагин», деб кўз ёши қилдилар. Мен, Бувайдага олиб кетсан,— ўз қишлоғимиз,— бирон кавак топилар деб ўйланган эдим. Волидамиз бундоқ деганларидан кейин шу атрофдан бирон иш топишга ҳаракат қилдим. Князнинг уч жойда водокачаси бор өди, шулардан биронтасига одам керак әмасмикин деб конторига борсам, саркори ўзимизнинг бувайдалик чиқиб қолди, арз-ҳол қилсам,

«водокачкада сизбоп иш йўқ, бирон ҳафта сабр қилас-
нгиз князъ келади, отларига қарайдиган сиздай бир одам
керак» деди. Ўзим отга ишқибоз эдим, хўп дедим. Ўн кун
деганда князъ хотини, бўйи етган икки қизи, оқсочлари,
ўн саккизта ити билан келди. Учта оти бор экан, ҳар от-
ларки, юлдузни кўвлайди. Бу отларга ўзим ҳам ишқибоз
бўлиб қолдим. **Хайр**, хизматга кирдим. Қиладиган
ишим — отларга қарап, кечқурунлари ҳалиги икки қизни
отлиқ саёҳат қилдириш. Князъ ўзи гоҳ Тошкентга, гоҳ
Андижонга кетиб, узоқ-узоқ туриб қолар эди. Князъ мени
бир ойча ишлатиб кўриб, энди ойлик тайин қилганда бир
куни ярим кечаси Фармонқул келиб «волидангиз сизни
йўқлаёттилар» деди, юрагим жиг этиб кетди; борсам,
тилдан қолиптилар; қалта-қалта нафас олиб шипга қараб
ёттилтилар. Тонг отди. Кун ёйилганда узилдилар... Охир-
ги нафасни олиб бошларини шундай менга буриб, хира
кўзлари билан бир қарадилар. Шу қарапнинг маъносини
ҳали-ҳали билмайман: хайр дедиларми ё бирон илож қил
дедиларми?

— Иккови ҳам эмас,— деди Сидиқжон чуқур хўрси-
ниб,— мен кетдим, энди сенга ким куяди деганлари! Она
шундоқ бўлар экан!..

— Ҳа, баракалла, мана бу гап тўғри,— деди чол ва
хийла вақт жим қолиб, кейин давом этди:—Шундан кейин
бир кўнглим, Авлиётага қайтиб кета берайми дедим;
кўргулик экан, яна қолдим. Оқпошшо от олди, князъ учта
отдан иккитасини бериб юборди, қолган битта отни ка-
ляскага ўргатгин деди. Ҳаром ўлгур от ниҳоятда асов
эди, бир тарзи ўргатганимда олиб қочди-ю, каляскани
чуқурга тиқди, ўзим калясканинг тагида қолдим. Бир ке-
чаю бир кундуз беҳуш бўлиб ётибман. Кўзимни очиб қа-
расам, Вася Тюминнинг уйида ётибман.

— Ким, кимнинг уйида?— деди Сидиқжон.

— Вася Тюмин. Водокачкаларга қарайдиган, ўшалар-

ни юргизадиган бир рус бор эди. Капсанчиларнинг етти яшардан ётмиш яшаригача ҳамма, ҳамма билар эди. «Олма гули, Вася Тюмин, ёру жўранг омонми» деб унинг но-мига ашула ҳам чиққан эди. Шунинг уйида уч ҳафта ётдим. Шу йигит менга уч ҳафта қаради, бир бурда нон топса юмшоқ жойини менга бериб боқди... Уч ҳафтадан кейин ўрнимдан турдим. Билмадим нима бўлган экан, шундан кейин бир қўлим билан бир оёғим буткул ишга ярамайдиган бўлиб қолди. Қарасам ишга ярамай қолдим, саркорга учраб «ишлаган ҳақимни беринглар, мен кетаман» десам, саркор «хўжайнин инсоф қилиб турганда ҳақ тўғри-сида оғиз очманг, коляска анча пул билан тикланди» деди. Нима дейман? «Замона ўйники». Фармонқул билан, хотини билан хайрлашдим, жиянимнинг пешонасидан ўпдим. Вася Тюминга «хайр энди, ука, бу қилган яхшилигинг у дунёю бу дунё әсимдан чиқмайди» дедим... Вася Тюмин «шу ерда қолинг, ўзим енгил иш топиб бераман» деб кўп қистади. Кўнмадим...

Чол «қилт» этиб ютинди, бир оз жим қолгандан сўнг давом этди:

— Йўлга нон берди... Олти ярим танга пул берди... Кетдим. Уч кун деганда шаҳарга қириб бордим. Шаҳарда шу каракт қўл-оёқ билан беш-үн кун ҳаммоллик қилиб Авлиётага жўнадим. Оқпошшо, ундан кейин бошқаси ҳам таҳтдан тушгандан кейин, билмадим нима хаёлга бордиму, қайтиб келдим. Вася Тюминни, Фармонқулни, жиянимни кўрай, волидамизнинг қабрларини зиёрат қиласай деб тўғри Капсанчиларга бордим. Бориб қарасам, уччала водокачка ҳам вайрон-валонгор, эгилган-букилган темир-терсаклари занглаб ётипти. Фармонқулнинг уйи теп-текис! Суриштирсам, Фармонқул ҳам, хотини ҳам урушда ўлган экан. Вася Тюмин билан жиянимдан дарак тополмадим.

— Қанақа уруш? — деди Сидиқжон.

— Азиатепа урушини эшитмаганмисиз? Уша уруш мана шу Капсанчилардан бошланган экан. Асқар қўрбоши деб эшитганингиз борми? Тангриқул ҳожининг куёви оқтовуқлик Асқар понсот шу ерда, шу урушда ўлдирилган экан. Одамларнинг айтишига қараганда, хотини Фармонқул билан баб-баравар юриб босмачилар билан отишпти. Ишонаман! Қирқ йигитга бош бўладиган хотин эди!

— Ҳа, баҳазур ишонса бўлади,— деди Сидиқжон ўйчан,— ўша замонда элликбошини болаган хотин-да! Фармонқул қизил аскар бўлган эканми?

— Йўқ, ҳукумат ўзимизга ўтиб, князъ қочгандан кеъин Тангриқул ҳожи водокачкаларга даъвогар бўлипти: «князъ водокачкаларни менга сотиб кетди» деб ҳужжат кўрсатилти. Водокачкадаги рабочийлар бу ҳужжатни тан олишмапти: «Князъ сени алдапти, водокачка унни эмас, ҳалқники, пулингни княздан қайтариб ол», дейнинпти. Тангриқул ҳожи илоннинг ёгини еган эди-да, қараса бўлмайдиган — ишни катта қилса, ҳалқ гапнинг тагидан хабардор бўлади-ю, бусиз ҳам меҳри баланд бўлган Вася Тюмин ва унинг ёр-жўраларига эргашади, шунинг учун индамапти, қулиб қўяқолипти; лекин, ўзига ўхшаган мулкдорлар билан бамаслаҳат бошқа йўл тутипти: ҳалқ орасида «халифайи Рум Бухорога келди, Эргаш қўрбоши бориб, мусулмонобод йўлида ғазот қилгани халифадан фотиҳа ва юз минг сарбоз олиб келди» деб гап тарқатипти, Васяни товушини ҳалққа эшиттирмасдан ўлдириш мақсадида ҳалқни қоракалтак қилиб чиқариш пайига тушипти. Орадан уч кун ўтиб, намозжумадан кейин Абдувақкос эшон ваъз айтипти, ғазотга фатво берипти. Тангриқул ҳожи бошлиқ аламон оққалтак-қоракалтак бўлиб, водокачкага қараб юрипти. Лекин аламон ярим йўлга етмасдан Мелиқўзи деган бир йигит Тангриқул ҳожининг қорнига пичоқ урипти. Шу ерда аламон иккига бўлининб, неча ҳисса кў-

пайиб кечгача ур-йиқит бўлипти. Шом пайтида йигирма учта қизил соқчи етиб келипти, лекин булар тўполонни бартараф қилгунча Тангриқул ҳожининг куёви оқтоворқалик Асқар понсот бир юз саксон йигити билан келиб капсанчиларни ўраб олипти. Йигирма учта қизил соқчи бир юз саксон босмачига қарши саҳаргача отишипти. Қизил соқчилардан ўн бир киши, капсанчилардан саккиз кишининг ўлиги қолиб, қолган қизил соқчилар билан капсанчилар саҳарга яқин тўқайга кириб кетишипти. Асқар понсот әрталаб ўн саккиз эркагу бир хотиннинг ўлигини дарёга ташлатипти, эгаси қизил соқчилар билан кетгаёнамма уйларга ўт қўйдирипти.

— Отряд чақиришмаган әкан-да, отряд! — деди Сидиқжон афсусланиб.

— Отряд ўша куни Тангриқул ҳожига жаноза ўқилаётганда етиб келипти. Шу куни намозгаргача Капсанчиларда, ундан кейин бир кечаю бир кундуз Азиатепада уруш бўлиб, Аскар понсот оғзидан ўқ еб ўлипти. Авлиётадан келсам шу... Жияним билан Васядан дарак тополматдим. Бир ёғи булар, қолаверса волидамизнинг қабрларидан кўнгил узолмай, Капсанчиларда қолиб кетдим. Бир-икки йил ямоқчилик, ундан кейин Абдусамад қорининг самоварида самоварчилик қиладим. Шу орада ер ислоҳоти бошлиниб қолди. Комиссиялар қорининг самоварида ишлади. Қорининг ҳам ери кўп әкан, сўроққа ҳаммадан бурун кириб: «Ортиқча ҳамма еримни меҳнаткаш чоракорларга, әзилган батракларга бўлиб бериш учун ишчи-дэҳқон ҳумуматига тутдим», деди.

Сидиқжон таажжубланди.

— Ўз ихтиёри билан-а?

— Ҳа.

— Бизнинг қишлоқда катта ер әгалари осонликча жон бергани йўқ, бир-иккита одам ҳам ўлди.

— Бу ерда ҳам ҳаммаси ўз ихтиёри билан бериптими дейсиз, битта шу Абдусамад қори шундоқ қилди-да. Шундан кейин қори самоварини ёпиб, менга жавоб берди. Толлиққа бордим. Ўша ердаги пахта заводига қоровул бўлиб кирдим. Ўндан кейин мана шу ерда МТС ташкил қилинди-ю бунга ўша пахта заводида ишлайдиган бир йигит каттакон бўлиб келди. Шу йигит мени олиб келиб МТСга қарашлик қизил чойхонага қўйди. Ишимдан хурсандман. Энди битта-яримта насибаси қўшилган хотин чиқиб қолса уйлансан деган ўйим ҳам йўқ әмас. Ҳар замон Капсанчиларга бориб волидамизнинг қабрларини зиёрат қилиб келаман. Капсанчилар ҳозир ҳаммаси битта колхоз бўлган. Дарёдан сув чиқаришга уриниб ётишипти.

— Жияннингизни бошқа қидирмадингизми? — деди Сидиқжон.

— Хўп қидирдим. Заводда қоровул бўлиб юрган вақтларимда уч марта газетага ҳам бердим. «Ҳанифа Усмоновани кўрган-билган одам бўлса, Толлиқдаги пахта заводига хабар қилсин» деб ёздиридим. Топилмади! Вася Тюмин Ашховот урушида ўлган деб эшигдим.

Шу яқин ўртада хўроя қанот қоқиб жуда ҳафсала билан қичқирди. Бунга аллақаердаги жўжакхўроя шошиб-пишиб жавоб берди.

— Ана шунаقا гаплар,— деди чол,— энди ухласак ҳам бўлар-а?

Сидиқжон бу чоқ қиз боланинг тақдирни тўғрисида ўйлар әди, чолнинг гапини эшигтмади. Унинг миясидаги ўй хаёлга, хаёли тушга туташиб кетди.

7

Сидиқжон әрталаб нонуштадан кейин жўнамоқчи бўлған әди, Қурбон ота:

-- Бирпас сабр қилсангиз машинага тушиб кетасиз, МТСнинг машиналари Найманга қатнаб туради. Найманга машинада борсангиз, у ёги яқин,— деди.

Сидиқжон умрида автомобилга тушмаган, унга тахти-равон, шоферларга өса қарийб Афлотун деб қарагани учун:

— Йўғе!..— деб кулди.

— Нега?

— Энди...

— Бемалол! Ўзимизга қарашли йигитлар, биронта-сига айтамиз...

— Машинага ҳеч тушган әмасман,— деди Сидиқжон кулиб.

Қурбон ота әнгасиб самоварнинг остига сим тиқаётгай әди, қаддини ростлаб Сидиқжонга қаради.

— Нима?

— Умримда тушган әмасман.

— Шу ҷоққача қайси бурчакда мөгор босиб ётган эдин-гиз?

Сидиқжон чолни ўзи сингари умрида автомобилга тушмаган деб ўйлаган ва шунинг учун ундан бундай гап чиқишини кутмаган бўлса керак, қаттиқ изва тортди, нима дейишини билмай, бошидан дўпписини олиб у ёқ-бу ёғига чертди, тиззасига қўйиб жиягини тортди. Бу гапни олтмишга бориб қолган бир чолдан әшигтанлиги унга ниҳоятда наша қилди. Шундан кейин автомобилга тушиб кетиши унинг учун бир ҳавас, Қурбон ота қўзғотган хоҳиш әмас, ўз қадрини билган ҳар бир одам боласи кундалик ҳаётдан талаб қиласиган заруратлардан бирига айланди; шундай зўр заруратга айландики, шу куни Найманга автомобиль чиқмаган әди, пиёда кетмади, кунни Қурбон отага қарашиб ўтказди: кўмир майдалади, хумга сув тўлдириди, ҳатто, бирон таниш-билиш кўриб қолса Зуннунхўжага етказади ва Зуннунхўжа албатта «ўла» дейди

Деган андишага ҳам бормай, чой ташиди, самоварнинг саҳнини супурди... Қурбон ота, унинг автомобильда кетишга жазм қилганини кўриб, кечқурун МТСдан эртага қаҷон автомобиль бўлишини билиб келди. Шу муносабат билан яна автомобиль тўғрисида гап чиқиб, Сидиқжон «шу чоққача қайси бурчакда мөгор босиб ётганлигини» ва ондиги ниятини батафсил сўзлаб берди.

— Э-э-э,— деди Қурбон ота,— Ўрмонжон? Ўрмонжон менинг тутинган ўғлим-ку! Мен Капсанчиларга онамнинг қабрини виёрат қилгани борганимда ҳамма вақт ўшаникига тушаман. Қунга бу кун нима? Шанбами? Бутгўн МТСга келган бўлиши керак. Келмаган бўлса, энди келади. МТСга келганида мени кўрмасдан кетмайди.

Сидиқжон, бир томондан, Ўрмонжонга қандай рўпара бўлишини ва гапни нимадан бошлишини билмай юраги пўкиллаб, иккинчи томондан, унинг хуш қабул қилиши умиди билан энтижиб кутар эди. Унинг ҳолатини сезган Қурбон ота МТСга уч марта бориб келди ва ниҳоят, охирги боришида «келипти, оти шу ерда» деб келди.

Ўрмонжон тўсатдан келиб қолди. Унинг келганини на Қурбон ота пайқади, на кўз-қулоқ бўлиб турган Сидиқжон. У икки қўлида учтадан олтига чойнак кўтариб ҳовуз бўйидаги чойхўрлар олдига кетаётган Сидиқжонни кўриб, худди кўвига ишонмагандай, туриб қолди. Қурбон ота иккинчи самоварга хумдан сув олиб қўймоқда эди. Сидиқжон ҳовуз бўйидан бўш чойнакларни олиб қайтишда узоқдан Ўрмонжонга бир қарадию, афтидан, танимади. Ўрмонжон соқолини буткул қирдириб ташлагани ва бунинг устига каттакон оқ қалпоқ кийиб олгани учун юзи кичкина ва қоп-қора кўринар эди.

— Янги касб қуллиқ бўлсин, бойвачча! — деди Ўрмонжон.

Сидиқжон Ўрмонжонни товушидан таниди, бир лаҳза гангигиб қолди-да, сўнг ўзига келиб, қўлидаги чойнаклар

ни ерга қўясолиб унга томон отилди, лекин унинг қимирдамаганини — бир оғини супанинг четига, бир қўлини белига қўйиб тураверганини кўриб, икки қадам берида тўхтади. Ўрмонжон қоматини ростлади ва сўрашгани қўл узатар экан:

— Нима қилиб юрибсан бу ёқларда? — деди.

Қурбон ота сада остидаги супага жой қилди. Сидикжон Ўрмонжонга бутун воқеани айтиб берди ва сўзининг охирида:

— Энди сизнинг әтагингизни ушлаганим ушлагањ, Ўрмонжон ака,— деб кўзига ёш олгандай бўлди.

Ўрмонжон унга бирон жавоб қилишни хоҳламагандай, ланжроқ бир товуш билан:

— Менинг әтагим сенга нима қилиб берар әди, ўз билганингдан қолма,— деди.

Унинг авзойини кузатиб турган Сидикжон бошини қўйи солди.

— Мен сизни қора тортиб келдим, Ўрмонжон ака. Сиздан бошқа ҳеч кимга гапира олмайман.

Қурбон ота яна чой келтириди ва Сидикжоннинг афтидан суҳбатнинг мазмунини фаҳмлади-да, Ўрмонжоннинг ёнига чўкка тушиб:

— Ўрмонжон, ўғлим, бола бечорага бир ёрдам қилгин, ўтган гапга саловот,— деди.

Ўрмонжон кулди.

— Жоним билан. Ҳозирнинг ўзида ёрдам қилишга тайёрман. Мана, сенга биринчи ёрдамим,— деди у Сидикжоннинг яктагини ушлаб, әтигининг қўнжини ғижимлаб.— Бу яктагинг эскирса янгиси борми? Башарти, колховга олишса, ҳали-бери янги яктак, янги әтик одолмайсан. Бизнинг колхозчилар бунақа әтик киядиган бўлгунча бир-икки қовун пишиғи ўтади... «Қўшчинор»да иш кўп, ош оа. Сен катта охурдан ем еб ўргангансан, чидолмайсан.

Қурбон ота Сидиқжонга қараб «ваҳма қилаётити» деган мазмунда кўз қисди, бунга ҳам қаноат қилмай:

— Ўғлим, Үрмонжон, бола бечорани чўчитмагин-да! — деди.

— Йўқ, отахон, билгани яхши. Уй оладиган киши уйни минорада туриб кўрмайди. Колхоз илгари икки юз ўн уч хўжалиқдан иборат эди, ҳозир бир юз саксон тўрт хўжалик қолди, бошқалари ҳар ёққа кетиб қолди.

— Гапинг тўғри-ку, лекин колхозларинг дуруст бўлиб келаётитпи: дамба қилиб тошқин балосидан қутудиларинг, ариқ битай деб қолди. Колхоз яхши бўлиб кетишилиги шундан маълум-да!

— Албатта яхши бўлиб кетади. Бунга ҳамма ишонади. Ҳатто ўша қочиб кетганлар ҳам ишонар эди. Улар ишонмаганидан қочиб кетгани йўқ, оғир меҳнатга чидамади. Одамлар колхоз яхши бўлиб кетишилигига ишонмаса, қанал ишида шунақа ишлармиди? Айниқса қиш кунлари-я!

Қурбон ота қаҳратон қиш кунларини эслади. Қаттиқ совуқ. Дарё томондан өсган изғирин бурунни учирив кетай дейди. Уст-боши юпун йигитлар, чоллар қулоқларини рўмол билан боғлаб олиб кетмон уришади, тупроқ кўчиришади; хотинлар замбил кўтаришади, қоп орқалашади. Буларнинг ичидаги оёғига увада ўраб, сим билан боғлаб олган кишилар ҳам бор эди.

— Рост, ўғлим! Жуда катта бир нарсадан умиди бўлмаган одам бу хилда меҳнат қилмайди. Яхши, йиғлаб-йиғлаб марза олсанг, кулиб-кулиб сугорасан.

Үрмонжон бошқа ҳеч нарса демади, МТСда иши бор экан, кириб кетди.

Сидиқжон ўтирган ерида ўтириб қолди. Қурбон ота, Үрмонжон ҳали узил-кесил бир гап айтгани йўқ, деб Сидиқжонга тасалли бера бошлади. Орадан ярим соат

ўтгандан кейин Үрмонжон МТС томондан иккита от етаклаб қолди.

— Қани, қайси бирини минасан? — деди у ҳануэ сукут қилиб ўтирган Сидиқжонга қараб.

Сидиқжон бирдан бошини кўтарди, аланглаб қолди, Қурбон ота Сидиқжонга «ана, айтмадимми» деган маънода қошини учирди. Сидиқжон югуриб бориб отлардан бирининг жиловини тутди.

Иккови Қурбон ота билан хайрлашиб жўнади.

ИККИНЧИ БОБ

1

Наймандан тортиб то Мирзаоролгача дарё бўйидаги ерларни авваллари чоракор ва батрак бўлиб, кейинчалик катта ер өгаларидан ижарага олиб эккан дедқонлар дарё бўйидаги қаторасига кетган катта-кичик бешта ҳавзага ўрнашган бўлиб, бу ҳавзаларнинг ҳар бири бир маҳалла, ҳаммаси Капсанчилар қишлоғи деб аталар эди. Бу ерларга дарёдан сув чиқардиган водокачкаларни босмачилар бузиб ташлагандан кейин капсанчиларнинг бир қисми аста-секин ҳар ёққа кўчиб кетиб қолди. Ер ислоҳотидан кейин бир йил дарё тошиб өкинларнинг ярмидан кўпи нобуд бўлди; яна бир йили қаттиқ қурғоқчиллик бўлиб, өкинлар куйиб кетди. Мана шу йиллари, гарчи ҳукумат ёрдам берган бўлса ҳам, капсанчиларнинг яна бир қисми ҳар томонга кўчиб кетди. Шундай қилиб беш маҳаллалик Капсанчилар қишлоғи Қўшчинор, Бақақуруллоқ, Қўғазордан иборат уч маҳалла бўлиб қолди.

Ер ислоҳоти вақтида ва ундан кейин юзага чиқиб қишлоқ совети атрофига тўпланган активлар азим бир дарё бўйида осмондан тушадиган томчига вор бўлиб ўти-

риши кулгили бир ҳол ҳисоблаб аввал район ижрония комитетига, ундан кейин область сув хўжалиги бошқармасига ариза беришди.

Қишлоққа район ижрония комитетининг раиси келиб водокачкалардан бирини тиклаш ҳақида мажлис ўтказадиган бўлди. Мажлисга фақат активлар чақирилган бўлса ҳам, сувнинг дарагини эшитиб, бутун қишлоқ келди. Қўғазордаги водокачкадан қолган харобанинг саҳни одамга лиқ тўлди. Раис Капсанчилар қишлоғининг талабига мувофиқ район ҳукумати водокачкалардан бирини тиклашга қарор қилганлигини, асбоб-ускуна келтириш учун Тошкентга одам кетганлигини билдириди. Капсанчилар бу хабарни эшитиб бениҳоя хурсанд бўлишди. Бироқ водокачкалардан қайси бири тикланиши тўғрисига келганда ҳалойиқдан ола чиқди. Капсанчилар уч гурӯҳга бўлинди. Ҳар қайси гурӯҳ ўз ерига яқин водокачканинг тикланишини хоҳдар, ҳамма ҳам сувнинг бошида бўлишни истар әди.

Тортишув қизиб кетди.

— Бақақуруллоқдаги тикланмайдиган бўлса — ҳеч кераги йўқ!

— Қўшчинордаги водокачка тикланадиган бўлса — тикланмагани яхши!

— Қўғазордаги водокачка тикланадиган бўлса — таги билан қўпориб ташлаймиз!

Раис бошқалардан кўра Бақақуруллоқдаги водокачкани тиклаш мувофиқ ва қулайроқ эканини тушунтиришга кўп овора бўлди. Капсанчилар, сиртдан муросага келган бўлиб, зиммаларига тушган вазифаларни мумкин қадар тезроқ бажаришга сўз бериб тарқалишди.

Буларнинг зиммаларига тушадиган вазифалар — хумондан ришт, Зарбулоқдан қум ташиш ва Бақақуруллоқдан икки томонга қараб кетган ариқларни тузатиш, кўмилиб кетган шоҳобчаларни қайтадан қазиш, янги ариқлар чиқариш әди.

Икки кундан кейин қишлоқ советининг раиси Самандаров қишлоқдаги ҳамма от, әшак ва ҳўжизларни навбат билан ишлатиш учун рўйхат қилди. Улов жуда оз эди. Бунинг устига Капсанчилардан улов олиш шу қадар қийин әдики, Самандаров усталар келгунча бу ишлар битмай қолишидан хавфсираб, ҳар кимга алоҳида-алоҳида уқтиришга, ҳатто ялинишга мажбур бўлди. Қўшчинорлик ёки қўғазорлик у ёқда турсин, сувнинг бошида бўладиган бақақуруллоқликлар ҳам ўзи ёки уловининг жонини койитгиси келмас эди. Қўғазорлик Тўлаган aka деган киши ҳатто отининг оёғига мих қоқиб оқсатиб қўйибди. Натижада олти-етти кунлик иш йигирма саккиз кунга чўзилди.

Ниҳоят водокачка қурилишига уста тушди.

Ариқларни тузатиш, қазиш ишида капсанчилар яна ҳам ноаҳилроқ бўлишиди. Булардан, айниқса сувнинг бошида бўладиган бақақуруллоқликлардан ҳеч бири ўз еридан сал нарига бирон кетмон уришни хоҳламас, Самандаров хуноб бўлиб бўғилса, «деҳқоннинг бошини бириктиришдан кўра зорора ундан чап-чап ёпиш осонроқ» деб кулишар эди.

Шундай бўлса ҳам водокачка битгунча ариқлар тайёр бўлди. Водокачканинг очилиш маросими катта тўйга, каттакон сайилга айланиб кетди. Бу сув қишлоқнинг бутун дард-фалокатини, бутун қашшоқлигини ювиб кетаётгандай ҳамма шод-хуррам, ҳамма аҳил, орада ўтган пастбаланд гаплар унутилган эди.

Мана шу кунларда колхозчилик ҳаракати бошланиб кетди.

2

Капсанчилар Баҳрободда собиқ батрак ва чоракордан ташкил топган бир қолхоз борлигини, улар ер-сув,

от-улов, асбоб-ускуналарини ўртага солиб шериклик деҳ-қончилж қилишларини әшиятган, лекин бу одамлар нима учун, нима мақсадда шу йўлга киргандарини билишмас, бунга бирор чандон қизиқдан ҳам әмас. Колхозлаштириш ҳақида миш-миш гаплар кўпайгандан кейин бунга ҳамма қизиқди, шунинг учун, район партия комитетининг секретари Аҳмедов шу тўғрида мажлис ўтказгани келганда Бақақуруллоқдаги водокачка майдонига одам сифишимай кетди.

Аҳмедов гапни Капсанчилар қишлоғининг тарихидан бошлади, капсанчиларнинг ўтмишидаги ҳаётларини батаф-сил гапириб берди; сўнгра, ер ислоҳоти тўғрисида гапириди, ўшанда «худо бермаган ерни бандасининг қўлидан олмайман» деб аввал ер олишдан бош тортган Қамбарали акага тегишиб ҳаммани кулдирди. Қамбарали aka қизариб, ер чизиб ўтирас әди.

— Албатта,— деди Аҳмедов,— ер зарурларнинг за-рури, лекин қашшоқликдан чиқиш учун ернинг ўзигина кифоя қилмайди. Буни ўзларинг кўриб турибсизлар.

Орқада ўтирган қўғазорлик Тилла бува луқма ташлади:

— Кўриб турибмиз, биримиз икки бўлаётгани йўқ. Ер бўлгани билан худо баракани кўтарса қийин. Ҳалай ҳам ўша «бултурги Эшматмиз».

— Биримиз икки бўлмаётитти деганингиз тўғри, отахон,— деди Аҳмедов,— лекин ҳали ҳам «бултурги Эшматмиз» деганингизга қўшилмайман. «Бултурги Эшмат» ердан тиши билан суғуриб олган ҳосилининг деярли ярмини бой акасига берар әди. «Бу йилги Эшмат» шунни бермайди.

Ҳамма гуриллаб унинг сўзини тасдиқлади.

— Энди,— деди Аҳмедов давом этиб,— худо баракани кўтарганлиги масаласига келайлик. Дарҳақиқат, Тангриқул ҳожи ҳар гектар еридан қирқ-қирқ беш путга етка-

зид пахта олар экан, ҳозир, масалан, бизнинг Қамбарали ака худди ўша ернинг ўзидан ўтган йил йигирма икки пут пахта олипти. Энди иккинчи томонга назар ташлайлик. Ўша вақтларда әгадиган ери ўзига кифоя қиласидиган дәққонлар ҳам бормиди? Албатта бор эди. Ҳудо баракани күттармаган ўша вақтларда буларнинг ҳоли қандоқ бўлган эди? А, Гулом ака, ўша вақтларда қанча ҳосил олар әдингиз?

Олдинги сафда ўтирган қоп-қора, озғин, оқ оралаган узун ва жуда сийрак соқоли шабадада ҳилпираб турган Гулом ака бир оқариб, бир қизарив, сеҗин ўрнидан турди.

— Оладиган ҳосилим қарз билан учма-уч келавергандан кейин пахта экишни ташлаб юборган әдим,— деди ва дарров ўтирди.

— Демак,— деди Аҳмедов,— гап ҳудо баракани кўтарганилиги ё туширганилигига әмас, бараканинг ўзи ерни қандай хўжалик экканлигига қараб бўлар экан. Тангриқул ҳожи бақувват хўжалик эди. Гулом ака ел келса йиқиласидиган бекувват хўжалик эди. Тангриқул ҳожи катта ҳамёнини — узанги, чоракор-батракларни — жилов қилиб ерни маълум даражада миниб олган эди. Гулом ака ерни мина олмас эди. Тангриқул ҳожи қўлидаги бутун воситалар билан ерни қамчилаб кўпроқ ҳосил беришга мажбур қиласиди, Гулом ака әса ернинг берганини олар эди. Демак, бараканинг сири нимада экан? Бараканинг сири ерни кўпроқ ҳосил беришга мажбур қилишда, уни миниб олишида экан. Кўпчилиги янги, өскилари ҳам нимжон бўлган ҳозирги дәққон хўжалиги ерни миниб ола оладими? Йўқ! Бунинг учун нима қилиш керак? Икки йўл бор: бири — Тангриқул ҳожининг йўли, иккинчиси — миранаороллик сониб қатрак ва чоракорлар тутган йўл. Тангриқул ҳожи йўли билан борилганда битта Тангриқул ҳожи чиқиши учун Қамбарали акага, Гулом акага ўхшаганлардан йиғирма-ўттизтаси «бултурги Эшмат» бўлиши керак. Бунга

партия йўл бермайди, мутлақо йўл бермайди! Мирзаороллик собиқ батрак ва чоракорлар тутган йўлдан борилгандадали янги, ёскилари ҳам нимжон хўжаликлар бирлашиб катта куч ҳолига, саноатимиз бераётган тракторни узанги, илмни жилов қилиб ерни миниб оладиган вўр хўжалик ҳолига келади. Партия ва ҳукумат буни қўллайди. Мана шунинг оти колхоз бўлади.

Аҳмедов капсанчиларни колхоз тузишга чақириб сўзини тамом қиласди. Савол-жавобга ўтилди. Савол ёғилиб кетди. Ҳаммадан кейин, ҳозиргина онасини өмган бузоқдай, лабининг икки бурчи оқариб турган, юзи шишинқираган — заҳил бир йигит худди дон тиқилган товуқдай бир товуш чиқариб, қўлини кўтарди.

— Савол!.. Ҳукумат ўзи берган ерни ўзи тортиб олар экан-да?

— Кимдан тортиб олар экан? — деди Аҳмедов. — Тортиб олиб кимга берар экан? Бойларгами? Сизга шу гапни ўргатиб юборган одамга бориб айтинг: Совет ҳукумати ерни сиздан тортиб олгандан кейин асл әгаларига топширган экан, энди ердан умид қилмас экансиз, денг!

Кулги кўтарилиди, қарсак бўлиб кетди.

Йигит, нима бўлганига тушунолмай, оғзини қатта очиб, киприк қоқмай, бақрайиб турар эди.

Олдинги қаторда ўтирган Бўтабой деган ўрта ёшлардаги бир киши баланд овоз билан:

— Нишонбой, бу саволинг палағда чиқди, бориб Оқилхонтўрадан бошқа савол олиб келгин! — деди.

Яна кулги кўтарилиди.

Мувокара бошланди. Биринчи бўлиб сўэга Рўзимат деган ёшгина, лекин бўлиқ бир йигит чиқди.

— Менинг сўзим қисқача. Аҳмедов акам трактор тўғрисида гапирдилар. Мен ҳам шу тўғрида гапириб ўтмоқчима. Мен баҳорда Қатортолга борган эдим. Жияним ўша ерга тушган. Шу Қатортолда бундан уч йил бурун таш-

кил қилингандар уруғчиллик совхози бор. Шу совхознинг директори ислоҳотда ер олган батраклардан биттасига божа бўлар экан. Шу батрак директорнинг олдига бориб «уловим йўқ, божа, шу йил тракторингиз билан еримни ҳайдатиб берсангиз, дурустроқ ҳосил олсам, келаси йил уловлик бўлар эдим» депти. Директор кўнипти, лекин, ерни бориб кўрганидан кейин: «Бу бир парча ерни трактор билан ҳайдаш замбарак билан қуён овлашдай гап; қўшнинларинг кўнса, ҳаммаларинг ерларингни қўшиб яхлит қилинглар, бир кунда ҳайдатиб бераман» депти. Ун уч хўжалик ерини қўшипти, шулар ичида бизнинг куёв ҳам бор экан. Трактор бир ярим кун ишлаб, тизза бўйи ҳайдаб берипти. Булар бир талай қўриқ ҳам очиб олишипти. Тракторнинг ҳақини ўн уч хўжаликка сочилганда битта отнинг уч кунлик ем-хашагидан арzon тушипти.

— Мана шу нима? — деди Аҳмедов.

— Тракторнинг фойдаси.

— Бундан ташқари?

— Бундан ташқари... деҳқоннинг фойдаси.

— Куртак! Куртак! — деди Аҳмедов, — мана шундан колхоз кўкариб чиқади. Турмушнинг ўзи деҳқонларни бирлашишга, колхоз бўлишга ундаётитпи! Хўш, ундан кейин нима бўлди?

— Ундан кейин мен бу гапни келиб Бўтабой акамга айтдим. Бу киши «иттифоқнома ёздириб районга борсак бўлар экан» дедилар. Шунинг устига Тиллабувам келиб қолдилар, бу киши: «Киймат беҳикмат эмас, арzon — беиллат эмас, бунинг тагида бир иллат бордир, сабр қилайлик» деб ланжлик қилдилар.

— Бир мен айтганим йўқ бу гапни! — деди Тиллабува дўнгиллаб.

Бўтабой ўрнидан туриб чолга қўлинни шоп қилди:

— Бир сиз айтмаган бўлсангиз ҳам аввал боши сиз айтдингиз..

— Тўғри,— деди йигит сўзида давом әтиб.— Шундан кейин бу ишга қунт қилмадик. Мен нима демоқчиман? Мен шуни айтмоқчиманки, бирлашсак, колхоз бўлсак, ҳукуматимиз трактор берса, биримиз икки әмас, ўн бўлади, юз бўлади. Шу билан сўзим тамом... Ҳа, айтгандай, бу орада «трактор ерни куйдириб, жирини қуритиб уч-тўрт йилда тиёҳ унмайдиган қилиб қўяр әмиш», «трактор чўчқанинг ёғи билан юрар әмиш», «гўристондан товуш чиқипти» деган таплар чиқиб қолди.

— Бунаقا гаплар кимдан чиқади?— деди Аҳмедов мийғида кулиб.

Боласини әмизиб ўтирган бир хотин икки-уч оғиз ростлаганидан кейин әшитилар-әшитилмас:

—«Гўристондан товуш чиқипти» деган гапни мен Нишонбойдан әшитган әдим,— деди.

Аҳмедов буни әшитиб қолди.

— Нишонбойдан әшитган бўлсангиз әшитгандирсиз, лекин бу гап Нишонбойнинг ўзидан чиққан әмас. Нишонбой курк товуққа ўхшаган нарса: әгаси товуқнинг тухумини бостирадими, ўрдақнинг тухумини бостирадими — унга бари бир — очиб чиқараверади.

Қийқириқ кулги бўлиб кетди.

— Бунаقا гап трактор келса зиён қиладиган одамдан чиқади,— деди Аҳмедов давом әтиб,— трактор келса, ким зиён қилади? Дехқон хўжалигининг кучсизлигидан, пулга, от-уловга, асбоб-ускунага муҳтоҷлигидан фойдаланиб қимиirlаб қолган, ер ислоҳотида қирқилган тирноғи ўсган ва ўсаётган, кучсиз хўжаликларни илондай авраб дамига тортаётган одамлар зиён қилади. Қишлоқда шуна-қа одамлар борми?

Ҳар томондан товушлар әшитилди:

— Топилади.

— Бор!

— Ҳа, баракалла,— деди Аҳмедов,— товуш гўристон-

дан эмас, мана шулардан чиқаётитти. Булар нонимиз яримта бўлади деб ҳалитдан, ҳали трактор келмасдан бурун ириллаётитти.

Рўзиматдан кейин Тиллабува сўз олди. Ҳамма «балоға қолдинг» деган маънода кулиб Рўзиматга қаради.

Тиллабува узун, оппоқ соқолини туталмаганича әнгашиброқ йўргалаб олдинга чиқди-да, қоматини ростлаб Аҳмедовга қаради.

— Гапинг тўғри, ука: мен бурунги капсанчи эмасман, дехқонман! Нима важдан, бултурги Эшматман дедим. Бу гапни шу важдан айтдимки, Шокиржон бойваччанинг ерини экиб ёки ундан ерни изараага олиб юрган вақтларимда бу одам орттираётган туман бойликни кўриб шўр пешоналигимга бирдан-бир сабаб ерсизлик, сувсизлик деб ўйлар әдим; шунинг учун, ислоҳотда ўзимга теккан ерни белгилаб қозиқ қоққанимда, водожачка қурилишига орқалаб ғишт ташиганимда кўп нарсаларни мўлжаллаб қўйган әдим, кўп нарсаларни орзу қилган әдим; лекин, ука, ер олганимдан кейин ҳам ўша мўлжалларим юзага чиқмади, орзуладарим ушалмади. Мана шу важдан мен бултурги Эшматман дедим. Бунинг сабабини мана энди билдим. Бундан чиқдики, бизнинг аҳволимизни сен ўзимиздан яхшироқ билар экансан, бундан чиқдики, бизни рўёбга чиқарадиган йўлни ҳам сен биласан. Агар бизни рўёбга чиқарадиган йўл колхоз йўли бўлса — бошла, ука, этагингни ушлаганимиз ушлаган! Иккинчи сўзим тирноғи ўсганлар, бизни илондай авраб дамига тортаётганлар тўғрисида. Бу тўғрида ҳам сенга қойилман. Ёгочнинг бўшини қурт ейди. Бизни илондай авраб дамига тортаётганлар кимлар— Нуъмон ҳожи, Мирҳомидхўжа, Сайдносир, Оқилхонтўра, Мирҳайдар...

— Ҳой, имонсиз чол, Мирҳайдар акани нега қўшасан?— деди кимдир орқадан.

— Нега қўшмас ўжанман? Мирҳайдар бизни Эшмат қилмаётптими?

Бояги товуш яна қичқирди:

— Мирҳайдар aka кимни Эшмат қилиптилар?

Тиллабува бўйини чўзиб товуш чиққан томонга қарди, лекин гапирган кишини кўролмади.

— Ҳой, бундоқ ўрнингдан туриб гапирсанг-чи! Нега қочган беданадай писиб чурқиллайсан. Мирҳайдарнинг Тўхлимергандаги шолипоясини ким эгади? Бу шолипояни Мирҳайдар Шодиқулдан қанақа қилиб олган, биласаними? Унинг Митондаги боғига ким қарайди? Мирҳайдар Мамадалига қўш ҳўқизини нимага бериб қўйипти? Қани, ҳой Мамадали, гапирсанг-чи, сенга мурувват юзасидан берганми?

Орқада тикка турган ёшгина йигит, Мамадали, ўзини одамларнинг орқасига олди.

— Мирҳайдар одамларни Эшмат қилмаганими бу?— деди Тиллабува давом этиб,— ҳукуматга чап бериб кучсиз хўжаликларнинг баданига зулуждай ёпишиб олган мана шунақа одамларнинг танобини тортиш керак.

Тиллабувадан кейин сўзга чиққанларнинг бири камбағалчиликдан нолиб, яна бири ҳукумат деҳқонни яхши йўлга бошлайди деган қаттиқ ишонч билан колхозга хайриҳоҳлик кўрсатди ва ҳаммаси ҳам муштумзўрлар тўғрисида Тиллабуванинг сўзини қувватлади.

Капсанчилар колхоз тувишга қарор қилишиди.

Мажлисда ҳамма масала ечилгандай, Аҳмедовда, сўралмаган ва тўлиқ жавоб олинмаган савол қолмагандай бўлган эди, бироқ, орадан икки-уч кун ўтар-ўтмас, ечилмаган масалалар, Аҳмедовдан сўралмаган гаплар чиқа бошлади: водожачкани тиклагани фишт ва қум ташишда, тайёр ёувга ариқ чиқаришда шунчалик ноҳил бўлган одамлар колхозда аҳил бўлишармикин? Куч-қуввати баравар, бир-бирига жони ачийдиган одамлар бирлашиб колхоз өмас, колхозча бўлишса қандоқ бўлар экан?

Январнинг бошларида область партия комитетидан ваз кил келиб қишлоқ совети раиси Самандаровнинг уйига тушди. У қоп-қора, қотма, вужуди пай бир йигит бўлиб, афтидан ёшини чамалаш қийин әди. У, капсанчиларнинг кайфиятини райкомнинг иккинчи секретари Шодиевдан эшишиб, чеки шу қишлоққа тушганига жуда хурсанд әди. Шодиев унга «колхозга ҳамма бир оғиздан қўл кўтарган, муштумзўрга қўлини бигиз қилиб «думини туг» деб турипти, демак, ҳамма тайёр — қўл тегизилса — палахса-палахса кўчиб чиқа беради» деб ишонтироди.

Эртасига камбағал деҳқонларнинг мажлиси чақирилди.

Оппоқ қор. Узоқ-яқинда қарғалар қағиллайди. Қош қорайганда юпун кийинган одамлар қунишиб, дйлдирашиб Бақақуруллоқ майдонидаги қизил чойхонага томон кела бошлади. Ёзлик қизил чойхонанинг атрофига чий тутилиб, ҳар ер-ҳар еридан туйнук қўйилган, бу туйнукларга газет қоғозлар ёпиширилган.

Ичкари қоронғи, ғовур. Одам кўп. Қаердадир чақалоқ ингаламоқда. Қаердадир чилим қуриллайди. Мана шундай мажлис ва байрам кунларидағина ёқиладиган қирқинчи осма чироқ ҳозиргина ёқилган бўлиб, ҳали пилиги кўтарилган эмас. Унинг хира шуъласида президиум столига ёпилган қизил алвон, унинг устидаги бир тахта оқ қоғоз, орқа томондаги деворга ёпиширилган портрет ва плакатлардан баъзисининг бир бурчи, баъзисининг ярми, столга яқин ўтирган кишиларнинг қоп-қора калласи кўринади.

Самандаров чироқнинг пилигини кўтарди, қаламнинг орқаси билан столни қоқиб ғовурни босди.

— Үртоқлар! Жим!. Ҳой, Рисолат, болангни йиғлат-

магин, ахир, эмиссанг бўлмайдими!.. Чилим чекилмасин, деган таклиф тушди. Ўртоқлар, камбағал деҳқонларнинг колхоз қурилишига бағишлиган ялпи мажлисини очиқ деб эълон қиласман, эълон қилиш билан бирга сўз областдан келган вакил ўртоқ Сафаровга...

— Ўртоқлар,— деди Сафаров,— мени бу ерга область партия комитети ва темир йўл депосининг ишчилари юборди. Менинг бу ерга келишдан мақсадим меҳнаткаш деҳқонни ҳашлоқликдан чиқарадиган, деҳқонни тракторга миндириб социализмга олиб борадиган ишда, яъни колхоз тузишда, ҳамма меҳнаткашларнинг қонини сўриб келган муштумзўрни таг-томири билан юлиб ташлашда сиз оға-иниларимга ёрдам беришдир. Мен ҳам деҳқон боласиман. Аслимиз Қудашдан. Отам Одил кўр деган қўйонлик бойнинг Қудашдаги ерини экар эди. Одил кўрни өшитган бўлсаларинг керак: Қўйонда бойлар «ҳукумат» тузиб, йўқ аскарга аскарбоши керак бўлиб қолганда бу одам Сибирдан қочган каллакесар Эргашни Бачқирдан оқ кигизга ўтқизиб олиб келган. Унинг шаънига ўша вақтда байт ҳам чиққан эди.

Кима дод айлайн аҳли ҳукумат бўлса Одил кўр,
Кўп одам қонига зомин бўлиб бу бирла жоҳил кўр,
Урушни бошлабон, қочди ўзи бўлмай муқобил кўр,
Қочиб билмамки, охир кетди Афгон ичра Кобил кўр.

Бу йигитнинг оғзидан байт чиқишини, айниқса бунажа қизиқ байт чиқишини ҳеч ким кутмаган бўлса керак, ҳамма гуриллаб кулиб юборди.

Мажлисдан расмият руҳи, мажлис аҳлига Сафаровни бегонароқ кўрсатиб турган парда қўтарилди.

Сафаров давом этди:

— Отамни мана шу Одил кўрнинг ювиндихўри Пайғамбарқул қўрбоши отиб ташлаган. Мен бу билан нима

демоқчиман. Шуни айтмоқчи бўламанки, камбағал нон деб бош кўтарса, бой-муштумзўр қон деб тош кўтаради. Буни ер ислоҳоти вақтида, ундан илгари ҳам ўзларинг кўргансизлар, айтиб ўтиришнинг ҳожати йўқ. Колхоз ниша әканини ўзларинг биласизлар. Райком секретари ўртоқ Аҳмедов бу тўғрида сизлар билан суҳбатлашган әкан.

— Биламиз!

— Ёзиламиз! — деган товушлар эшитилди.

— Ҳўп,— деди Сафаров,— бу тўғрида энди гапирмасак ҳам бўлади. Бу масала ҳал. Энди иккинчи масалага ўтайлик.

Энг орқада ўтирган Бўтабой шошиб-пишиб оғзидағи носни ташладио, қулоғини боғлаган қийиқчасининг учи билан мўйловини артиб қўлини кўтарди ва:

— Мумкинми... — деб ўрнидан турди,— мен шуни айтмоқчи бўламанки, ўртоқ Сафаров ҳақ гапни гапирдилар. Камбағал бош кўтарса бой тош кўтаради. Колхоз камбағалнинг фойдаси бўлмаса муштумзўр бунчалик ти-пирчилиб қолмас әди. Ҳўроздан, «тонг отишини нимадан биласан» деб сўралса, «ёрқанотнинг чийиллаганидан биламан» деган әкан. Мен колхозга биринчи бўлиб ёзиламан...

Унинг ёнида ўтирган Қамбарали секин қўлини кўтарди.

— Мумкинми... Сўраганнинг айби йўқ... «Колхоз социализмга олиб боради» дедингиз, социализмга ҳаммани олиб борадими ёинки хоҳлаган бориб, хоҳламаган қола берадими?

Бўтабой шовқин солиб ўрнидан турди:

— Вой, беғуворе, социализмни ҳўп тушунган әканисиз! — деди ва социализм нима әканини тушунтира кетди, лекин ўзи ҳам аниқ равшан бир сўз айттолмай, гапни чайнай бошлади. Сафаров тез-тез луқма ташлаб, мисол қистириб унга ёрдам берди.

— Бошқа савол йўқми? — деди Сафаров, — бошқа савол бўлмаса, иккинчи масалага ўтамиш. Биз муштумәўр-Жарнинг ерини, асбоб-ускунасини, иш ҳайвонларини олиб колхозга беришимиз ва ўзини бу ердан бадарга қилишимиз керак.

Мажлис бир лаҳза жим қолди-ю, кейин, ундан-бундан товушлар чиқа бошлади:

— Отангга раҳмат!

— Ҳайдалсин!

— Мол-мулки ҳам тортиб олинсин!

— Ҳўп,— деди Сафаров,— бўлмаса шундоқ жазога доийқ муштумәўрларни ном-баном айтайлик. Қани, ёзинг, ўртоқ Самандаров! Биринчи... ким?

Ҳеч кимдан садо чиқмади. Сафаров яна қайтиб сўрагандан кейин бир неча киши Нуъмон ҳожининг номини айтди.

— Биринчи Нуъмон ҳожи Қаландаров. Кимда ким Нуъмон ҳожи Қаландаровнинг хўжалиги тутатилсин, ўзи бу ердан бадарга қилинсин деса, қўлини кўтарсан.

Ҳамма баравар қўл кўтарди.

— Иккинчи... ким?

Яна жимлик чўқди. Бўтабойнинг вардаси қайнаб кетди.

— Ҳой, халойиқ, нимадан қўрқасан! — деди ўтирган ерида қўлини пахса қилиб.

Орқадан кимдир:

— Қўрқмасангиз ўвингиз айтинг! — деб дўнғиллади. Бўтабой ўридан турди.

— Нимадан қўрқаман? Эё! Мирҳомидхўжани ёё! Сайдносир, Оқилхонтўра, Мирҳайдар, Абдумалик...

Шу онда чироқ шарақлаганича бориб шипга урилдию, ерга тушиб чил-парчин бўлди ва бирданига иккита ўқчиқди. Халойиқ бир лаҳза жим қолди, кейин, бирданига ўзини эшикка ўрди. Эшик қулади, қамиш девор ўпирилди.

Чақалоқнинг бигиллагани, хотин кишининг фарёди әши-
тилди. Нимадир қарсилаб синди. Кимдир ўқирди. Ким-
дир сўкинди. Ерга тушган чироқ бир-икки допиллади-ю
аввал кўк, кейин қизғиц аланга кўтарили. Сафаровниң
кўзи деворнинг тагида бир-бирини пийпалаётган икки ки-
шига тушди. Бунинг бири бояги Бўтабой aka әди. Сафаров
югуриб бориб, уни бўғаётган йўғон кишининг елкасига бир
тепди. Йўғон киши ўрнидан тура солиб Сафаровга таш-
ланди. Сафаров икки қадам орқага чекинди, кейин гавда-
сининг бутун оғирлигини олдинга ташлаб, муштининг қир-
раси билан унинг кекирдагига туширеди. Йўғон киши
чалқанча йиқилди ва сўйилган товуқдай питирлаб, сувқ ти-
қилган итдай хириллай бошлади. Бўтабой aka ерда ётган
қўш тиф милтиқни олиб қўндоғи билан унинг калласига
солмоқчи бўлган әди, Сафаров тутиб қолди.

— Урманг!

Бу орада ташқаридан товушлар эшитила бошлади

— Ушла!

— Оқилхонтўра!

— Тўхта, отиласан!

Сўнгги товуш Самандаровнинг товуши әди.

Сафаров супадаги кигизни тортиб аланганинг устини
қоплади-да, югуриб ташқарига чиқди. Оппоқ қорда одам-
ларнинг қораси елиб-югуради. Самандаров тўппонча-
дан осмонга ўқ узди. Одамлар орасидан чиқиб дарё то-
монга югуриб кетаётган кимдир қоқиниб йиқилди...

Ҳаял ўтмай бир нечта чироқ пайдо бўлди. Ҳамма қи-
вил чойхонага кирди. Бўтабой aka қўш тиф милтиқни кў-
тариб, худди соқчидай, гоз турар, Мирҳайдар унинг оёғи
остида дам-бадам ўқчиб, ётар әди. Бир неча киши қўл-
оёғи боғланган Оқилхонтўрани судраб олиб кирди. Шу
онда кимдир:

— Тиллабува! — деб қичқириб юборди.

Ҳамма ўша томонга юзланди. Чироқ тутилди. Тилла-

буга мукка тушиб ётар, унинг ўнг томонга қайрилиб чиқкан узун, оппоқ соқолига бўйнидан оқиб тушаётган ҳон буғланиб туар әди. Оқилхонтўра Бўтабойни мўлжаллаб отган ўқ Тиллабувага теккан экан.

4

Мажлис әртасига кечқурун давом этди. Мажлисда рўйхатдаги камбағал деҳқонларнинг ҳаммаси ҳозир бўлди. Рўзимат, ҳеч ким буюргмаган бўлса ҳам, эшик олдида узун сўйил кўтариб туар ва чойхонага кирадиган ҳар бир кишини бир тўхтатиб, кейин киргизар әди.

Колхозга кириш тўғрисида мажлисгача йигорма тўқиз камбағалдан ариза тушган әди, мажлис бошланиши олдидан яна ўн саккиз кишидан ариза тушди.

Мажлис жуда тез тугади. Самандаров колхозга кириш учун ариза берганларни номма-ном айтиб мажлисдан ўтказди, кейин, хўжалиги тугатилиши керак бўлган муштумзўрларнинг рўйхатини ўқиди. Булар: Мирҳайдар, Оқилхонтўра, Абдумалик, Мирҳомидхўжа, Сайдносир, Шокиржон бойвачча, Нуъмон ҳожилардан иборат әди. Мажлис рўйхатни бир оғиадан тасдиқлади ва шу билан бирга, муштумзўрлар мол-мулкини яшираётганини, отловини сўяётганини айтиб, бу ишни тезроқ ўтказишни қишлоқ советидан талаб қилди. Активлардан учта кўмакчи группа ташкил қилинди.

Эртасига муштумзўр хўжаликларни тугатиш учун юриш бошланди.

Сафаров бошлиқ Рўзимат, Қамбарали акалардан иборат группа Мирҳомидхўжанинг уйига борди. Унинг ҳовлиси, ташқаридан қаралганда Қўшчинордаги бошқа уйлардан чандон фарқ қилмаса ҳам, Капсанчиларда шундоқ ҳовли бўлишини сира кўз олдига келтиргмаган Сафаровни

қайратда қолдирди: баланд ғишт пойдеворлик түрт үй, даҳлиз, деворига толгул ва бўйни уаун офтобанинг сурати солинган баланд айвон, ошхона; сон-саноқсиз мевали дарахтлар, тසк, бир томонда отхона, бир томонда оғил, омбор... Қишида шундоқ, чиройли кўринган бу ҳовли ёзда қандоқ бўлса экан!

Мирҳомидхўжа уларни кўпдан кутилган азиз меҳмонлардай таъзим-тавозе билан қарши олиб, даҳлизга, ундаи чап томондаги уйга бошлади. Бу уйдаги сандал атрофита шоҳи ва атлас кўропачалар тўшалган, катта-катта парқу ёстиқлар қўйилган, дастурхон турли-туман қанд-қурс, мева-чева, анвойи мураббо, гижда, чап-чап, патир, бўғирсоқлар билан зеб берилган, қисқаси, мезбон меҳмон кутици санъатини хўп ўрнига қўйишга вўр берганлиги кўриниб турар әди.

— Қани, қани ўтирсинлар... Бир пиёла чойимиз бор...

Қамбарали калишини ечаётib Рўзиматга қараган эдий, Рўзимат қовоғини солди. Қамбарали ечган бир пой калишини дарров кийиб олди. Рўзимат ер остидан Сафаровга қараб «қани, бошлайлик» демоқчи бўлди. Сафаров гап бошлишни имо билан унинг ўзига ҳавола қилди. Рўзимат томогини бир-икки қириб олгандан кейин:

— Биз чой ичгани келганимиз йўқ! — деди. — Бўладиган гап шуки, камбағаллар мажлис қилиб сизнинг хўжалигингиzioni тугатишга, ўзингизни Капсанчилар қишлиридан бадарга қилишга қўл кўтаришиди.

Бу гап кутилмаган бўлмаса ҳам, Мирҳомидхўжанинг ёшига номуносиб равишда таранг ва тиниқ қизил юзи оқаришиди, оқ оралаган чўққи соқоли хиёл титради. У, ҳаяжонини яшириш учун, уйқусизликдан қизарған ва ёшланиб турган кўзларини бош бармоғининг орқаси билан артар әкан:

— Шундоқми? — деди ва илжайишга ҳарақат қилди. — Ҳай-ҳай, кўп яхши, кўп яхши! Бурунгилар «югур

Ганники әмас, буюрганники дейишган. Биз елдик, югурдик; уй-жой, рўзгор қилдик; бизга насиб қилмаган экан, буюрганга насиб қилсин. Кўп яхши. Сўзимиз шу... Нима десаларинг, нима қилсаларинг қуллуқ қиласмиш. Муштумвўр десаларинг ҳам қуллуқ, ҳайдаймиз десаларинг ҳам қуллуқ. Биз шу вақтгача ҳукуматдан фақат адолат кўрдик. Ҳеч қайси замонда ҳукумат бундоқ камбағалпарвар бўлган әмас. Биздан лозимки, бундоқ камбағалпарвар ҳукуматнинг адолатига тан бериб унинг раъйини қайтармасак... Шундоқ қилдик ҳам: одамлар қасд қилиб қўл кўтарса, биз паст бўлиб қўл қовуштиридик; одамлар молини яширса, биз... мана, кўриб турибсизлар, бир дона гугурт чўпини ҳам остонаядан ташқарига чиқармадик.

Рўзиматга қараб ўзини сипо тутишга тиришиб, қувогини очмаган Қамбарали Мирҳомидхўжанинг сўзинга жон-дили билан қулоқ солар экан, сиполикни эсидан чиқариб қўйди, ҳатто Мирҳомидхўжага дилсўзлик важидан муқур уф тортди. Сафаров ичидаги кулди-ю, Мирҳомидхўжадан:

— Бу иморат отангиздан қолган бўлса керак? — деб сўради.

— Йўқ,— деди Мирҳомидхўжа,— бу ер бир чордевор ёди, агар эшитган бўлсалар, Асқар понсон деган қонхўр босмачи ўт қўйган уйлардан эди. Биз ўша вақтда муҳтоҷ бўлган бева-бечораларни йигиб ош бериш мақсадида бир бостирма солдик.

— Очлик йилими?

— Балли. Ҳукуматимизнинг даврида яхшилик ерда қолмас экан, шу одамлар кейинчалик бизга қарашиб шунчалик жой бўлди...

— Ўша очлик йили солганимисиз?

— Балли.

— Ўша бева-бечораларни ишлатганимисиз?

— Биз ишлатмадик, ўзлари... Отамиздан қолган унчамунча харжимиз бор эди.

— Демак, бу иморатни ўша очлик йили солган әкан-сиз-да?

— Бева-бечораларга бошпана бўлсин деб солган әдик.

Иморат тўғрисида қайта-қайта савол беришдан ва буни очлик йили солинганлигини таъкидлашдан Сафаровнинг муроди Қамбарали акага: «Кўрдиларингми» дейиш эди. Қамбарали буни дарров Фаҳмлаб яна қовоғини со-либ олди.

Мирҳомидхўжа яна гап бошлаган эди, Рўзимат дераза-нинг тубига ўтириб дафтарини очиб:

— Энди иш бошлаймиз, амаки,— деди,— биз бутум хўжалигингизни хатга оламиз. Хатга тушган нарсалари-нгиз колхозга ўтади. Эртага кечгача уйни бўшатиб қўя-сиз.

Мирҳомидхўжа таъзим қилди.

— Хўп, хўп, жоним билан.

Бу уйдаги ҳамма нарса хатга олингандан кейин ташқа-рига чиқилди.

— Отхонага,— деди Сафаров.

Сафаров билан Рўзимат отхонага кетаётгандан Мир-ҳомидхўжа Қамбаралини секин туртди.

— Сиз оғилни кўриб турасизми?

— Майли.

Иккови оғилга кирди. Оғилда тўрт ҳўқиз, икки сигир, икки бузоқ бор эди. Мирҳомидхўжа оғилнинг эшигини секин ёпди-да, имо билан Қамбаралини бир чеккага ча-қирди. Қамбарали ҳайрон бўлиб туарар эди.

— Берироқ келинг,— деди Мирҳомидхўжа пичирлаб ва рўмолчага тугилган бир нарсани қўйнидан олди.— Ҳи-ҳи... Шуни шаҳарлик меҳмон билан бўлишиб олинг-лар, лекин сиздан мен яна қарздор. Яна қарздор! Ана у, бола ҳали ёш, унга билдирамай қўяқолинглар.

Мирҳомид шу гапни айтиб, тугунчани Қамбарали ака-
нинг қўлига тутқиазди. Тугунча хийла оғир әди. Қамба-
ла aka бир тугунчага, бир Мирҳомидхўжага қараб, гаранг
бир аҳволда:

— Нима бу? — деб сўради.

— Қўйнингизга солиб қўя беринг, кейин қўрасиз.

Қамбарали aka тугунни ечди, бир даста нуқул юз сўм-
лик пулни кўриб кайфи учиб кетди.

— Қўйнингизга солинг, солинг! — деди Мирҳомид пи-
чирлаб.

Шу онда ташқаридан Рўзиматнинг «жийрон от қани?»
деган товуши эштилди. Афтидан, Сафаров иккови оғил-
га томон келмоқда әди. Мирҳомидхўжа шошиб Қамбарали
аканинг қўлидан пулни олди-да, унинг қўйнига тиқди.
Эшик очилиб Сафаров кирди. Мирҳомидхўжа югуриб бо-
риб говмиш сигирни устундан ечар әкан:

— Ҳи-ҳи... Уч маҳал соғилар әди... Ҳи... — деб Сафа-
ровга қаради.

Сафаров Қамбарали аканинг авзойидаги ўзгаришни кў-
риб:

— Ҳа? — деди.

Қамбарали aka қўйнидан бояги пулни чиқариб унга
уватди.

Сафаров дарров фахмлади. Мирҳомидхўжа сигирнинг
устига қўлини ташлаб, илжайиб турар әди.

— Неча пул бердингиз? — деди Сафаров хиёл табас-
сум қилиб. Унинг табассум қилганини кўриб Мирҳомид-
хўжанинг жони кирди.

— Бешта, ука, бешта... ҳи-ҳи-ҳи...

— Қамбарали аканинг баҳоси беш минг сўм деб сиз-
га ким айтган әди?

— Ҳи-ҳи-ҳи... Қолганига биз қарядор..

— Қамбарали акани сотиб олгани кучингиза етмаса

қерак. Милтиқ билан бўлмади, әнди пул билан раҳна солмоқчимисизлар?

— Э-э, ука,— деди Мирҳомидхўжа ранги ўчиб,—мен... мен пора деб берганим йўқ, наҳотки шундоқ десангиз...

— Нима деб бердингиз?

— Ахир... Ҳамма нарсани нима деб хатлаётисивлар, шуларни оласизларми, ахир. Шулар қатори... бисотимда шу пул бор экан, бераётибман-да.

Қамбаралининг жони чиқиб кетди ва уни чапароста қилиб сўкиб ташлади.

— Икковларинг бўлишиб олинглар демадингизми?— деди бўғилиб.

— Ҳи-ҳи-ҳи... Тушунмапсиз. Мен ундоқ деганим йўқ,

— Ҳўп,— деди Сафаров,— Рўзимат, мана бу пулни ҳам дафтарга ёзиб қўй!

— Ёзсин, ёзсин,— деди Мирҳомидхўжа,— мен буни ҳам дафтарга ёзиш кераклигини билмабман.

Сафаров пулни Рўзиматга берди.

Мирҳомидхўжа уйнинг зинасига ўтириб хийла вақтгача сукут қилди, кейин бошини кўтариб: «Ҳўп, ҳўп, яҳши, кўп яҳши», деди, лекин бу гапни ўзига гапирдими, буларга айтдими — билиб бўлмас эди. Мирҳомидхўжанинг хўжалигини хатлаш кечгача давом әтди.

5

Сафаров соат бешларда Рўзимат билан Қамбарали акага жавоб бериб, сельсоветга қайтиб келди. У әшикдан кирганда даҳлизда ўтирган уч киши баравар ўрнидан туриб салом берди. Сафаров буларни ҳеч кўрмаган эди. Йичкарида Самандаровнинг олдида яна икки киши ўтирган экан. Сафаров булар билан ҳам саломлашди-да, ти-тилиб, пружиналари кўриниб ётган диванга ўтириб папи-

рос чекди. Самандаров столнинр тортмасидан бир нечта қогоғ олиб, илжайганича, унинг ёнига бориб ўтирида, русчалаб:

— Мув кўчди, ўртоқ Сафаров, ўрта деҳқон қимирилаб қолди,— деди ва қўлидаги қоғозларни унга берди.—Беш кишидан ариза...

— Бу яхши гап,— деди Сафаров ҳам русчалаб ва араб ғлифбесининг қадимги имлосида ёзилган аризалардан бирини ўқиди.

«Капсанчилар қишлоғининг қишлоқ шўроларига ариза.

Капсанчилар қишлоғига қарашли Кўғазор маҳалласида тургувчи менким Муҳиддин Муҳаммадсолиҳ ўғли-дирман, бераман ушбу аризани шул хусусдаким, меҳнаткашлар даврида кўзим очилиб ишчи-деҳқон ҳукумати бошлигар колхоз йўлини ихтиёр қилдим ва умид қиламанки, мени бир нафар ҳўқиз ва бир нафар эчки ва бир нафар эшак ва ўн икки нафар товуқ ҳамроҳлигига колхозга олсалар, деб ўз ихтиёрим билан бармоғим босдим. Муҳиддин Муҳаммадсолиҳ ўғли гинвор ойинда».

— Ким ўзи бу?— деди Сафаров энсаси қотиб.

Самандаров жавоб бергунча бўлмай ўтирганлардан бири ирғиб ўрнидан турди-ю даҳлизининг эшигини очиб қаттиқ шивирлади:

— Майдин, кир, аризанг чиқди!

Кўса, озғин, кенг гуппи тўн ва қундузсиә телпак кийган бир киши кирди ва бастига ярашмаган йўғон товуш билан:

— Мўйдин Мамасолиҳ ўғли мен бўламан,— деди.

Сафаровнинг чеҳраси очилиб кетди.

— Э, сизми? Аризани ким ёзиб берди?

— Қорига ёздирган эдим. Нима эди, нобопроқ ёзилитими? Гап аризада өмас, мулла, колхозга кирамиз дедик, кирамиз.

Сафаров кулди.

— Шундоқми? Қани, бу ёққа ўтириңг-чи. Үзингизга тинч әкансиз-ку, нега колхозга кирадиган бўлиб қолдинги?

Мұхиддин ака диваннынг бир четига ўтироди.

— Энди, мулла, ўзингга тинч әкансан дейсиз-ку, лекин бунақа тинчликдан юз тилла қарз яхши. Жўжабирдай жонман, ҳаммаси «бер, ейман» дейди. Бу ёқда ҳўқиз, өшак... Булат ҳам «бер, ейман» дейди. Ер ўрик әмаски, ўзи гуллаб, ўзи пишса. Ҳосил олиш учун, саломатлик бўлса, билакнинг кучидан ташқари асбоб керак, гўнг керак... Шуларнинг ҳаммаси пул билан бўлади. Кўп ер әkkани кучим етмайди, оз ер эксан ўзидан чиққанини ўзига чаплаб қараб тура бераман. Энди ташвишнинг кўплигини айтинг: искартдан ортиқроқ ёғса «әкиндан айрилиб қоламанми» деб жонимни ҳовучлаб нуқул қурбақа ўлдирман; ҳўқиз икки марта устма-уст бўкирса «ўлиб қолса нима қиласман» деб кечаси билан жинчироқ кўтариб чиқаман. Нима, мен дунёга жинчироқ кўтаргани-ю бақа ўлдиргани келганманми? Касал бўлиб қолсам нима бўлади? Бирон оғат келиб қолса нима бўлади? Бола-чақа пўстакнинг жунини ейдими? Қўлтиғимга ким киради? Акам бўлмаса, укам бўлмаса... Колхознинг йўриғи бошқа әкан, буни раёнкомимиз ўртоқ Аҳмедов тушунтириб бердилар. Мана шуларни хўп ўйладиму, мен сизга айтсам, ариза ташлашга жазм қиласмадим, ташладим.

Сафаров завқ билан тиззасига уриб ўрнидан туриб кетди.

— Эртадан кейин бўладиган мажлисимизда биринчи сўз сизники, Муйдин ака, биринчи сўзни сизга берамиш!

— А?— деди Мұхиддин ака чўчиб.— Нима дейман?

— Мана шу гапларни айтиб берасиз.

— Мен шу ёшга кириб қўпчилик ичидা «самоварчи, чой!» дёёлган одам әмасман. Гапимни сизларга гапирдим, бу ёгини ўзларинг бир нима қиласизлар.

- Үзингиз гапиринг. Ўрганинг.
- Э, мулла,— деди Муҳиддин ака,— ўрганиб нима қиласман, гап ўрганиб ваъз айлармидим!
- Ҳа, колхозга киргандан кейин унча-мунча ваъз айтишини ҳам билиш керак бўлади. Бусиз иш битмайди.
- Мен ҳамма ишни кетмон билан битираман.
- Шу чоққача ҳамма ишни кетмон билан битира ол-мапсиз-ку?
- Муҳиддин ака нима дейишини билмай туриб-туриб, ниҳоят Аҳмедовнинг гапини өслади:
- Шу чоққача мен ерга қул эдим,— деди.
- Сўзга Самандаров аралашди.
- Энди-чи?
- Энди,— деди Муҳиддин ака илжайиб,— кўп қатори хўжайин бўламан.
- Ҳа, баракалла,— деди Сафаров,— ерга хўжайин бўласиз, колхозга, катта хўжаликка хўжайин бўласиз. Хўжайин бўлгандан кейин киши ўз хўжалигининг кам-кўсти, унинг ривожи тўғрисида ўйлади, жон куйдиради; маслаҳат солади, маслаҳат олади, гап уқтиради, ўргатади, ўрганади, тортишади... Шуларнинг ҳаммасига лаб-даҳан керакми? Керак! Зарур! Кетмон чопишу даромад олишдан бошқасини билмайдиган, колхознинг ҳамма ишига куйиб-пишиб бош қўшмайдиган колхозчининг яхши отдан нима фарқи қолади? Борди-ю колхознинг бирон раҳбари бирон иш қилмоқчи бўлиб қолди-да, бу ишнинг номаъ-қуллигини, бундан колхозга фойда бўлмаслигини фақат сиз билдингиз, шу нарса кўпчиликнинг ўртасига ташланганда, мажлисга қўйилганда нима қиласиз, гапиришни билмайман деб индамай ўтира берасизми?

Муҳиддин ака, «фақат сиз билдингиз» деган гап хуш ёқиб, илжайди.

- Кам-кам ўрганамиз-да, мулла, кам-кам...
- Қачон?

Муҳиддин ака телпагининг орқасидан қўлини тиқиб бошини қашлади ва илжайиб:

— Майли, гапирсам гапира қолай,— деди.

Муҳиддин ака аризаси «дарров чиққанлиги» ва бундан ташқари яна алланимадан хурсанд бўлиб, қўнгли тўлиб чиқиб кетди. Бошқалар ҳам қўзғалди.

Сафаров уларни кузатиб қайтди ва аризаларни бирма-бир кўздан кечирди.

— Кори дегани ким ўзи?

— Шу ерлик бир деҳқон,— деди Самандаров.

— Деҳқонга ўхшамайди-ку?

Самандаров столнинг тортмасидан бир нима қидирап экан:

— Мен шу одам тўғрисида сиз билан гапиришмоқчи әдим,— деди,— у ҳам ариза берган. Мана аризаси. Ўзи ер ислоҳотидан бурун унча-мунча ери бўлган, унча-мунча одам ишлатган киши. Ислоҳотда ҳамма ортиқча ерини ўз иختиёри билан комиссияларга топширган, «ортиқча ҳамма еримни меҳнаткаш чоракорларга, эзилган батракларга бўлиб бериш учун ишчи-деҳқон ҳукуматига тутдим» деган, худди шундоқ деган.

Сафаров кулди.

— Ишчи-деҳқон ҳукуматига тутмасдан бошқа чора-си ҳам бор эканми?

— Ҳозир шундоқ деймиз-да, бошқа ер әгалари кечалари болта кўтариб одам овлаб юрган бир вақтда бу одамнинг шундоқ деб чиқиши катта гап әди.

— Ҳозир нима иш қиласди?

— Деҳқон. Ӯшандан бери ҳалол деҳқончилик қиласди. Уртадан кўра пастроқ, пастдан кўра юқорироқ хўжалиги бор.

— Колхозга олиш керак демоқчимисиз?

— Олмасликка ҳеч қандай асос йўқ. Мен бошқа нарса демоқчиман: ишнинг кўзини биладиган одам, пишиқ хат-

саводи бор, ҳозир колхозга раис топишдан ҳам кўра секретарь топиш қийинроқ, шу одамни секретарликка тавсия қилсак демоқчиман. Нима маслаҳат берасиз?

Сафаров ўринидан турди, нари-бери юрди, папирос чекди ва Самандаров ҳануз жавоб кутиб турганини кўриб:

— Бу тўғрида иккевимиздан ҳам кўра колхозчиларнинг ўзларидан яхшироқ маслаҳат чиқади,— деди.

— Секретарликка бир саводли одам керакми, йўқми?

— Колхозга саводли одам кўп керак. Ўқингани имконияти бўлган йигитлардан камида беш-олти кишини ўқишига юбориш чорасини кўриш тўғрисида ўйлайлик.

Самандаров, бу гап Сафаровга ёқмаганини кўриб, бошқа мавзуга кўчди: эртага қилинадиган ишлар, эртаниндин райондан келадиган агитаторлар тўғрисида гапириди.

6

Шундай қилиб, ўртаҳол деб аталган деҳқонларнинг кўпчилиги — бири «ҳукуматимиз деҳқоннинг зиёнига иш тутмайди» деган ишонч билан, бири-бирига өргашиб, бири таваккал қилиб, баъзи бирлари эса «ҳукуматнинг авзойи шу бўлса, бари бир қўймайди» деб колхозга кирди. Ишнинг бундай силлиқ боришидан ўзида йўқ хурсанд бўлган Самандаров елиб-югуриб, Сафаров айтмоқчи, «янги тугилтан колхоз хўжалигини йўргакламоқда» эди.

Сельсовет Найманга кўчиб, унинг биноси колхозга идора қилинди. Идоранинг бутун жиҳози битта стол, учта скамейка, битта ёғоч сандиқдан иборат эди.

Умумлаштирилган жониворлар Нуъмон ҳожининг каттакон қўрасига жойлаштирилди.

Тугадиган товуқларнинг тухуми, соғин сигир ва эчки-

ларнинг сути тўғрисидаги майдо-чуйда гапларни әътиборга олинмаганда ҳамма апоқ-чапоқ өди.

Водокачкалардан бирини тиклашда, тайёр сувга ариқ чиқаришда ўшанчалик ноаҳил бўлган капсанчилар ҳозир бўнчалик иттифоқ бўлиб қолганларига ўзлари ҳам ҳайрон эди. Колхозга правление сайлаш масаласида уларнинг эски савдолари бир қўзғаган бўлса ҳам, узокқа чўзилмади. Правлениега тавсия қилинган рўйхатга Қўшчинордан уч киши кирган экан, қўғазорликлар буларнинг ҳаммасига қарши туришди. Булардан бирининг «акаси, ўлиб кетган бўлса ҳам, Абдуваққос эшоннинг муридларидан бўлган» экан». Булар Қўғазордан одам кўрсатишди. Бақақуруллоқликлар буларга қарши чиқишли. Булар, гарчи ўз номзодларини кўрсатишмаса ҳам, правлениенинг кўпчилиги бақақуруллоқликлардан бўлишини хоҳлаганликлари кўриниб турар эди. Ҳар қалай бу масала ортиқча тортишувга сабаб бўлмади. Раисликка Бўтабой aka сайланди.

Иш шу хилда борса, кайфият шу бўлса, ҳадемай Капсанчиларда биронта ҳам якка хўжалик қолмаслиги муқарарар эди.

Бироқ шу кунларда Хўжақишлоқда колхозга қарши бир тўплон чиқдию бу тўполонда муштумзўларгина эмас, ҳатто айрим камбағал дэҳқонлар ҳам қатнашганлиги колхозга киришдан чўчиб турган одамларнинг юрагига ғулғула солиб қўйди. Бунинг устига «бориб-бориб хотинлар ҳам ўртада бўлармиш, ҳамма дошқозондан овқат еб, бир кўрпада ётармиш», «колхозга кирмаганларнинг мол-ҳоли, бутун рўзгори тортиб олинар эмиш» деган гаплар тарқалди. Шундан кейин якка хўжаликларнинг кўпи бисотида бор жониворлардан кўзи қийганини сўйиб, кўзи қиймаганини шаҳарга ҳайдай бошлади. Хўжақишлоқдаги фитна, хотинлар ва тирикчилик тўғрисидаги миш-мешлар, якка хўжаликларнинг бу қилмиши колхозчилардан бир қисмини ўйлантириб қўйди.

Бир куни кечаси Сафаров, колхоз идорасида агитаторлар билан сұхбат ўтказғанидан кейин, Бўтабой aka билан Найманга — сельсоветга борди. Самандаров, қошининг бири паст ва бири баланд, ниманидир дижқат билан ўқир, унинг қаршиисида курсида Тўлаган aka ерга қараб ўтирад әди. Сафаров кирганда Тўлаган aka ўрнидан туришини ҳам, турмаслигини ҳам билмагандай бир ҳаракат қилди. Самандаров хатдан бошини кўтартмади. Сафаров иккаласининг авзойини кўриб бирон дилсиёҳлик рўй берганини сезди-ю. беихтиёр оёқ учидаги юриб бориб диванга ўтиради. Бўтабой aka тикка туриб қолди. Самандаров хатни ўқиб бўлди, унинг устига кафтини қўйиб Тўлаган акага қаради-да, сохталиги билиниб турган мулоиммлик билан:

— Хўш, Тўлаган aka, нега? — деб сўради.

Тўлаган aka жавоб бермади.

— Мумкини? — деди Сафаров хатга қўл чўзиб.

Самандаров хатни унга узатди. Бу хат ариза бўлиб, Тўлаган aka колхозга кириш тўғрисида берган аризасининг қайтарилишини сўрар әди. Сафаров аризани икки бувлаб столга қўяр экан:

— Хўш, нега? Миш-мишларга ишондингизми? — деди.

Тўлаган aka яна жавоб бермади. Самандаровнинг қони қайнаб кетди.

— Мундай гапирсангиз-чи, забон борми?!

Тўлаган aka бошини қўтариб бунга бир хўмрайди-ю, уйнинг бурчагига қараб дўнгиллади:

— Аризадаги гапимдан бўлак гапим йўқ.

— Аввал боши нега ариза бердингиз?

Тўлаган aka бир неча марта оғиз ростлаганидан кейин, ҳамон уйнинг бурчагига қараганича жавоб берди:

— Муҳиддин «бирга кирайлик» деб қистай берганидан кейин юзидан ўтолмадим.

— Муҳиддин аризасини қайтариб олаётгани йўқ-ку!

— Қайтариб олмаса майли. Ҳар кимнинг гўри бошқа.
Мен қайтариб оламан.

Самандаров дўққа ўтди:

— Хўжақишлоқда хўжалар, уларнинг думлари колхозни бузишипти, сиз ҳам ўшаларга әргашмоқчимисиз! Хўжаларга дум бўлмоқчимисиз?

— Мен хўжа-пўжани билмайман. Дум әмиш, хўжа келиб менга дум бўлсин.

Самандаров кулиб юбормаслик учун лунжини шиширди ва жаҳл билан столнинг тортмасини тортиб унинг аризасини қидирган бўлди.

Сафаров «гапиринг» деб Бўтабой акага ишора қилди.

— Менга қара, ҳой, Тўлаган,— деди Бўтабой ака унинг елкасига қўлини ташлаб,— яхши иш қилмаётибсан. Ифвогарларнинг ифвосига, муштумзўрларнинг қутқусига учмагин. Бир вақти келиб пушаймон бўласан.

Самандаров ҳамон столнинг тортмасини титкилар әканд

— Буми, бунда калла бўлса әкан, пушаймон бўлса! Бу, ўшанда ҳам пушаймон бўлмайди, «пешонам шўр әкан, тоғлийм йўқ әкан» дейди қўяди!— деди ва бир қоғозни олиб унинг олдига ташлади.— Ана, олинг!..

Сафаров кўз ва қош ишораси билан Самандаровга «эвнада! Бу гаплар, бу муомала ортиқча» дегандай қилди. Тўлаган ака ўрнидан турди, қоғозни олиб, у ёқ-бу ёғига қаради-да:

— Шуни олиб борсам отим билан сигиримни берадими?— деди.

— Менга қаранг, Тўлаган ака,— деди Сафаров мулоҳимлик билан.— Сигирингиз, отингиз турипти, бирор еб қўймайди. Ўйланг, ўйлаб иш қилинг. Етти ўлчаб бир кес деганлар. Кейинги пушаймон асқотмайди.

— Сизга от ҳам йўқ, сигир ҳам йўқ,— деди Самандаров Сафаровга кўз қисиб.

Тўлаган ака унга бақрайиб қараганича секин курсига ўтириди.

— Иел.. Зўрликми? Зўрлик әкан-да!.. Йўқ, ука, меҳнаткашга зўрлик қилинадиган замон аллақачон ўтиб кетган. Ҳозир унақа закун йўқ.

— Меҳнаткаш ўз фойдасини билмаса, зўрлаб билдиришга закун топамиз.

— Мен ўз фойдамни жуда яхши биламан.

— Қачондан бери?— деди Бўтабой ака,— водокачкани тиклагани гишт, қум ташиш керак бўлганида отининг туёғига мих қоқиб, оқсатиб қўйган ким эди? А, ким эди? Сен әдинг! Водокачканинг тикланиши кимга фойда эди? Сенга фойда эди! Шуми ўз фойдангни билганинг? Қани, гапир тилинг бўлса!

Тўлаган ака нима дейишини билмай қолганини кўриб Сафаров беш-олти букланган аризани унинг қўлидан олди.

— Шундоқ бўлсин, Тўлаган ака, яна бир ўйланг. Аризани қайтариб олиш қочмайди. Ҳўпми?

Тўлаган ака индамасдан чиқиб кетди. Унинг бу ҳаракатини зарда қилди деб ҳам бўлмас эди, инсофга келди деб ҳам.

Самандаров унинг орқасидан қараб ўйланиб қолди. Бўтабой ака унинг кетидан чиқди. Сафаров тугаган папироснинг чўғидан иккинчисини тутатиб олиб, пари-бери юрди.

Тўлаган аканинг аризасини, оти билан сигирини қайтариб бериш эртага яна бир неча ариза тушувига йўл очиш, қайтариб бермаслик эса «колхозга берилган мол қўлдан кетар әкан» деган гап тарқалишига сабаб бўлиш деган сўз; бунинг ҳар иккиси ҳам колхозлаштириш ишини орқага суриши, хийлагина орқага суриши мумкин эди. Буни Сафаров ҳам, Самандаров ҳам яхши тушунар, уларнинг ҳар иккалasi ҳам шу тўғрида ўйлар эди.

— Ҳўш, натижа эътибори билан нима бўлди ёнди,— деди Самандаров кулимсираб.

Сафаров папироғ найчасининг ивиган жойини тиши билан узиб пуллаб ташлади-да, ўйчан жавоб берди:

— Натижга эътибори билайн... Шундок вақтларда қандоқ қилиш кераклигини райондан сўраш керак,— деди.

7

Кейинги уч-тўрт кун ичида колхоздан чиқиш ҳақида яна иккита ариза тушди. Сафаров бу масала ва ишда учраётган бошқа қийинчилклар тўғрисида гаплашиш, йўл-йўриқ олиш учун районга бормоқчи бўлиб турганда районнинг иккинчи секретари Шодиев келиб қолди. У. Капсанчиларда ниҳояти уч-тўрт соатгина турди, бу нинг ҳам ярмидан кўпини, негадир, дала айланиб ўтказди; кечқурун колхоз идорасида Сафаров, Самандаров ва Бўтабой акалар билан суҳбатлашди, лекин бу суҳбатда аҳвол билан танишиш учун буларнинг сўзини, фикр-мулоҳазаларини тинглашдан кўра кўпроқ ўзи гапирди, «кўпи билан бир ой ичида биронта ҳам якка хўжалик қолмаслиги, ҳамма юз процент колхоз бўлиши керак» деди. Самандаров ер остидан Сафаровга қаради. Сафаров бу қарашнинг маъносига дарров тушунди-ю, колхоздан чиқиш ҳақида аризалар тушганини айтиб, уларнинг молҳоллари тўғрисида йўл-йўриқ сўрамоқчи бўлган эди, Шодиев бақириб берди: «Демак, тушунтирумабсизлар! Демак, тушунтириш керак! Колхоздан чиқсан ҳар бир деҳқон учун партия билети билан жавоб берасизлар!» деди.

Шодиев кетди. Сафаров секретарнинг бу келиб кетишидан, хусусан унинг сўзларидан қаттиқ норози бўлса ҳам, руҳи бир оз тушган Самандаровнинг руҳини яна туширмаслик, ҳайрон бўлиб қолган Бўтабой акани гаранг қилмаслик учун ўзининг кайфиятини уларга билдирамади қисинча, тушунтириш масаласида секретарнинг гапларини қувватлади.

Эртасига яна иккита, индинига яна битта ариза тушди. Бу аризаларни худди бирор йиғиб туриб, колхоз нураётганини кўрсатиш учун жўрттага биттадан, иккитадан берәётганга ўхшар әди.

Ҳар куни бир кўнгилсиз ҳодиса рўй берадан бошлади. Бир кечада колхознинг қўрасига иккита ўғри тушиб, қоровулнинг оёқ-қўлини боғлаб, оғзиға тўппи тиқиб, учта сингир, иккита от, тўртта қўйни ҳайдаб кетди. Райондан келган терговчи уч кун овора бўлиб жиноятчиларнинг изини тополмади. Якка хўжаликлар ҳадеб мол сўя бергандан кейин Самандаров Сафаровдан бемаслаҳат, бунга қарши маъмурӣ чора кўроқчи бўлган әди, бу чора ҳали кўрилмасдан туриб акс натижага берди: якка хўжаликлар, «демак, бари бир олар экан» деб яшириқча яна кўпроқ сўядиган бўлишди. Қўғазорлик Маткарим деган кишининг ўғли агитаторларни уйга киргизмаган экан, Рўзимат уни «ҳозир районга олиб бориб тегишли жойга топшираман» деб судрапти, йигит ортиқча қўрслик қилиб қўл кўтарган экан, Рўзимат уни тутиб олиб роса урипти. Бу, воқеа катта жанжалга сабаб бўлиб, прокурор аралашиди. Гулом ака колхоз туфайли хотини билан қўйди-чиқди бўлипти. Қўшчинорлик Нематуллабува деган бир чор воғидаги уч туп ток, беш туп ўриқ, шу бу йил мевага кирган бир талай шафтоли, олча, беҳини кесиб ўтин қилипти. Бу одамнинг дараҳтга қўл ургани Сафаровни катта ташвишга солди. Сафаров Нематуллабувани чақиртириб аввал яхши гапирди, чол ўжарлик қилгандан кейин пўписа қилди. Чол ҳам бўш келмади: «Кесган бўлсан ўз қўлим билан эккан дараҳтимни кесдим. Колхозга дараҳт керак бўлса ўзи экиб олсин!» деб әшикни қаттиқ ёпиб чиқиб кетди.

Якка хўжаликларнинг бу хилдаги қийиқлиги, колхоздан чиқиш тўғрисида ариза бергандарнинг хархашаси натижасида юзага келган аҳвол колхозчилардан кўпига таъсир қилмай қолмади.

Булар бир-бiri билан худди жуда чарчаган, тиңчи-
ни ололмагандан жуда ҳам хуноб бўлган одамлардай гап-
лашар өди.

Буларнинг ҳаммаси, албатта, ёмон, хунуқ, ҳар бирى
бир хавф, лекин Сафаровнинг назарида булафдан ҳам
ёмонроқ, хунукроқ нарса, булардан ҳам каттароқ хавф
кўкламни қўлдан бериб қўйиш өди. Агар кўклам қўл-
дан берилса колхозчи кузда икки қўлини бурнига тиқиб
қфла берс...

Сафаров колхозга ўн қўллаб ёпишган активларни йи-
ғиб, агар кўклам қўлдан берилса, бунинг оқибати нима
бўлишини очиқ айтди ва одамларнинг авзойига зеҳн сол-
ди. Одамларнинг руҳи тетик өди. Бўтабой ака сўз олди.

— Ўртоқ Сафаров айтган гапларни ҳаммамиэ уқдик.
Тўғри, чоршанба куни далага қўш чиқиши керак. Лекин,
ҳақиқатга қараганда, уловимиз кам. Бу ҳам майли, бир
еви бўлар, вўр келса, бу ёғи ҳукуматчилик — район ёр-
дам берар; мени хавотирга солган нарса шуки, ҳозир якка
хўжаликларгина әмас, ҳатто ўзимизнинг колхозчилар ҳам
колхоз әрта-индин бузилса керак деган фикрда бўлиб ту-
рипти.

Самандаров луқма ташлади:

— Шу ерда ўтирганлар ҳам колхозчи! Менимча, бу-
лардан ҳеч бири бундай Фикрда әмас.

Ундан-бундан:

— Тўғри! — деган товушлар чиқди

— Йўқ, мен ҳаммаси демоқчи әмасман, баъзи бирла-
ри, — деди Бўтабой ака ва гапини йўқотиб қўйди. →
Тушунтиришимиз керак. Мана, ахир маслаҳат қилайлик,
ҳар қандай бўлганда ҳам кўкламни қўлдан бермаслигимиз
керак. Аввал боши ўзимизнинг колхозчиларга тушунти-
ришимиз керак. Сўвим шу. Бошқа сўвим бўлса өсимга
келгандан кейин айтаман.

Бўтабой ака ўтириди.

Маткарим аканинг ўрлини тутиб олиб урганидан бери ўз қилмишидан хижолат бўлиб мажлисда кўзга кўринмай бир чеккада ерга қараб ўтирадиган бўлиб қолган Рўзимат Бўтабой аканинг сўзи давомида бир неча марта бурнини жийирди. Ҳаммага зеҳн солиб ўтирган Сафаров буни пайқаган экан, Бутабой акадан кейин ўшанга сўз берди. Рўзимат, аввал, сўзлашдан бош тортди; кейин қизариб, ўрнидан турди-да, ерга қараб:

— Бўтабой акамга қарши гапирсам ҳам майлигами?— деди.

— Мажлисда кatta-кичик деган гап бўлмайди, гап келганда отангни ҳам аяма!— деди Сафаров.

— Гапирсам шуки,— деди Рўзимат кулимсираб.— Бўтабой акамнинг лабига учук тошмаганига ҳайронман. Туяни шамол учирса, эчкини осмонда кўр... Бизга бош бўлиб турган одам шунаقا деб ўтиrsa бошқалардан нима деб ўпкалаймиз! Колхозни «бузилади» деб четда қараб турган одамлар тузганмас, тузамиз деб бел боғлаган одамлар тузган. Бу киши «тушунтириш керак» дейдилар, тўғри, лекин «гапни айтгин уққанга, жонни жонга суққанга; гапни айтиб нетарсан, онаси бемаҳал туққанга!» Сиз куйиб-пишиб гапириб турганингизда сигирни маъраб қолса сизга әмас, сигирига қарайдиган одамга гап таъсир қиладими!

Қаҳқаҳа кўтарилди. Рўзимат ўзи кулмас, одамларнинг кулганига тушуна олмагандай, ҳайрон бўлиб турар әди.

— Сенинг ўзинг ҳамма нарсага дарров тушуна қолганимисан?— деди Сафаров кулги ёшини артиб.

— Тўғри, ўзим ҳам дарров тушунган әмасман. Мен уқтиришнинг кераги йўқ деётганим йўқ, бу гапни айтмайман. Мен, уқтириш билан бирга, колхозга жон-жаҳдимиз билан ёпишганлигимизни, колхоз бузилмаслигини кўрсатишимиз ҳам керак, демоқчиман. Бўтабой акам

«уловимиз қам» дедилар. Тўғри. Лекин биз колхозга жон-жаҳдимиз билан ёпишган бўлсак, колхозни бузилгани қўймаймиз десак, шу оз улов билан далага чиқиб мана шу оз улов билан кўкламни қойил қилишимиз керак. Шундоқ қилмасак колхозга жон-жаҳдимиз билан ёпишганимиз қаёқда қолди.

Қамбарали aka иргиб ўрнидан турди.

— Камол топ ука. Кўнглингга келмасин-ку, Бўтабой, ақл ёшда әмас, бошда деган одам билиб айтган... Рўзимат, ука, шу яхши гапингга яна битта гапни қистириб ўткин... Шошма, ўзим айта қолай. Тўғри, беш-үн кун қаттиқчиликни устимизга олиб шу оз улов билан кўкламни енгиб олсак, кўп одамларнинг кўзи очилиб кетади. Лекин яна битта гап бор: буларнинг кўзини далага қўш чиққанда очамиз деб қараб ўтирамизми? Далада ҳозир иш йўқми?

— Иш топилади!

— Қиласиз десак иш кўп! — деган товушлар чиқди.

Қамбарали aka ўтириди. Рўзимат ҳам ўтириди. Сафаров бурчакда пешонасини тириштириб ўтирган Болтабойга қаради.

— Қани, Болтабой, сиз нима дейсиз!

Болтабой дарров ўрнидан турди, қоп-қора мўйловини бураб, кулимсиради.

— Ўртоқ Сафаров «гап келганда отангни ҳам аяма» дедилар. Агар бемалол бўлса мен ҳам... Бетга айтганинг заҳри йўқ. Биз Бўтабой акани раис қилганимизда, ҳозир колхоз янги кўчиб кирилаётган ҳовли, бу киши эпчил келин бўлиб бу ҳовлини саранжом-саришта қилиб туради деб ўйлаган эдик. Лекин шу шундоқ бўлаётгани йўқ. Муштумзўрлардан олинган ғалланинг ярмидан кўпи Шокиржон бойваччанинг отхонасида захлаб ётипти. Жой йўқми? Бор, Мирҳайдарнинг уйи бўш, кўча эшигини бирор кўчириб кетипти. Қўйлар Қўғазорда қўй ейдиган янтоқ Бақақуруллоқда — бечоралар баъзан оч қолар экан;

ҳаммаси туэсираган бўлса керак, кирсангиз қўлингиизни ялайди. Жоди йўқ — сигирларга поя бутун ташланади. Отлар бўлса колхоз отхонасига киргандан бери қашлағич кўргани йўқ; таги камдан-кам тозаланади. Колхозга ўтган уйлардан биронтасининг томи куралмайди. Мана, мана шу ерни олайлик, бу ерни колхознинг идораси деб қўйиб-миз, ким айтади бу ерни шунча одам кириб чиқадиган жой деб? Қаранг, бу ерда хомут нима қиласди? Ҳум нима қиласди? Қиласман десанг далада ҳам, қишлоқнинг ўзида ҳам иш кўп. Биз қачон саранжомимизни оламиз, колхозга хамма киргандан кейинми? Шунга қараб ўтирамизми? Йўқ, бошқаларга қарап керакмас, бошқалар бизга қарасин, кўрсин, ўйласин...

Мажлис қизиб кетди. Қатнашувчиларнинг кўпчилиги озми-кўпми, яхшими-ёмонми, ишқилиб гапирди. Сафаров шунча одам гапиришини сира кутмаган эди. Булардан бири бўғилиб: «Шунча гап-сўз, шунча ҳаракатдан кейин колхоз бузиладиган бўлса қишлоқдан кўчиб кетаман», деб ҳаммани кулдирди. Мажлис әртадан бошлаб далага чиқишга қарор қилди ва колхоз хўжалигидаги камчиликларни тездан бартараф қилишни Бўтабой акага топширди. Бу ерда ҳозир бўлган кишиларнинг ҳар бири ўзи билан бирга бир неча кишини ишга олиб чиқишга сўз берди.

Далага биринчи куни эллик икки, иккинчи куни етмиш тўққиз, учинчи куни бир юзу йигирма олти, ундан кейин юз эликка яқин одам чиқди. Буларнинг ичидаги колхоздан чиқмоқчи бўлиб арива берганлардан ҳам уч киши бўлиб, бири Тўлаган aka эди.

Бу ҳол бирмунча одамларда ҳақиқатан колхозга ишонч шайдо қилди, бирмунча одамларни гангитиб қўйди, баъзиларнинг эса ғашига тегди.

Сал кунда колхоз хўжалиги бир қадар тартибга тушгандай бўлди. Бўтабой аканинг назарида, одамлар кўкламни «миниб олишга» бел боғлагандай кўринди.

Бироқ, далага қўш чиқиб орадан учтўрт кун ўтар-
ўтмас Бўтабой аканинг бутун умиди пучга чиқадиган
кўриниб қолди: одамлар бригадирнинг сўзига қулоқ сол-
майди, баъзилар далага фақат «хўжа кўрсин» учун чиқади...

Бўтабой дала айланиб юриб Тўлаганни кўриб қолди.
У колхознинг энг яхши қўш ҳўкизи билан ўз ерини ҳайда-
моқда эди.

— Ҳа, охун? — деди Бўтабой ака.— Сен Тарновбошидаги
ерни ҳайдашинг керак эди-ку, бу ерда нима қилиб турибсан.
Тўлаган ака бошини кўтармасдан:

— Тарновбошида нима қиласман? Тарновбошида менинг
ерим йўқ,— деди.

— Ахир, биз сени ҳали колхоздан чиқарганимиз йўқ-ку!

— Сенинг чиқаришингга қараб қўш маҳалини ўтказиб
юборайми?

Бўтабой ака уни чаппа-роста қилиб сўкиб кетди.

— Кимни сўкаётибсан! — деди Тўлаган ака дўғайиб
ва ўнг қўлини чопонининг енгидан сугуриб шудгордан
чиқди.— Қани, бу ёқса туш!

Бўтабой дарров отдан тушди.

— Нима дейсан, урасанми?

— Раис бўлсанг колхозингга раиссан, менга раис эмас-
сан! Нега сўкасан?

— Сен хумпарни ҳар қанча сўксам яна бўйнимда қарз
қолади. Сенга ўхшаган ёт унсурлар бутун қишлоқни... бул-
ватиб юборди.

— Ким ёт унсур? — деди Тўлаган яна дўғайиб.

— Үзинг ёт унсур бўлмасанг ҳам, қилиғинг ёт унсур-
нинг қилиғи.

— Кирмайман колхозингга, осмон қўлингда бўлса ус-
тимга ташлаб юбор!

Тўлаган енгини кийиб шудгорга кириб кетди.

— Кўраман кирмаганингни,— деди Бўтабой отланан-
ётсиб.— шу қилганингга сеними... бошим омон бўлса товуқ-

дай қийқиллатиб олиб кираман! Ҳўкизларни ҳозир жойига
элтиб қўй!

— Отим билан сигиримни бер, ҳўкизингни ол.
Бўтабой сўкиб-сўкиб жўнаб кетди.

8

Сталиннинг «Муваффақиятлар олдида эсканкираш» деган мақоласи чиққанлиги ҳақидаги хабар Капсанчилар қишлоғига шу куни кечқурун етиб келди. Бирпасда бутун қишлоқни миш-миш тутиб кетди. Эшикларнинг олдида, чорраҳаларда, қўшни деворига қўйилган шотиларда, ҳовлиларда дув-дув гап: «Масквадан районга «колхоз керакмас» деб газет келипти»; «Сталин каттакон газет юбориб «Ғаламисларнинг жазасини бериш керак» деган әмиш», «районда катта мажлис бўлар әмиш»; «моллар эгаларига қайтарилар әмиш»...

Бўтабой даладан қоронғи тушганда қайтди, бу гапларни аввал хотинидан, сўнгра, ҳовлиқиб келган Қамбаралидан эшишиб ишонмади ва икковини ҳам сўкиб берди. Сафаров билан Самандаров бугун эрталаб районга кетган эди, шундоқ бўлса ҳам Бўтабой колхоз идорасига борди. Идоранинг ҳовлисида ўн чоқли одам нима тўғридадир босинқи товуш билан сўзлашиб туар әди. Булар ҳам мишмишлар тўғрисида сўзлашаётган экан, Бўтабой энди қўрқиб кетди, лекин, буларнинг кўнглига баттар ғулгула солмаслик учун сир бой бермади.

«Бордию рост бўлса! Ҳаммаси әмас, ярми рост бўлганда ҳам жуда хунук гап-ку! Йўқ, буткул ёлғондир. Ёлғон бўлмаса ҳам эртага чатоқ бўлади: бунинг ёлғонлиги маълум бўлгунча далада иш тўхтаб қолади. Ё Сафаров билан Самандаров шунинг ҳидини билиб районга кетган эканми?»

Бўтабой ўйлаб ўйига етолмади. У «нима бўлса эртага

биларман» деб ётди, лекин ухлай олмади — кўкрагининг аллақаеридан бир нима чирс-чирс узилётгандай бўлиб кўзи очилиб кетар әди; ўринидан турди, ташқарига чиқди. Ҳамма ёқ жимжит. Аллақаерда мов бўлган мушуклар вағиллаб бутун қишлоқни бошига кўтармоқда. Бўтабой қайтиб уйига кирди, чироқни ёқмоқчи бўлганида кўнглидан «бордию иккови әртага ҳам келмаса нима бўлади» деган гап ўтди. У ҳар эҳтимолга қарши Самандаровнинг уйидан бир хабар олишга, агар келмаган бўлса районга боришга жазм қилиб пиёда Найманга борди. Бемаҳалда эшик тақидашидан хавотир олган Самандаровнинг хотини «кимсиз, товушингиз Бўтабой аканинг товушига ўхшайди-ку, улар районга эмас, у томонга — станцияга кетишган» деган гаплар билан уни қарийб ярим соат овора қилганидан кейин эшикни очди ва «Ҳали келишгани йўқ, ўзим ҳам хавотир бўлиб ўтирибман» деди. Бўтабой қайтди ва от олгани оғонага борди. Отбоқар ҳам хийла вақтгача эшикни очмай сўроқ қилди; ниҳоят, фонусни ёқиб эшикни очди ва фонусни, негадир аввал унинг қорнига, кейин юзига тутиб:

— Йўл бўлсин? — деди.

— Районга, районга! — деди Бўтабой шошиб,— бўлақол...

Отбоқар фонусни яна унинг юзига тутди.

— Шунақа қилиб колхоз синдими энди?

— Нега синади?

— Нега ҳаммаларинг ташлаб қочаётисизлар бўлмаса?

— Ким қочибди?

— Сафаров билан Самандаров эрталаб қочган экан, мана ҳозир сиз...

Бўтабойнинг жиги-бийрони чиқиб кетди.

— Қайси унсур айтди сенга бу гапни?! Ким айтди? Ким айтган бўлса эрталаб менга кўрсатиб берасан! Қани, кўрсатиб бермагин-чи! Сен ҳали унсурларнинг гапни кўтариб юрадиган бўлганмисан!..

Отбоқар фонуенин ерга қўйиб югурғанича отхонага кирди ва ҳаял ўтмай бир отни етаклаб чиқди-да, ўз гуноҳини шу билан ювмоқчи бўлгандай, яхшилаб эгарлаб берди. Бўтабой индамасдан отни миниб жўнади. Отбоқар фонусини дарров ўчиринб унинг кетидан қараб қолди.

Кўройдин. Бўтабой, бирорининг кўзига кўриниб яна бирон миш-мишга сабаб бўлмаслик мақсадида, қишлоқни четлаб, тўқайнинг этагидаги сўқмоқдан юрди; лекин, бир оз юриб Кўшчиорнинг тепасига келганида бу йўлдан юрганига пушаймон бўлди: тўқай томон ниҳоятда қоронғи, ваҳимали — ҳар бир дараҳт, ҳар бир бута остида бирор писиб ётгандай туюлар эди. У узун пичоғини қинидан суғуриб, тўқай томонга дам-бадам кўз қирини ташлаб борди; бир оз юргандан кейин ўзининг қўрқоқлигидан ўзи хижолат бўлди: наҳот кап-катта, шунча одамга бош бўлиб турган киши шунчалик қўрқоқ бўлса! У пичоғини қинига солди, қоматини ростлади, йўгалди, отининг бошини тортиб тўқайга рўйирост қаради. Бута ёки дараҳт остидан писиб ётган шарпа узоқда қолгандай туюлди. Бўтабой яна юрди, хийла ергача тўқайга қараб борди; шундан кейин дадил бўлиб тўқайдан кўзини олган эди, шарпа яна қимирлагандай, кўланка сингари кетидан эргашиб кетаётгандай бўлди. «Ҳаёл мени аҳмоқ қилаётитти,— деди ичидা,— бунинг жаззаси тўқайга буткул қарамаслик». Бироқ тўқайга қарамаслик мумкин эмас, ҳарчанд қилса ҳам кўзининг қири тушар эди. У жаҳл билан бурилиб эгарга чап сонини қўйди-да, қишлоққа томон қараб ўтириб олди ва ҳеч нарсадан қўрқмаётганлигини кимгайдир писандга қилгандай, отни ўз майлига қўйиб берди. От ҳам, әгасининг дилини билгандай, битта-битта қадам ташлаб, сўлиғини шиқирлатиб борар эди. Бўтабой бўлмағур хаёлларни бошидан чиқариш учун қишлоққа қараб кимнинг уйи қаерда эканини билишга уринди: «Мана бу Нуъмон ҳожининг айвони; ана, қари тути ҳам кўриниб турип-

ти. Ана у қорайиб турган қимнинг әшиги бўлса әкан? Уйнинг әшигими, ўпирилган соғонанинг тешигими? Бу уй мунча ҳам ўпирилган соғонага ўхшамаса! Ундоқ десам, бу уйларниң қайси бири уйга ўхшайди? Ҳаммаси ҳам эски, ўпирилган, қийшайган, чўқкан соғона, гўр... Кечаси узоқдан қишлоқ кўҳна бир қабристонга ўхшаб кўринар әкан-ку! Вой-вўй, қишлоғимиз шунаقا хароб, шунақа хунукми!..»

Бўтабой қишлоқдан юзини секин ўғирди, эгарга тўғри ўтириб, отга беихтиёр қамчи босди. От йўртди. Ваҳимали тўқай, ундан ҳам ваҳималироқ қишлоқ манзараси орқада қолди. Сўқмоқ катта йўлга туташган жойдан бепоён дала бошланар әди. Бир оздан кейин, кўрайдинда қопқорайиб ётган даладан илон изи бўлиб кетган оқиш йўлнинг уфқида бир нима «йилт» этди, сўнgra, бир нечта қора нуқта кўринди. Булар отлиқлар әди. Булардан бир қисми ўнг томонга — Азизтепа төмонга бурилди, қолгандари йўлда давом әтди. Бўтабой буларниң ичидаги Сафаров билан Самандаров борлигига қаттиқ ишонч билан отнинг бошини тортди ва кутиб турди. Анчадан кейин одамларниң ўзаро нима тўғрисидадир баҳсласиб келаётган товуши әшитилди. Булар ҳам Бўтабойни кўришди шекилини, кимдир: «Ким у?» деб қичқирди. Бўтабой «ошна» деб жавоб берди. Бешта отлиқ етиб келди. Буларниң ичидаги дарҳақиқат, Сафаров билан Самандаров ҳам бор әкан. Қолган уч кишини Бўтабой танимади. Булардан бири, нимча пўстин, қулоқлик телпак кийган новча, жуда ҳам йўғон бир киши олдинда Сафаров билан ёнма-ён келар әди.

— Ҳа, Бўтабой ака, йўл бўлсин? — деди Самандаров.

— Шундай... Сизларни кутиб олай деб чиқсан әдим. Бемаҳалга қолдиларинг.

Бўтабой буларни өлдинга ўтказиб орқадан юрди ва Самандаровга ёндашиб, ундан секин:

- Тинчликми? — деб сўради.
- Тинчлик,— деди Самадаров.
- Газет чиққани ростми?
- Рост.
- Энди нима бўлади?
- Нима бўлар эди, одамларнинг сараги саракка, ҳозирча пучаги пучакка чиқади, колхоз мустаҳкам бўлади.

Бўтабойга «колхоз мустаҳкам бўлади» деган гапнинг ўзи кифоя қилди. У, эркин нафас олди-ю, одинда, бояги йўғон одамга гап уқтириб кетаётган Сафаровга ҳалал бермаслик учун бошқа гап сўрамади. Зотан, бошқа гапнинг қераги ҳам йўқ эди.

— Мақола вақтида чиқди,— деди Сафаров,— айни вақтида чиқди. Энди иккинчи саволингизга жавоб берай... Иккита мисол: картошка билан калош масаласини олайлик... Йўқ, ҳайрон бўлманг, ҳозир тушунтириб бераман. Картошка янги келган вақтда одамлар экканми, еганми? Йўқ, узоқ вақт еган эмас. Картошка масаласида ташвиқот, ифво, синфий кураш тўғрисида сўз бўлиши мумкинми? Йўқ, чунки картошка ҳеч кимнинг, ҳеч қайси табақанинг думини босган эмас. Энди калош масаласини олайлик. Калош янги келганда одамлар кийганми? Кийган, лекин сал вақт ўтгандан кейин киймай қўйган. Нега? Калошнинг тагида «бисмиллоси» бор эмиш! Калош масаласида ташвиқот, ифво, кураш тўғрисида гапириш мумкинми? Мумкин, чунки калош ковушдўз косибларнинг ва вофурӯшларнинг бозорини касод қилган эди.

Бўтабой Самандаровни туртиб секин шивирлади:

— Нега ўртоқ Сафаровга ҳозир картошка билан калошнинг ғами тушиб қолди?

Самандаров «қулоқ солинг» деб ишора қилди.

— Мана,— деди Сафаров давом этиб,— мана шундан хуолоса чиқариб олишингиз мумкин. Биз учун колхоз

ҳам янгилик, колхоз масаласида картошка билан калош бирлашди дейиш мумкин.

Йўғон киши, худди ғозга ўхшаб, «fat-fat-fat» қилиб кулади.

Найманга яқинлашганда, уччала нотаниш отлиқ хайрлашиб, Бешсерка томонга бурилди. Булар кетгандан кейин Бўтабой то Самандаровнинг уйига келгунча, ҳамма мишишларни, ҳатто отбоқарнинг шубҳасини ҳам айтиб берди. Сафаров билан Самандаров қотиб-қотиб кулишди.

Самандаровнинг хотини ҳануз ухламаган экан, буларнинг кулгисини эшитиб эрининг бегамлигидан, бепарволигидан фигони чиқиб, вайсаб юриб чой қўйди, дастурхон ёзди. Бўтабой бетоқатлик билан уни овутган бўлиб бир неча оғиз сўз айтди-ю кейин Сафаровга қараб илжайди.

— Қани, эшитайлик...

Сафаров Самандаровга ишора қилди. У, хуржундан бир даста газетани олиб Бўтабой аканинг ёнига ўтириди ва ўртоқ Сталиннинг «Муваффақиятлар олдида эсан-кираш» деган мақоласини ўқишига киришди. Бўтабой тин олмай, гоҳ бош чайқаб, гоҳ қошини кериб, гоҳ «Ана! Ўз-ўҳ-ўҳ!» деб қулоқ солди.

— Қалай? — деди Сафаров ўқиш тамом бўлгандан кейин.

Бўтабой ўйлаб туриб:

— Бизнинг қишлоқдан ҳам маълумот борган эканда, а? — деди.

Сафаров қулди ва әртага қилинадиган ишлар тўғрисида гапирди.

Әртага, турган гап, далага одам чиқмайди. Бизнинг вазифамиз бу мақолани халқقا, биринчи навбатда колхозчиларнинг қулогига етказиш, ундан кейин кечроқ бўлса ҳам, кеч бўлса ҳам далага одам чиқариш. Оз бўлса ҳам юдам чиқиши шарт! Газеталар кун чиқмасдан агитаторларнинг қўлига тегсин. Ундан кейин соат тўққизга бу-

тун колхозчиларни йиғиш керак. Газетани ўқиймиз, ҳамма гапни очиқчасига гаплашамиз.

Бўтабой газетадан бир неча нусхасини қўйнига тиқиб Капсанчиларга жўнади. У, йўлакай, самоварчини уйғотиб әртага мажлис бўлишини айтди ва чойхонани «гулдай қилиб» қўйишини буюрди; сўнгра, отни қўйгани отхонага борди. Отбоқар уни кўриб ҳайрон бўлди-ю, лекин, ҳайрон бўлганини билдирамасликка тиришди.

— Хўш,— деди Бўтабой,— сен ҳали ёт унсурларнинг ифвосини тарқатадиган бўлиб қолдингми!.. Хўп, мен сен билан кейин гаплашаман. Ҳозир отлан, мана бу газеталарни ҳамма агитаторларга етказ!

Бўтабой қўйнидаги газеталарни олиб отбоқарга берди ва қайтиб кетар әкан, дарвоза олдига борганида қайрилиб:

— Бирон кишини уйғот, отхонага қараб турсин!— деди.

Бир неча минутдан кейин отбоқар чиқиб кетди.

9

Эртасига кун ёйилгунча газета бутун қишлоқни айланниб чиқди. Ёш-қари, әркак-аёл ҳамма қўчада; ҳамма бу гапларга ўзича, ўзи ёки ўз тўпининг тилини узун қиладиган бир маъно беришга ҳаракат қилар эди.

Колхозчиларнинг соат тўқизига чақирилган мажлислар саккиздан сал ўтгандеёқ бошланди. Якка хўжаликлар ва колхоздан чиқиши тўғрисида ариза берганларни учун мажлисга қатнашишдан ўзларини озод ҳисоблаган кишилар бу мажлис ва унинг белгиланган вақтдан олдин бошланганига ҳам ўзларича маъно беришди. Ҳалқ мажлис бўлаётган қизил чойхона атрофида айланиб қолди.

Қизил чойхонага одам сифишимас эди. Үртоқ Сталин-

нинг мақоласини Сафаров ўқиди. Ичкаридаги-ю ташқари-даги одамлар жим туриб қулоқ солишиди. Мақола ўқилиб бўлгандан кейин, қизғин музокара бошланиб кетди: баъзи одамлар «якка хўжалик бўлсанг сенга кун йўқ, деб бизни колхозга киргани мажбур қилишди» деган мазмунда гапириб, колхозни тарқатишни, муштумзўрлардан олинган нарсаларни ҳаммага бўлиб беришни талаб қилишди. Агитаторлар, активлар буларга қарши гапириб, деҳқон колхозга кириб аҳил бўлиб ишлагандагина пешонаси очилади дейишиди.

Сафаров сўзга чиқди. Яна ҳамма унинг сўзига жим туриб қулоқ осди.

Сафаров ниҳоятда осуда, баъзи деҳқонларнинг колхозга қарши гапирган гапларига ҳеч парво қилмагандай кўриниша ҳади. У колективлаштиришда йўл қўйилган хатоларни эътироф қилди, бундан кейин колхозга кириш-кирмаслик ҳар кимнинг ўз ихтиёрида эканини айтди-да, деҳқонларни колхозга киришга, уни мустаҳкамлашга, дастлабки қийинчиликлардан қўрқмасликка чақирди.

— Ўртоқ Ленин деҳқонларга қашшоқлик ва жаҳолатдан чиқиш учун бирдан-бир йўлни кўрсатиб берди,— деди у сўзининг охирида,— бу йўл колхоз йўли, социализмга олиб борадиган йўл. Колхоз бўлади, ўсади, мустаҳкамланади. Колхозга бугун қия қараган одамлар әртага колхозчи бўлишига аминман.

Мажлис тугагандан кейин ҳамма қизил чойхонадан чиқаётган одамларнинг авзойига зеҳн солди, бироқ буларнинг авзойидан қайсиси колхозда қолмоқчи, қайсиси чиқмоқчи эканини билиш қийин ҳади. Ҳамма чиқиб бўлгандан кейин Бўтабой баланд овоз билан бригадирларни чақирди, гарчи буларнинг қаерда ва нима иш қилиши маълум бўлса ҳам, ҳаммасига топшириқ берди. Бригадирлар ҳам, бу имонинг маъносига дарров тушуниб, қўл остила-ридаги одамларни баланд овоз билан чақириб йигишиди,

ҳаял ўтмай уловларини чойхонанинг олдидан ҳайдаб дала-га намойишкорона чиқиб кетиши. Бироқ бу тадбирлар халойиққа Бўтабой кўзда тутганча таъсир қилмади, чунки одам оз, кунда чиқаётган одамларнинг ярмидан ҳам оз эди.

Бўтабой куни бўйи бригададан бригадага чопиб, иш устида бирордан хуноб бўлиб ва бирорни хуноб қилиб, ҳориб-толиб кечқурун сельсоветга келди. Сафаров уни хунук бир хабар билан қарши олди: колхоздан чиқиш тўғрисида яна ўттиз саккизта ариза тушибди. Бўтабой, хат билмаса ҳам, столдаги қоғозларга кўз югуртирас экан, секин курсига ўтириди.

Шу чоқ эшик очилиб кимнингдир ғайри табиий «ҳа-ўҳӯ!» деб йўталган товуши эшитилди-ю, Тўлаган кириб келди. Бўтабой бу йўталнинг маъносига дарор тушунди, ранги оқариб, йўтални эшиитмаган ва Тўлаганни кўрмаган бўлиб деразадан ташқарига қаради. Бу йўтал Сафаровга ҳам тегиб кетди. У, ғаши келиб бир нима демоқчи бўлди-ю, ниманидир мулоҳаза қилиб айтмади ва хатдан бошини кўтармай:

— Ғалати йўтал чиқарисизми, Тўлаган ака? — деди.

— Таъбим-да. Подшо одам эканман! — деди Тўлаган ва ўзини гурс этиб диванга ташлади, узун кекирди; нос отди, лабида қолган юқини пулфаб, кафтини тиззасига артди.— Энди, ўттоқ Шапаюп, шиггиймиз билан отимижни бешаларинг ҳам бўлар...

— Ҳўп. берамиз.

Жимлик чўқди. Тўлаган анчадан кейин носни тилининг устига олиб қаттиқ пуркади. Нос сочилиб, унинг бир неча донаси сакраб-сакраб стол тагига кириб кетди. Бўтабой ҳарчанд ўзини босишга тиришса ҳам бўлмади — бошқа бирон қаттиқроқ сўз айтиб юбормаслик учун:

— Бу ерга нос туфланмасин! — деди.

Тўлаган унинг сўзига жавоб беришни ҳам лозми кўрмади.

— Ер тўғрисида янги гаплар чиқиб турипти, бу қанақа бўлди? — деди.

— Қанақа гап экан? — деди Сафаров.

— Бизга бошқа жойдан ер берилар эмиш...

— Тўғри, — деди Сафаров бошини кўтариб, — ерингиз колхоз ерига суқилиб кирган бўлса бошқа жойдан беришга мажбурмиз.

— Мен бошқа жойдан бериладиган ерни хоҳламасам-чи.

— Хоҳлаган жойингиздан берамиз-да.

— Уни ҳам хоҳламасам-чи.

— Ўзингиз ўйлаб кўринг, Тўлаган ака, колхознинг ери парча-парча бўлса...

Бўтабой тоқат қилолмади:

— Ер ҳукуматники, ҳукумат қаердан беришини хоҳласа ўша ердан беради!

Тўлаган ялт әтиб унга қаради.

— Қанақа ҳукумат?

Бўтабой унга тик қаради.

— Ишчи-дехқон ҳукумати!

— Ишчи-дехқон ҳукумати? Ҳукумат ишчи-дехқоннинг кими, ахир? Ҳукумат ишчи-дехқонники бўлса, ўша дехқон мен бўламан! Мен бўламан!

Бўтабой нима дейишини билмай, ёрдам кутиб, Сафаровга кўз қирини ташлади. Сафаров буни фаҳмлаб Тўлаган акага қаради ва жуда совуққонлик билан:

— Қаерда ўтирибсиз, Тўлаган ака? — деди.

Бўтабойни мот қилганига мағрур бўлган Тўлаган келилиб:

— Сельсоветда ўтирибман, нима әди? — деди.

— Сельсовет ўша ишчи-дехқон ҳукуматининг қишлоқдаги вакилими?

— Вакили бўлса зўрлик қиласидими?

— Йўқ, ундоқ демоқчи эмасман. Сиз «ҳукумат ишчи-

дэҳқонники, ўша дэҳқон мен бўламан» дедингиз. Тўғри, мен биламан, сиз «ўша дэҳқон»сиз, лекин сельсоветга кириб келишингизни, қилиқларингизни, ўтиришингизни кўрган, гапларингизни әшифтган киши, сизни «ўша дэҳқон» дермикин?

Тўлаган бирдан ҳовридан тушди, тушдигина эмас, гаранг бўлиб қолди.

— Нима, мен... нима дедим? Нима қилдим?

— Майли, ҳеч нима деганим йўқ, ҳеч нима қилганим йўқ десангиз ўзингиз биласиз... Ешлик чоғимда мен бир ҳикоя әшифтган эдим: хон бир бегуноҳ одамни, ғазабига олиб, тошбўрон қилдирипти, «тош отмаган одам қолмасин» деб ўзи тепасида турипти. Оломоннинг ичидаги ўша одамнинг укаси ҳам бор экан. Ука — жигар, тош отай деса жигарчилик, отмай деса хон турипти; ниҳоят, тўнидан увада юлиб олиб отипти. Шунча тош текканда «вой» демаган бояги одам укаси отган увада текканда «дод» деган экан. Шунаقا, Тўлаган ака, душман отган тошдан жигар отган увада қаттиқ тегади!

Тўлаган ерга қараб жим қолди. Унинг чакка томирлари бўртди, бурнининг учи йилтиради.

— Нос чекишни ўрганибсану, қаерга туфлашни ўрганимабсан-да? — деди Бўтабой одатдагидан йўғонроқ товуш билан. Сафаров унга «бас, гапирманг» деб ишора қилди.

Тўлаган чурқ этмай хийла вақтгача ерга қараб ўтирганидан кейин бошини кўтариб:

— Жаҳл келганда ақл қочади,— деди.

— Нимага жаҳлингиз келди? — деди Сафаров кулимсираб.

— Бўтабой мени сўкди, «товуқдай қийқиллатиб бўлса ҳам колхозга олиб кираман» деди...

Сафаров Бўтабой акага қаради. У шошиб:

— Тўғри,— деди,— шундоқ деганман, лекин ичимдан

чиқариб айтганим йўқ, ўртоқ Шодиев юз процент бўлсин деганлари учун айтганман. Ҳамма қатори мен ҳам хато қилганиман...

— Сен хато қилган бўлсанг, мен ҳам хато қилдим, ора очиқ,— деди Тўлаган қистаб келаётган кулгидан лаби пиғираб.

Бўтабой кулиб юборди ва:

— Ҳўп, ора очиқ... ярашдикми әнди?— деб қўл узатди.

Тўлаган иргиб ўрнидан туриб уни қучоқлади.

— Ярашдик!.. Мендан кўпроқ ўтди шекилли... Уртоқ Сафаров, мендан ўтди, сизнинг олдингиизда беадабчилик қилдим.

— Ҳўп, узр сўрамай қўяқол,— деди Бўтабой.— Колхозда қоласанми?

— Йўқ әнди, ўртоқ, қўй, кирсак кейинроқ киармиш...

— Кейинроқ кирсанг олмаймиз-да, майлими?

— Оларсан...

— Йўқ, олмаймиз!

— Хайр, олмасанг... ота-бобомиз, ахир... умрнинг кўпи ўтиб ози қолган, бу ёрини ҳам бир бало қилиб ўтка-зарман.

Тўлаган оти билан сигири қачон ва қаердан берилшини сўрамасдан, қўлини кўксига қўйганича ёнбош юриб чиқиб кетди.

Бўтабой колхоздан чиқиш тўғрисида яна ўттиз сакқизта ариза тушганидан катта ташвишга қолиб, Тўлаган тўғрисида ортиқ гапирмади.

— Уртоқ Сафаров,— деди анчадан кейин.— Ўттиз сакқиз кишининг кўпи от-уловлик ўрта деҳқон бўлса керак; булар уловни қайтариб оладиган бўлса, кўкламни қўлдан бериб қўймасмикимиз?

Сафаров кулди.

— Яна ваҳимами?

— Йўқ, мен.. шуларнинг от-уловини кузга яқин қайтарсанмикан дейман-да.

Сафаров кулди.

— Биттасининг «ўша деҳқон мен бўламан» деб келгани камлик қилдими? Ўрта деҳқонни ранжитиб бўлмайди. Ҳа, нега тағин бўшашиб кетдингиз? Буларнинг уловини қайтариб берадиган бўлсак, муштумзўрларнинг улови қолади-ку, ахир! Демак, ишлаш мумкин. Эҳтимол кетмон билан ер ағдаришга ҳам тўғри келар. Майли,— деди Сафаров бир оз ўйланиб туриб,— ҳукумат ёрдам беради. Янги йилга районда машина-трактор станцияси ташкил қилинади деб эшитдим. Бу йил қийинчилик бўлса, янаги йил... Ишқилиб бу йил тизгинни қўлдан бермасангиз бўлгани... Ҳўп, бу тўғрида эртага правлениеда гаплашамиз. Бориб ухланг, кўзларнингиз қизариб кетипти.

Бўтабой уф тортиб ўрнидан турди.

10

Ери колхоз ерига суқилиб кирган якка хўжаликлар бошда жириллаб, арзу дод қилиб у ёқ-бу ёққа югуришган бўлса ҳам кўкламнинг қизгин пайтини ўтказиб юбормаслик учун бошқа жойдан ер олишга рози бўлишди.

Майда жониворларнинг ҳаммаси ва соғим сигирлар өгаларига қайтарилди, йўқолган ёки ўлган жониворларнинг товони «колхозга пул тушганда» тўланадиган бўлди. Уловнинг бир қисми қайтарилди, бир қисми «катта мажлисдан»кейин бериладиган бўлди; лекин бу қанақа мажлис эканини, қачон бўлишини, бу гап кимдан чиққанини ҳеч ким билмас әди. Бу ҳақда Бўтабой акадан сўрашса у: «Ҳозир мажлиснинг мавридими, одамлар нима билан банд эканини кўриб турибсизлар-ку», деб жавоб берар әди.

Колхозда кўпроқ қўшчинорликлар қолгани учун колхозга «Қўшчинор» ном бўлиб қолди.

Колхоз тинчишга тинчидию, лекин кўклам иши ниҳоятда судралди. Колхозга улов билан кирган кишиларнинг кўпчилиги нима иш қилиш ёки нима иш қилинганинига эмас, ўз уловининг қаерда ва кимнинг қўлида ишлайдиганлигига қизиқар, илож тополса уни ўз қўлига олиб мумкин қадар камроқ ишлатишни хоҳлар әди. Баъзи одамларнинг қўли ишда бўлса ҳам, хаёли ўз ерида. Бригадирларнинг сўзига деярли ҳеч ким қулоқ солмайди. Баъзи одамлар дехқончиликда кўпдан ва ҳаммага маълум бўлган нарсалар тўғрисида ҳам маслаҳат қилгани идорага боришади, идорада ҳеч ким бўлмаса, куни бўйи кутиб ўтиришдан ҳам тойишмайди.

Ер бир нав ҳайдалди, әкин бир нав экилди, лекин шундоқ бўлса ҳам, ҳосил әкинни ёзда қандоқ парвариш қилинишига ҳам боғлиқ бўлгани учун одамларнинг кўнгли тўқ әди.

Июннинг ўрталарида Сафаров кетадиган бўлди. Шу муносабат билан Бўтабой аканинг уйидаги кичикроқ зиёфат берилиб, Сафаровнинг шаънига кўп яхши гаплар айтилди, бешикдан чиққан колхозни вояга етказиш тўғрисида кўп ваъдалар берилди. Сафаров бундан кейин биринчи навбатда қилинадиган ишлар, ҳозир ишда мавжуд бўлган камчиликлар ва буларнинг сабаблари тўғрисида гапириб активлардан кўпининг, шу жумладан Бўтабой аканинг ҳам камчиликларини қаттиқ танқид қилди. Активлар уни зўр минннатдорлик билан куватиб қўйишиди.

Бу кунларда Бўтабой ота-онаси узоқ сафарга кетиб, бутун рўзгор ўзига қолган ёш йигитчадай бўлиб қолди: бир томондан рўзгор масъулиятини сезиб юраги орқасига урса, иккинчи томондан шундай масъулиятни бўйнига олишга қодир одам бўлганига ғурурланиб оёқ босгани жой тополмас әди. Ҳадемай масъулият ҳиссини ғурур

енгди! Бутабой ҳеч кимни ўзига тенг кўрмайдиган, агар бироғ бирон нотўғри ҳаракатини айтса, бунинг ҳақ эканлигини ўзи билиб турса ҳам, обрўни қўлдан бермаслик учун уни оёқ ости қилишга тиришадиган бўлиб қолди. Оқибат правление аъзолари четга чиқиб қола бошлади, бригадирларнинг бригада аъзолари орасида бўлган унчамунча обрўйи ҳам ер билан яксон бўла борди. Натижада раиснинг иши кундан-кун оғирлаша кетди. У кечаю кундуз тинмас, отбоқарнинг ишидан тортиб баъзан, адациб, сельсоветнинг ишигача аралашар, шунча вўр беришга қарамай, өкин парваришининг кўнгилдагидай бўлмаётганидан бўғилиб одамлар билан уришар, бақирар, баъзан «менинг ўрнимда бирон бегайратроқ одам бўлганда колхознинг аҳволи нима кечар эди экан?» деб ўзига ўви савол бериб қўяр эди.

Мана шу кунларнинг бирида районда колхоз раисларининг мажлиси бўлиб, район ижроня комитетнинг раиси Мавлонбеков колхозларни ташкилий-хўжалик жиҳатдан мустаҳкамлашда навбатдаги вазифалар деган мавзууда доклад қилди. У оёққа босиб дадил қадамлар билан олга бораётган колхозларнинг тажрибаларини умумлаштириди, ҳали қаддини ростлай олмаган бирмунча колхозларнинг ишидаги камчиликларни таҳлил қилиб, сабабларини очиб берди. Мувокарага чиққанлардан бир-икки киши сўз ҳали қаддини ростлай олмаган колхозлар тўғрисида кетганда «Кўшчинор» колхозини ҳам тилга олди. Бу Бўтабойга жуда-жуда малол келди. У энг кейинда шумшайиб ўтириди, сўзга ҳам чиқмади. Буни Аҳмедов пайқаган экаи, мажлисдан кейин уни кабинетга таклиф қилди. Бўтабой бу таклифни «сени ноҳақ танқид қилишди» деган маънода тушунди-да, кабинетга кира солиб ўзининг қанчалик ҳаракат, ғайрат, қанчалик жонкуярлик қиласётганини танқид қилган одамлар «Кўшчинор»даги шароитдан бехабар эканни тўғрисида куйиб-пишиб узоқ гапирди. Аҳмедов унинг

сўзини бирон марта ҳам бўлмасдан тек ўтириб тинглади. Бўтабой колхоз ишидаги камчиликлар тўғрисида гапириб, учинчи бригада бошлиги Болтабойни бригадирликдан бекор қилмоқчи эканини айтди.

— Тўнг, қайсар одам, менинг обрўйимни тўкаётитпи! — деди.

Аҳмедов хиёл табассум қилди ва қора, қалин сочларини бармоқлари билан секин-секин тараф экан:

— Болтабой Раҳимовми? Илгари дуруст эди шекили? — деди.

— Дуруст эди, лекин ҳозир бузилди!

— Шундоқми? — деди Аҳмедов ва келиб диванга, Бўтабойнинг ёнига ўтирди. — Нега бузилди экан, суриштирмадингизми?

Бўтабой нима дейишини билмай қолди ва Аҳмедовнинг жавоб кутиб турганини кўриб:

— Билмадим... — деди.

Аҳмедов кулди.

— Ана холос... Раис — правлениенинг боши, бригадир — правлениенинг қўли; бош қўлининг оғриганини билмаса... бу қандоқ бўлди? Бошқа бригадирлар-чи, бошқалари бузилгани йўқмикин?

Бўтабой бошқа ҳамма «қўллар»дан хабардор эканини писанда қилиш учун дадил:

— Бошқалари яхши, ҳаммаси яхши! — деди.

— Ҳўп, Болтабой обрўйингизни тўкаётган бўлса, уни бригадирликдан бекор қилиш билан иш ўнтарилса... ўзларинг биласизлар. Лекин, Бўтабой ака, масалага кенгроқ, нафсониятга унча берилмай, холисроқ қараш керак бўлар. Сиз мажлисда тажанг бўлиб ўтириб кўп нарсаларни эшитмаган, эшитган гапларингиздан кўпининг мөҳиятига ақл юргутириб кўрмаган бўлишингиз мумкин. Жаҳл келганда ақл қочади...

Бўтабой бир оз хижолат бўлиб илжайди.

— Тўғри, баъзи гаплар қаттиқ ботган бўлиши мумкин...

Аҳмедов унинг сўзини бўлди:

— Гап бирор яхши, бирор ёмон эканлиги тўғрисида эмас, колхоз янги даврга кирганлиги, янги даврнинг янги талаблари тўғрисида кетаётитти. Биз мана шуни тушуши масак, шу талабларни кўрмасак, шунга қараб оёқ олмасак обрў орттира олмаймиз. Обрўмиз бўлмагандан кейин обрў тўғрисида мана бунаقا ташвиш тортиб ўтиришнинг ҳам маъноси қолмайди. Кўнглингизга келмасин, мен Бўтабойни ёқламоқчи эмасман, правлениенинг, колхозчиларнинг раъйи шу бўлса бунга на сиз қарши чиқа оласиз, на мен. Шу муносабат билан шуни айтишим керакки, ҳозирги янги шароит биздан одамлар билан ишлашни, яна ҳам кўпроқ ишлашни талаб қиласди. Бунинг учун одамларимизнинг ҳаммасини, ҳар бирини ҳар томонлама яхши билишимиз керак. Буларни билмасак, ҳар қайсисини ўзига лойиқ, ўзига муносаб жойга қўя олмаймиз, ўстира олмаймиз, кўтара олмаймиз. Унда ўзимиэга зўр келади, ҳамма ишга ўзимиз қўл уришга мажбур бўламиз, баъзан бақирамиз, лекин ишимиз ривож топмайди...

Сукут қилиб ўтирган Бўтабойнинг пешонаси йилтиради, қулоқлари қизарди. Аҳмедов янги даврнинг янги талаблари деб айтган нарсаларининг бирмунчаси ҳақиқатан янги вазифалар бўлса ҳам, кўпчилиги «Қўшчинор»нинг ишида бўлган кечаги, бугунги ва бугун хаспўшлангани билан әртага қалқиб юзага чиқадиган камчилик ва хатоликлар эди.

— Ҳақиқатда тўғри, ўртоқ Аҳмедов,— деди Бўтабой ҳамон сукут қилганича бош бармогининг орқаси билан бурнининг икки ёнини артиб,— камчилик ва хатоларимиз кўп. Бир томондан ўқимаганлик бўлса, иккинчи томондан ўзингиз биласиз...

Аҳмедов унинг сўзини бўлди:

— Важ кўрсатмайлик, Бўтабой ака,— деди кулиб,—
агар шуларни хато ва камчилик деб билсак важ кўрсатмай-
лик! Бу хато ва камчиликларнинг сабаблари тўғрисида
гапирсангиз йўриги бошқа эди. Тўғри, саводингиз йўқ,
ўқимагансиз. Нега ўқимагансиз деялмайман, лекин нега,
нима учун ўқимаётисиз дейишими мумкин. Бунга нима важ
кўрсатасиз? Кўрдингиҳми, кўрсатаётган важингизнинг
ўзи важга муҳтож...

Бўтабой кулиб юборди.

— Ҳамма гапингиз ҳақ, ўртоқ Аҳмедов...

Аҳмедов ўрнидан туриб уйни бир айланиб келди-да,
Бўтабойнинг қаршисида тўхтади.

— Мана шу тўғриларда сиз ҳам бир ўйланг, одамла-
рингиз билан гаплашинг; мен ҳам ўйлай, одамлар билан
гаплашай, ана ундан кейин яна бир гурунглашайлик.
Хўпми?

Бўтабой нимадандир таъби очилиб, нимадандир кўнг-
лига ғашлик тушиб чиқиб кетди.

Орадан уч-тўрт кун ўтгач, Бўтабой келиб колхознинг
ишини яхшилаш тўғрисида нималар қилмоқчи эканини
Аҳмедовга батафсил сўзлаб берди. Аҳмедов бу тадбир-
ларнинг ҳаммасини маъқуллади ва ўзининг ҳам мўлжал
ва таклифларини айтди. У, чоралардан бир чора тарзида
Бўтабойга ёрдам учун «Қўшчинор»га бир кишини юбо-
риш мўлжали борлигини ҳам яширмади. Бу гапни эшитиб
Бўтабой бир оз бўшашиди. Аҳмедов буни пайқаб:

— Бу одамга қандай вазифа беришни ўзларингга ҳа-
вона қиласмиш, лекин ҳосилот кенгашига раис қилсаларинг
куймайсизлар,— деди.

Аҳмедов бу гапни чин кўнглидан айтиётганини билса
ҳам Бўтабой хотиржам бўлиш учун яна:

— Раис бўлиб борса қандай бўлади?— деб сўради.

Бўтабой бу саволни нима учун берганини билиб Аҳ-

медов қошини чимириди ва жавоб беришни лозим кўрмай, бошқа гапга ўтди. У «Қўшчинор»га юбормоқчи бўлган одами ким эканини айтиб, унинг тўғрисида батафсил сўзлаб берди.

Бу одам Баҳрободда ер ислоҳотидан кейиноқ собиқ батраклардан ташкил топган «Қизил қўшчи» колхозининг раиси бўлиб, колхознинг ҳозир «Қўшчинор» бошдан кечираётган гўдаклик чоғларини кўрган, уни балофатга етказишда аччиқ-чучукни татиб, тажрибали бўлиб қолган Үрмонжон Омонов эди.

11

Даромад тақсимотидан кейин Үрмонжон бола-чақаси билан кўчиб келди ва Қўғазордаги собиқ водокачка харобасини Бўтабойнинг ёрдами билан ўзига уй қилиб олди.

Колхоз правлениеси Үрмонжонни ҳосилот кенгашининг раиси қилиб тайинлади, уни правление составига киритди ва бу қарорни колхозчиларнинг умумий мажлисига киритмоқчи бўлди.

Үрмонжон бир неча кунни дала айланиб, одамлар билан танишиб, идора ишларига разм солиб ўtkазди. Идоранинг бутун иши колхозчиларнинг номлари, қорамол ва уларнинг сони, омбордан кимга нима берилгани ёзилган битта дафтар, йигирматага яқин турли-туман плакат, ярим қоп ҳар хил китоб ва газеталардан иборат эди. Раис саводсиз бўлгани учун ҳамма ёзув-чизув ишлари унга аввал «холис» қарашиб юрган ва кейинчалик ўз-ўзидан секретарь бўлиб қолган Абдусамадқорининг қўлида эди.

Абдусамадқори әртадан кечгача идорада ўтирас, иш билан келган колхозчиларга кўпинча раис, баъзан правление номидан жавоб-муомала қилар эди.

Ўрмонжон келиб ишга тушган кундан бошлаб қори унинг пинжига киришга ҳаракат қилди. Ўрмонжон борида бирор бирон тўғрида мурожаат қилса қори илжайиб дароров Ўрмонжонга қарап ва «буни фақат Ўрмонжон акам биладилар» ёки «Ўрмонжон акам турганларида мендан сўрайсизми» дер, бундай вақтларда Ўрмонжон: «Сиз-чи, билмайсизми» деса «ҳи-ҳи, сизни райком юборган, партия аъзосига ҳамма нарса аён бўлади» деб қўяр эди. У секин ва майин товуш билан гапирар, ҳеч ким билан баҳслашмас, мушукка ўхшаб мулоийм қадам босар эди.

Бир куни қори идорада йўқ вақтида Ўрмонжон Бўтабойдан сўради:

— Бу одам колхозга қачондан бери секретарь?

Бўтабой ака кулди.

— Ўзим ҳам билмайман, Ўрмонжон! Колхоз ташкил бўлгандан кейин менга ёзув-чизув ишига қарашиб юрган эди, бориб-бориб ўз-ўзидан секретарь бўлиб қолди. Правлениедан ўтган эмас, шундай бўлса ҳам, ишлаб юрипти. Ишchan, жуда-жуда ишchan одам. Ишнинг кўзини билади. Колхознинг бутун ҳисоб-китоб ишларини шу эплаб турипти.

— Шундоқми,— деди Ўрмонжон кулимсираб,— лекин идора ишида унинг ишчанлигини кўрмадим. Колхознинг ҳисоб-китоб ишлари ҳам сиз ўйлаганчалик яхшига ўхшамайди. Бундан ташқари қорингиз алланечук... шиалкимроқ!

— Ҳали сиз янги одамсиз,— деди Бўтабой ерга қараб,— қорини билмайсиз.

Ўрмонжон индамади, лекин шундан кейин идора ишига аралашадиган бўлди.

Ўрмонжон қариялар билан ўтказган бир суҳбатида алланимадан гап чиқди-ю, кимдир ер ислохотидан бурун бўлган дарё тошқини ҳақида гапирди. Бу тошқинда олти минг танобдан ортиқроқ экинни сув босган, агар Балиқ-

чидан ўн саккизта қайиқ ўз вақтида етиб келмаганда талай одам ўладиган бўлган экан. Бир чол герман урушидан бурун бўлган тошқинда князнинг чўчқаларидан иккитаси, капсанчилардан саккиз киши гарқ бўлиб ўлганини ҳикоя қилди. Шу хилдаги тошқинлар вабо йили, оқпошшо Мингтепа қишлоғини тўпга тутган йили ва ундан илгарилари ҳам бўлган экан. Ўрмонжон бу йилларни аниқроқ суриштириб қараса, тошқин тахминан ҳар ўн-ўн икки йилда бир марта ба бўлар экан. Бу, янги туғилган қўзичоқдай зўрга оёқ узра турган колхоз учун катта хавф туғдирар эди. Ўрмонжон бу гапни Бўтабойга айтди. Бўтабой шуни Ўрмонжондан бурунроқ билмаганига ичида афсусланди-ю индамади, әртасига қиём вақтигача юриб Кўғазордан Кўшчиноргача бутун дарё бўйини кўздан кечирди. Кўшчинордан бир ярим километр юқорида бири юз эллик, иккинчиси яқин юз қадам келадиган иккита даҳана бўлиб, тошқин суви шу ерлардан ўтар экан. Бу даҳаналарга дамба қилиш керак эди. Бўтабой бу масалани дарров правлениега қўйди. Тошқин хавфидан қутулиш учун дамба қилиш зарурлигини ҳамма бир оғиздан таъкидлари, лекин бу ишни қачон бошлаш масаласига келганда Ўрмонжон Бўтабойнинг бетўхтов бошлаш керак деган фикрига қарши чиқди:

— Ҳозир тошқин, дамба тўғрисида оғиз очиб бўлмайди. Колхоз шу аҳволда кета берса кузда ҳам айтиб бўлмайди. Колхознинг бу йилги даромад тақсимотидан оладигани ҳозирдан маълум. Бу даромад билан колхозчи тўймайди. Қорни тўқ бўлмаган колхозчига узоқдаги думбадан кўра яқиндаги ўпка яхшироқ кўринади. Агар биз ҳозир колхозчига дамбада ишлайсан десак колхозчи бу ишни қўйиб балиқ овлайди. Менимча, биз ҳозир колхозни бир қадар оёқча бостириш тўғрисида ўйлаб, ундан кейин дамба масаласини қўйишимиз керак. Шошиб керакмас, чунки бу йил тошқин хавфи йўқ.

Бўтабой шундай ташаббуси йўққа чиқаётганини кўриб асабийлаши.

— Тошқин хавфи бу йил бўлмаса, янаги йил... ишқилиб борми? Дамба қилиш керакми, йўқми?

— Мен бу билан дамба масаласини кун тартибидан чиқариб ташлаш керак демоқчи эмасман. Дамба масаласи — асосий масала. Мен бу ишни нимадан бошлаш кераклиги тўғрисида гапираётибман. Агар лозим кўрсангиз мулҳазаларимни кенгроқ айтиб бераман.

Ўрмонжон бир дамбагина эмас, умуман шундай ишларни бошлаш учун замин тайёрлаш, бунинг учун эса биринчи навбатда жорий қилиш керак бўлган тадбирлар тўғрисида гапирди, колхоз ва колхозчининг иқтисодини кўтариш чораларига кўпроқ аҳамият берди. Бу чоралардан бифи водокачкага яқин, сувнинг бошида бўлган Бақақуруллоқнинг ҳамма ерига пахта экиш эди. Бу таклиф ҳаммага, ҳатто уни бирон гапда илинтириш пайига тушиб ўтирган Бўтабойга ҳам маъқул бўлди. Сўнгра, Ўрмонжон Капсанчилар қишлоғи асосан кўп йиллардан бери пахта экмагани, капсанчиларнинг кўпчилиги пахтани билмагани учун бу әкинни унча-мунча биладиган одамлардан терма бригадалар тузишни, бу бригадаларга тажрибали қарияларни бригадир қилиб тайинлашни таклиф қилди ва бригадирликка ярайдиган мўйсафидларни ном-баном айтиб берди.

Ўрмонжоннинг бу гапларини, айниқса тажрибакор чолларни ном-баном айтганини кўриб Бўтабой ичидаги зил кетди; «бу чолларни-ку мен бундан яхшироқ билар эдим, нучук шунга фаросатим етмалти...»

Правление аъзоларининг ҳар бири ҳам шуни кўнглидан ўтказди.

Дамба масаласи кейинга қолди.

Бақақуруллоққа буткул пахта экиш масаласи правлениенинг навбатдаги мажлисида атрофлича муҳокама қилингандан кейин колхозчиларнинг умумий мажлисига

бўлиб чиқилди. Колхозчилар бу таклифни жуда журсанд бўлиб қарши олишди. Бригадирликка мўлжалланган мўй-сафидлардан Зокир ота правлениенинг бу ташаббусини: «Шу яқин ўртада правлениедан биттаю бирагай гап чиқди» деб таърифлади.

Одамларда ғайрат ва ташаббус яшина бетди.

Караҳтроқ бўлиб ётган «Қўшчинор» колхозида ҳаёт қайнай бошлади.

Бўтабой ака бу кунларда ўзини ҳали от минишни дурустроқ билмай туриб жуда учар отда улоққа кирган кишидай сеза бошлади. Шунинг учун у ҳар ишга ўн қўллаб ёпишадиган, янгидан-янги ишлар бошлашга ва ҳар бир бошланган ишнинг, ўзи айтмоқчи, ёнбошига олгандан кейин бетўхтов отишга ҳаракат қиласидиган бўлиб қолди. У баъзан, ўнг келиб қолганда, Ўрмонжондан бирон қадам олдинда юришга интилар, шунинг орқасида баъзан ножўя қадам ҳам босиб қўяр эди.

12

Ўрмонжон бригада ва звено бошлиқларидан хоҳлаган кишиларни ҳар ҳафта икки мартаба қизил чойхонага йиғиб ўқита бошлаган эди. Одамлар ҳарф таниб сал-пал ўқиидиган бўлгандан кейин, Ўрмонжон правлениенинг олдига ҳамма бригада ва ҳамма звено бошлиқларини ўқишига мажбур қилиш масаласини қўйди. Правление унинг таклифини маъқул кўриб қарор чиқарди ва бу қарорнинг обрўсини кўтариш учун ўқишига правлениенинг ҳамма аъзоси, жумладан Бўтабойнинг ўзи ҳам қатнаша бошлади. Бўтабой бригада ва звено бошлиқлари, ўқишига иктиёрий равишда қатнашаётган баъзи колхозчилар олдида обрўни қўлдан бермаслик учун жуда астойдил ўқиб, баъзан кечалари Ўрмонжоннинг уйига бериб қўшимча дарс ҳам олә

бошлади. Кўп ўтмай у дурустгина ўқийдиган ва унча мунча ёзадиган бўлиб қолди. Ким билади, ўқиш унга жуда ҳам осон кўриндими, ёки, ўқиш-ёзиш жуда маъқул келиб қолиб, бу неъматдан бошқалар маҳрум эканини ҳазм қиломадими, ишқилиб нима бўлдию, ҳеч ким билан кенгашмай, ҳеч кимга айтмай бир куни правлениенинг эшигига шундай бир эълоннома қоқиб қўйди:

«Колхозчиларагай!»

Илмисизлик синфий душманларга хизмат қилиб келгани учун ўқимаган колхозчига аванс йўқ. Кузда даромад тақсимоти ҳам қўл қўйишни билмаган колхозчига берилмайди. Қаршиларга умумий мажлисда чора кўрилади. Ўқиш Бақақуруллоқда, қизил чойхонада бўлади. Дафтар, қалам бепул, самоварчидан сўраб олинсин.

Колхоз правление раиси: *Бўтабой Бўронбоев*. -

Бу эълоннома кўпчилик ёшлар учун кутилмаган, фавқулодда бир нарса бўлмади-ку, лекин ёши бир жойга борган, айниқса кексаларнинг қаттиқ норозилигига сабаб бўлди. Ўқиш, буларнинг назарида, оппоқ соқолларини сиакиллатиб «тутминди» ўйнашдай кўринди. Қўғазорлик Каримқулбува билан Неъматилла акалар икки кун ишга чиқишмади. Бақақуруллоқлик Эокир ота биринчи куни ўқишга ёғоч от миниб, орқасига неварасининг сумкасини осиб келди...

Урмонжон районга кетгани учун бу воқеадан бехабар эди, райондан келгач, бу эълонномани ўқиб аввал хит бўлди, кейин кулгиси қистади. У Бўтабойга ҳозир бундай талаб қўйиб бўлмаслигини, бунинг учун аввал замин тайёрлаш кераклигини тушунтирмаоқчи бўлган эди, Бўтабой «менинг ташаббусимни бўғаётиссан» деган мазмунда қиноя қилиб хафа бўлди.

Бир томондан раиснинг обрўсини сақлаш, иккинчи томондан бу тадбирдан қаттиқ норози бўлган одамларга бунинг моҳиятини ётиғи билан тушунтириш керак бўлиб қолди. Ўрмонжон бунга хийлагина вақт ва меҳнат сарф қилди. Бўтабой буни кўриб Ўрмонжон олдида ўз қилмишидан қаттиқ хижолат тортди, унга узр айтишни кам билиб, бирон иш билан ўзини оқлашни кўнглига туғиб қўйди.

Пахта терими бошланган кунлар әди. Дарсдан кейин Бўтабой пахта теримидаги яхши ишлайдиган хотин-қизлардан бирмунчасини гапга солиб суҳбат ўтказди. Суҳбат хийла кеч тамом бўлди. Бўтабой уйига кетди.

Ойдин кеча. Бўтабой Бақақуруллоқдан чиқиб, Қўшчинорга юқоридан — катта йўлдан кетди. Ҳаво соғ, салқин. Сўл томонда Бақақуруллоқнинг паст-баланд уйлари, қоп-қорайиб турган якка-дукка дарахтлардан нари азим дарё оқаришиб кўринади. Ўнгда очилган пахтадан чипор бўлиб кетган тўқ-яшил пахтазор. Унинг этаги тобора қорайиб, узоқдаги тўқайга туташиб кетган. Бугунги ишдан, дарсдан, эпчил теримчилар билан ўтказилган суҳбатдан, қолаверса, мана бу тунги манзарарадан вақти хуш бўлган Бўтабой аллақандай шўх бир куйни хиргойи қилиб борар әди.

Кўшчинорга тушиладиган муюлишда Абдусамадқори учраб қолди. У, одатдагича, йўл кенг бўлса ҳам дарров четланди.

— Ҳўш,— деди Бўтабой,— бугун ўқишга бормадингиз?

Қори битта-иккита оқ оралаган чўққи соқолининг учини ушлаб илжайди.

— Ҳўп ажойибсиз-да, Бўтабой ака, ажойибсиз! Одам ҳайрон қолади... Дарров пайқабсиз-да. Мен пайқамасмикнисиз деган әдим. Ҳи-ҳи... бугун шундоқ бўлиб қолди,— деди ва тегишиди,— аввал менга етиб олишсин, ундан кейин бирга ўқийлик-да. Йўқ-йўқ, ҳазил...

— Бу гапингиз нотўғри, қори, сизнинг илмингиз эс-

кича илм. Колхозга янгича илм керак. Кўнглингизга келмасин-ку, извошга эшак қўшиб бўлмайди.

— Тўғри! Албатта, албатта... Бугун узрли иш чиқиб қолди. Шаҳардан божамиз совға-салом билан келган ёди, шуни кузатиш лозим бўлиб қолди. Келинойимга ўша совғадан насиба олиб келган ёдим.

— Ҳим....— деди Бўтабой ўнғайсизланиб,— шунақами... Қани, юринг, уйга кирайлик.

Қори дарров эргашди. Ҳийла ергача жим боришиди. Бу ўнғайсиз жимликни қори бузди:

— Божамиз сиз билан кўришишни орзу қилган ёдилару фурсатлари бўлмади. Кўпдан-кўп салом айтдилар.

— Саломат бўлсинлар... У киши шаҳарда нима иш қиласидилар?

— У кишини танийсиз, яхши танисангиз керак. Область ижроия комитетида секретарь. Икки йил бўлди.

— Э-э, Жавдот Наимми?

— Ҳа, баракалла.

— Бундоқ демайсизми! Область ижроия комитетида секретарь денг! Айтмадингизми, колхозимиэга қарашиб юборинг демадингизми?

Қори гавдасига номуносиб ингичка бир товуш чиқарип кулди:

— Ҳай-ҳай, мендан гап қоладими, Бўтабой ака... Колхознинг фойдаси деганда осмондаги қушнинг оғзирадаги донни оламан!

Бўтабой пастаккина эшикдан энгашиб кирап әкан, тандирнинг олдирадаги кундага боғлаб қўйилган каттакон бўрдоқи қўйни кўриб қолди. Қўй унга қараб шикоятомуз маъради.

— Ие,— деди Бўтабой ва қорини айвондаги сўрига таклиф қилди.— Совғани жуда катта қилиб юборибсиз-ку. Божангиз қўй совға қилиб келган эканми?

+ Йўқ, у киши келинингизга икки жуфт атлас олиб

кёлган әканлар. Келинингиз шундан биттасини опам кий-тинлар деди. У шундоқ дегандан кейин мен ҳам, «совға деган тоқ бўлмайди» деб шу қўйни... Ҳўжақишлоқда бир ошнам билан шериклик тўртта қўй боқиб юрган эдик, иттифоқо шу бугун ўша қўйларнинг иккитасини бериб юборипти. Шу, атлас билан жуфт бўлсин деб шунинг биттасини етаклаб кела қолдим.

Қўй яна маъради. Бўтабойнинг назарида, жуда қаттиқ маъради, унинг товушини бутун қишлоқ эшигандай бўлди. Бўтабой атласни хотинидан сўраб олди, ойдинга солиб унинг у ёқ-бу ёғига қаради.

— Саккиз телкилиқ,— деди қори атласнинг қатига бармоғини тиқиб.

— Ҳўп, бу нарсаларни олсак сиздан неча пул қарздор бўламиэ?— деди Бўтабой узоқ жим қолгандан кейин.

Қори бу саволдан қаттиқ ранжиди.

— Ҳа, шуми ҳали, Бўтабой ака, орамизда пулдан ҳам каттароқ нарса — меҳру оқибат бор эди-ку...

Қўй яна боягидан ҳам қаттиқроқ маъради. Бўтабой ичидан тўлқинланиб келаётган титроқни босишга зўр бе-риб бир оз жим қолди, сўнг, мумкин қадар мулоиймлик билан сўз бошлади:

— Менга қаранг, қори, агар ҳақиқатан шундоқ деб билсангиз мен сизга битта яхшилик қиласай... Ҳа, айтгандай, агар ёмонликка олсам ҳозир уриб башарангизни дабдала қиласай эдим! Яхшилик қилақолай. Бу атласни хотинингизга қайтариб беринг, ўзи кийсин, ранснинг хотини умрида атлас киймаган әкан, ҳали ҳозир киймоқчи ҳам өмас әкан денг, бу бир. Йккинчидан: бу қўйни олиб бориб шериги билан яна бир-икки ой боқинг, йигим-теримни олганимиздан кейин тўй қилмоқчимиз, шунда ўз қўлингиз билан сўйиб берасиз. Учинчидан, ҳозирдан бошлаб сиз секретарликдан бекор бўлдингиз. Тўртинчидан: сизга

ўзингизга ўхшаган қирови тўкилмаган одамлардан иккитасини қўшиб бераман, учловларинг Кўғазорнинг юқорисидаги тўқайдан ўтин қиласизлар. Неча саржин ўтин қилишни кейин айтаман. Тушундигизми? Тушунмаган бўлсангиз эртага идорада тушунтириб қўяман! Безбет!..

Қори орага бўлак гап сиғмаслигини сезиб секин ўрнидан турди, атласни бир чеккасидан кўтариб, қўйни етаклаб чиқиб кетди.

— Латта жинниси! — деб бақирди Бўтабой бутун аламини хотинидан олмоқчи бўлиб,— латтанинг учини кўрсатса ўзингни томдан ташлайсан.

Хотин ҳам бўш келмади:

— Мен қаёқдан биламан унинг нима ниятда олиб келганини? Кўрқмай-нетмай, ҳеч нарсани андиша қилмай шунича катта «совға» олиб келган бўлса, бундан чиқдики, кичикроқ «совға»ларни едириб этингизни ўлдириб юрган экан-да!

Хотинининг бу гапи Бўтабойнинг жон-жонидан ўтиб кетди, лекин бундаги кучли мантиқ тилини боғладио ҳеч нарса деялмади. У қори билан шу кунгача бўлган бутун муомала ва муносабатларини хаёлидан кечириб, бундан, хотини айтмоқчи «этни ўлдирадиган» бирон нарса топишга уринди. Бироқ бундай ҳодиса бўлган әмас әди. Модомики шундоқ экан, қори шундоқ қилишга нучук журъат қилди? Нимага суюнди? Бўтабой бир вақтлар қори хусусида Ўрмонжон билан келиша олмаганини, орада ўтган бу гапларни бир оз бўртдириброқ, мақтаниброқ бир-иккӣ одамга айтганини, бу гаплар қорининг қулогига яна ҳам шишиброқ етганини хаёлига ҳам келтирмас әди...

13

Бўтабой диққат бўлиб кўчага чиқди. Ой уфқдан салгина юқорида юпқа булут орасидан хира нур сочмоқда.

Ҳамма ёқ жимжит. Тун суқунатини фақат водокачканинг тапиллашигина бузмоқда. Узоқда от кишинади. Ўрмонжон районга кетган эди, ўша келаётитими? Бўтабой катта йўлга чиқди. Ҳира ойдинда қоп-қора ҳайкалдай бўлиб бир отлиқ кўринди. Дарҳақиқат Ўрмонжон әкан. У, Бўтабойни кўриб дарров отдан тушди.

— Ҳа, Бўтабой ака, бемаҳалда нима қилиб юрибсиз? Тинчликми?

— Тинчлик,— деди Бўтабой ва отнинг жиловини унинг қўлидан олди,— жуда кечга қолдингиз?

— Ўртоқ Аҳмедовдан салом... хушхабар олиб келдим. Бўтабой уни уйига бошлади.

— Қандоқ хушхабар әкан?

Ўрмонжон чўнтағидан бир нусха газета чиқариб унинг қўлига берди. Ҳовлига киришди. Бўтабой Ўрмонжонни сўрига таклиф қилди ва пастлатиб қўйилган осма чирогнинг пилигини кўтариб газетани кўздан кечириди. Унинг диққати қизил қалам билан белги қўйилган «Тошқин» сарлавҳали бир мақолага жалб бўлди.

— Ҳа, мана шу,—деди Ўрмонжон,— ўқинг. Менга беринг, ўзим ўқиб бера қолай.

Бўтабой бермади, туртинмасликка тиришиб ўзи ўқиди. Мақола ўн-ўн икки йилда бир бўладиган тошқинда «Қўшчинор» колхозининг қарийб ярим ерини, унга қўшни колхозларнинг еридан анчагина қисмини сув босиб кетиши, бундан келадиган заарлар ҳақида гапириб, бу оғатдан қутулиш йўлини кўрсатар ва «Қўшчинор», «Қизил гайрат», «Коммуна» колхозларини бу оғатга қарши курашга чақирад әди.

Бўтабой суюнганидан Ўрмонжонни қучоқлаб олди.

— Агар шу колхозлар ҳам бош қўшадиган бўлса дамба йигирма-йигирма беш кунлик иш! Йигим-теримни олганимиэдан кейин бошласак совуқ тушмай битирамиз. .

— Тўғри, лекин ўртоқ Аҳмедов бу неча кунлик иш әка-

ни, буни қачон бошлаш яхшироқ бўлиши тўғрисида бевоси-та кетмон урадиган, тупроқ орқалайдиган одамлар билан маслаҳат қилинглар,— деди.

— Албатта! Умумий мажлис қиласиз, ўртага соламиз.

— Эртага аввал бу масалани правлениеда бир гаплашиб олсангу индинга умумий мажлис чақира қолсак.

— Яхши, гаплашамиз. Умумий мажлисда кичкинагина бир докладча қилишни ўзингизга топширамиз,— деди Бўтабой «докладни ўзинг қиласан» дермикин деган умидда.

Ўрмонжон ўйлаб туриб жавоб берди:

— Агар доклад қилиш лозим бўлса буни Зокир ота бошлиқ чолларга топширамиз. Ҳўп, эртага гаплашамиз. Мен борай. Чарчаганга ўхшайман.

Бўтабой уни кузатиб чиқар экан, эшик олдига боришпанди, бир неча мартаға оғиз ростлагандан кейин, ниҳоят:

— Қорини секретарликдан бекор қилдим,— деди.

Ўрмонжон бирдан тўхтаб унга ўгирилди.

— Нега? Нима учун?

Бўтабой бундай саволни кутмаган бўлса керак, гангиб колди.

— Илми әски...

— Илми әски эканлиги шу бугун маълум бўлдими?

Бўтабой бунинг сабабини ҳарчанд айтмоқчи бўлса ҳам, хотинининг гапи қулоғидан кетмай, сира тили айланмади.

Ўрмонжон кетди.

Бўтабой бу гапни унга эртасига ҳам айтмади, вақт ўған сайин айтиш ноқулай бўлаверди.

Абдусамадқори бир неча кун Бўтабой бу гапни ошкора қилишидан хавфсираб юрди, бироқ ҳеч гап чиқмаганидан кейин «демак Бўтабой Ўрмонжондан ҳадик олганидан шундоқ қилган әкан» деган қарорга келди. Оғир ишда ўзи озиган ва уйидаги икки қўйи семирган сайин унинг Ўрмонжонга қарши юрагидаги адовати ўт ола борди.

Газетадаги мақолага бағишлиланган колхозчиларнинг

умумий мажлисида Зокир ота доклад қилди. Унинг доклади ва музокарага тайёрланган чолларнинг сўзларидан тошқин манзараси, бу оғатнинг бутун оқибатлари ҳамманинг кўз олдидага гавдаланди қолди. Булардан кейин Ўрмонжон сўзга чиқди. У тошқин, дамба тўғрисида әмас, колхоз олдидага турган катта ишлар, колхознинг яқин келажаги тўғрисида гапириди. Унинг сўзидан кейин тошқин балоси колхознинг порлоқ әртасига соя солиб турган бир фалокат, дамба эса колхоз олдидага турган катта ишларнинг боши бўлиб қолди. Бутун колхозчилар бир оғиздан «бажарамиз» дейишиди.

Бир неча кундан кейин дамбадан манфаатдор бўлган колхозларнинг вакиллари кенгашиб амалий тадбиrlар белгилашди.

Иш сентябрнинг охирларида бошланиб, даромад тақсимотига яқин тугади. Кўпроқ оғирлик «Қўшчинор» устига тушди.

Даромад тақсимотида ҳар бир меҳнат кунига яқин бир килодан буғдой, бир сўму қирқ етти тийиндан пул тушди. Утган йили меҳнат кунига ярим килога етар-етмас бургдой, йигирма уч тийиндан пул олган капсанчилар бу йилги даромадни кўриб бутун орзулари ушалгандай бўлди.

Бироқ район ижроия комитети билан район партия комитети колхозчиларни бундан ҳам яхшироқ турмуш кечириш йўлига бошлади: шу атрофдаги ўн бир колхознинг сувга муҳтоҷлигини назарда тутиб, дарёдан канал чиқаришга қарор қилди. Канал ўн етти километр узунликда бўлиб, Яккабоғдан чиқарилиши ва Шўртепанинг пастрогидан яна дарёга ташланиши керак эди.

Каналдан сув ичадиган ўн бир колхоз бу қарорни муҳокама қилиб, кўкламда қийналиб қолмаслик учун об-жаве имконият берганича бу ишни асоссан қишида қилишга қарор қилди. Ўн биринчи январь куни трассага икки минг ниши чиқиб, иш бошланиб кетди. Бу иш оғир, ниҳоятда оғир эди.

Мана шу кунларда «Қўшчинор»дан бир талай одам кетиб қолди.

Ўрмонжон Қурбон отанинг сўзига жавоб бериб «колхоз илгари икки юзу ўн хўжаликдан иборат әди, ҳозир бир юзу саксон тўрт хўжалик қолди» деганда мана шу кунларни кўзда тутган әди.

УЧИНЧИ БОБ

1

Қурбон ота билан хайрлашиб жўналгандан кейин Сидиқжон хийла ергача, худди тўсатдан уйғонгандай, гаранг бир аҳволда борди.

Ўрмонжон йўл бўйи гапирмади, фақат, бир жойга келганда, қора варақ ва шўр босган ердан илон изи бўлиб ўтиб, тўқайга кириб кетган тупроқтепани қамчинининг сопи билан кўрсатиб:

— Канал! — деди.

Илгари канал тўғрисида гап бўлганда Сидиқжон уни бирон тегирмон сув элтадиган ариқ деб ўйлаган әди, тупроқни кўриб:

— Э-ҳе,— деди,— каттакон анҳор-ку.

Ирғай, туронғу, ёввойи жийда, тол, дўлана сингари бута ва дарахтлардан иборат тўқайни оралаб анча юрилгач, ҳеч кутилмаган ерда Ўрмонжон:

— Келдик,— деб отдан тушди ва ҳайрон бўлиб турган Сидиқжонга қараб кулимсиради,— келдик!

— Қаерга келдик?

— Қишлоққа. Колхозга.

— Қишлоққа? Қишлоққа ўҳшамайди-ку?

— Ҳа, ўҳшамайди. Ўзимиз ўҳшатамиз-да!

Отни боғлаб каттагина бир майдонга чиқишиди. Майдон-

нинг ўртасидан арава йўли ўтган, йўлнинг у юзида кекса қайрағочнинг остида ташландиқ темир йўл бекатининг харобасига ўхшаган кичкина ғишин иморат турад эди. Унинг ўпирилиб тушган жойлари синиқ пишиқ ғишт, гувалак билан тикланган, олдинга томон нишаб томига йиртиқ-ямоқ толь парчалари ёпилиб, устига тош, ғишт, бостирилиб қўйилган одатдагидан хийла баланд деразасининг икки қўзида ойна бор, қолганларига қоғоз ёпиширилган, тахта қоқилган.

Ўрмонжон Сидиқжонни уйнинг ёнбошига омонатгина ўрнатилган әшикка бошлиди. Уйнинг орқаси ҳам бир замонлар шунинг сингари уй бўлса керак, лекин бузилгандан кейин олди деворни олиб ташлаб айвон қилинибди.

— Қани, ўтири, — деди Ўрмонжон арқон каравотни узун столга яқинроқ суреб.

Сидиқжон каравотга ўтирап экан, айвондан пастдаги қамишзорга, унинг нариги томонида оқаришиб турган дарёга, сўнгра, айвоннинг у ёқ-бу ёғига қараб:

— Бу ер илгари нима бўлган экан? — деб сўради.

— Илгари водокачка бўлган экан.

— Ҳа, князнинг водокачкасими? Қурбон ота гапириб берган әдилар. Бечора капсанчилар, дейман, ер ўзларига қарашли бўлгандада шу ариқни ўша вақтда чиқаришса ҳам бўлар экан.

Ўрмонжон Сидиқжоннинг дилига ёруғлик солиб биринчи мартаба кулди.

— Гап ерда әмас, Сидиқжон, гап ерда бўлса ислоҳотдан кейин нега чиқарипмапти? Бир боғ жўхорипоя аравага ўқ бўлмайди, лекин битта қайрағоч бўлади. Бунақа катта ишини фақат катта хўжалик — колхоз қила олади.

Уйдан Ўрмонжоннинг хотини — тўлагина, хийла ҳусндор жувон чиқиб Сидиқжон билан кўришида, қайтиб бир лаган тут билан нон олиб чиқди ва буларни столга қўяр экан:

- Меҳмон келган эди,— деди..
- Қанақа меҳмон?
- Шаҳардан. Агроном экан.
- Агроном?— деди Ўрмонжон ўрнидан туриб.— Қани?
- Бўтабой ака бошлаб келган эди, бирга чиқиб кетиши. Идорага боришгандир.
- Сидиқжон, айбга буюрмайсан, ука, мен ҳозир кела-ман.

Ўрмонжон шошиб чиқиб кетди ва бирон соатдан кейин оғзин, сочи ўнг томонга жуда ҳафсала билан таралган, оқ шим ва оқ кўйлак кийган ёшгина бир йигит билан кириб келди. Йигит Сидиқжонга: «Агроном Иброҳимов», деб қўл берди ва Ўрмонжон суреб берган курсига ўтириб ўзини ел-пиди. Сидиқжон агроном нима иш қилишини аниқ билмас. лекин, негадир, агроном деганда кўз олдига ўзбекчани ча-ла биладиган хушчақчақ рус чол келар эди; шунинг учун таажжублангандай, йигитга бир-икки қараб қўйди. Иброҳи-мов тутнинг яхши-яххисини, худди нозик бир жоноворни ушлаётгандай. эҳтиёт билан териб оғзига солар экан, тўх-таб қолган гапини давом эттириди:

— Шунақа, Ўрмонжон ака, мақсадим илмим етганча, қўлимдан келганча сизларга хизмат қилиш, ундан кейин Тошкентга бориб яна ўқиш. Тошкентда зўр олимлар кўп. Менинг домлам Иван Петровични Бутунитифоқ билади. У қишини ўртоқ Аҳмедов жуда яхши билар эканлар.

— Ҳали келмасдан кетиш ғамидасиэ-ку...— деди Ўр-монжон кулими сираб.

— Йўқ, Ўрмонжон ака, менинг гапимни тўғри тушу-нинг. Колхоз қишлоғи тобора билимдонроқ агрономни та-лаб қила беради. Мен шу маънода гапираётиман. Мен қа-ерга келганимни, қандай шароитда, қандай ишлар қилиш кераклигини яхши биламан. Ўртоқ Аҳмедов бу қишлоғининг тарихини, кейинги бир йил ичida қилинган ишларни, «Қўшчинор»нинг келажагини гапириб берди. Мен бу ерга

очиқ кўз билан келдим. Мен бу ерга фақат агроном сифатида әмас, балки... мен аввал коммунист, ундан кейин агрономман. Ўртоқ Аҳмедов сен борсанг колхозда учта коммунист бўласизлар, деган эди. Учинчиси ким?

— Эҳсон Каримов. Пахтакор бригаданинг бошлиғи. Бу йигит колхоз секретари бўлиб келган эди, ўзи далага чиқаман деди. Секретарликка Зиёдахон деган бир аёлни тайёрлаётимиш.

— Ҳозир бир центнер пахта неча меҳнат кунига тушади?

Ўрмонжон буни ҳеч қачон ҳисоблаб кўрмаган бўлса керак, жавоб бера олмай илжайди.

— Куч кўп кетади, лекин экинлар ичидан бундан сердаромади йўқ,— деди.

— Биламан, сердаромад, лекин меҳнат талаб қиласди. Гап мана шунда. Агар шу сердаромадлигига меҳнатни оз талаб қиласа эди! Ўртоқ Аҳмедов «Иттифоқ» колхозида ўтган йил бир центнер пахта йигирма бир меҳнат кунига тушди деди. Йигирма бир меҳнат куни! Агар шу колхозда бир центнер пахта бир меҳнат кунига тушса, қандоқ бўлар эди?— деди Иброҳимов Сидиқжонга қараб.

Сидиқжон бу саволга жавоб кутиб Ўрмонжонга қаради.

— Унда одамларнинг итялоғи тилладан бўлар эди,— деди Ўрмонжон.

— Ҳа, тилладан бўлиши керак-да, бўлмаса колхоздан нима фойда? Ҳамма гап шундаки колхоз бир центнер пахтани бир меҳнат кунига тушириши мумкин, мумкингина әмас, партия ва ҳукумат шундай қилмоқчи, шундай қилмоқчигина әмас, қилаётитпи. Сталинграднинг трактори, Чирчиқнинг маъдан ўғити, илмга сарф қилинаётган миллион-миллион пул... шуларнинг ҳаммаси ўша йигирма бирни бирга тушириш учун!

Иброҳимов оёғини ёзгани ўрнидан турди ва айвоннинг дамига бориб қамишзор ва дарёнинг у томонидаги кўм-кўк

далаларга, узоқдами қаптар ғанг төгларга қаради. Бир оз жиммикдан сўнг, Ўрмонжон чуқур нафас олиб Сидиқжоннинг елкасига қўлини ташлади.

— Ана шунаقا гаплар, Сидиқжон, шунаقا гаплар. Йигирма бирни бир қилишимиз керак, бир! — деди ва ўрнидан турди.— Энди, меҳмонлар айбга буюрмайсизлар, менниг қиладиган ишм, борадиган ерим кўп. Сизлар овқатгача дам олинглар, қолган гапни овқатдан кейин гаплашамиз.

— Бирга борамиз,— деди Сидиқжон ўрнидан туриб.

— Қаёққа?

— Айланиб келарман.

— Бизнинг қишлоқда айлангулик, томоша қилгулик жой йўқ. Мен билан юришингдан фойда ҳам йўқ. Мана ўртоқ Ыброҳимов билан гаплашиб ўтиринглар.

Ўрмонжон чиқиб кетди. У кетгандан кейин Сидиқжон отаси бегона уйга ташлаб кетган ёш боладай мунгайиб қолди. Ыброҳимов буни кўриб уни гапга солишга ҳаракат қилди, ундан-бундан гапирди, турли ҳазил-мутойиба қилди. Ҳадемай Сидиқжоннинг қулфи-дили очилиб кетди. Ярим соат ўтар-ўтмас орадаги бегоналик пардаси кўтарилди-ю, Сидиқжон саргузаштини қисқача сўзлаб берди.

— Яхши қилибсиз, лекин болангиз бор экан,— деди Ыброҳимов.— Ҳозир қизиқ устида билинмас-ку, кейин чидомлассиз. Болангизнинг бир мартаба «дада» деганини әшиитсангиз ҳар қанақа кек әсдан чиқади. Ёш боланинг тиали ҳар қанақа кўнгилни эритади.

Сидиқжон ўйлаб туриб жавоб берди:

— Отасининг уйидан чиқиб кетса бола туфайли ярашсам эҳтимол әди, лекин шариатда йўл йўқ. Уч талоқ қиласманан.

Иброҳимов қулди.

— Ҳали ҳам шариат деб юрибсизми! Ярашадиган бўлсангиз шариат йўл топиб беради. Шариатнинг йўли кўп,

биттаси берк бўлса ўнтаси очиқ. «Худонинг арши қимирлашга қимирлайди-ю, лекин йиқилмайди» деган латифани эшитганмисиз?

Сидиқжон «худонинг арши» деб эшитган, «арш» деганда ҳеч нарсани тасаввур қилмаса ҳам эти жувиллашиб кетар әди.

— Йўқ, мулла,— деди бенхтиёр қўлини қовуштириб.

— Худо ҳам, ҳамма пошшоларга ўхшаган, тахтда ўтиради. Ўша тахтни арши аъло дейишади... Бир шаҳарда бир бузуқ хотин бор экан. Шу хотин қариганда қиёмат ваҳмига тушиб аъламнинг олдига борипти: «Аълам почча, киши зино қиласа нима бўлади?» деб сўрапти. «Ҳай-ҳай, асти гапирма,— депти аълам,— зино шундоқ ёмон гуноҳки, бир кун зино қилинса уч кун худонинг арши қимирлайди!»

— Ўҳў!— деди Сидиқжон кўзларини катта очиб.

— Бу гапни эшитиб хотин йиғлапти: «Вой, аълам почча, энди нима қиламан, менинг зино қилмаган куним йўқ әди-ку» депти. Хотин шундоқ деган экан, аълам салласини улоқтириб ташлаб, ҳалиги хотинга тармашити... Хотин «Вой, аълам почча, ҳозир ўзингиз худонинг арши қимирлайди демадингизми?» деса, аълам: «Қимирлашга қимирлайди-ю лекин, бари бир йиқилмайди» деган экан.

Сидиқжон шундай қаттиқ кулдики, бурчакда кулча бўлиб ётган мушук шошиб ўрнидан турди ва Сидиқжонга қараб «миёв» деди.

— Ана шунаقا,— деди Иброҳимов,— шариат ўзи йўл топиб беради. Йўлни хотинингизнинг ўзи топиб келиб, сизни опқочиб кетса нима дейсиз?

— Опқочиб кетади-я, опқочиб кетади!— деди Сидиқжон кўкрагини кериб.— У зангар билан кейинчалик ҳам ярашмайман, мулла. Эҳе... эрнинг юз-хотирини қилмайдиган хотин пирига ҳам дўст бўлмайди. Онам бечора, денг, мулла, ўзи жуда кам борар әди, ҳар боргандада бир нарса олиб борар әди. Бир борганида ҳеч нарса тополмай нима

олиб борипти денг — йигирматача эски арава мих! Қаранг, шўрлик... Үзи ҳам, онаси ҳам бир оғиз гапирмаса, бир мартагина қовоғини очиб қарамаса-я!.. Шуларни ўйласам кўнглим муз-муз бўлиб кетади. Шунга шунча йил чидаганимга ҳайронман. Вой-вўй, ақлимга куйдирги чиққан әканми дейман-а!

Иброҳимов димогида кулди.

— Дунё шу, одамлар шунаقا деб ўйлагансиз-да.

— Шунақадир-да,— деди Сидиқжон ўзини ўзи калака қилган бир оҳангда,— одамини гафлат босса шундоқ бўлар әкан.

Ўрмонжон овқатга келмади. Хотини узр тариқасида өридан иолиб дастурхон ёзди.

— У киши шунаقا... Ишлари чиқиб қолса районга ҳам кетиб қолаверадилар. Бир куни оши буюрдилар. «Бир соатда тайёр бўлсин» дедилар. Ошни дамлаб ҳали ўтирибман, ҳали ўтирибман — қани... Тўғон участкасига кетиб қолган әканлар, әртасига кечқурун келдилар.

— «Қўшчинор» тўғон участкасида ишлаётитими?— деди Иброҳимов.

— Ҳа. Бирон икки ойлик иш қолган.

Хотин овқатни меҳмонлар билан бирга ўтириб еди. Бунга Сидиқжон жуда ҳайрон бўлди.

Коронги туша бошлади. Хотин чироғ олиб чиқиб столга қўяр әкан, қулимсираб:

— Энди айбга буюрмайсизлар-да,— деди,— мен ўқишга бораман. Ўқишидан чиқиб қуртга барг кесгани борамиз. Жиндай қуртимиз бор. Ў киши келсалар овқат ўчоқ босшида.

— Бемалол, bemalol,— деди Иброҳимов.

Узоқдаги адирнинг орқасидан жуда ҳам каттакон, қинқизил ой кўтарилди. Тоғлар, адирлар, узоқ-яқиндаги дарахтлар қурум босгандай қоп-қора тус олди.

Ўрмонжондан ҳануэ дарак йўқ әди.

Төнг ёришганда Ўрмонжоннинг хотини Сидиқжонни уйғотиб унга Ўрмонжон киши юборғанлигини айтди. Сидиқжон шошиб ўрнидан турди, айвон ҳали қоронги бўлса ҳам назарида, тарашадай қотган юзи ва ёшланиб турган кўзига хотиннинг назари тушмасин учун, Ўрмонжон қаерда эканини ҳам сўрамасдан, ташқарига чиқди.

Ташқаридаги уни ўн-ўн икки яшар бола кутар эди. Бола уни кўриши билан, ҳеч нарса демасдан, йўлга тушди. Сидиқжон яктагининг барига юз-қўлини артди-да, унинг кетидан әргашди. Булар чап томони бутазор, ўнг томони тўқай бўлган арава йўлдан боришиди. Бир оз юрилгандан кеъин чапга қайрилиб пастқамликка тушилди. Бу пастқамлик хийлагина катта ҳавза бўлиб унинг теварак-атрофидаги паст-баланд уйлар, эгри-буғри деворлар, булар орасида сўппайиб турган якка-дукка дарахтлар кўриниар эди.

Ўнг томондаги тахланиб қўйилган ёғоч, бордонлар орқасида от кишнади. Ҳаял ўтмай ўша томондан Ўрмонжон чиқиб келди.

— Хўш-хўш,— деди Сидиқжонни кўриб,— яхши ухлаб турдингми, кечаси келсам ухлаб қолган экансан, зерикиб дарров ётиб қолибсизлар-да.

— Йўқ, Ўрмонжон ака, зерикканимиз йўқ. Ўртоқ Иброҳимов жуда яхши агроном эканлар, чақчақлашиб ўтиридик.

— Шунақами? Хўп, яхши. Энди меҳмон бўлганинг бас, озгина қарашмасанг бўлмайди. Ҳамма канал ишида, дала-да. Одам етишмайди. Тўғон участкасига озиқ-овқат олиб боргин. Мана бу хатни Болтабой деган йигитта бер.

Бояги ёғоч ва бордонлар орқасидан олтмиш ёшлардаги бир чол арава миниб чиқди.

— Қани, мин!— деди Ўрмонжон ҳайрон бўлиб турган

Сидиқжонга,— мана шу тепалик орқасида бизнинг Бақақуруллоқ деган маҳалламиз бор, шунинг кираверишида сени бир хотин кутиб туритти. Бу хотин сен билан бирга боради. Эҳтиёт бўл, от асовроқ. Сенга уй топиб қўйдим.

— Уй?— деди Сидиқжон отга минаётиб.

— Ҳа. Энг обод маҳалламиздан — Бақақуруллоқдан уй топиб қўйдим. Бориб келганингдан кейин кўрасан.

Сидиқжон жўнади. У катта йўлга — юқорига чиқиб чапга бурилиши билан пастқамликдаги Бақақуруллоқ яқ-қол кўринди. Дарҳақиқат Бақақуруллоқ сердараҳтлиги, майдондаги бир-иккита оқ уйлари билан Қўғазордан хийла обод кўринар эди. Сидиқжон сал юргандан кейин йўл бўйидаги каттакон тўнкада ўтирган хотинни кўрди. Хотин аравани кўриб ўринидан турди. У истараси иссиққина, нарни борса йигирма беш ёшларда, ўрта бўйлик бир жувон бўлиб, өгнидаги тўқ қизил кўйлаги, унинг устидан кийиб олган қора жилеткаси, бошидаги яшил рўмоли қораҷадан келган юзини бўғиброқ қўйган бўлса ҳам, ўзига хўп ярашган, унга шулардан бошқа ранг, бошқа кийим ярашмайдиганга ўхшар эди.

— Бақақуруллоқ шуми, синглим?— деди Сидиқжон отнинг бошини тортиб.

— Сидиқжон ака сиз бўлсангиз, Бақақуруллоқ шу,— деди жувон очиқ чеҳра билан ва келиб араванинг кегайига оёқ қўйди.

Сидиқжон унга тинчроқ жой кўрсатиш баҳонаси билан қайрилиб қаради, жувон қоп ва тугунлар устидан олдинга ўтгандан кейин тизгинни силтади.

Бақақуруллоқдан чиқилгандан кейин йўл бутазор, қумлоқ, қўриқ ер ва әкин майдонларини оралаб кетар эди. Кун тиғ тортиб дарёнинг у томонидаги адирларнинг сирти тўқяшил, жилғалари қора тусга кирди. Дарё томондан фириллаб эсиб турган шабада йўл бўйидаги ўт-ўланларни әгар, тебратар, сарғайиб бораётган арпалар мавж урар эди. Си-

диқжоннинг диққати ўнг томондаги тўқаййининг очиқ ерига
териб қўйилган сон-саноқсиз гиштга жалб бўлди.

— Ҳумдомни? — деди.

— Мактаб,— деди хотин,— шу ерга мактаб тушади.

Сидиқжон у ёқ-бу ёқса кўз югуртириб:

— Мактаб? — деди,— мактаб деган қишлоққа солин-
майдими? Қишлоққа жуда ҳам олис-ку.

— Қишлоқни шу ерга, янги ариқнинг икки юзига кўчир-
моқчимиз. Мактаб қишлоқнинг қоқ ўртасида бўлади. Ҳу-
ана у ерга идора, клуб тушади. Мана бу тўқаййининг ўрни
бог бўлади.

— Янги қишлоқ тушар әкан-да? Бунга бирон йигирма
йил кетар?

— Ўртоқ Аҳмедов районда мажлис қилиб жуда нари
борса тўрт-беш йилда бўлади деганлар. У киши мажлисга
солган иш бўлмай қолмайди. Мана шу канал ҳам ўшанақа
мажлисга тушган.

Қўшчинор маҳалласи ҳам орқада қолди. Арава тебра-
ниб, фижирлаб, катта-кичик қумтепалар, юлғунзорлар ора-
сидан ўтиб, бепоён қўриққа чиқди. Қўриқни кўм-кўк ўт
қоплаб ётган бўлса ҳам мол кам, онда-сонда битта-иккита
сигир, қўй қўринар эди. Йўл қўриқнинг бағрини ёриб ўтган
канални ёқалаб, узоқ уфқда ўйилиб ётган туман сингари
қўринган дарёга қараб кетар эди.

— Қаранг,— деди жувон,— шу ерга сув чиқарилиб
пахта экилса бутун районнинг остонаси тилладан бўлмай-
дими?

Сидиқжон бир сонини эгарга қўйиб жувонга томон ўги-
рилиб ўтириди.

— Бу ерлар ҳам Қўшчинорга қарашлимиси?

— Йўқ. Қўриқ ер бизда ҳам кўп.

— Ҳозир бор ерларинг етадими?

Жувон қаҳқаҳа уриб кулди.

— Нега етар әкан, ер ҳар қанча бўлса кам эмасми?

— Нега,— деди Сидиқжон хижолат бўлиб,— ер одамга қараб экилади-да ахир.

— Ер одамга қараб экиладиган бўлса колхоздан нима фойда? Ҳукумат тракторни, машина ўроқни нимага чиқарив қўйипти? Сизларнинг колхозларинг қанақа колхоз ўви, трактор ишлатасизларми? Нима экасизлар?

Сидиқжон бир оздан кейин жавоб берди:

— АРпа, буғдой, шоли...

Жувон яна хандон ташлаб кулди.

Хотин кишини ҳамма вақт ноумид, норози кўриб ўрганган ва буни хотинлик латофати деб билган Сидиқжонга жувоннинг бу гаплари, катта ишонч ва зўр мамнуният билан гапириши унча ботмади, шунинг учун эрдан қолган қари қиз бўлса керак деган хаёлга борди; шу билан бирга, ўзи кўрган бошقا хотинлардай әркакдан тортинмаганини ёйилиб кулганини кўриб «бирон қамчи йўргаси йўқмикин» деб ҳам қўйди.

Айрилиш келиб қолди.

— Қаёққа юрамиз?— деди Сидиқжон қайрилиб унинг кўзига қараб.

— Ўнг қўлга,— деди хотин.

Айрилишдан ўтгандан кейин чумчуқларнинг чигирлаши қудоқни қоматга келтирди. Чумчуқлар айрилишдан бирон юз қадам наридаги каттакон балх тутда чигирламоқда. Сидиқжон тутнинг остида отнинг бошини тортиб:

— Тут емаймизми?— деди.

Кўм-кўк барглар орасида тизилиб, гуч-гуч бўлиб, офтобда садафдек ярқираб турган тутни кўриб жувоннинг ҳам оғзи сув очди.

Сидиқжон ўрнидан туриб каттакон бир шохни эгди. Чумчуқлар зўр бериб чигирлар, шохдан шохга сакрар, тўкилган тут тушган ерида эзилиб, суви тирқираб кетар эди.

Жувон иргиб ўрнидан турди, Сидиқжон эгган шохни ушлғани икки-уч интилиб ушлай олмади. Сидиқжон шох-

ни яна ҳам әгиш учун аравага ўтди. У икки-уч ҳовуҷ тутни оғзига тиқди-ю, яна бир ҳовуҷ териб жувонга ўгирилди. Жувон, бошидан рўмоли тушиб кетган, Сидиқжонга орқасини ўғириб зўр иштаҳа билан тут териб емоқда эди. Сидиқжон ҳовуҷидаги тутни унинг қулоғи остидан олиб ўтиб оғзига тутди. Жувон елкаси оша Сидиқжонга қараб оппоқ, маржондай тизилган тишларини ярқиратиб илжайди.

Жувоннинг бу ҳаракати Сидиқжонга жуда хуш ёқди, ичиди «бор әкансан-ку» деб қўйди-да, уни бошдан оёқ кузатиб чиқди. Ҳозир унинг кўзига жувон бирон совуқлиги билан эркакни ўзидан қочирадиган қари қиз эмас, кўп йигитларни ўзига шайдо қилган, шайдо бўлганлардан битта иккитасининг кўнглини овлаб юрган бир нозанин бўлиб кўринди. Сидиқжон унинг бўйнига қаради, қулоғи билан бўйни орасидаги сийрак сочи назарига жуда чиройли кўриниб, шу ердан ўпкиси келди, лекин ўпишга журъат қиломади-ю, социдан уч-тўрттасини ушлаб тортди:

— Шу бўйнингизни менга беринг, мен сизга иккита бўйин бераман.

Жувон унга қарамасдан жавоб берди:

— Шу бўйнингиз ҳам ортиқчалик қилаётгандир.

Жувон бу гапни ҳазил аралаш айтдими, чин айтдими, Сидиқжон фарқига боролмади. У беихтиёр шошиб-пишиб тут терар экан:

— Ўхў! — деди, — бўйнимизни узадиган жаллодингиз ким әкан?

— Эрим!

— Эрингиз борми?

— Сизнинг хотинингиз йўқми?

Сидиқжон «йўқ» демоқчи бўлиб оғиз ростлади-ю, боласи кўзига кўриниб:

— Бор эди, — деди.

— Қўйганмисиз?

— Қўйганман.

— Шундоқми? Болангиз борми?

— Бор, ўғлим бор.

— Ундоқ бўлса қайтиб борасиз.

Жувон бу гапи билан гўё унинг хотини борлигини ва ўша хотинни яхши кўришини таъна қилиб ундан ўпкала-ётгандай бўлди. Сидиқжон шошиб-пишиб:

— Борсам жанозасига бораман, жанозасига! — деди.

Жувон ялт әтиб унга қаради ва шу қараши билан «бировга ўлим тилагунча, ўзингга умр тила» деган мазмунда қовоғини солмоқчи әди, лекин, ҳарчанд қилса ҳам, бўлмади — қулиб юборди; унинг топган гапига ва гапни бу қадар шошиб гапирганига шу қадар кулдики, дармони қуриб қопнинг устига ўтириб қолди. Сидиқжон унинг чап ёнига ўтириди-да, орқасидан қўлинни узатиб елкасини ушлади.

Жувон қапчиб ўрнидан турди. Унинг ранги бир оз ўчган, кўзларида ҳайронлик ва қўрқув аломати бор әди.

— Э... ҳа? — деди.

Сидиқжоннинг юзида илжайишга ўхшаган, лекин ҳеч қандай маънони ифода әтмаган бир нарса пайдо бўлди.

Жувон асабий бир ҳаракат билан рўмолини олиб ўради, әтакларини йиғиштириб ўришиб ўтириди.

— Кўшчинорнинг хотинлари шунаقا деб сизга ким айтди? Сиз билан тортинмасдан очилиб гаплашганим учун шунаقا қиласетибсизми? Шундақадир-да! Шундоқ бўлса сизларнинг колхозларингдаги хотин-қизларнинг тоза шўри қуритан экан! Хотин-қизлар әркакни кўрганда юраги ёрилиб қимтиниб турса, әркаклар бир-бирига ишонмаса колхоз колхоз бўладими!..

Сидиқжон сукут қилганича қимирламай ўтирас экан, қизарган пешонаси билан бурнининг учи тердан ялтиради. Узоқ жимлик чўкди. Қаердадир қизилиштон қариллади, попушак «пу-пу-пуп-пишш» деб қўйди. Жувон унинг ўтиришини кўриб бир оз жаҳлидан тушди.

— Тавба,— деди кулемсираб,— инсофингиз ... фми, йўқми! Менинг эрим сизнинг хотинингизга шу кўзъилан қараса нима қиласа эдингиз?

Шу пайт от сўнани қўриб шатта отди. Сидиқжон, худди от олиб қочадигандай, ваҳима билан ўзини эгарга отди. От ҳуркиб юриб кетди.

Анча ергача жим бориши. Жувон Сидиқжондан пи-чоқ сўраб олиб иккита бодринг арчида, бирини ўзи тишлаб, иккинчисини пишонинг учидаги Сидиқжонга узатди.

— Мана, бодринг енг! — деди.

Жувоннинг бутун берган дашноми ҳам бир бўлдию, ҳозир бодринг узатгани ҳам бир бўлди. Сидиқжон, салгина бошқа ёқса қараса арава ағдарилиб кетадигандай йўлдан кўзини олмай:

— Қуллуқ, баҳузур... — деди.

— Олинг, қўлимни қайтарманг!

Сидиқжон унга қарамасдан қўл узатди.

— Ўрмонжон акамга яқин одам экансиз,— деди хотин бодрингни карсиллатиб тишлаб,— ёмон одам бўлмассангиз керак. Ёмон одам бўлсангиз мени ҳар нима қилиш қўлингиздан келар әди: зог учмайдиган дала, бақувват йигит экансиз, белингизда мана бунақа пишоқ...

— Албатта,— деди Сидиқжон ҳамон йўлдан кўзини олмай.

— Майли, ҳар кимдан ҳам бир хатолик ўтади. Айб сизда ҳам эмас, эски турмушда. Эски турмушда хотинлар ҳар қанақа эркақдан тортинади, эркаклар ҳар қанақа хотинга тегишгуси келади. Билмадим, хотин тортингани учун эркақ тегишгуси келадими, эркақ тегишадиган бўлгани учун хотин тортинадими? Баъзи хотин киши тегишмайдиган эркақни кўрса кўнглига ҳар хил гаплар келади. Эркақ тортингандиган хотинни кўрса албатта бузуқ деб ўйлади. Русларда ҳеч, ҳеч ҳам шунақа эмас әкан. МТС да рус эркаклар, рус хотинлар бор. Шуларнинг юриш-ту-

рӯзини кўриб кишининг бирам ҳаваси келади, бирам күннинг суст кетади... Ўтган йил баҳорда қуртга барг кесгани тутга чиқдиму қайтиб туша олмай турган эдим, Андрей деган бир тракторчи келиб қолди. Қарасам, мени тушурниб қўйгани қўлини чўзиб келаяпти. «Вой-ўлай» деб тутдан ўзимни ташлаб юборибман. Оёғим синаёзди. Андрей бирам бўғилади, бирам аччиғи келади. Қўнглида кири йўқ, хотинга хотин деб қарамайди-да, мен майиб бўламан демай тутдан ўзимни ташлаганимга тушунмайди... Бориб-бориб янги турмушда биз ҳам шунаقا бўлармиз.

Арава даштга чиққанда дарё бўйидаги капалар, тупроқтепалар, унинг ён-верида юрган одамлар қораси кўрина бошлади. Шу капаларга яқинлашган сайин Сидиқжоннинг юраги така-пука бўла бошлади, назарида, арава бориб тўхташи билан ҳамма югуриб келадиган ва бу жувони дод солиб, йўлда бўлган воқеани шуларга айтадигандай бўлар эди. Узоқдан кичик-кичик, гуч, дарёга яқин кўринган бу капалар катта-катта бостирма бўлиб бир-биридан хийла узоқ ва дарёдан анча берида экан. Сидиқжон аравани жувон кўрсатган бостирма олдида тўхтатди. Бостирманинг уч томони очиқ бўлиб, кун юриш томондаги чий девор остига сопол идиш-товоқ, бир томонига турли рангдаги кўрпа-тўшак, яна алланималар уйиб қўйилган. Бостирмадан бир неча қадам нарида янтоқ ғарами ёнига қурилган дошқозон олдида нима биландир машғул бўлган ўрта ёшлиардаги бир хотин буларни кўриб ўрнидан турди-да, қўлини фартуғига арта-арта югуриб келди. У, Сидиқжон билан кўришгач, юкни тушириб қўйгани бостирмадан жой кўрсатди ва жувон билан нима тўғридадир узоқ гаплашиб қўлди. Сидиқжон юкларни аравадан туширас экан, булар нима тўғрида гаплашаётганини авзойидан билиш учун тез-тез икковига қарап, биронтасининг юзида озгина табассум аломати кўриниб қолса, юраги орзиқиб кетар эди. Жувон

каттакон самовардан тунука чойнакка чой дамлаб келди,
дастурхон ёзib Сидиқжонни чақирди.

— Сидиқжон ака, келинг, чой ҳам ичганингиз йўқдир.
Аввал отни чиқаринг.

Сидиқжон енги ва әтакларини қоқди, отни чиқариб
араванинг тегарчигига боғлади-да, бостирмаға кирди. Жувон
дастурхонга учта арпа нон, икки-уч ҳовуч ўрик ташла-
ди. У, Сидиқжонга чой узатар әкан, узоқдан келаётган
өрига кўзи тушиб:

— Болтабой акангиэ,— деб ўрнидан турди.

— Ким?

— Эрим...

Сидиқжон беихтиёр ўрнидан турди.

— Сиз ўтира беринг, ўтириңг!— деди жувон. Унинг
гали Сидиқжоннинг қулоғига кирмас эди.

Сидиқжон то ҳушини ўнглагунича Болтабой бостирма-
га кириб келди. У ўрта бўйли, хушқомат, лўлига ўхшаш
қеп-қора юзига ҳам бениҳоя қора кўринган мўйлови ўзи-
га жуда ярашган бир одам бўлиб, табиатан хушчақчақ ва
ҳазилкаш бўлса керак, хотинига тегишиди:

— Энди нос олиб келадиган, айтмасдан ўзи билиб олиб
келадиган хотин ҳам олар әканмиз-да. Ё олиб келдинг-
ми?— деди.

У хотинидан жавоб кутмай, Сидиқжон билан кўриш-
ди. Сидиқжон кўришар әкан, унинг катта-катта шу қора
кўзлари бирпасдан кейин, хотиннинг шикоятини әшишиб
ғазабдан чақнаганда қандай бўлишини тасаввур қилар әди.

Ўтиришиди. Жувон унинг ҳазилига ҳазил билан жавоб
бергандан сўнг Сидиқжонни икки оғиз сўз билан унга та-
ништириди.

— Шундоқми?— деди Болтабой,— жуда соз бўлип-
ти-да. Мана, канал ҳам битай деб қолди. Гўза чопиги бўл-
маганда-ку, бир ойлик иш қолган әди-я. Энди иш яна чў-
зиладиган бўлди.

Сидиқжон орага қандай гап тушмасин унинг охири йўлдаги можарога бориб тақаладигандай, шу гапни давом эттиришга ҳаракат қилди.

— Яна неча ойлик иш қолди?

— Ўзимизга боғлиқ. Мана шунаقا ўрик еб ўтира берсак узоқча чўзилади, гайрат қилсан, сиз ҳам қарашиб юборсангиз тезроқ битади. Сиз қоласизми?

— Билмадим... Ўрмонжон акам хат бериб юборган әдилар,— деди Сидиқжон ва хатни Болтабойнинг қўлига берди.

— Қоладилар,— деди жувон эрининг носқовоғига носсолаётиб,— қолинг, Сидиқжон ака!

Жувон бу гапни худди уйига меҳмон бўлиб келган акасини ётиб қолгани қистаётгандай бир тарзда айтди. Шундай бўлса ҳам Сидиқжон, унинг юзида истеҳзоли бир табассум бор гумон қилиб, ер остидан қаради. Бироқ жувоннинг юзида самимият, софдилликдан бошқа ҳеч нарса йўқ әди. У йўлда бўлиб ўтган нарсани тамом унутганлиги, уни яна хотирлашни ўзига муносиб кўрмаганлиги, унақа гаплардан ўзини юқори тутганлиги кўриниб турар әди. Буни кўриб Сидиқжоннинг қалбида бу жувонга нисбатан ҳар қандай ғараздан холи бир меҳр уйғонди. У ҳозир жувоннинг ҳукмида бўлиб, унинг хоҳишига қарши ҳеч нарса дейлмас әди.

— Нима десангиз шу-да, қоламиз,— деди.

— Бўпти,— деди Болтабой носқовоини липпасига қистираётиб,— бизнинг бригадамизда ўн бир киши қолди, холос. Бизга қарашинг. Лекин ҳаммаси ҳам омон бўлгурлар, ударник йигитлар.

Сидиқжон кунни бостиurmада ошпаз хотинларга қарашиб ўтказди. Жувоннинг оти Зиёдахон әкан, Сидиқжон унга мурожаат қилганида, ўзидан кичик бўлса ҳам, «Зиёдахон опа» дер әди.

ТҮРТИНЧИ БОБ

1

Сидиқжон кимнингдир қаттиқ кулгисидан уйғониб кетди. Ҳали тонг ёришмаган, лекин теварак-атрофда ғовур ҳайқириқ, кулги. Унинг тепасида оппоқ бир нарсани силкитиб турган кимдир:

— Мана, мана буни кийиб олинг, Сидиқжон! — деди.
Бу — Болтабой әди.

Сидиқжон, худди аллақачон уйғонгану, шунга маҳтал бўлиб ётгандай, дарров ўрнидан турди ва унинг нима эканлигини ҳам суриштирмасдан, Болтабойнинг қўлидан олди.

— Яктак, лозим,— деди Болтабой,— мана бу чориқ...
Бўла қолинг, чой тайёр!

Сидиқжон бостирманинг орқасига ўтиб яктак, лозим билан чориқни кийди. Қаердандир пайдо бўлган Зиёдахон унинг қўлидаги әтигини, қийиқقا тугилган яктак, лозимини олди-да, қўлига каттакон сопол коса тутқазиб, бостирманинг нариги томонида давра олиб ўтирган кишиларни кўрсатди.

Сидиқжон бориб Болтабойнинг ёнига чўкка тушди. Кимдир унинг қўлидаги косани олиб, шопириб чой қўйиб берди. Ҳамма жим, пуфлаб чой ҳўплар, ковшанар, кимдир дам-бадам қаттиқ пишиллар әди.

— Болтабой ака, шу олмачойни солмаса нима қилағ әди,— деди ёшгина бир йигит,— қайноқ сув ича берайликда! Буни қаранг, ёмғирда қолган мушукнинг ҳиди келади!

Ҳамма кулади.

— Айним, айним! — деди йўғон бир товуш.— Ёмғирда қолган мушукни ҳидлаб кўрганмисан?..

Бу йигит жуда тегишқоқ бўлиб, кўпроқ шу одам билан ҳазиллашадиган ва бу гапни ҳам унинг тилини қичитиш учун айтган бўлса керак, яна:

— Сиз ҳидлаб кўрмаганмисиз? Ҳидлагандирсиз? —
деди.

Сидиқжоннинг ёнида ўтирган киши ҳўплаган чойни
пуркаб юборди, узоқ йўталгандан сўнг, ҳамон ўзини кула-
гидан тўхтата олмай:

— Бу киши ҳидлаб ўтирмайди, тўғри ейди қўяди,—
деди ва қойил қилганига ишониб ҳаммадан баландроқ қаҳ-
қаҳа урди.

Бу одамлар тўрт ишқали бут, дунёни сув босса тўпиғи-
ға чиқмайдиган, баҳузур ёнбошлаб ётиб фақат хурсандлик
билин машғул бўлган кишилардай бамайлихотир, ҳузур
қилиб кулишар эди.

— Э, ҳали ҳам ўтирибсизми? — деди Болтабой Сидиқ-
жоннинг ҳануз нонга қўл урмаганини кўриб,— олинг. Ҳам-
маси сизнинг тегишингиэ, ҳеч кимга қараманг. Балиқни
олинг!.. Бўлинг тезроқ! Ҳозир турамиз.. Сиз нима қила-
сиз, кетмон чопасизми, тупроқ ташийсизми?

Сидиқжон балиқни ёмон кўтар эди, шунинг учун ба-
лиқ ҳиди келиб турган нонни аранг чайнар әкан:

— Бизга бари бир,— деди ва яна нимадир демоқчи
бўлган эди, тегишиқоқ йигит сўз қотди:

— Сидиқжон акам тупроқ таший қолсинлар, ўзим ях-
ши ошқовоқ пўчоққа узун ип боғлаб бераман,— деди.

Бу йигитнинг тегишгани, отини билгани, айниқса «Си-
диқжон акам» деб гапиргани бу ерда бегонасираб ўтирган
Сидиқжонга шу қадар хуш ёқдики, қалбига шу қадар ис-
сиқ ва юмшоқ тегдики, она кўкрагини оғзига олган гўдак-
дай яйраб кетди. Ҳозир бу йигитгина эмас, унинг сўзига
завқ қилиб кулаётган бошқалар ҳам унга яқин, энг ками-
да кўпдан бери таниш одамлардай бўлиб қолди. Бундан
бир неча минут бурун Болтабойдан салгина ҳам нари бў-
лишни истамаган, одамлар ишга тушганда Болтабой қаер-
да бўлар әкан деб ташвиш тортиб ўтирган Сидиқжон ҳо-
зир бу тўғрида ўйламас эди.

— Шундоқми,— деди Болтабой қулги ёшини артиб.—
Тупроқ ташийсизми?

Сидиқжон нима бўлса ҳам шу хушчақчақ йигитнинг
ёнида ишлашни хоҳлаб Болтабойдан секин:

- Ўзи нима иш қилади? — деб сўради.
- Рўзиматми? Рўзимат кетмонда...
- Мен ҳам кетмон чопа қолай.
- Эшитдингми, Рўзимат,— деди Болтабой,— Сидиқ-
жон аканг сен билан бел ушлашмоқчи.
- Қани, ҳо, йигитлар! Ишга! Ишга, азamatлар!—
деган товуш эштилади.

Ҳамма гуриллаб ўрнидан турди.

Узоқда қоп-қорайиб турган тоғнинг усти ёришди. Бу
ёруғлик аста-секин қоронғиликни қувиб, узоқдаги адирлар,
дарахтлар, бутун саҳро, ҳатто ариқ ва унинг икки томони-
га чиқарилиб ташланган тупроқ ҳам кўқимтири-кул ранг
тусга кирди.

Болтабой Сидиқжонга кетмон келтириб берди ва унинг
қиладиган ишини кўрсатди, ўзи юқорига қараб кетди. Си-
диқжон бу одамлар иш вақтида ҳам шундай бегам, хушчақ-
чақ, бир-бирини чандиб кунни билинтирмасдан ўтказади
деб ўйлаган әкан шекиали, ҳамма жимжит бўлгандан ке-
йин дарров зерикиб қолди. Тушгача ҳам ҳеч ким, ҳатто
Рўзимат ҳам бир оғиз гапирмади. Кетмон ураётганларгина
эмас, замбиллаб, қоплаб тупроқ ташиётганлардан ҳам са-
до чиқмас әди. Сидиқжон кетмонни қўйиб Рўзиматнинг
олдига борди. Рўзимат қоронғида кўзига йигирма беш ёш-
ларда, гавдалилкина кўринган әди, ҳақиқатда энди мўйло-
ви сабза урган, ориқ, лекин чайир бир йигит экан. Ҳозирги
афтини кўрган киши уни гап-сўзда йўқ, ўзи тўнггина бир
йигит гумон қилас әди.

— Уҳӯ,— деди Сидиқжон,— жуда ўпириб ташлаб-
сиз-ку!

Рўзимат кетмонни зўғатасигача бетириб урди-ю, Сидиқжонга қаради.

— Ҳорманг!

— Бор бўлинг, ўзингиз ҳорманг,— деди Сидиқжон ва ўзи чиқарган тупроққа қараганда қарийб тўрт баравар келадиган тупроқни ҳар томонда кўрди,— ўпиреб ташлабсиз-ку!

— Ўпиргани келганмиз-да, ака!

— Бунақада кечгача анча иш қилиб қўярсиз! Кечгача яна уч баравар бўлар?

— Бўлиб қолар, ундан ҳам ортар...

— Бир қунлик шунақа ишингиз неча пулга тушади?

Рўзимат кулди.

— Бизга ҳозир пул керакмас, сув керак. Пул керак дейдиган одамлар аллақачон колхозни ташлаб кетган. Ўндоқ демаганлар, мана кўриб турибсиз, жонини жабборга бериб ишлаётитти. Майли, менга деса бу йил меҳнат куни-миз бир миридан тушсин!

— Ҳа, албатта,— деди Сидиқжон, гўё бу ҳақиқатни кўпдан бери билгандай,— турган гапки... йиғлаб-йиғлаб марза олсанг, кулиб-кулиб сугорасан.

— Ҳа, баракалла,— деди Рўзимат яна кетмонга қўл узатиб,— Аҳмедов акам ҳамиша шундай дейдилар. Ўртоқ Аҳмедовни биларсиз-а, бизнинг райком... Билмайсизми? Шу киши бориб-бориб ҳамма ишни машина қиласди дейдилар. Трактор ер ҳайдар экан, трактор чигит тикар экан, трактор чопиқ қилас, пахта терар, ғўзапоя юлар экан... Соч олмас экан холос-да!

Сидиқжон, бунга мутлақо ишонмаса ҳам, Рўзиматнинг кўнгли учун ёқасини ушлади.

— Э, қудратингдан! Одам нима иш қиласр экан?

Рўзимат икки-уч тупроқ отди-ю, яна кетмонни қўйди.

— Э, Сидиқжон ака, бизга иш топилади, ота-бобола-римиз қилмай, қилолмай бизга ташлаб кетган иш кўп! Ма-

на, шу канални айтинг, шу ота-боболаримиз қиладиган иш әди.

Рўзимат яна кетмонни қўлига олди, худди бу ишни битириб, ўша кўп ишлардан яна бирига ўтиши зарур бўлгандай, ғайрат билан ура кетди. Теварак-атрофда кетмон ураётган, замбиллаб, қоплаб тупроқ ташиётган ҳанчадан-ҳанча одамлар ҳам, худди Рўзиматдай, жадаллаб ишлар әди. Сидиқжон бурилиб кетар экан, фақат бир нима дейиш учунгина:

— Трактор пахта терса-я,— деди.

— Ҳа,— деди Рўзимат,— ана шунга ҳайрон қолади киши. Олимлар бирон йўлини топаётгандир-да, топмайдиган бўлса Аҳмедов акам айтмас әдилар. Олимлар ҳам колхоз бўлиб ишласа... Кўпдан қўён қутулмайди!

Сидиқжон бориб ишга тушди.

Тушки овқат вақтида Рўзимат яна, әрталабдагидай унга-бунга тегишиб кушандаларининг тилини қичитиб, баъзан мот бўлиб, баъзан мот қилиб ҳаммани кулдириб ўтириди, сўз ўрни келганда Сидиқжонга ҳам нишини ботириб олди.

— Болтабой ака,— деди,— Сидиқжон акам билан бел ушлашадиган бўлсам зиён қиласман. Бу кишининг кетмон уриши қорни тўқ қўзининг хашак титишига ўхшайди.

Сидиқжон қаттиқ изза тортди. Болтабой буни кўриб «ҳазилни кўтаролмас экан» деб ўйлади-да, Рўзиматга кўз қисиб, қошини чимириди. Буни ҳамма пайқади. Бир лаҳза, лекин Сидиқжонга жуда узоқ туюлган жимликдан сўнг, ўрта ёшлардаги бир киши қўлидаги қошиқ билан Рўзиматнинг пешонасига бир уриб:

— Ўзинг-чи, сенинг кетмон уришинг, биласанми, нимага ўхшайди?— деди, лекин нимага ўхшаганини айтмаса ҳам қизиқ нарсага ўхшаганлиги ҳаммага маълумдай, ҳамма баравар қийқириқ кўтарди.

Сидиқжон тушки дам олишдан кейин кечгача хийла дуруст ишлади. Кечки овқатдан кейин табелчи ҳар бир киши, ҳар бир бригада ва бутун колхознинг бир кунлик иши тўғрисида маълумотларни эълон қилди. Рўйхатда Сидиқжон йўқ эди. Сидиқжон, гарчи ўзини буларнинг бирин ҳисобламаса ҳам, нучукдир оғринди. Унинг номи чиқмаганлигига ҳеч ким эътибор қилмаган бўлса ҳам, назарида, ҳамма унга «хафа бўлманг, ахир, бир куни қаторга кириб қоласиз» деяётгандай бўлар эди.

Сидиқжон әртасига куни бўйи астойдил ишлади-ю, бугун ҳам номи чиқмаганидан кейин Болтабойни холи топиб, мумкин қадар мулоҳимлик билан:

— Болтабой ака, такбирчингиз бизни эсидан чиқариб қўяётитпи-ку, майлигами? — деди.

Болтабой, икки кун ишлаб дарров табелчидан шикоят қилаётитпи деб ўйлади шекилли, унга тик қараб:

— Нима қилди? Ҳеч кимнинг ҳақи куймайди!.. — деди.

— Мен ҳақ тўғрисида гапираётганим йўқ, Болтабой ака, ҳақ ёзмаса ҳам майли. Кечқурун ҳамманинг отини айтганда... одам ўқсисб қолар экан.

Болтабойнинг чеҳраси очилиб кетди.

— Отим чиқсин десангиз мусобақага қўшилинг бўлмаса.

— Майли, нимага қўшил десангиз қўшиламан. Нима қилсан бўлади?

— Ҳар куни энг камида бир ярим меҳнат куни ишласанғиз бўлади.

— Энг кўпи қанча бўлади?

— У ёғи ўз ихтиёргизда. Маллавой деганимиз уч ярим меҳнатга етказиб ишлайди.

— Уч ярим меҳнат? — деди Сидиқжон ҳайрон қолиб ва ўша одамни тасаввур қилмоқчи бўлган эди, кўэ олдига жуда новча, йўғон, билак ва кўкракларини қоп-қора

мун босган, қовоги солиқ ва ниҳоятда баджақл бир киши келди.— Уч ярим меҳнат куни?

— Ҳа, «Ишчи» колхозида Аширмат деган йигит ҳар куни сал кам тўрт меҳнат куни ишлайди.

— Тўрт меҳнат куни?— деди Сидиқжон ҳарчанд қиласа ҳам у йигитни кўз олдига келтира олмади.— Қанча овқат ейди?

Сидиқжон оғзини, кўзларини катта очиб, киприк қоқмай фавқулодда бир жавоб кутиб турганини кўриб Болтабойнинг кулгиси қистаб кетди.

— Қанча овқат ер эди... Уни-ку билмайман, ўзимизнинг Маллавой ака бир ўтирганида битта қўйни каллапочаси билан еб, терисини нонуштага қўяди.

— Йўғе! Терисини... терисини емас!

Бу гапга Сидиқжон чиппа-чин ишонганилигига Болтабой қотиб-қотиб кулди-да, бостирмада чоригини дам-бадам чироққа солиб кўриб ямоқчилик қилаётган Маллавой акани кўрсатди. Бу одам кеча тушки овқат вақтида Рўзиматнинг пешонасига қошиқ билан урган ва унинг кетмон чопишини алланимага ўхшатган киши эканлигини кўриб Сидиқжон донг қотиб қолди. Ўшанда хийла жуссали кўринган бу одам ҳозир кўзига пачоқ, жуда пачоқ кўринди. Сидиқжон унга жуда узоқ тикилиб қолганини кўриб Болтабой:

— Ҳа, уч ярим меҳнат ишлайдиган одамга ўхшамайдими?— деди.

— Жуссага қарамас әкан-да.

— Нега, жуссага ҳам қарайди. Жуссаси ёмонми?

— Йўқ, жуссаси ҳам жойида-ку... кетмон чопишини бир кўриш керак.

Болтабой Сидиқжоннинг унга ҳаваси келаётганини билди:

— Шогирд тушасизми?— деди.

Маллавой ака ўз ҳунарини бирорвга ўргатиш эмас, би-

ров қараб турганда кетмон чопиниға ҳам рози бўлмас деб ўйлагани учун Сидиқжон кулиб:

— Ўргатармиди! — деди.

Болтабой қаҳқаҳа уриб кулди-ю, Маллавоӣ акани чақирди. Маллавоӣ ака ипни тиши билан узди, чоририи яна чироққа солиб кўрди-да, қўлтиғига қисиб, бостирмада чўзилиб ўзаро гаплашиб ётган, ухлаб қолган одамлар орасидан ўтиб келди.

— Чориг битдими? — деди Болтабой унга ёнидан жой кўрсатиб, — Рўзимат қани?

— Ухлаб қолди, — деди Маллавоӣ ака, — бола пақир буғун жуда тер тўқди. Ёш-да, ғайратига чидолмай бошда ўзини уринтириб қўяди. Кетмон деганин бир қиёмда чопади киши. Ундан кейин чарчагунингча чопма, айни қизишган вақтингда, ғайратинг келиб тогни талқон қиласман деганингда дам ол, бирпасгина дам ол!

Болтабой «кўрдингми, яширмайди» деган мазмунда Сидиқжоннинг тиззасини босиб қўйди.

— Сидиқжон сизга шогирд тушмоқчи.

Маллавоӣ кулди.

— Мен билан бел ушлашмоқчи денг. Бу ишда уста-ю шогирд бўлар эканми? Ударникликни менга ким таълим берипти? Кимнинг билагида кучи бўлса, ким ишнинг ҳавосини олса, кимнинг камбағаллик жонига теккан бўлса, айниқса жонига теккан бўлсаю, шу ишдан бир нима чиқнишига ишонса, ўша ударник бўлаверади. Мушук болага сувда юзишни бирор ўргатиптими? Дарёнинг ўртасига элтиб ташланг, юзишини томошা қиласиз... Қирғоқ кўриндими, шу қирғоқ эканлигига ишондими — бас!

Сидиқжон, гарчи сўзга аралашмоқчи бўлмаса ҳам, Маллавоӣ аканинг камбағаллик тўғрисидаги гапи әриш туюлиб сўради:

— Камбағаллик жонга тегмаган вақт, жонига тегмаган одам бўлганмикин?

Маллавой ака чоригини бир чеккага қўйиб Болтабой-нинг ёнига ўтириди.

— Бўлган эмас! Камбағаллик ҳамма вақт, ҳамма одамнинг жонига теккан нарса. Лекин, одамзод жонига теккан нарсадан қутулиш йўлини билмаса осмон йироқ, ер қаттиқ бўлади, унга кўникади, шунчалик кўникадики, бу нарса жонига текканини ҳам пайқамай қўяди. Энди биз камбағалликдан қутулиш йўлини биламиз, кўриб турибмиз. Бизни уста қиласидиган ҳам, ударник қиласидиган ҳам, бизга осмонни яқин, ерни юмшоқ қиласидиган ҳам мана шу.

Маллавой ака камбағалликдан қутулиш йўлига тушган кишилар ҳозир қай аҳволда ва қай ҳолда ишләётгандилари ҳақида гапирди. Кейин сўз канал битгандан сўнг қайси колхоз қанча пахта экиши, машина-трактор станцияси, Чирчиқ чиқарадиган «оқ кунжара» ва бу нарсанинг ерга қандай куч бериши, бир пуд пахтадан қанча газлама, қанча ёғ, қанча кунжара, қанча чигит пўчоқ, лентир чиқиши ва ғўзапоядан нималар қилиниши, «райкомимиз ўртоқ Аҳмедов» колхозларнинг истиқболи ҳақида нималар дегани тўғрисида кетди.

Орага мана шу хилдаги гаплар тушиб сұҳбат шу билан тугади-ю, Сидиқжон табелчидан қиласидиган шикоятини охирига етказа олмади, әртасига яна ҳам астойдилоқ бел боғлаб ишга тушди-ю, ҳеч тўғрида ўйламай, ҳеч кимга қарамай, кетмонни қай хилда чопиш тўғрисида Маллавой ака берган таълимга ҳам риоя қиласидиган кўйиб-пишиб ишлади; икки кун шу хилда ишлаганидан кейин, гарчи табелчи ҳақида Болтабойга қайтиб оғиз очмаган бўлса ҳам, учинчи куни табелчи бехосдан унинг номини айтди. Ҳеч қачон кўпчилик ичида ўз номини эшифтмаган Сидиқжон қўрқиб кетди. Унинг назарида, табелчи номини бошқаларнинг номидан кўра қаттиқроқ ва равшанроқ айтгандай, бу ном чиққанда ҳамма бирпас жим қолгандай бўлди. Эртаси, учинчи куни ҳам шундай бўлди; бунга анча кўнинкандан

кейин ҳам рўйхат кўтариб келаётган табелчини кўрганида юраги гул-гуп уриб, нима қилишини билмай қолар эди. Табелчи ҳам, худди жўрттага қилгандай, унинг номини ё тутилиб айтар, ёки чатоқ ўқиб, яна такрорлар эди. Сидиқжон, гарчи шу ҳаяжон пайтида «менинг номимни айтмаса ҳам майли эди» деб кўнглидан ўтказса-да, табелчи айтиб бўлгандан кейин яна айтишини хоҳлар, шу ҳаяжон билан бутун ҳордиги чиққандай бўлиб, эртаги ишга ўзида зўр иштиёқ сезар эди. У шундай иштиёқ билан шу қадар қаттиқ ишлар, шунинг учун овқатгача шу қадар очиқар әдикни, ҳатто балиқни, айниқса сувда пиширилган балиқни жинидан баттар ёмон кўришига қарамай, зўр иштаҳа билан ер, баъзан Рўзиматга «яхши балиқ товуқ гўшидан қолишмайди» деб мақтаб ҳам қўяр эди.

2

У бир куни, тушки дам олиш вақтида, Зиёдахоннинг сўровига кўра, эшак аравани қўшиб дарёдан сув келтиргани борди; қайтиб келганида қараса ҳамма бостирма ёнига тўпланиб ўтирипти-ю, ўттиз ёшлардаги пачақцина бир киши сўзлаётитти. Сидиқжон аравани ғижирлатиб ўтиши билан гапга ҳалал бериш, ундан ҳам кўра шунча одамнинг ичидан ўтишдан истиҳола қилиб нарироқда тўхтади. Шу онда қаттиқ қарсак чалинди-ю ҳамма гуриллаб ўрнидан турди. Ора-сира «Бажарамиз!» «Бажарамиз!» деган товушлар эшитилди. Одамлар бир зумда тарқалиб ишга тушиб кетди. Йигин бўлган жойда ўша гапирган одаму яна бир неча киши қолди. Буларнинг орасида Болтабой ҳам кўриниб қолди. Сидиқжон эшакни етаклаб ўтоқ бошига томон кетаётуб бостирмада турган Зиёдахондан имо билан «бу киши ким?» деб сўради. Зиёдахон ҳовучини оғзиининг бир томонига қўйиб «сельсоветимиз ўртоқ Самандаров» деди. Самандаров, ҳамма колхозчилар-

ни таниса керак, шу пайт ёнидагилардан Сидиқжон ким әканлигини сўраган ва ҳамма Сидиқжонга қараб турган эди. Орқада турган Болтабой уни имо билан чақирди. Сидиқжон, юраги «шув» этиб, қўлини қовуштирганича оёқ учida югуриб борди.

— Қаерликсиз? — деди Самандаров хиёл жилмайиб, — қўлингизни туширинг!

— Баҳрободлик...

— Қўлингизни туширинг! Нега қўл қовуштирасиз?

Сидиқжон қўлини туширди, лекин қаерга қўйишини билмай яна қорнига қўйди.

— Урганиб қолганмиз, муллака...

Самандаров кулди.

— Урганиб қолганмиз? Кимга қўл қовуштириб ўргангансиз?.. Баҳрободда колхоздамидингиз?

— Йўқ, муллака, колхозга кирган эмас эдим.

Самандаров бирпас жим қолгандан кейин:

— Үрмонжон кимингиз бўлади? — деб сўради.

— Ҳеч кимим бўлмайдилар.

Самандаров унга бошдан-оёқ разм солди-ю бошқа гап сўрамади; қўлидаги қофозни Болтабойга бериб унга алланимани тушунтира кетди.

Сидиқжон бочкани ўчоқ бошига туширди, қайтиб ишига борди. Нарироқда кетмон ураётган Рўзимат уни кўриб алланималар деб кулди, лекин гапи Сидиқжоннинг қулоғига кирмади. Самандаров отланди, қамчи дастаси билан канал томонни кўрсатиб Болтабойга бир нималар деди-ю жўнаб кетди. Бостирмада Болтабой нима биландир машғул эди. Сидиқжон, кўнгли фаш бўлиб, Болтабой билан гаплашгани келди, лекин нима тўғрида гаплашмоқчи эканини ўзи ҳам аниқ билмас эди. Бироқ Сидиқжон боргунча Болтабой эшакни миниб қаёққадир жўнади. Бостирмада Энёдахон супра ёзиб, ун элаб ўтирас ҳади. Сидиқжон, гўё сув ичгани келгандай, кўзани қимирилатиб кўрас экан:

— Эйёдахон опа, ун әлашингиздан бугун кечқурун чучвара қилиб берадиганга ўхшаб қолдингиз,— деди.

Эйёдахон дарров жавоб бермади, әлакдаги кепакни оғзи тор халтачага әҳтиёт билан солди, әлакни қоқди, қопнинг оғзини аста очиб әлакка ҳовучлаб ун солди, қопнинг оғзини яна буриб қўйди. Унинг қандай чехра билан жавоб беришини юраги орэзиқиб кутиб турган Сидиқжон «ҳатто жавоб ҳам бергуси келмаётитпи» деб ўйлашига сал қолганда Эйёдахон очиқ чехра билан жавоб берди:

— Чучвара нима экан, Сидиқжон ака, ёғлиқ манти қилиб бераман. Ҳамири юпқароқ бўлсинми, қалинроқ?

Вужудини қақшатиб турган тиш оғриги бирдан тўхтагандай Сидиқжоннинг кўзи ялт этиб очилиб кетди. У шундай бир ҳолатда әдики, Эйёдахоннинг сўзига кулиш керак әкани кейин әсига келди ва шунинг учун кечикироқ кулди.

— Яшанг, опа, яшанг,— деди анчадан кейин,— Болтабой акам қаёққа кетдилар?

— Станцияга.

— Қачон келадилар?

— Цементни тушириб бўлиб келадилар-да. Ҳа, айтгандай, ўртоқ Самандаровнинг гапларида сиз йўқ әдингиз. Цемент келипти, тўғонга.

— Цементлик тўғон бўлар әкан-да?

— Бўлмаса баҳорги тошқинда ҳамма ёқини сув олиб кетмайдими? Ҳали ўртоқ Самандаров сизни чақириб нима дедилар?

Сидиқжон қандай қилиб шуидан гап очишни билмай турган эди, Эйёдахоннинг бу саволи айни муддао бўлди.

— Қаерликсан дедилар, Үрмонжон киминг бўлади дедилар... Болтабой акамга ҳеч нарса деганлари йўқми?

— Нима тўғрида?

— Менинг тўғримда.

— Нима дейишлари керак эди?

— Мени суриштириб қолганларига айтаяпман-да.

Зиёдахон қумғондан тогарачага сув қуиди, бир сиқим туз ташлаб чайқади, бармоғи билан татиб кўриб ҳовучлаб ун солар экан:

— Сизни танимаганларни учун суриштиргандирларда. Кўнглингизга келмасин-ку, ҳар хил одам бўлади. Қишида «Йашчи» колхозидан бир одам ҳайдалди. Бу одам миэрзароллик бир ёт унсур экан.

Ёт унсур деганда негадир Сидиқжоннинг кўз олдига етти пуштидан қолган васиқаларни кўтариб титраб-қақшаб турган қайнанаси келди. «Наинки шу кампир эри Зуннунхўжанинг колхозга киришига рози бўлса!»

— Ёт унсур колхозга кирадими? — деди Сидиқжон.

Зиёдахон, ҳамир қорар экан, унга кўз қирини ташлаб кулемсиради.

— Йўлини топса киради.

— Ўзи колхозга қарши бўлса ҳам-а?

— Қарши бўлгани учун киради-да! Энди «ҳамма бир қозондан овқат ейди, битта кўрпада ётади, хотинлар ҳам ўртада бўлади» деган гаплар кетмай қолди. Колхоз бўлди, ҳамма ўз қозонидан овқат еб, ўз кўрпасида ётиб юрипти; бирорвоннинг хотинига бирор ола қараётгани йўқ... Шунақами?

Сидиқжон қип-қизариб, худди фавқулодда бир нарса кўргандай, кўзанинг ичига қаради.

— Шундоқ бўлгандан кейин,— деди Зиёдахон давом этиб,— колхоз кўп нарсадан маҳрум қилган ёт унсур нима қилсин? Иложини топса ўз қишлоғида, иложини топмаса бошқа қишлоққа бориб колхозга киради, мулоийим супурги бўлиб юради-ю, колхознинг расвосини чиқаришга ҳаракат қилади. Буларга колхоз ҳам, бизнинг ҳукуматимиз ҳам бўлмаса, бурунги замон келса, ер-сув қўлида бўлса, эшигига хизматкорлар, даласида чоракорлар, батраклар ишласа, Аҳмедов акам айтмоқчи, кузда ҳосил олиб

киргани-ю баҳорда гўнг олиб чиққани дарвозасини ҳам бирор очиб берса...

— Ундоқ бўлса, албатта, ўртоқ Самандаровнинг суриштирганлари ўринли. Болтабой акам айтгандирлар. Унақа одам эмас дегандирлар?

Эйёдахон зувала узар экан, ҳазиломиз жавоб берди:

— Унақа одам эмаслигингизни ҳали ўзлари ҳам билмайдилар.

Сидиқжон унинг ҳазиломиз гапирганини пайқамай Зиёдахонга мунгайиб қаради.

— Нега, Эйёдахон опа, нега билмас эканлар?

Эйёдахон ҳам унинг руҳи тушиб кетганини пайқамади.

— Қаёқдан биладилар?

Сидиқжон узоқ сукут қилиб қолганидан кейин бош чайқади.

— Болалигимда эшикма-эшик юрар әдиму қаерга борсам ўша ерга келгинди бўлиб болаларнинг ўйинига қўшила олмас әдим. Бориб-бориб ўз маҳалламиэнинг болалари ҳам мени келгинди деб ўйинга қўшмайдиган бўлишган әди. Дарбадарлигим ана шунда билиниб, жуда-жуда хўрлигим келар әди. Ҳозир ҳам худди шундай бўладиганга ўхшаб қолди. Йўқ, Эйёдахан опа, мен унсур әмасман! Агар мени бирор унсур деса ҳақимга жуда-жуда жабро қиласди.

Эйёдахон шитоб билан угра кесар экан унга бир қараб қўйди:

— Сизни ҳеч ким унсур дегани йўқ-ку.

— Жуда жабро қиласди,— деди Сидиқжон чуқур олган нафасини гап билан бўшатиб.

Сидиқжон бутун саргузаштини — онаси нима учун аравасозга шогирд берганини, нима бўлиб Эуннунхўжага йичкуёв бўлиб қолганини, ўз тўпидан айрилиб кечирган ўн йиллик ҳаётини, бола-чақасини ташлаб чиқиб кети-

шига нималар сабаб ва нималар туртки бўлганини, ўз қишлоғида нима учун колхозга кирмаганини, онасининг олдидан қандай ният билан чиқиб кетганини, эндиги ниятини батафсил гапириб берди.

Зиёдахон унинг сўзида шунчалик қизиқиб қулоқ солдикни, шунча ҳамирни қандай қилиб угра кесганини билмай қолди.

Сидиқжон сўзининг охирида жуда ҳам маъюслик билан деди:

— Энди, опа, мен Ўрмонжон, Болтабой акамларнинг, шу ерда пешонасини очаётган ҳамманинг этагини ушлаганим ушлаган. Шулар қайси йўлга бошласа юраман, қаёқ-қа олиб борса бораман...

Сидиқжоннинг товуши ўзгарди. Зиёдахон, худди унинг шундай кунлар кўрганига ўзи сабаб бўлгандай, нима қилишини билмай қолди.

— Тегишдим, Сидиқжон ака, тегишдим. Ўртоқ Самандаров ҳеч нарса демаган бўлсалар керак. Десалар ҳам Boltaboy akangiz tushuntirmay қўярмидилар! - деди.

— Мен омади гапни айтаётиман. Ўртоқ Самандаров, албатта, мени билмайдилар. Boltaboy akam, bu ёғи мана сиз... Ўрни келиб қолганда айтсаларинг... Биз ҳам одам боласи... Бироннинг яхшилигини ерда қолдирмаймиз.

Зиёдхоннинг кўзларига ёш келди, унга тасалли бериб чехрасини очгунча ўлиб бўлди.

Сидиқжон, гарчи Зиёдахоннинг сўзларидан кейин бир қадар таскин топган бўлса ҳам, ҳар қалай, Boltaboy bilan ikki ofiz gaplaшиб, Samandarovning Boltaboyiga nimalar deganini aniқ bilgisi keldi. Boltaboy kechki ovqatdan keyin keldi. У, жуда катта ишни битириб kелгандай ofzi қулоғида бўлиб, нуқул цемент тўғрисида — унинг бир xуржунини әшак зўрга кўтариши, у билан том шувалса қандоқ бўлиши ҳақидаги ўзининг тахминларини, цеменглаб қилинган тўғон қанчалик пишиқ бўлиши ва ҳоказолар

тўғрисида гапирав, шу қадар шавқу завқ билан гапирав әдикى, Сидиқжон унинг қулоғига ҳозир бошқа гап кирмас-лигини билиб гаплашгани ҳаракат ҳам қилмади. Эртасига ҳам маврид бўлмади. Учинчи куни райондан артистлар келиб дарё бўйида катта концерт берди. Шу концертдан қайтишда Сидиқжон гапни нимадан бошлишни билмай турган әди, Болтабойнинг ўзи гап очди:

— Ўртоқ Самандаров сизни хўп ташвишга солиб қўйиптилар-да? — деди кулиб,— у киши бирорни колхозга ол, бирорни олма демайдилар, бу ишга аралашмайдилар. Кимни колхозга олиш, кимни колхоздан чиқариш колхозчиларнинг ўз ихтиёрида. Бунинг ўз йўл-йўриғи бор. Ўртоқ Самандаров ана шу йўл-йўриқни бузманглар дейдилар, холос.

Сидиқжон камоли суюнганидан нима дейишини билмай:

— Қуллуқ, Болтабой ака, қуллуқ,— деди, лекин нимага қуллуқ деяётганини ўзи билмас әди.

— Йўл-йўриғи шуки,— деди Болтабой,— правление-га ариза берасиз. Аризангизни правление кўради, кейин колхозчиларнинг ўртасига солади. Колхозчилар нима деса шу бўлади.

— Бу ерда мени ҳеч ким билмайди-ку? Бу ёғи нима бўлди?

— Мана ҳозир билдириб юрибсиз-ку. Ҳозирданоқ кўриб турибмиз: дангасалик, айёрикни билмайдиган йигитга ўҳшайсиз.

— Бу одамларнинг ичидагаса киши ўғрига ўхшаб қолмайдими, Болтабой ака! Мен у томонини айтаман... Кимлигимни ҳеч ким билмайди...

— Ўзингиз айтиб берасиз-да.

— Ўрмонжон акам яхши биладилар. Яна кимга айтсан бўлади?

— Ҳаммага айтасиз-да, мажлисга айтасиз.

— Ўша мажлисга ўзим ҳам кираманми?

Болтабой унинг қўрқиб кетганини кўриб кулди.

— Бўлмаса-чи!

— Йўқ, ростини айтинг, Болтабой ака. Ҳазиллашманг...

— Ҳазили йўқ. Колхозчи қўл кўтаргандан кейин кимни олаётганини билиши керакми, йўқми? Мажлисда ўрнингиздан турасиз, аввал саволларга жавоб берасиз; кейин бир бошдан гапирасиз: кимсиз, қаерликсиз, нима иш қилгансиз...

Сидиқжон юзларча киши оғзиға қараб турган мажлисни кўз олдига келтириб жуда катта ташвишга қолди-ю, дами ичига тушиб кетди. Болтабой буни пайқамади, то бостирмага келгунча ўз ўйи билан бўлиб, сўз қотмади. Бостирмада чироқ пастлатилган, теварак-атрофда ҳамма ётиш тараддуудида, кимдир аллақачон хуррак отмоқда.

Сидиқжон шу кундан бошлаб, ҳар замон, мажлис эсига тушиб қолганда юраги «шув» этишини ва шундай кезларда ким кўз олдида бўлса «ўша мажлисда бу ҳам гапирамикин» деб ўйлашини әътиборга олмаганди, ҳар жиҳатдан хотиржам ва руҳи енгил бўлиб қолди. У энди, дастлабки кунлардаги сингари, бегонасирамас, гаплашгани ва ҳамтовоқ бўлгани одам танламас, истироҳат чоқларида рўпара келган тўпга қўшилиб хурсандчилик қиласи, асқия ва афанди айтишар, ишга доир гапларга аралашиб, бироннинг фикрини қувватлар ёки рад қиласи, ўз фикрини айтар эди.

Ғўза чопигига кетган кишилар қайтиб келгандан кейин ҳамма участкада иш жуда қизиб кетди. Ҳамма колхозчилар ғўза чопигига кетган вақтни чиқариб олишга уриниб басма-басига ҳаракат қиласи. Район газетаси ишнинг бориши ва айрим колхоз, бригада, ҳатто айрим одамларнинг қандай ишлаётгани тўғрисида тез-тез ёзиб турар эди. Область газетаси «Бешийиллик» колхозининг аъзоларидан Тўрақул Мамажонов деган ударникнинг суратини босиб чиқарди. Райондан тез-тез ҳар хил одам-

лар келиб турарди. Сидиқжоннинг назарида, бу иш учун фақат шу ердаги одамларгина эмас, бутун район халқи жон кўйдираётган, қимиirlаган ҳар бир жон унини олға босиши учун нимадир қилаётгандай кўринар эди. Сидиқжон ишга шу қадар берилиб, шу қадар зўр бериб ишлар эдики, битта одамнинг қўлидан шунча иш келишига баъзан ўзи ҳайрон қолар эди.

Навбатдаги чопиқ маҳалигача колхозчиларнинг кўпчилиги мўлжалдан ортиқроқ иш қилиб қўйди. Тўғон участкасида ер иши асосан битди. Тўғонга керакли харсанг тошлар уйиб қўйилган, қизил темир дарвоза бутун лаш-лушлари билан ўт-ўланлар ичидаги ётар эди.

Навбатдаги чопиққа одам кетишидан уч кун бурун кечки пайт иккита ҳамшира келиб алланимага қарши ҳаммага укол қилди. Уколдан кейин Сидиқжон жуда ланж бўлиб, ишдан барвақт қайтди; кечки овқатни кўнгли тортмай зўрга еди-ю, ҳеч кимга ҳеч нарса демай ётди. Эртасига иситмаси жуда кўтарилиб кетди. Уколдан ҳеч кимга ҳеч нарса бўлмагани ҳолда Сидиқжоннинг иситмаси бу қадар кўтарилганидан ташвиш торган Болтабой доктор олиб келди. Умрида докторга кўринмаган Сидиқжон мўйсафид, жуда нуроний, вужуди ҳамма дардга шифодай кўринган докторнинг жуда ҳам ағдар-тўнтар, қилиб кўришини, минг хил иллат топишини ва бир эмас, бир неча хил дори беришини кутган эди. Бироқ доктор уни қўл учидагина кўрди, дори бермади, тайинли бир гап ҳам айтмади. Докторнинг бу ҳаракатлари, айниқса дори бермагани Сидиқжонга «кўришнинг, дори беришнинг фойдаси йўқ, бари бир ўлади» дегандай бўлиб кўринди. У, кўзигаmall жойнамоз билан олача тўш ёпилган тобут ва сочини юлиб фарёд чекаётган онаси кўриниб, йиглаб юборди.

Кечқурун Болтабой уни аравада Капсанчиларга жўнатди.

Ўрмонжон уйида йўқ әкан, хотини Тўпанисо Сидиқжоннинг аҳволини кўриб дарров каравотга ётқизди, чой дамлаб келди. Сидиқжон бир пиёла чойни худди угра ош ичгандай узун-узун ҳўплаб ичди-да, чой оғзига ёқмаса ҳам, бир оз таъби очилгандай бўлди.

Ташқаридан кимдир «Ўрмонжон ака» деб чақирди, ҳаял ўтмай эшикдан илжайган калла намоён бўлди.

— Келинг, қори ака,— деди Тўпанисо ва ўрнидан турди.— Қани, бу ёққа.

Андусамадқори йўғон гавдасига номуносиб тарзда мушукдай мулоим қадам босиб стол ёнига келди; қўлидаги тугунчани столга қўйди-да, Сидиқжонга қараб кўзлари олайиб кетди.

— Ийе!— деди худди ҳозир унинг устига ўзини ташлагудай бўлиб.— Нима қилди? Ўрмонжон акаммилар?

— Йўқ, меҳмон,— деди Тўпанисо совуққина.

— Бундоқ денг-да. Кайфим учиб кетди-я!— деди қори ва ёқасини катта очиб кўкрагига уч марта туфлади.— Бугун кўрган эдим, ҳайрон бўлдим... Ҳудо кўрсагласин... Меҳмон дедингизми?

— Сидиқжон. Тоблари қочипти.

Қори дарров энгашиб Сидиқжоннинг юзига бир қарди-ю, худди унинг афти маъқул бўлмагандай, совуққина.

— Э, ошна, нима қилди?— деди ва ундан жавоб кутмасдан, Тўпанисога мурожаат қилди:— Анзират холанинг уйига шу киши борадими?

— Ҳа, шу киши.

Абдусамадқори курсига ўтираётуб, худди қизиқ бир нарса тўсатдан эсига тушгандай, пиқ әтиб кулиб юборди.

— Ўрмонжон акам хўп аломатлар-да, жуда-жуда аломатлар,— деди, лекин унинг нимаси аломат эканлигини айтиш ўрнига Ўрмонжоннинг ишибилармон ва файратли әкани, «Қўшчинор» колхозига унинг пойқадами ёққани, у келгандан бери Капсанчилар қишлоғининг ҳатто оби ҳавоси ҳам ўзгаргани, правление шундай одамини ҳосилотликдан олиб чорвачилик Фермасига қўйганлиги ва унинг ўрнига пахтани фақат китобда кўрган Иброҳимовни тайинлагани чакки бўлганлиги тўғрисида гапирди; сўнgra, унга куч-кувват, файрат берган нарса унинг оиласиди ҳушбахтлиги деган мазмунда гапириб, бу гапдан «Қўшчинор»ни «Қўшчинор» қилаётган Ўрмонжон бўлса, Ўрмонжонни Ўрмонжон қилаётган унинг хотини деган хулоса чиқарди. Сўз Ўрмонжон ҳақида кетаётганда, бу гапларнинг ҳаммаси хушомад деб қовоғини солиб ўтирган Тўпанисо ўзи ҳақидаги мақтовга келганда оғзининг таноби қочиб:

— Мен нима қилибман?.. Менда нима гап?.. Ҳеч-да,— деди.

— Хотин, яхши хотин әркак кишининг бўйни,— деди қори бу гапларга зўр мароқ билан қулоқ солиб ётган Сидиқжонга юзланиб.— Яхшиликка бурадиган ҳам бўйин, ёмонликка бурадиган ҳам бўйин, шундоқ әмасми?

Сидиқжон, ёмон хотиннинг жафосини торта-торта жонида жон қолмагандай, «Нимасини айтасиз» деган мазмунда бош қимиrolатди.

— Қани ҳамма хотин ҳам сиздай бўлса!— деди қори Тўпанисога зўр ҳавас билан қараб.

Тўпанисо хижолат тортиб ерга қаради:

— Менга нима қипти?..

— Қандингизни уринг-да! Ўрмонжон акам чизган чизигингиздан чиқмайдиларми? Чиқмайдилар! Е чиқадиларми?

Тўпанисо ёлғондан қовоғини солди.

— Нега? Ихтиёр ўзларида.

— Тўғри, ихтиёр ўзларида, лекин сизга маслаҳат соладилар, маслаҳатингизга юрадилар-да, яхши маслаҳат берсангиз юрмайдиларми? Йўлингиизга юрганлари, чизган чизиғингиздан чиқмаганлари шу-да!

— Яхши маслаҳатга ҳамма ҳам юради,— деди Тўпанисо.

— Тўғри, лекин яхши маслаҳат ҳаммадан чиқавермайди-да. Бизнинг хотинлардан ҳам чиқса-чи! Яхши маслаҳат эмас, бир оғиз бамаъни гап — анқога шафे!

Қори ўзининг хотинини ёмонлаб кетди: шолини сочмасдан туёлмайди, сув қайнатса ҳам тагига олдириб қўяди, боласининг бурни ҳамма вақт оқиб туроди, насиҳат қилинса эснайди...

— Ўзига ҳам қийин, менга ҳам қийин! Қийин, жудажуда қийин! — деди қори,— сиздай синглимиз бўлсаю биз шунаقا қийналиб юрсак...

Тўпанисо кулгидан лабини йигиштиромай ерга қаради.

— Мен нима... мен нима қиласман...

— Шуни қолипга солиб бермасангиз бўлмайди, синглим. Бир сингиллик қилинг! Ҳа, айтгандай, келинингиз сизга ўрик бериб юборган эди.— Қори тугунчани очиб ўрикдан иккитасини Сидиқжонга узатди.— Заб ўрик өкан-да. Канал битиб, сув сероб бўлиб боф-роғ қилганимизда албатта шунинг данагидан экамиз... Шундай қилинг, синглим, келинингизни рўёбга чиқаринг. Сизга, сиздай хотинга бу ҳеч гап эмас. Унинг сизга ҳеч оғирлиги тушмайди. Сиз билан бирга бўлса бас. Одамнинг одамга акси уради. Ҳамма гап мана шунда. Буни келинингизнинг ўзи ҳам билади. «Тўпанисо опам билан бирга бўлсам иш билар әдим, гап билар әдим, тушунган хотин бўлар әдим» дейди. Сиз билан бир бригадада бўлса бас. Мен шу тўғрида Бўтабой акамга гапирмоқчи әдим, менга «йўқ» десалар...

йўқ демайдилар-ку! Мабодо йўқ десалар, сизнинг айтишингиз нокулай бўлиб қолади деб индаганим йўқ. Буни сиз айтсангиз яхши бўларди. Шундоқ қилинг, секин айтинг...

Қорининг бу гапларидан кейин Тўпанисо бунаقا ишларга ҳеч қачон аралашмаганини айтишга номус қилди-ю «хўп» деди, лекин шу билан кўнглига жуда катта ғашлик тушди.

Қори, гўё хўп деса-демаса шу ишни қилишдан кўнгли тўқ бўлгандай, унинг жавобини кутмасдан Сидиқжонга юзланди.

— Тобингиз қочгани ёмон бўлипти-ку, ошнам, Анэират холанинг уйига қачон борасиз? Борасизми?

Сидиқжон бошини яна ёстиққа қўйиб жавоб берди:

— Қишлоққа кетиб, тузалганимдан кейин қайтиб келмоқчиман.

Қори, худди фавқулодда бир ҳикмат эшигандай, оғзини ва кўзларини катта очиб Тўпанисога қаради. Тўпанисо Сидиқжоннинг сўзини эшитмаган ва ўз ўйи билан бўлиб бошқа ёққа қараб ўтирган эди, шундоқ бўлса ҳам қори «бу гапнинг фаҳмига етдингиэмиси?» деган мазмунда унга бош иргатиб қўйди. Сидиқжон бу гапнинг нимаси қорини бу қадар ҳайратга согланини билолмай қолди.

— Шундоқми? — деди қори яна шунаقا зўр гап кутгандай катта ихлос билан унинг юзига тикилиб.— Қишлоқда кимингиз бор?

— Онам бор, укам бор.

Қори дарҳол маъюс қиёфага кирди.

— Уҳ-үҳ-үҳ! Ҳа она-я! Онайизор! Шўрлик она ҳозир қандай тушлар кўраётган экан! Уй-жойингиз борми?

Сидиқжон кўзига ёш келиб, зўрга жавоб берди:

— Бор...

— Ийе, онангиз бўлса, уй-жойингиз бўлса... давлатку! Нима қиласиз мусофиричилликда? Ўзингизни мусофири қилиб, онангизни мусофиридай қилиб... Ҳозир ҳам унча билинмайди — янги келгансиз, ўзингиз якка, битта уйда турсангиз, бошингиз мана бунаقا ёстиққа тегса... бир қултум сувга зор бўлиб «вой» деганингизда «қаеринг оғрийди?» дегудай киши бўлмасдан ётсангиз... Бундан ёмони борми! Анэират хола ҳам юраги торгина бир кампир, бўлар-бўлмасга хархаша қиладиган... уйи ҳам гўрга ўхшайди.

Шундан кейин қори мусофиричилик қандай ёмон эканлиги, бу тўғрида кимлар нималар дегани, ҳозирги замон одамларида гёё бир-бирига меҳр-муҳаббат қолмаганлиги, Анэират холанинг феъл-атвори ва ким билан уришгани-ю унга нималар дегани, аллақаердаги ғариб гўристонлик тўғриларида гапирди. Бу гапларнинг ҳаммасини Сидиқжонга жуда хайриҳоҳ бўлиб, дам-бадам унинг пешонасини ушлаб кўриб, қўлинни силаб гапирди. Сидиқжоннинг кўзиға қабр сингари қоп-қоронги ва тор уй, қайнанаси сингари ўлгундай баджаҳл ва шанги кампир, ўзининг бемор ётгани, ўлгани, фақат бўйра солингган ва усти очиқ тобутда тўрт киши кўтариб ғариб гўристонга олиб кетаётгани кўриниб кетди.

Сидиқжон шу ётганича уйқуга кетган экан, бир вақт кўзини очиб қараса тепасида Ўрмонжон туритти. У кўзларини катта очиб, Ўрмонжоннинг юзига тикилганича ўрнидан турмоқчи бўлган эди, Ўрмонжон елкасидан босди.

— Қимиirlама, қимиirlama! Ҳўш, нима қилди? — деди унинг ёнига ўтириб,— укол ёқманти-да. Ҳеч нима қилмайди, бир сен эмас, яна етти киши шунаقا ётипти... Жуда қўрқоқ экансан-ку!

— Қишлоққа борсам, бир-икки кун туриб, тузалганимдан кейин келсам деган әдим.

— Нега, бу ерда тузалиб бўлмас эканми? Фақат шунинг учун қишлоққа бормоқчимисан?

— Бошқа нима бўлар эди?

— Ростини айтавер, агар...

Сидиқжон туриб ёнбошлади.

— Сўранг, Ўрмонжон ака, ҳаммадан, ҳаммадан сўранг... Болтабой акамдан, Рўзиматдан, Эйёдахон опамдан сўранг... Бўтабой акамдан сўрасангиз ҳам бўлади.

— Биламан, биламан,— деди Ўрмонжон кулимсираб.— Дуруст, яхши ишлабсан, кўнглингда кетиш бўлса бунақа ишламас эдинг.

— Сиз менинг кўнглимни билмайсиз, Ўрмонжон ака.

— Кўнглингни билиб қолармиз. Колхоз нима эканлигини сен ҳам билиб оларсан. Гап шу: ҳеч қаёққа бормайсан.

— Узоқ ётиб қолсам...

— Аввали шуки, әртага отдай бўлиб кетасан. Ундан кейин, узоқ ётиб қолсанг нима эмиш? Бирорвга оғирлигинг тушмайди. Колхозчилик, битта одамнинг оғирлиги шунча одамга бир мисқолдан ҳам тушмайди.

Сидиқжон илжайди.

— Эртага ўрнимдан туриб кетадиганга ўхшайман, ҳозир ҳам аича енгил тортдим.

Ўрмонжон турди. Сидиқжон Анзират холанинг уйидан бошқа уй топилмасмикин деб сўрагани оғиз очди-ю сўрамади. Ўрмонжон унинг бир нима демоқчи бўлганини пайқаб:

— Ҳа, нима демоқчисан?— деди.

— Анзират хола билан гаплашиб қўйганмисиз?

Ўрмонжон ялат этиб унга қаради.

— Отини ҳам билиб олибсан-ку. Гаплашганман,

Анзират холанг мени ҳар кўрганида сени сўрайди. Ҳўп, ухла өртага гаплашамиз.

Ўрмонжон чиқди. Кўчада от кишнади.

4

Анзират холанинг әри Капсанчилардан бўлиб ер ислоҳотида ер олди-ю енгини шимаришга улгуролмай қазо қилди. Анзират хола ундан икки яшар ўғли Мадрайим, ўн беш яшар қизи Кимсаной билан қолди. Не-не умидлар билан олинган ер, болалар ёш ва Анзират холанинг ўзи дардчил бўлгани учун, экувсиз қолиб қўриқقا қўшилиб кетди.

Мадрайимни сельсоветнинг ўша вақтдаги раиси районга олиб бориб исполкомга югурдак қилиб қўйди. Анзират хола унинг ҳар замон беш-тўрт танга пул юбориши ёки бирон нарса кўтариб келишидан ҳам кўра «худо газаб қилган шу Капсанчилар қишлоғидан» чиқиб кетганига, ўша ёқларда юрса пешонаси очилишига хурсанд эди.

Кимсаной бўйга етди. Анзират хола уни шу ердан чиққан одамларга бермай Чирикжийдага узатди — хотини ўлган, ўрта ёшлардаги ўзига тўқ бир кишига берди. Анзират хола шу ишни қилганида кўёвнинг ўзига тўқлигидан ҳам кўра Кимсанойнинг «худо газаб қилган шу қишлоқдан» чиқиб кетса баҳти очилишини, хотини ўлган ва ўрта ёшлик кишига тегса тили узун бўлишини қўзда тутган эди. Бироқ у одам, хотини бор экан, бир йил ўтар-ўтмас Кимсанойнинг устига кўчириб келди. Кимсаной кундош азобига бир йилча чидади-ю охири бўлмади: қўлида ўғилчаси Ҳошимжон билан қайтиб келди. У, бир ярим йилча ўтгандан кейин, шу ерлик Абдували деган бир кишига тегди. Бу одам ичкуёв бўлди. Эр-хотин колхозга киришди. Анзират хола эндиғина ёруғ кун кўришга умид

боғлаганида дамба ва ундан кейин канал иши бошланди-ю
куёв, эвази нақд бўлмаган оғир меҳнатга тоб беролмай,
Кимсанойни олиб шаҳарга кетиб қолди. У Ҳошимжонни
ҳам олиб кетиш тўғрисида оғиз очмагани учун бу ҳақда
на Кимсаной бир нима дея олди, на Анзират хола. Ҳошим-
жон Анзират холанинг қўлида қолди.

Мадрайим ўша кунлари аскарликка кетди. Аниқ бил-
ган одамларнинг айтишига қараганда, Мадрайим аскар-
ликка ўзи ариза берган ва ҳатто бунинг кетидан хийла
овора бўлган экан.

Шундай қилиб, Анзират хола набираси Ҳошимжон ва
кейинчалик Ўрмонжон келтириб қўйган Канизак деган
бир жувон билан бирга туарар эди.

Унинг ҳовлиси одам бўйи келар-келмас гувалак де-
вор билан ўралган, деворнинг баъзи жойлари ичкарига,
баъзи жойлари ташқарига қийшайган бўлиб, ҳар ер-ҳар
еридан қизил сопол парчалари, тош, яна алланима бало-
лар кўриниб туарар эди. Ҳовлининг тўридаги айвончанинг
икки томонида биттадан уй бўлиб, Анзират хола
бунинг бирини ўша жувонга берган, лекин жувон бу
уйда эмас, Анзират холанинг ўзи билан туарар эди.
Сидиқжон мана шу уйда туриши керак эди. Уй, айниқ-
са Анзират хола қори айтганича бўлиб чиқмади. У олт-
мишларга бориб қолган, нимжон, юзи жуда буришган
бўлса ҳам қизил, товуши майнин ва ёқимли бир кампир
эди. У Сидиқжонни ўз боласидай қарши олиб, ўзи ту-
радиган уйга олиб кирди; дастурхон ёзиб олдига нон,
бир шокоса эзилганроқ ўрик, бир ликобчада шакар қўй-
ди; чой қайнагунча Сидиқжоннинг нимадан касал бўлга-
нини, кимлари борлигини сўради; чой маҳалида гоҳ кулиб,
гоҳ йиғламсираб ўзи, болалари, невараси, Ўрмонжон тўғ-
рисида гапирди.

— Дуруст, худо хайрини берсин,— деди Ўрмонжон
тўғрисида,— биздан тез-тез хабар олиб туради, ҳар

байрамда Ҳошимжонни бирон нарса билан йўқлайди. Умрини берсин. Ҳаммадан ҳам кўра мана бу Канизакни обкелиб қўйганига суюнаман. Бу бечоранинг ҳам ҳеч кими йўқ экан. Она-боладай бўлиб қолдик. Менга, айниқса Ҳошимжонга жуда меҳрибон, топганини шу ерга олиб келади. Мен ҳам, албатта, тек ўтирмай кучим етганча қимирлаб тураман. Қурт тутамиз. Бу йил колхозга тўққизта якандоз, ўн тўртта кўрпа қоплаб бердим. Ўтган йил бир юз ўн саккиз меҳнат куни ишладим. Қимирлаган қир ошар экан-да, шунча иш қўлимдан келар деб ҳеч ўйламаган эдим. Меҳнат кунига дон дуруст тушди-ку, пахтамиз оз-да, пул жуда кам тушди. Майли, мана бу канал битса, янги ер очилса пахта ҳам кўпаяди. Ӯшанда ҳамманинг егани олдида, емагани кетида бўлиб қолади. Ишқилиб худо Ӯрмонжоннинг умрини берсин. Ӯзи унча гапдон ҳам әмас, мажлисларда кўп гапирмайди; кўп гапирган одамга «гапнинг пўскалласини айт» деб туради.

Анзират хола йиртиқ-ямоқ ва ҳар хил икир-чикир ишлар билан машғул бўлиб, кечгача Сидиқжоннинг олдидан жилмади. Сидиқжон бошда унинг хуш қабул қилганлигини Ӯрмонжон кўп писанда қилиб тайнинлаганидан деб ўйлаган эди; бироқ кампир у билан куни бўйи шу хилда гаплашиб ўтириди ва унга шундай меҳр-муҳаббат кўрсатдики, бошда ӯшандай ўйга борганидан хижолат бўлиб қолди ва қачон бўлса ҳам бу кампирга сира эсдан чиқмайдиган бир яхшилик қилишни кўнглига туғиб қўйди.

Кечки пайт соя қайтганда Анзират хола унга дарчанинг олдидаги супага жой қилиб берди. Сидиқжон, гарчи ҳануз оғзи bemaza ва боши оғирроқ бўлса ҳам, иситмаси тушганиданми, ёки кампирнинг меҳрибончиликлариданми, кўнгли кўтарилиб таъби очилганиданми, жуда енгил торгди.

Кечқурун кўча эшиги тақиллади-ю, кампирнинг «вой ўргилай! Вой, гиргиттон» деган товуши эшитилди. Ҳаял

ўтмай эшикдан Самандаров кирди. У, бўйнига осилиб олган Ҳошимжоннинг оғирлигидан ўзини бир оз орқага ташлаб, кампирнинг тинмай ёғдираётган саволларига гоҳ бош ирфатиб ва гоҳ сўз билан жавоб бериб супага томон келар эди. Сидиқжон уни кўриб ҳаддан ташқари қўрқди ва иргиб ўрнидан турди-ю, супадан тушишини ҳам, туши маслигини ҳам билмай турив қолди. Самандаров келиб болани супага чиқариб қўйди, сўрашгани Сидиқжонга қўл узатди, Сидиқжон, ҳануз эс-ҳушини ўнглаб ололмаганидан, унинг нима учун қўл узатганини дарҳол фаҳмлолмай ҳаяллаброқ қўл берди.

— Ўтилинг, ўтилинг,— деди Самандаров ва чўнта-гидан иккита хўрөзқанд чиқариб болага берди. Бола супадан сакраб тушиб, чопқиллаганича кўчага чиқиб кетди.

Сидиқжон Самандаровга бақрайиб қараб турар, афтидан, унинг бу ерга нима учун келганини юзидан билишга ҳаракат қиласар эди. Кампир ҳануз гоҳ кулиб, гоҳ кўзига ёш олиб тинмай гапираётгани, дам-бадам савол бераётгани учун Самандаров унинг ҳолатини пай-қамади.

— Ойма-ойига икки ой бўлди, болам,— деди кампир яна кўзига ёш олиб,— наинки икки ойда бир йўқласа-нгиз... Менинг сизлардан бошқа кимим бор? Кимсаной у ёқда, куёв бўлмай ўлгур на ўлигини кўрсатади, на тири-гини. Мана, дамба битди, канал битай деб қолди, энди қизгинамни олиб келса ўладими! Кўришипти, бозорда мурч, қалампир сотиб ўтирган эмиш. Ўл бу кунингдан!

Самандаров қулди.

— Ундоқ бўлса бу ерга қайси юзи билан келади?

— Ҳа, шуни айтаман-да, бу ерга қайси юзи билан келади? Ўроқда йўқ, машоқда йўқ, хирмонда ҳозир... Бошқаларнинг жони жон эмас эканми! Бу орада қизим шўрлик унинг касофатига қолди. Кимсаной бўлгандা

ҳозир бригада бўлар эди. Гайратлик, ориятлик жувон эди. Мана, Канизак звено бўлар эмиш, Кимсанойнинг Канизакдан нимаси кам эди! Ҳа, айтгандай, ғалати туш... билмайман қаер экан... ёнимда ким ҳам бор экан... Ой иккита чиққан эмиш! Мен айтаман: вой худо... Шу ерда Мадрайим пайдо бўлипти... Ҳа, йўқ. Мадрайим ҳам шу ерда экан. Мадрайим: «Ана, кўрдингизми?» дейди. Билмайман кейин нима бўлди. Садақа бердим.

— Яхши, жуда яхши туш кўрибсиз,— деди Самандаров,— ойнинг биттаси ўғлингизу, биттаси келин: ўғлингиз ўша ёқдан ойдай бир хотин олиб келади.

Кампир, худди ҳозир ўғли келин билан қўл ушлашиб кириб келаётгандай, эшикка қаради.

— Вой оғзиңгизга ёғ, ўғлим! Келин кўрадиган куним ҳам бормикин!

— Келин қилгани бисотда ҳеч нарса борми?

— Колхоздан нима теса шуни сандиққа ташлаб қўяётибман. Бисот дейсиз, менинг бисотим сизларда. ўғлим! Менинг сизлардан кўрганимни, кўраётганимни ҳеч ким ўз фарзандидан ҳам кўрган эмас.

— Биздан хурсандмисиз, ахир? Нега бўлмаса биздан нолибсиз?

Кампир, унинг саволига тушунмади шекилли, анграйиб туриб:

— Нима? — деди.

— Ўғлингизга нима деб хат ёздириб юбордингиз?

— Ҳеч нима... нима қилди?

— Ўғлингиз район ижрония комитетига ўртоқ Мавлонбековга хат ёзипти, хатида: «Онам жуда абгор бўлиб, куни гадойчиликка қолган өмиш» депти. Бу қандоқ бўлди?

Кампир ўғлига дарҳақиқат шу мазмунда хат ёздириб юборган, лекин унинг бу тўғрида район ҳукуматларига хат ёзишини сира хаёлига келтирмаган эди, гангигиб қолди.

— Вой, ўлай, бу нима дегани?

Самандаров этигининг қўнжидан тунука : қутича чиқариб маҳорка ўради.

— Билмайсизми? Нима дегани бўлар эди, совет ҳукумати райондан қўчиб кетганми дегани-да!

Кампир ўғлига ёзган хатидан бундай маъно чиқишини ҳеч ўйламаган экан.

— Мен ундоқ деганим йўқ...

— Ким айтди бўлмаса? Хат ёзиб берган киши ўзидан қўшиптими? Хатни кимга ёздирган эдингиз! Тайинлик одаммиди?

— Жон ўғлим, Мақсадали, у ёғини суриштирмай қўя қол. Менгина ўлай! Шундоқ деб хат қилсан Мадрайим келақолармикан дебман... Соғинганимдан...

— Шунга ишонсан бўладими?

— Ниятимга етмайни... у бўйнинг узилмагур ҳам дарров сизларга хат ёвақолмаса нима бўлар экан!

— Ҳа, кимга ёссиң бўлмаса, Охунбобоевга ёки Калининга ёса бўларниди? Ўша мирангизга яна битта хат ёздириб бор гапни айтинг. Нега ўшандоқ хат ёздирганингизни ўғлини билсан. Бола бечорани ташвишга қўйганингизни қаранг! Ўйламабсиз-да!..

Шом вақтида малла ранг кенг қўйлак кийган ва гуллик сариқ дурра боғлаган ўрта бўйли, озғингина, йигирма-йигирма бир ёшлардаги бир жувон келди. Жувон әшикдан кириши билан буларни кўриб бир тўхтади-ю, дуррасини қайта боғлаб, тўғри супа томонга келди; Самандаров билан қўл бериб сўрашди; Сидиқжон билан қўл бермасдан, лекин қўпдан таниш одамдек кўришди; ҳол-аҳвол сўради; сўнгра, бирдан лаби пирираб, ҳўнграб юбордида, дуррасининг учи билан юзини бекитиб тескари ўгирildi.

— Э-э-э, хўш, Канизакхон, нима, нима бўлди, ким уришибди?— деди Самандаров.

Канизак икки-уч ҳиқиллаб:

— Бўтабой акам масалангни мажлисга соламан дедилар.— деди.

— Қанақа масала әкан?

Канизак, енги билан бурнининг икки ёнини тез-тез артар әкан, Самандаровга кўз қири билан қаради.

— Сиз айтгандирсиз-да... Ўзингиз айтгансиз!

Унинг ўтириши, қарави, ўлкалаб гапириши, бутун ҳаракати Сидиқжонга жуда чиройли кўринди, «Инглashi ҳам чиройлик-а кулиши қанақа бўлса әкан» деб кўнглидан ўтказиб қўйди.

— Нима гап ўзи?— деди Самандаров,— аввал нима өванини билай, айтган бўлсан айтдим дейман.

— Айтмаган бўлсангиз... айтинг, мажлисга солмасинлар... майли, меҳнат кунимдан қирқсинлар... Бўлган иш шуки, ўша куни тушлик маҳалида Холмурод аканинг звеносида учта кетмон йўқолди. Бу кетмонлар жўхорипоя ичидан топилди, дарров топилди, ҳеч ким ишдан қолгани йўқ. Шуни бизнинг звенога тўнкашипти, ростдан ҳам бу ишни бизнинг звенодагилардан биронтаси қилганлиги аниқ әди. Ҳеч ким бўйнига олмади. Қарасам, бутун звено қора бўладиган, мен бўйнимга ола қолдим. Олмай ҳам ўлай...

Самандаров ўйлаб туриб:

— Ўша звено билан мусобақа қилганмидиларинг?— деб сўради.

Канизак, афтидан, шуни айтмоқчи әмас әди шекили, ноилож:

— Ҳа...— деди.

Самандаров заҳарханда қилди.

— Кетмон яшириб ўтирасизларми, кечаси чиқиб гўзасини юлсаларинг бўлмасмиди?

Канизак яна йиғламсиради.

— Вой, мени нега қўшасиз! Айтдим-ку...

— Хайр, ана сизлар мусобақада ютиб чиқдиларинг,

бу ютишдан нима фойда? Колхозга нима фойда? Бунақа ишни бир-биридан харидорини қизғанадиган, бирининг дўкони бирпас ёпилса бошқаси кўпроқ фойда кўрадиган, шунинг учун бир-бирини ғажиб ташлашга тайёр турган дўкондорлар қиласа бўлади! Бу қанақа мусобақа бўлди? Мусобақанинг маъносини биласанми ўзинг?

Канизак, кампир келтирган чироқни олиб ўртага қўяётиб, Ўрмонжондан эшитган гапини қайтарди:

— Биламан, мусобақадош икки кишидан бирининг ютуғи иккинчисининг рашигини эмас, ҳавасини, ғайратини келтириши керак,— деди.

— Бу гапни яхши ёд олибсану, маъносига тушунмабсан-да. Шу қилган ишларинг мусобақадош звенонинг ҳавасини, ғайратини келтирасар әмишми?

— Вой, тагин мени қўшасиз-а...

Канизак қуийб-пишиб яна тушунтироқчи бўлган эди, Самандаров сўзини бўлди:

— Хўп, агар кетмон эмас, пул йўқолганда бўйнингга олармидинг?

— Йўқ, албатта...

— Ҳа, баракалла! Уялар эдинг-а? Бунга нега уялмадинг? Чунки «ҳа, нима қипти, кетмон яширган бечора звенога яхшилик қилмоқчи бўлиб, звено ютиб чиқсин деб шу ишни қилган-да» деб ўйлагансан. Эҳтимол бу ишни бўйнингга олганингда тантилик қилдим деб звено олдида қанча керилган бўлсанг! Агар звено ҳам шуни тантилик деб билган бўлса кетмон яширган кишигина эмас, бутун звено социалистик мусобақанинг маъносини билмас экан... Қачон бўлган иш бу?

Канизак эштилар-эштилмас жавоб берди:

— Анча бўлди...

— Бўтабой энди эшитилтими?

— Йўқ, ўшанда эшитганлар.

Самандаров бир қоши паст ва бир қоши баланд бўлиб, ўчиб қолган маҳоркасини чироқдан тутатиб олди. Сидиқжоннинг гумонича, у ҳозир Канизакка қаттиқроқ ботадиган бирон гап айтиши керак эди. Бироқ унинг чеҳрасидаги бу тундлик дарров йўқолди. У Канизакка очиқ чеҳра, ҳатто хиёл табассум билан қараб:

— Кўрқма, шу чоққача мажлисга қўймаган одам әнди қўймайди,— деди.

Канизак билолмай қолди: бу Самандаровнинг тасалли берганими, Бўтабойни қоралаганими? Канизак унинг яна бир нима дейишини ва шундан кейин маълум бўлишини кутди. Самандаров боядан бери Канизакнинг кетида қўлини орқасига қилиб тикка турган болага қаради.

— Ҳўш, Ҳошимжон, худди сурат олдираётган кишига ўҳшаб турибсан? Бери кел.

Ҳошимжон, худди тийғаниб йиқиладигандай, бир қўли билан Канизакнинг елкасини ушлаганича икки қадам олдинга босди-ю, латтага ўралган бир нимани унинг қўлига берди ва дарҳол Канизакнинг орқасига бекинди. Самандаров латтани олиб икки дона гайка, бир дона тишлик мис парракни кўрди ва бола бу нарсаларни нима учун берганини англай олмай:

— Ўҳӯ, буларни қаёқдан топдинг? Буни нима қилсак бўлади?— деди.

Ҳошимжон дарров ўрнидан туриб Канизакнинг қулогига пицирлади. Канизак оғзини ва қўзларини катта очиб унга қулоқ солди-ю бирдан пицирлаб кулиб:

— Трактор ясаганингизда ишлатар әмишсиэ,— деди.

Самандаров завқ қилиб кулди ва болани қўлидан тортиб олиб бағрига босди.

— Баракалла, баракалла!— деди.

Сидиқжон куни бўйи бу болага бирон оғиз гапирмаганидан, уни ҳатто пайқамаганидан хижолат тортиб ҳозир сўзга аралашибни лоэм топди.

— Бу киши трактор ясашни биладиларми-а, Ҳошимжон? — деди болага яқин әнгашиб.

Бола, Самандаровнинг тракторсоз уста эканига жуда амин бўлса керак, қаттиқ бош ирғатди.

Шундан кейин сўз трактор, канал, янги очиладиган ерлар, пахта тўғрисида кетди. Анзират хола келиб яна қизи, куёви тўғрисида гапирди; Мадрайимга юборган хати ҳақида гапириб яна ўзининг ёмон қариганидан, анчайин нарсаларга фаҳми етмайдиган бўлиб қолганидан нолиди. Шундай қилиб Самандаров Канизакнинг қилмиши тўғрисида бошқа гап очмади.

Канизак дастурхон ёзиб овқат келтирди. У бир коса ошни Самандаровнинг олдига қўяр әкан:

— Айб қилмайсиз-да, Мақсудали ака, холам сўк оши қилиптилар,— деди.

Самандаров сопи узун, оғир ёғоч қошиқ билан ошни шопирап әкан, жилмайиб:

— Майли, ҳозирча айби йўқ. Айб қиладиган вақт ҳам келади. Лекин,— деди Самандаров қошиқни салмоқлаб,— ҳали ҳам мана бунаقا қошиқ тутиш айб. Бунга йўқчиликни, камбағалчиликни важ қилиб бўлмайди.

Самандаров ошни тез ичди ва бошқалар ҳам ичиб бўлгандан кейин кетгани қўзғалди.

У кетгандан кейин, худди бутун ҳовлини тўлдириб хандон-хушон сухбат қилиб ўтирган бир талай меҳмон бирдан чиқиб кетгандай, ҳовли ҳувиллаб қолди. Анзират хола ўша хатни нима учун юборганлиги, юбориб чакки қилганлиги, бунга Мақсудали ҳар қанча хафа бўлса ва уришса ҳам арзиши, лекин у бечора уришмагани тўғрисида ўзидан-ўзи жовраб қоронғида ивирсиб юрар әди.

Сидиқжон эртасига қушдай бўлиб турди.

У, тўғон бошига боришини эртага қўйиб, кунни шу

ерда ўтказди, лекин куни бўйи тинмади: айвончани, ҳар иккала уйни, ҳовлини тозалади; тўлиб қолган кир ўрани кўмиб ташлаб бошқа ўра қазиди; кўча эшигининг турмани туватди; Ҳошимжонга камон, қамишдан бир талай ўқ ясад берди. Кечки пайт кўчага чиқмоқчи бўлган әди, Анзират хола, унинг пули йўқлигини билгандай, соч олдиргани пул берди. Сидиқжон ҳам, худди бирон жойдан улгуржи пул кутиб тургану шу пул келиши биланоқ унинг пулинин бир неча ҳисса кўпайтириб берадиган ва буни кампир ҳам яхши биладигандай, ҳеч тортинмасдан олиб чўнтағига солди.

Кечқурун Канизак эшикдан кириши билан: «Сидиқжон ака, бизнинг звенода ишлар эмишсиз» деди. Сидиқжон, буни ўзи билгандай, бу звено қаерда ва нима иш қилишини ҳам сўрамасдан эртасига аzonда Канизак билан бирга ишга борди.

Звено пахтакор бригадалар звеноларидан бўлиб унинг бошлиғи олтмишларга бориб қолган, савод чиқариш борасида Бўтабойнинг қалтис тадбирига қарши исён кўтарган чоллардан бири, унинг олдидан ёғоч от миниб ўтган ўша Эокир ота әди. Эокир ота Сидиқжонни бир оз гўза чоптириб кўрди-ю, чопиққа ниҳоятда чечан әканини кўриб «отангга раҳмат» деди, сўнгра, ёзиб олмаса бу йигит қочиб кетадигандай, узоқ эвора бўлиб унинг отини дафтарчасига ёзиб қўйди.

5

Сидиқжон ишга Эокир ота ўйлагандан ҳам чечанроқ, файратлироқ чиқиб сал кунда бутун звенонинг диққатини ўзига тортди.

У, куни бўйи ва ҳатто дам олиш чоғларида ҳам тинмаслигига қарамай, улоқчи отдай ҳамиша ўйноқлаб ту-

рар, бутун ъвенони гуллатиб ашула айтар, одамларга тегишар, кулар, кулдирар әди. У нимага бунчалик хушвақт ва нимадан бу қадар хушбахт эканлиги тўғрисида ўйламас, мабодо ўйлагудай бўлса ҳам кўз олдига Самандаров, Ўрмонжон, Зиёдахон, Болтабой, Тўпанисо, Анизират хола ва бошқалар, шулар билан бир қаторда Канизак ҳам келар әди. Бу одамларнинг бири меҳр-оқибат кўрсатган, бири, мартабаси улуғ бўлишига қарамай, бир улфатдай гаплашган ва энг яқин дўстдай ғамхўрлик қилган, бири шу ерда юриб пешонаси очилиб кетишига ишонч туғдирган, бири ҳақоратга қарши интиқом қўлинни кўтармай ҳамширалик қўлинни чўзган, бири оналик меҳр-муҳаббати билан бошини силаган... Канизак нима қилган? Сидиқжон ўзига бундоқ савол бермас ва бундоқ савол хаёлига ҳам келмас әди.

Бу кунларда Сидиқжон нақадар хурсанд бўлса, Канизак шу қадар хафа ва унинг хафалигига «районда колхозни уриб чиқсан газета» сабаб әди. Район газетасида район партия комитетининг колхозларда оммавий-сиёсий ишларни кучайтириш тўғрисида чиқарган қарори эълон қилинган бўлиб, шу муносабат билан бош мақола ҳам босилган. Бош мақолада бу иш яхши йўлга қўйилган «Зарбдор», «Қизил омоч» сингари илғор колхозларнинг иш тажрибалари умумлаштирилган, «Нек қадам» колхозида йўл қўйилган хатолар ва бошқа бирмунча колхозлардаги камчиликларнинг сабаблари очиб ташланган, булардан хулоса чиқарилиб оммавий-сиёсий ишни ривожлантириш йўллари кўрсатилган әди. Бош мақолада бирмунча колхозлар қатори «Қўшчинор» колхозининг ишидаги камчиликлар ҳам кўрсатилган бўлиб, бу колхозларда партия ташкилотлари етарлиқ равища ишламасликлари натижасида социалистик мусобақа ва ударниклик қоидалари бузилаётганлиги, баъзи звенолар социалистик мусобақа ўрнига рақобат қилишиб, бир-бирларининг ишларига халал бераётганликлари ало-

ҳида қайд қилинган. Канизак буни ўз звеносида бўлиб ўтган кетмон воқеаси кўзда тутилиб айтилган гап деб ўйлади. У минут сайин юрагини кемириб кетаётган бу дардни ҳеч кимга айтольмас, лекин айтиб, ҳасрат қилиб, ўзини қарғаб, йиғлаб юрагини бўшатгиси, бирон оғиз бўлса ҳам тасалли берадиган гап эшитгиси келар эди.

Сидиқжон унинг сўлиброқ юрганини пайқади-ю, пайт топиб сабабини сўради. Канизак райкомнинг қарори колхоз активлари мажлисида муҳокама қилинишини эшитиб юраги сиқилиб турган эди, Сидиқжонни қаттиқ жеркиб ташлади. Шундай қаттиқ жеркидики, Сидиқжон нима гап бўлганини билмай гаранг бўлиб қолди. Канизак буни кўриб ўз қилмишидан қаттиқ хижолат бўлди ва узр айтмоқчи бўлиб оғиз ростлаган эди, кўзи жиққа ёшга тўлди-ю, узр у ёқда қолиб ҳасратга тушиб кетди.

— Боринг, Ўрмонжон акамга ростини айтинг,— деди Сидиқжон,— шундай бўлган эди, билмабман денг. Кунда-кунда ўлгандан бир кунда ўлган яхшироқ. Лекин Ўрмонжон акам уришмайдилар, мана кўрасиз, уришмайдилар.

Сидиқжон бу гапларни бир нав маслаҳат тарзида өмас, куйиб-пишиб гапирди ва Канизак кўнмагунча қўймади. Дарҳақиқат, Канизак Ўрмонжоннинг олдига юраги пўкиллаб борди-ю гул-гул очилиб қайтди. Райкомнинг ўша қарор чиқарилган мажлисида Ўрмонжоннинг ўзи ҳам қатнашган, кетмон яшириш ҳодисаси бошқа бир колхознинг бир звеносида ҳам бўлган экан. Ўрмонжон Канизакнинг сўзини эшитиб хўп кулипти, сўнгра, бу қарорнинг маъносини, активлар иштироки билан бўладиган очиқ партия мажлисининг вазифасини тушузтириб берипти.

Шундан кейин Канизак Сидиқжонни ўзига жуда яқин кўриб, ҳатто унга бир қадар суюниб қолди. Бу Канизакнинг унга қиласидиган ҳар бир муомаласидан

очиқ-оидин кўриниб турса ҳам, Абдусамадқорини эътиборга олмаганда, бунга ҳеч ким аҳамият бермас эди. **Дарҳақиқат**, Сидиқжон ҳамма вақт ва ҳар қандай шароитда ҳам унга ҳаддан ташқари, ҳатто баъзан хотин кишига малол келадиган даражада оқ кўнгиллик билан муомала қилар, лекин бундай муомала қилганда бир марта хотин кишига ола қараб оғзи куйганлиги кўнглиниңг кўчасидан ҳам ўтмас эди. У, афтидан, гаразли муомаланиңг ҳар қандай лаззатли натижасидан ҳам кўра содда, қувноқ ширин сўз, ёш, чиройли бир жувоннинг шу хилдаги яқинлигини, ўрни келганда қиладиган бирон меҳрибончилигини афзалроқ кўрар эди.

Шундай қилиб Сидиқжон, худди зўр бахтга эришган ёки ўшандай бахтининг бўсағасида тургандай, терисига сифмай, қулоғига ҳар бир товуш ёқимли эшитилиб, кўзига бутун олам ўн саккиз яшар қишлоқ қизининг юзидаи кўриниб, эски ҳаётини эслагуси ҳам келмай юрар эди.

Мана шу кунларнинг бири, иш жуда қизғин бораётган бир вақтда звенога Ўрмонжон келди. У ерни айланиб гўзаларни кўрди, қурт еган битта баргни узиб Зокир отага кўрсатди, кейин чопилган гўзаларни кўздан кечирди-ю, қорининг қўлидан кетмонни олди, сопини тутга уриб синдириб ташлади-да, индамай нариги звенога ўтиб кетди. Нима ҳодиса рўй бергани Зокир ота бориб кетмонни қўлига олганда маълум бўлди: кетмон кичкина, пойтешадәккина келар эди. Зокир ота гоҳ кетмонга, гоҳ қорига қараб нима дейишини билмай туриб-туриб бирдан соқоли силкиниб, «ҳез, ҳезалак!» деди-да, кетмонни унинг оёғи остига кўтариб урди. Кимдир «пиқ» этиб кулди.

Анэират хола, унинг уйи, мусофиричилик тўғрисида гапириб таъбини хира қилгани ва кейинчалик бу гапларнинг ҳаммаси ёлғон чиққанидан бери Сидиқжон қорини хушламас, унинг ҳар бир ҳаракати, бастига номуносиб ингичка товуши, мушукка ўхшаб юмшоқ қадам

босиши, ҳамма вақт сохта табассум қилиб туриши, гапирганда одамнинг юзига әмас, кўкрагига ёки қорнига қараб гапириши, ҳатто ош ичганда косанинг устига энгашиб, ҳали қошиқ яқин келмасдан оғзини катта очиши ҳам фашига тегар эди.

Шу кун кечқурун даладан қайтишда қори Сидиқжонга ҳамроҳ бўлиб қолди. Хийла ергача жим боришиди. Ниҳоят қори:

— Ўрмонжон акамнинг жаҳллари хўп тез-да,— деди ва товуш чиқармай қорнини силкитиб кулди,— раиснинг ўнг қўли бўлгандан кейин шу билиниб турмаса бўладими... Айниқса хотин важига келганда, ҳай-ҳай, худо ўз паноҳида сақласин! Битта-яримта одам хотинига, ё бўлмаса ўйнашига кўз олайтиrsa борми, ҳай-ҳай... ўзини тополмаса, эшагининг қорнига пичоқ уради!

Сидиқжон кулди.

— Ўрмонжон акамнинг ўйнаши борми?

— Энди, ука, иссиқ жон... бир томони ферма мудири... унинг ўрнида сиз бўлсангизу кўз олдингизда боши очиқ бир жувон қилпиллаб юрса... Э, содда экансиз, ука!

Сидиқжон тўғон йўлида Энёдахонга тегишгани ёдига тушиб, нима дейишини билмади. Қори қийқириб унинг елкасига осилди.

— Содда экансиз, ука! Бундоқ иш сизу бизга ҳаром, буларга ҳалол!.. Майли, ош бўлсин... лекин яхши одам, худога қараб айтганда баҳоси йўқ одам! Баҳрободдаги уй-жойини, қавм-қариндошини, ёр-дўстини ташлаб келиб биз билан жафо чекиб ўтириптими, баракалла! Шундоқ бўлгандан кейин майли, хурсандчилигини қилсан. У-бу дейдиган одамнинг оғзига уриш керак. Ким нима деса мен ҳамма вақт оғзига ураман.

— Бирон гап борми ўзи? Ким экан у боши очиқ жувон?

Қори кафтини оғзига қўйиб, худди ағдарилган шинчадай, кул-куллаб кулди.

— Гап ўлсин!.. Қўя беринг...

Қори бирдан ўзига жиддий тус бериб бошқа мавзуга ўтди. Бақақуруллоққа келингандан тўсатдан бурилиб, Қўшчинорга қараб кетди.

Сидиқжон йўл бўйи ўйлаб кетди. «Ўрмонжон наҳот шундоқ бўлса... У хотин, у «боши очиқ» жувон ким бўлса экан?» Шу савол бошига келгандан кўзига тўсатдан Канизак кўриниб, Сидиқжоннинг юраги ўйнаб кетди: «Борди-ю шу бўлса-чи?»

Сидиқжон кейинчалик ҳарчанд уринса ҳам бу тўғрида қоридан бошқа гап ололмади. Қори бу мавзуда гаплашишни ҳам хоҳламас әди. Канизак билан бир ҳовлида туриш кундан-кун Сидиқжоннинг кўнглига ғашлик сола бошлади.

Чопиқ тугай деб қолган кунлар әди. Сидиқжон Анзират холанинг уйида турмасликка қарор бериб, бошқа жой сўрагани бир куни кечқурун Бўтабойнинг уйига борди.

Сидиқжон келганида кўча әшиги олдидаги турган бир хотин четланиб унга йўл берди. Ҳовлида яна икки хотин бор әди: бири — ўрта ёшлардаги чўтири хотин — тикка туриб Бўтабойга бир нима делётган экан, Сидиқжонни кўриб гапдан тўхтади, иккинчиси ёшгина жувон, ундан берида чўнқайиб ўтирап әди.

— Ҳўп, ҳўп,— деди Бўтабой Сидиқжонга айвондаги сўридан жой кўрсатиб,— ҳўп, қани ўтиринглар бўлмаса... Яна ким бор? Ҷақиринг.

Эшиқдаги хотин ҳам кириб ёш жувоннинг ёнига чўнқайди. Бу йигирма икки ёшларда бўлиб, бир кўзи ғилай әди.

— Ҳўп, қани, қулогим сизларда,— деди Бўтабой.

Хотинлар бир-бирларига қарашди. Ҳануз тикка турган чўтири хотин шошиб ҳалигиларнинг қаторига бориб ўтириди. Ҳеч ким гап бошламади.

— Ҳўш, гапиргинглар,— деди Бўтабой.

Шу чоқ Ӯрмонжон келиб қолди.

— Гапирысак шуки,— деди чўтири хотин Ӯрмонжонга кўз қирини ташлаб,— аввал боши эчки тўғрисида... Ориф ҳозир чорвага яхши қарайди. Ӯрмонжон акам шуни ҳам ишга солдилар, одам қилдилар. Ӯрмонжон акам ферма бўлганларидан бери молларнинг ранг-рўйи кириб қолди. Маърашга дармони етмаган бузоқлар ҳозир одамга тутқич бермайди... Лекин эчкиларга ҳамма ҳайрон: нега Орифнинг эчкиси бир туққанда иккита туғар экану, колхознинг эчкилари нуқул биттадан туғар экан! Орифнинг эчкиси иккита туққани ёлғон! Битта туққан! Қолган биттаси колхозники!

Ӯрмонжон ҳайрон бўлди: бу ҳақда бир марта гап бўлган, текширилган, бу даъво пуч чиқсан эди-ку, нега бу ҳақда яна гап қўзғалипти-ю бир әмас, бирданига уч киши даъвогар бўлиб келипти.

— Бу бир марта текширилган эди-ку, яна текширилсинми?— деди Бўтабой.

— Яна текширилсан!— деди чўтири хотин. Иккала жувон индамади. Ӯрмонжон, буларнинг индамаганига ҳайрон бўлиб сўради:

— Текширилсанми? Сизлар ҳам шу эчки тўғрисида келганимисизлар?

Чўтири хотин улардан бурун жавоб берди:

— Ҳа, ҳаммамиз ҳам аввал боши эчки тўғрисида, ундан кейин Канизак, Канизакхон тўғриларида келганимиз,— деди «хон» деганда бошини иргатиб.

Сидиқжон ялт этиб бу хотинга, сўнгра Ӯрмонжонга, ундан кейин иккала жувонга қаради. Иккала жувон, фа-

қат шундан гап очилишини кутиб турган әкан шекилли, бир-бираига навбат бермай бидирлаб кетди:

— Канизак звено бўлар эмиш...

— Бошқа одам қуриб қолиптими?!

— Ўзи нотайин бир келгинди бўлса...

— Қийшангламай ўлсин!..

— Шошманглар, шошманглар!— деди Бўтабой қўлини кўтариб.— Аввал эчкини бир ёқлик қиласилик. Бошқатдан текширилсанми?

— Текширилсан!— деди чўтири хотин.

Иккала жувон яна бараварига жовраб кетди:

— Текширилсан!

— Эчки ҳам текширилсан, Канизак ҳам текширилсан.

— Аввал боши Канизак текширилсан! Ҳудо кўтарсин...

— Текширилиб ундан кейин звено қилинсан!

Бўтабой гап асосан Канизак устида әканини фаҳмлаб:

— Ҳўп, эчки масаласи яна текширилади, гумонларинг бўлса айтасизлар,— деди,— хўш, энди Канизак тўгрисида нима дейсизлар. Канизак звено бошлиғи бўлар эмиш деб сизларга ким айтди? Лекин навбат билан битта галиринглар.

— Биламиз,— деди уччала хотин бараварига.— У звеноликка ярамайди. У нимага звено бўлар әкан! Вой!..

— Аввали шуки,— деди Бўтабой,— уни звено бошлиғи қилиш тўгрисида ҳеч қанақа гап бўлгани йўқ. Лекан звено бошлиғи бўлса эплайди, арзийди! Мана, Сидиқжон айтсин. Эокир отадан сўранглар... Анзират хола билан қурт тутиб ҳар қутидан неча килограммдан пилла берди. Шу колхознинг нафими? Шунча қуртга баргни бошида ташиди! Бирон марта мендан от ёки эшак сўрагани йўқ. Шу ҳам колхознинг нафими? Шунчалиги билан яиада дала ишида биринчи! Ўзи йигначидаккина бўлса ҳам қўтасга ўхшаган баъзи одамлардан иккитасининг ишини

қилади. Пахтанинг тилини билиб олди. У ҳозир Зокир отанинг ўнг қўли! Колхозимиэдаги ҳамма аёллар ҳам шунақа бўлганда, эҳе...

Ҳамма жим қолди. Анчадан кейин ғилай жувон ерга қараб мулоиймлик билан сўз бошлади:

— Бу гапларингиз тўғри, Бўтабой ака, Канизакнинг кўп ишларига одамнинг ҳаваси келади. Ўтган йили даромад олишда кўп әркаклар ундан уялиб қолганлиги ҳам рост. Ҳамманинг ҳаваси келди, лекин ёш, шўх! Анчагина шўх... ёш!

— Тўғри, ёш, шўх, бунинг устига боши очиқ,— деди Үрмонжон,— лекин бузуқ эмас. Буни ўзларинг ҳам биласизлар. Ким бузуқ деса бекор айтипти. Ота-онаси болалигида ўлиб кетган экан, асли шу ерлик экан. Наманганда ўсипти. Наманганда нима қилганини, қандай кунлар кўрганини билмайман, суриштириб кўрган әмасман. Ҳар қалай ёмон йўлга кириб кетган бўлса, бу ерга келмас эди, келганда ҳам меҳнатга, бу хилда меҳнат қилишга бўйни ёр бермас эди. Ота-онасининг арвоҳини паноҳ тортиб шу ерга келипти. Ҳаммамизни ота-она, ака-ука, опа-сингил ўрнида кўриб шу ерда қолипти... Нима қилиш керак? Нотайинсан, кеча бузуқ әдинг ёки әртага бузилиб кетасан деб звеноликка йўл бермаслик, иложи бўлса, колхоздан ҳайдаш керакми? Кўчада битта занглаған мих тушиб ётган бўлса-ку, керак бўлади деб, дарров оламиз, занглаған бўлса ҳам чўнтағимизга соламиз, нега бутун бошлиқ одамни кўчага чиқариб ташлаймиз? Наинки бутун бошлиқ одамнинг қадри қиммати битта занглаған михча бўлмасал!

— Биз Канизак колхоздан ҳайдалсин деяётганимиз йўқ,— деди ғилай жувон хийла бўшашиб,— айб ўзида: бизга ҳеч қўшилмайди, нуқул водокачкадаги рус хотинлар билан гаплашади. Биз қаёқдан билайлик...

— Нега сизларга қўшилмайди? Нега тил билмаса

ҳам рус хотинларга қўшилади? Одам ҳам, ғўзага ўхшаб, офтобга интилади, лекин унинг офтоби — одамдан кўрадиган меҳр-оқибати. Одам одамдан баҳра олади. Канизак, тил билмаса ҳам, рус хотинларга интилса бундан маълум бўладики, ўшалардан меҳр-оқибат кўтар экан, баҳра олар экан.

Бирдан Бўтабойнинг жаҳли чиқиб кетди.

— Бунақа ифво гапларни сизларга қайси унсур айтди!.. Ким айтди? Эчкини баҳона қилиб бир ҳалол аёлни қоралагани келдиларингми? Ҳаммангни мажлисга соламан! «Ёш, шўх» эмиш! Қани энди ҳамманг шунақа ёш, шунақа шўх бўлсанг! Боринглар, Ўрмонжон акам айтган гапларнинг мағзини чақиб, хўп ўйлаб кўринглар. Одамнинг қадрига етиш керак, одамни қадрлаш керак! Ўртоқ Ленин айтган бу гапни!

Аёллар жуда ноқулай аҳволда ва жуда ҳам қаттиқ хижолатда қолишли. Ўрмонжон буни билиб гапни чалғитди.

— Ҳўп, энди асосий масалага келайлик, эчки масаласини яна текширамиз.

Булар кетгани қўзғалганда Сидиқжон ҳам ўрнидан турди.

— Ҳўш, сен нега турдинг? — деди Бўтабой. Сидиқжон тўхтаб, аёлларга йўл берди. Аёллар чиқиб кетишиди.— Бирон иш билан келганмидинг?

— Ўрмонжон ака, бу хотин тўғрисида бунақа гаплар бўлса менинг ўша ерда туришим қандоқ бўлар экан? Мен-ку, қўл узатмайман, лекин... иложи бўлса менга бошқа жой топиб берсангиз.

Ўрмонжон кулди.

— Ҳа, қўрқиб кетдингми? Ҳалол бўлсанг хавотир қилма.

Сидиқжон Абдусамадқоридан эшитган гапини айтгани журъат қилолмади.

— Ҳар қалай яхши әмас..?

— Нимаси яхши әмас,— деди Бўтабой бўғилиб,— чумчук пир этса, юрагинг шир этади. Қўй бу гапни! Болтабой билан Рўзимат сени соғинишипти, каналга боргин.

— Бораман,— деди Сидиқжон,— ўзим ҳам шуни айтмоқчи эдим.

Сидиқжон чиқиб кетди.

Шу-шу бўлдию, Сидиқжон Канизакдан ўзини мумкин қадар олиб қочишига, ишдан ва ишга у билан бирга кетмасликка, гаплашмасликка, гаплашганда ҳам қовоғини очмасликка ҳаракат қиласди.

7

МТС ёзи билан ҳар хил бостирмалар, бинолар солди. Шу бинокорликларда ва МТСнинг ўзида ишлагани ҳар ёқдан турли-туман одамлар келди. Бу одамларнинг қўпчилиги то ишга кириб уй-жой топгунича Қурбон отанинг қизил чойхонасида туар, ундан кейин ҳам эрталабу кечқурун топган-тутганини кўтариб чой ичгани шу ерга келар эди. Бу йил ёз қизил чойхона умуман гавжум бўлди.

Қурбон отанинг қўли-қўлига тегмас эди. У ёрдамчи сўраб икки марта директорга ариза берди. Директор бақувват, абжир бир йигитни ёрдамчи қилиб берган эди, бу йигит бир ой ишлар-ишлилас тракторчиликка ўқигани кетиб қолди. Шундай қилиб Қурбон ота онасининг қабрини зиёрат қилгани Капсанчилар қишлоғига май байрамида келганича бошқа келолмаган эди. Бу йил куз яхши келиб чойхона октябрнинг охирида ётди. Катталарнинг буйруғига кўра, чойхона октябрь байрамигача янги солинган қишки бинога кўчиб кириши ва байрамга очилиши керак эди. Бироқ янги қишки бинонинг ички пардоз-

андозлари битмади. Чойхона байрамдан кейин очиладиган бўлиб қолди. Қурбон ота мана шу пайтдан фойдаланиб онасининг қабрини зиёрат қилиб келадиган бўлди.

Қурбон ота Капсанчиларга жўнагани тайёрлик кўраётганида Гиёсиддин махсум келиб қолди. У отага қарашган бўлди, сўнгра, Капсанчилар қишлоғини мақтас, кўпдан бери ўша ерга бориш орзусида юрганилигини айтди.

Гиёсиддин махсум шу Бешсерка қишлоғининг руҳо нийларидан бўлиб, бундан икки-уч йил бурун Садалик мачитда сўғиллик қилас эди. Намозхон йилдан-йилга камайиб, мачит ўз-ўзидан ёпилиб қолгандан кейин махсум ўликлар «хизматига» ўтди ва баъзан битта-яримтага ром очиш билан тириклар «хизматини» ҳам қилиб юрас эди. Қурбон ота у билан ўтган йили танишган. Махсум Қурбон отанинг бедом-дарак йўқолган жияни тўғрисида ўзининг тахминларини, ўша урушда ўлган ёки жонини олиб қочган одамлар ҳақида билган ва эшитганларини айтиб берди, кейинчалик, Қурбон отанинг илтимосига кўра, у ёқ-бу ёққа дарак ҳам солди. Мана шундан кейин икки орада муносабат пайдо бўлиб, махсум самоварга баъзан келиб турадиган бўлиб қолди. Қурбон ота унинг суҳбатини хушламаса ҳам одамнинг юзи иссиқ — ҳамсафар бўлиш тўғрисидаги сазасини ўлдиролмади.

Иккови кечки пайт йўлга чиқди. Улар қош қорайганда Капсанчиларга етиб келишди. Махсум, ўзи айтишича, эски қадрдон ошинаси Абдусамадқориникига қўнди; Қурбон отанинг мўлжали эса кечани Ўрмонжонникида ўткашиб, эртаси кечга қолмай қайтиш эди.

Қурбон ота кечки пайт қайтмоқчи бўлганда Ўрмонжон «Эрта байрамни шу ерда ўтказинг, эртага каналимиз очилади, тўғон бошида катта сайил бўлади, томоша қилиб кетасиз» деди ва қари-қартангларни олиб кетадиган машинага солиб юборишини ваъда қилди. Бу таклиф

Қурбон отага маъқул тушди, бундан ташқари Сидиқжонни кўриши дозим бўлгани учун бу кеча ҳам қолишга қарор берди. Сидиқжон тўғон бошига кетган экан.

Каналнинг очилиш маросими байрам куни соат тўртга белгиланган ёди.

Эртасига қиём вақтигача жимжит бўлган Қўғазор қиёмдан кейин жонлана бошлади. Кўчаларда, майдонларда, тепаликларда одамлар пайдо бўлди. Ёш-яланг елиб-югурап, ҳайқирап, болалар у ёқдан-бу ёққа чопар, шовкин солар ва лунжларини шишириб қамиш сурнай чалишар, бир тўп қариялар майдоннинг кираверишида офтобшувоқда ўтиришиб, афтидан, автомобиль кутишар ёди. Ҳадемай экинзор ва тўқайларни оралаб ўтган сўқмоқ ва арава йўлларидан қатнов бошланди. Қурбон ота ўша қариялар тўпига томон тушиб бораётгандা Бақақуруллоқ томондан каттакон оқ әшак миниб келаётган Ўрмонжон кўринди. Унн қариялар ўраб олишди. Қурбон ота етиб келганда Ўрмонжон қарияларга йўл ёмон бўлгани учун автомобиль бу ерга келолмаганини, буларни кўпrik бощида кутиб турганини, у ергача олиб бориш учун ҳозир арава келишини айтди. Шу ерда турган махсум унинг сўзига чандон қулоқ солмай, әшакнинг бўйнидан ушлаб силтаб, найдай диккайиб турган узун қулогини негадир қайриб кўрди-да, «Азизларнинг хизматини қилган жонивор» деб сафрисига шаппалаб қўйди. Қурбон ота шундан билдики, әшак махсумга жуда-жуда ёқди, шу әшакни миниб боришга кўнгли суст кетди. Ўрмонжон ҳам унинг әшакда боргиси келаётганини билиб нўхтани қўлига тутқазди. Махсум әшакни дўнгликнинг олдига етаклаб келди-да, бир иргиб миниб, Қурбон отани имлади. Қурбон ота кулиб унинг орқасига мингашди.

Жўнашди.

Әшак устида икки киши борлигини писанд қилмай, гоҳ йўргалар, гоҳ йўртар, махсум узун оёқларини саланг-

латиб, қоматини тик тутиб борар әди. Қурбон ота бу жойлар тўғрисида билган, эшитган ва кўрганларини сўзлаб берди: водокачкалардан бирининг ва водокачкалар конторасининг харобасини, князниг қизларини кечқурунлари отлиқ саёҳат қилдирган жойларини; коляска тиқилиб ўзи майиб бўлган чуқурликни, князъ ўзининг қизлари ва ўн саккиз ити билан ёзлаб кетадиган боғини ва Абдуваққос әшоннинг боғини кўрсатди. Бу боғлар Қўшчинорнинг чиқаверишида әди. Эшон боғининг йўл томонини хийлагина катта гиштин иморатнинг харобаси әнлаб ётипти. Харобанинг атрофини, устини янтоқ, қуроқ, шўра, ажриқ, какра босиб кетган, унинг ўнг томонидаги каттакон ҳовузнинг ичини ва бўйларини қуриб қолган супурги, сассиқкапа, тўзғонмия қоплаган. Бу харобани кўриб Қурбон отанинг кўз олдига Фармонқул ва ўшангага ўхшаган дунёга надомат билан келиб, заҳмат чекиб, ҳасрат билан ўтган кишилар келди, бу хароба назарига ўшандай кишиларни қон-қора қақшатган аждаҳонинг емирилган уясидай кўринди.

Кўприкнинг нариги ёғидаги чорраҳада турган юккаш машинанинг атрофини ёш-қари, эркак-аёл юз чоқли киши ўраб олган. Ғовур Хотинлардан кимдир шоферга «жон ука, мен машинага ҳеч тушган эмасман, ҳеч бўлмаса Қақиргача олиб бор» деб ялинар, йўғон бир товуш қаряларга жой бермай ўтириб олган Абдуҳолиқ деган бир кишини сўкар әди. Шофер машинага чиқмоқчи бўлиб тармашган эркак-аёллардан сочи, соқоли оқарғанларнингна қўлидан тортиб машинага чиқарар, бошқаларнинг эса дўпнисини, рўмолини бошидан олиб узоққа улоқтириб ташлар әди. Машина ҳадемай тўлди, гулдуради, қарс-қурс қилдию, орқасидан одамларга кўк тутун пуфлаб жўнади. Унинг ён ва орқа бортларига осилган ёш-яланг бири ўзини ташлаб, бири йиқилиб қолди; битта-иккитасини машинада ўтирганлар тортиб олишди. Қолган халойиқ ав-

томобиль тўзитиб кетган чанг йўлдан ҳайқириб, бир-бирини чақириб пиёда йўлга тушди. Қўриқни оралаб ўтган иланг-биланг йўлдан гизиллаб, кетида чанг қолдириб бораётган автомобиль ҳадемай уфқда кўздан гойиб бўлди.

Машинага сифмай қолган чоллар унинг қайтиб келишини кутиб йўл бўйига, кампирлар эса нарироқдаги тупроқ тепанинг устига чиқиб ўтиришди. Махсум эшакни кўприкнинг панжарасига боғлаб олдинга ўт юлиб солди ва ўша ерда, афтидан, таниш чиқиб қолган бир одам билан гаплаша кетди. Қурбон ота чолларнинг олдига келиб бир чеккада ўтириди. Чоллар машина тўғон бошига неча пиёла чой ичилгунча бориб келиши, бир кўтаришда неча тую юк кўтара олиши, унинг чироги баландроқ жойга ўрнатилса неча маҳаллани ёритиши ҳақида сўзлашар мунозара қилишар эди.

Бу орада йўловчилар тобора кўпайди. Оқтовуқ томондан келган бир гуруҳ ўсмирлар, йигитлар ҳайқириб-қичқириб, бир-бирини қувалашиб, ўйнашиб ўтиб кетди. Буларнинг кетидан ҳўқиз қўшилган аравада бир талай болалар қий-чув қилиб ўтди. Ундан кейин бир трактор тариллаганича иккита бричкани тортиб ўтди. Ҳар иккала бричкада ҳам тўла хотин-халаж, ҳамма чапак чалиб ашула айтар, олдинги бричкада ўрта ёшлардаги семиз бир хотин ўтирган ерида ўйинга тушар эди. У кампирларнинг рўпарасига келганда чўккалаб, икки қўлни биқинига қўйиб муқом қилди, чолларнинг рўпарасига келганида эса қўлларини «соябон» қилиб, қошини «ажувоз-ажувоз» қилди. Қийқириқ кулги кўтарилди. Чоллардан кимдир «дўст, кам бўлма!» деб қичқирди. Капсанчилар томондан бир арава қиз-жувон чилдирма чалиб ёр-ёр айтиб ўтишди. Булар ва булардан кейин от, эшак, ҳўқиз қўшилган араваларда, пиёда ўтиб кетган ва ўтиб бораётган сон-саноқсиз ёш-қари әркак-аёлларни кўриб Қурбон ота бедом-дарак йўқолиб кетган жиянини эслаб.

ди: «Ўшанда неча яшар әди. Боши омон бўлса ҳозир йиғрма бир-йиғрма иккига кирди. Қаерда экан? Нима қилиб юрипти экан? Дурустроқ одамга тушдими ё етимлик, ғариблик баҳтини қора қилдими? Агар онасига тортган бўлса, ўшандай қирқ йигитга бош бўладиган аёл чиққан бўлса бу замонда, элликбошиси, князесиз замонда қандоқ бўлди экан? Бу замонда унинг онаси қандоқ бўлар әди экан? Фармонқул-чи...» Қурбон отанинг кўзига Фармонқул кўриниб кетди. У ҳали Қўғазорда арава кутмай пиёда йўлга чиққан қариялар орасидан чиқиб йўлнинг четидан илжайиб келаётгандай бўлди. Унинг бошида ўша, гули кўринмай кетган қора дўппи, устида ўша яктак, оёқ яланг... Қурбон ота, худди Фармонқул ростдан ҳам шу қариялар орасидан чиқиб қолиши мумкин бўлгандай, бўйинни чўзиб қаради. Бу чоқ маҳсум унинг қулоғи остида пишиллаб, хириллаб: «Ё алҳазар! Ё девонаи Бадоваддин! Ё Гавсулаъзам! Ҳали аравада ўйнаб ўтган аёлни кўрдингизми?» деди. Қурбон ота шундай дарғазаб бўлдик, ўзини тутолмай: «Қўйинг, тақсири! Қўйинг, ўйнасин, кулсан!» деб ўрнидан туриб кетди.

Қўғазордан пиёда йўлга чиққан қариялардан кейин арава кутганлар ҳам етиб келишди. Бир оздан кейин автомобиль ғувиллаганича қайтиб келди ва аста бурилдида, гийт этиб тўхтади. Унинг кетидан эргашган чанг буралиб елиб юқорига кўтарили. Уни кутиб турганлар, ўтиб бораётган йўловчилар чангда энтикиб, бир-бирини итариб яна автомобилга ёпирилди. Яна шовқинсурон кўтарили, шоферга ялиниш-ёлвориш бошланди. Маҳсум бирорнинг елкасини ушлаб, бирорнинг оёғини босиб олдинга ўтди ва қулайроқ жойга ўрнашиб олганидан кейин ўтирган ерида бор товуши билан Қурбон отани чақирди. Еши хийлагина ўтиб қолган бир кампир ўзидан ҳам қарироқ чолига «Юрганда мендан бехабар қолманг» деб қайта-қайта тайинлар әди. Автомобиль қўз-

галганда бир ғовур кўтарилиди-ю, кейин жимлик чўкди. Машина гоҳ тезлаб ва гоҳ секинлаб, чайқалиб ғижирлаб, кўтариб-кўтариб ташлаб, мўр-малаҳдай ўрмалаб кетаётган пиёда йўловчиларни ва ўнг-сўлга бурилиб шофернинг ғашига тегаётган араваларни пўшт-пўштлаб гудок бериб борар; йўлнинг икки четига тизилган йўловчилар уни қийқириб кузатишар, болалар чангда кўзга гоҳ кўринниб, гоҳ кўринмай унинг кетидан югуришар әди.

Иргайзорлар, қўриқлар орқада қолиб бепоён яйловга чиқилгач, олдинда тикка туриб кетаётгандардан бири узоқ уфқни кўрсатиб: «Ҳу ана тўғон боши», деди. Уфқда бир неча жойдан оқиш тутун кўтарилиб кўм-кўк осмонга ёста-секин тарқалмоқда әди. Яна бир оз юрилгандан кейин узоқда, сап-сариқ адир этагида оппоқ бўлиб узала тушиб ётган дарё, сўнгра, сарғимтирир кул ранг саҳро юзини ва ундаги паст-баланд дўнгликлар устини тутиб кетган одамлар, онда-сонда ўргимчақдай ўрмалаб юрган аравалар кўричли.

Машина сайрогоҳга кириб борди ва дудулаганича одамларни, отлари чиқарилиб қўйилган қатор-қатор араваларни оралаб дарё томонга йўналди. Аравалардаги четанлардан, ялпиз, мия, похоллар орасидан кечки қовун, тарвуз, хазанаклар кўриниб турар; қолларда, катта-кичик халталарда, сават ва кажаваларда ўрик, жийда, майиз, беҳи, узум, ёнғоқ, тутмайиз, нок, олма, қовунқоқи, баргак, бодом ва бошқа нозу неъматлар очилиб-сочилиб ётибди. Ғовурда автомобилнинг гудоги аранг эшитилар әди. Қаердадир чилдирма гижбангламоқда, бир томонда майдада ва шўх, иккинчи томонда кишининг қалбини тирнайдиган катта ашулалар бўлмоқда. Аллақаерда кимдир баланд овоз билан галирмоқдаю, одамлар гур-гур кулмоқда. Ора-сира «Кеп қолинг! Емаган армонда, еган дармонда», «Отангга раҳмат!» алланиманинг «Сараси бу!» деган товушлар эшитилар әди. Машина дарёдан анча беридаги паст-баланд тепа-

ликлар олдида тўхтади. Бу тепаликларнинг устига, ён бағрига солинган кигиз, шолча, бўйра ва бошқа полосларда одамлар тиқилишиб ўтирас, абжир йигитлар югуриб-елиб чой, даста-даста нон, патнусларда мева-чева, бошқа нарсалар ташир эди.

Қарияларни икки жувон ва бир норгул йигит кутиб олишди. Кампирларни ён бағирда ғуж бўлиб ўтирган аёллар тўпига, чолларни юқорига бошлаб чиқишиди. Ўқорида ўн-ўн беш чоқли мўйсафид бу ердан яқзол кўриниб турган сайрогоҳни томоша қилиб чақчақлашиб ўтирас эди. Максум бир чеккадаги бўш жойга чўкка тушиб, Қурбон ота-нинг əтагидан тортиди. Шу чоқ ён бағирдан кимнингдир баланд қувноқ товуши эшитилди:

— Ассалому алайкум, Қурбон ота! Салом, отахон!

Қурбон ота бурилиб қараб ён бағирдан кийикдай сакраб чиқиб келаётган Сидиқжон ва унинг кетидан кулиб қараб турган Ўрмонжонни кўрди. Ўрмонжон Қурбон отага қараб бир нима деб ишора қилди, афтидан, «унинг суюнганини қаранг» дедиу тушиб кетди. Сидиқжон дарҳақиқат, худди отаси тирилиб келгандай, ниҳоят хурсанд бўлиб қучогини ёзиб келар эди. У кела солиб Қурбон отани даст кўтарди, икки айлантириб ерга қўйди, ҳол-аҳвол сўради, яна қучоқлади.

— Баракалла, ўғлим, баракалла,— деди Қурбон ота кулиб,— Ўрмонжон ҳар боргандা сўрайман... Юрипти, вақти чоғ дейди... Кеча йўқлаган эдим, бу ёқда экансиз. Хўп ўйнаб-кулиб юрибсизми?

— Шукур, отахон, шукур...

Боя қарияларни кутиб олган норгул йигит чой, бир патнусда нон, қовунқоқи, бир қийиқчада ошқовоқ сомса келтириб қўйди.

Сидиқжон мана шу канал ишида биринчи кун ва ундан кейин қандоқ ишлаганини, кимлардан қандоқ меҳру оқибат кўрганини, «райкомимиз ўртоқ Аҳмедов» қандоқ

одам әканини сўзлаб берди. Қурбон ота ёш боладай қувончдан энтикиб гапираётган Сидиқжоннинг сўзларига жуда хурсанд бўлиб қулоқ солар әди.

— Айтмадимми,— деди Қурбон ота кулиб,— оппоқ соқолим билан ёлғон гапираманими! Ўрмонжон ўшанда бизнинг колхозда иш кўпу ош оз, ҳали-бери янги этик киёлмайсан деганда бу гаплардан чўчиманг демадими! Бу замонда меҳнат қиласидиган киши хор бўлмайди, албатта, лекин ҳар гиёҳнинг ўзи севган тупроғи бор.

— Буниси тўғри, отахон, лекин Ўрмонжон акам у гапларни мени синаб кўриш учун айтмаган әканлар. Ростдан ҳам иш кўп әкан.

— Дамлаб қўйилган ош ҳеч қаерда ҳам йўқ. Сабр қиласанг ғўрадан ҳалво битар...

— Биламан, мен нолиётганим йўқ, отахон, нолимайман. Бу ерда ҳеч ким ҳам нолимайди. Нолийдиганлар нолимасдан бурунроқ колхозни ташлаб жўнаб қолган әкан.

— Қаттиқчиликнинг қирқи кетиб бири қолгандир әнди?

— Ҳа, отахон, қирқи кетиб бири қолган, лекин бирақайи қолган. Йигим-теримни олганимиздан кейин баҳоргача икки юз йигирма гектар янги ер очишимиш керак.

— Қанча?— деди Қурбон ота ҳайрон бўлиб.

— Икки юз йигирма гектар.

— Икки юз йигирма танобдиր?

— Йўқ, отахон, гектар. Бу ерларнинг кўпи тўқай. Қиши билан аракашлик қилиб, тўнка кавладиган бўлиб турибмиз.

— Бу биро гапдир? Шунча ер, яна бунинг кўпи тўқай бўлса... Йўғ-е, маҳовотдири... Бўладиган иш әмас. Айниқса тўқайнни бузиб ер қилиш...

— Йўқ, отахон, яқинда райкомимиз ўртоқ Аҳмедов ўша очиладиган қўриқларни, бузиладиган тўқайларни айланиб кўриб, план қилиб районда мажлисга солипти-

лар. У киши план қилган иш бўлмай қолмайди. Бўлмайдиган ишни мажлисга солмайдилар. Лекин қийинчиллик тортамиз, бусиз бўлмайди. Ўрмонжон акам шундоқ дейдилар.

Сидиқжон бутун саҳрони тутиб кетган, тепаликларда, канал ва дарё бўйларида, қизил темир дарвозаси офтобда чўғдай ёлқинланиб турган тўғон бошида юрган одамларга қараб жим қолди. Тўғон бошидаги тепаликдан бирдан дўм-дўм этган товуш эшитилди-ю, тўрт карнайнинг оғзи баравар осмонга кўтарили. Тўрт карнайчи, гавдадарини орқага ташлаб, қоринларини чиқариб бараварига чалишди. Тўрт карнайнинг «ваҳа, ваҳа, ваҳу-ваҳа» деган товуши бошқа ҳамма товушларни босиб, қулоқларни қоматга келтира бошлади. Бунинг орасидан узилиб-узилиб эшитилаётган сурнай товуши эчкининг маърашига ўхшар эди. Қурбон ота ҳамон жияни, Фармонқул тўғрисида ўйлаб сукутга кетди.

Бир чойнак чой кўтариб Ўрмонжон келди. Унинг келганини на Сидиқжон пайқади ва на Қурбон ота.

— Ҳа, нимага қараб қолдинг?— деди Ўрмонжон Сидиқжоннинг ёнига ўтириб,— отани зериктириб қўйибсан-ку.

Сидиқжон ўрнидан туриб уни тўрга таклиф қилди.

— Зерикканлари йўқ, Ўрмонжон ака, гаплашиб ўтирибмиз. Отамга қишида қиласидиган ишимизни айтиб бердим.

— Шу аниқ гапми, ўғлим?— деди Қурбон ота,— икки юз йигирма гектар, яна бунинг кўпи тўқай бўлса.. Жуда қийин бўлар?

— Ҳа, секинроқ айтасизми,— деди Ўрмонжон ва Сидиқжонга имо қилиб кўз қисди.— Бу йил қиш колхоз яна эланадиган бўлиб туритти. Шу элакдан Сидиқжоннингиз тушиб кетмаса деб қўрқаман.

— Энди катта бўлиб қолганмиз, Ўрмонжон ака,—

деди Сидиқжон керилиб.— Элагингиз йиртилиб кетса ҳам тушиб кетмаймиз. Дамба вақтида кетиб қолганлар ҳам атрофимизда айланиб, ҳид олиб юрган әмиш-ку.

— Ким әкан?— деди Үрмонжон қизиқиб.

— Рўзиматнинг тогаси.

— Ҳўш?

— Келиб Рўзиматницида уч кун туритти. Нуқул колхозни суришириар әмиш. Рўзимат боплатти...

Үрмонжон пастга қараб, йигитлар даврасида тарвуз еб ўтирган Рўзиматни чақирди. Рўзимат югуриб чиқди.

— Лаббай, Үрмонжон ака,— деди ва Қурбон ота билан икки букилиб сўрашди.— Айёмлари муборак!

Қурбон ота қаттиқ хижолат тортди: бу каналнинг очилиши булар учун ҳақиқатан катта байрам әди-ку, нечук бу байрам билан на Үрмонжонни қутлади-ю на Сидиқжонни?

— Ўтири,— деди Үрмонжон.— Тоганг келиб кетип-тими?

— Ҳа...

— Нима дейди?

— Э, Үрмонжон ақа, нима дер әди. Нуқул колхозни суриширади: нима бўлди, қанақа... Каналнинг дарагини ёшитипти. Буғдойкорликлар энди пахтага айлантирилса керак дейди. Жуда гашим келиб кетди.

— Нима иш қиласар әкан?

— Сўрамадим.

— Нима дединг?

— Нима дер әдим... Э, тоға пахта қаёқда, заб кетиб олган экансиз-да, мана энди биз кетолмай ўтирибмиз дедим... Афтимга қараб бақрайиб туритти... Канал қазиган әдик, сув чиқмади, энди дарёга тўғон солмоқчи бўлиб турибмиз. Дарёга оқиб ўлсам мендан рози бўлинг дедим.

— Чакки қилибсан, бор гапни айтиб, қолинг дейиш керак әди.

Рўзиматнинг ранги ўзгарди, кўзларида ҳамиша ўйнаб турадиган табассум ифодаси тўсатдан йўқолди. Сидикжон уни ҳеч қачон бундай қиёфада кўрмаган, шундай қиёфага киришини хаёлига ҳам келтирмаган әди.

Рўзимат икки-уч оғиз ростланганидан кейин ниҳоят, жуда ўзгарган бир товуш билан:

— Нега, нега қолинг дер эканман? — деди.

— Йиқитган полвон йиқилганни кўтариб қўяди, — деди Ўрмонжон Қурбон отага кўз қисиб.

— Менинг тоғам бўлгани учун, менинг кўнглим учун шундай деяётисизми? У ҳали тоғам экан-ку, отам тирилиб келмайдими! Мен қаҳратон қишда оёғимга, пўстак боғлаб, атала ичиб тупроқ орқалаганман. Шундай вақтда колхозни ташлаб кетса у кўтарадиган тупроқ ҳам менинг елкамга тушишини билмасмиди? Билар эди! Номардлик қилди, Ўрмонжон ака, ҳажиқизлик қилди! Полвон йиқилганни кўтариб қўяди дейсиз, у мен билан бел ушланиб йиқилгани йўқ.

Ўрмонжон унинг сўзларига қўшилмаганини, фақат ранжитмаслик учунгина унга қарши бирон нарса демагани кўриниб туради әди.

— Билмаган-да, ўғлим тушунмаган, — деди Қурбон ота, — бу ишларнинг охири баҳайр бўлишига кўзи етмаган.

— Нимани билмапти, нимани тушунмапти? Сидикжон акам келганларида ҳам биз ҳалво еб, пашшамизни қўриб ўтируммаган эдик. Бу киши нега дарров била қолди, бу киши нега дарров тушуна қолди?

Самоварчи дастурхон ёзиб, каттакон сопол товоқда ош келтириб қўйди. Рўзимат иргиб туриб сопол обдастан ҳамманинг қўлига сув қўйди.

Овқатдан кейин Ўрмонжон устма-уст икки пиёла чой

иҷдию, Сидиқжонга меҳмонларни томоша қилдиришни тайинлаб, тушиб кетди.

Махсум, ошни қўп еб қўйиб, «лоҳас бўлиб кетаётибман» деб томошага бормади.

Сидиқжонлар пастга тушиб сад юрар-юрмас ҳалойиқ гувиллаб тўғон бошига томон оқа бошлади. Ҳадемай бутун тепаликлар, оралиқлар бўшади. Орқаларига от боғланган қатор-қатор аравалар, катта-кичик буталар, пайҳон бўлган янтоқлар, қораварақалар очилиб қолди. Минглаб ҳалойиқ тўрт карнай бараварига ваҳа-ҳалаб турган тўғон бошига интилар, тиқилишар, итар-итар, сур-сур билан каналнинг оқимига томон силжиб борар эди. Рўзимат йўқолиб қолди, Қурбон отани авайлаб Сидиқжон сеға интилмади, шунинг учун иккови орқада қолиб кетди. Булар турган жойдан тўғоннинг қизил дарвозаси устида турган бир гуруҳ одамни тусмол билангина таниш мумкин эди. Сидиқжон буларнинг ичидаги йўзининг йўғон гавдаси, новча бўйи билан таниқли бўлган ижроия комитетнинг раиси Мавлонбековни таниди. У дарвозанинг ўнг томонига тикка ўрнатилган узун ёғочнинг одам бўйи келадиган ерида пирпираб турган қизил байроқнинг ёнида каналнинг оқимига қараб турар эди. Карнай товуши тинди. Шу билан бирга бутун ҳалойиқ ҳам жим бўлди. Қаердадир от кишинади. Даشت шабадаси дам-бадам пуфлаб қулоқларда гувуллар эди.

Мавлонбеков тўғоннинг ўртасига келиб бир лаҳза котиб турди-да, бошини хиёл силкиди, шунинг кетидан «ўртоқлар!» деган товуш зўрга етиб келди. Раис ўн минутча нутқ сўзлади. Бир неча марта қаттиқ қарсак, ҳайқириқ кўтарилиди. Раис қаттиқ олқиш ва ура садолари остида салгина энгашиб, олдидан ўтган қизил лентани кесиб юборди. Лентанинг бир учи юқорига кўтарилиди, пирпиради, икки-уч айланди-да, кўздан гойиб бўлди. Бу онда бояги ёғочдан байроқ шувиллаганича юқорига кўта-

рилди-да, ёғочнинг учига етгач яна ҳам кенгроқ ёзилиб қаттиқ пириради. Яна ҳам кучлироқ олқиши ва ура садолари янгради. Шу пайт тўғоннинг устига колхозчилардан бир неча киши югуриб чиқди. Булардан бири бошқалардан эпчиллик қилиб бир сакрашда тўғоннинг парраги олдига келди-да, унинг қабзасидан ушлаб шитоб билан бурай кетди. Сидиқжон уни таниб қичқириб юборди:

— Ие, Рўзимат-ку! Оббо хумпар-ей, маза қилди!

Рўзимат дарвозани катта очиб, дарҳақиқат маза қилгандай, қўлини орқасига қилиб керилиб турар эди.

Раис қўлини баланд кўтарди. Бир лаҳза чўккан жимлика унинг товуши әшитилди:

— Оналар, оталар, опа-сингиллар, акалар-укалар, ҳорманглар! Ҳорманглар энди!

Унга бир неча минг товуш бараварига жавоб қайтарди:

— Бор бўлинг! Саломат бўлинг!

— Раҳбарларимизга минг раҳмат!

Талай вақтгача бутун саҳро гуриллаб турди.

Бирмунча вақтдан кейин тўғоннинг тепаси бўшаб қолди. Унинг икки томонида тўрттадан саккизта чилдирм «така-тум-так, така-тум-так» деб бараварига мақом бошлиди. Икки томондан учтадан олтига оқ кийинган қиз чилдирма мақомига оёқ уриб, кифт қоқиб чиқди. Шу билан область ва район театрларининг бирлашган кучи томонидан бериладиган концерт бошланиб кетди. Буларга колхозчи ҳаваскор ашулачилар, ўйинчилар, қизиқчилар, ниҳоят тарафма-тараф аскиячилар қўшилиб концерт қоронги тушгунча давом этди.

Қоронги тушгандан кейин олти жойга кунжара ёқилди. Ёшу қари, әркак-аёл аралаш-қуралаш бўлиб олти даврага бўлинди. Бир ярим одам бўйи келадиган сепояларга ўрнатилиб ёқилган кунжараларнинг сарғимтир-қизғиши алангаси шабадада бир томонга салгина қийшайиб гур-

кирар, буларнинг ёруги бир-бирига қўшилиб, ҳамма ёқ ёриган эди.

Ўрмонжон Қурбон ота билан Сидиқжонни созандалар ялла қилаётган даврадан топди. Иккови олдинги қатордз ўтирар, Сидиқжон дам-бадам тиззасига уриб «дўст!» ёки «кам бўлма!» деб қўяр эди. Ўрмонжон бориб Қурбон отанинг ёнига чўжка тушди. Қурбон ота ёш боладай талпинар, ўзи кўрган томошаларни негадир Ўрмонжон кўрмаган гумон қилиб, нуқул унга таърифлар, қайта-қайта мақтар эди.

Созандалар бир тўхтаб уфор чалишди. Давранинг бир чаккасидан беқасам тўн кийиб устидан кўк қарға шоҳи белбоғ боғлаган, чуст нусха дўпписини чеккасига қўйиб узун ва йўғон кокилларининг бирини олдига, иккинчисини орқасига ташлаган бир жувон чиқиб қулочни ёзди-да, гавдасини бир оз олдинга ташлаб, соз мақомига бошини хиёл-хиёл чайқаб, давра бўйлаб йўргалай кетди. Жувон даврани уч айланганидан кейин ўзи сингари кийинган бир йигитни тортди. Йигит новча, соқоли еллигичга ўхшаган бир жишини тортди. Бу одам аввал уятчан қизларга тақлидан ноз қилиб, кейин ҳалиги беқасам тўн кийганд жувонга тақлидан ўйинга тушиб ҳаммани кулдирди; сўнгра Мавлонбековнинг олдига бориб муқом қилиб туриб олди. Қийқириқ бўлиб кетди. Раис дарров ўрнидан турди, бир қўлини орқасига қўйиб, иккинчи қўлини боши узра камалак қилиб икки-уч елка қоқди-да, шундай йўғон гавдали бўлишига қарамасдан, беданадай йўргалади. Аста-секин бошланган чапак тобора авж олиб соз овозини босиб кетди. Раис шавқ-завқ билан ўйнаб даврани бир неча марта кезиб чиққач, пилдираб бир айланди-ю, беҳосдан Ўрмонжонга ташланди. Ўрмонжон ундан абжирлик қилиб ўзини орқага, одамларнинг ичига олди. Раиснинг қўлига Қурбон ота тушиб қолди. Қурбон ота ўрнидан турди, қўлини кўксига қўйиб бир нималар деди, майиб

оёғини кўрсатди. Раис уни даст кўтарди-да, давранинг ўртасига келтириб қўйди. Қурбон ота бир лаҳза гангида. Ўловиллаб ёнаётган аланга ва қаршисида муқом қилиб турган раисдан бошқа ҳеч нарсани, ҳеч кимни кўрмас, қулогига ҳеч қандай товуш кирмас эди.

У икки қўлинини икки томонга чўзди, майиб оёғини соз мақомида аста-аста ерга уриб, умрида биринчи марта ўйинга тушди...

Ўйин-кулги ярим кечагача давом этди.

Одамлар тарқала бошлади. Онда-сонда аравалар гижирлаб «пўшт-пўшт» деган товушлар, қичқириқлар әши-тилди.

Кунжара ёқилган сепоялар тахтага ўрнатилган экан, олтовини ҳам аста кўтариб бориб каналга оқизишиди. Алангалар тебраниб-қалқиб каналнинг икки томонини ёритиб оқиб кетди. Унинг кетидан сон-саноқсиз одамлар әргашди.

Ўрмонжон Қурбон отани арава олдига бошлаб келди. Махсум аллақачон аравага чиқиб олган, қунишиб, дилдинраб ўтираг эди. Аравада ундан бошқа яна икки киши бор эди, Қурбон отадан кейин яна тўрг киши чиқди. Отни Сидиқжон минди. Жўнар олдида Ўрмонжон Сидиқжоннинг қулогига «Меҳмонларни бизнекига олиб бор, мен орқаларингдан етиб бораман» деди.

Саҳро аста-секин бўшади. Узоқ адирнинг орқасидан кўтарилган каттакон ойнинг дастлабки шуъласи тўғоннинг тепасида пирпираб турган байроқка тушди. Арава жўнади. Олдинда оқиб бораётган кунжараларнинг алангаси гоҳ кўриниб, гоҳ кўздан гойиб бўлиб теварак-атрофга ёғду сочиб борар эди. Булар кўприкдан ўтишда ажойиб манзарани кўришди: каналдан бояги олтита машъаладан бошқа яна сон-саноқсиз кичик машъалачалар, чироқлар оқиб келар эди.

— Бу болаларнинг иши,— деди кимдир.

Бу чироқлар билан бирга канал бўйлаб қувноқ ғовур, қаҳқаҳа, ашула оқиб келар эди.

Ўрмонжон қўшни колхозлардан келган меҳмонларни кузатиш билан бўлиб, уйига хийла кеч келди. У келганда Қурбон ота ўрнида ёнбошлаб ётар, махсум ухлаб қолган эди. Сидиқжон янгитта чиқиб кетипти.

— Отахон, дейман, ўйинга уста экансиз-ку,— деди Ўрмонжон кулиб.

Қурбон ота чуқур хўрсинди.

— Шуни айтгин, ўглим, ўйинга уста экамман... Бир менми? Капсанчиларингни кўрдингми? Шу одамлар ҳам ўйин-кулгини билар экан, шу одамларга ҳам ўйин-кулги ярашар экан-ку!

— Бу одамлар жуда кўп нарсани билади, буларга жуда-жуда кўп нарсалар ярашади, отахон! Булар ҳориштолишини билмайди-ю, буларга камбағаллик, мана бунақа ўйлар, бунақа қишлоқ ярашмайди, холос. Буларга ярашадиган ўйларни, булар боп қишлоқни кўрсатайми?

Ўрмонжон токчага суяб қўйилган бир ўрам қоғоз ичиндан бир тахтасини олиб Қурбон отанинг олдига ёйди. Бу янги Капсанчилар қишлоғининг плани эди. Қурбон ота план деган нарсани умрида кўрмагани учун қоғодаги турли шакл ва рангдаги катта-кичик доғларга, ҳар хил чизиқ ва аломатларга мароқ билан тикилса ҳам, кўз олдига ҳеч нарса келмади. Ўрмонжон қоғознинг ўртасидаги яшил-чипор доирага йўғон кўрсатгич бармоғини қўйди. Бу яшил-чипор доира қишлоқнинг ўртасида бўладиган беш ярим гектарлик маданият ва истироҳат бояи бўлиб, бугун очилган канал унинг ўртасидан кесиб ўтар эди. Бонгинг юқориги ва пастки палласидан ҳар томонга тортилган қизил чизиқлар қишлоқ кўчалари бўлиб, булар туташган доирада боққа қаратиб иморатлар солинар экан: мактаб, кинотеатр, клуб, ҳаммом, магазин, меҳмонхона, радиоузел, коммутатор, қироатхона, кутубхона кол-

хозидораси... Үрмонжон Қурбон отага бўлажак қишлоқ кўчаларидан бирининг суратини кўрсатди. Яшил уфқа туташган тўппа-тўғри ва ниҳоятда озода тош йўл. Унинг икки томонидаги ариқлар бўйига экилган ёш дарахтлар орасидан боғча оралатиб солинган бир хилдаги оппоқ иморатлар кўриниб турипти.

— Шу қишлоқни кўриш менга ҳам насиб бўлармизин,— деди Қурбон ота суратга узоқ тикилиб,— шу қишлоқни кўрсам, мана шу кўчалардан бирига қоровул бўлиб сув сепсам беармон кетар эдим. Афсус, минг афсуски, дунёга жуда эрта келган әканман... Жуда-жуда эрта кетаман. Бу ерлар ўн йилдан кейин, йигирма, ўттиз, эллик йилдан кейин қандоқ бўлса әкан? А, ўғлим, эллик йилдан кейин қандоқ бўлади?

Үрмонжон кулди.

— Ўн, йигирма йилдан кейин қандоқ бўлишини биламиз, бу ўзимиэга, бизнинг дидимиэга, орзумизга боғлиқ. Лекин эллик йилдан кейин қандоқ бўлишини билмаймиз, чунки бу мана шу уйларда туғиладиган, шу қишлоқда ўсадиган болаларнинг дидига, орзусига боғлиқ. Буларнинг дидини, орзусини ўлчагани бизнинг газимиз эскилик қиласди. Капсанчилар бир вақтлар шундай азим дарё бўйида осмондан тушадиган томчига кўз тутиб ўтиришар эди, каналга сув қўйганимиэдан кейин бу кулгили бир ҳол бўлиб қолди. Шундоқ әмасми? Кулги! Куламиш! Бу қишлоқда туғилиб ўсадиган болалар бир вақти келиб эҳтимол бизнинг кўп ишларимиздан кулишар. Кулишади, бунга шубҳа йўқ, отахон! Мана, мен сизга бир нарсани айтиб берай. Қишлоқнинг планини, кўчаларини, уйларини кўрдингиз. Мана бу кўча ҳозирги гўристоннинг бир чеккасидан ўтади. Шундай кўччанинг бўйида, шундай уйлар, шундай чарвоғларнинг ёнида гўристон бўлиши тўғрими? Албатта нотўғри. Лекин ҳозир шу гўристонни бошқа ёқ-қа кўчирамиз десангиз сочини юлиб дод соладиган хотин-

лар топилади. Ҳотинларгина әмас, әркаклар ҳам топилади. Үн йил олдинроққа ўтиб қаралса шу кулгими, йўқми? Менга қолса ҳозир ҳам кулги. Нима дедингиз?

Қурбон ота, соқолини остидан бармоғи билан тез-тез тарап әкан, ўйланиб қолди-да, анчадан кейин кулимсираб:

— Ҳа, әркаклардан ҳам... топилиб қолар,— деди.

— Албатта топилади,— деди Ўрмонжон ҳам кулимсираб,— ҳамма Қурбон отага ўхшаган әмас. Баъзи одамлар бунақа масалада бизнинг гапимиздан кўра битта-яримта руҳонийнинг гапига қўпроқ қулоқ солади.

Қурбон ота қизариб кетди.

— Майли, ўғлим, шу ишни ўзим бошлаб бераман,— деди кулиб.— Мен ҳеч кимнинг гапига қулоқ солмайман. Қачон керак бўлсам айт, югуриб келаман.

Бу нарса ҳозир зарур әмас әкан шекилли, Ўрмонжон бошқа мавзуга қўчди:

— Шундай қишлоқни кўрсам деган орзунгиз яхши, лекин шу қишлоқни бунёдга келтиришда қатнашсангиз ундан ҳам яхшироқ бўлар эди.

— Жон дер әдим, лекин,— деди Қурбон ота ўнг қўлини кўрсатиб,— бу карахт қўлдан нима иш келади?

— Топган бир даста гул, топмаган бир боғ пиёз... Келаман десангиз шу қўлга ҳам иш топилади. Келасизми?

— Келаман!

Қурбон ота тонг қоронғисида маҳсумни уйғотди. Йўлга чиқишиди. Сидиқжон уларни канал бўйигача кузатиб қўйди. Канал кўпргидан Бақақуруллоқнинг юқорисидаги бўлажак қишлоқнинг маркази — тўқайдан қад кўтариб чиқкан икки қаватлик бино оқаришиб кўриниб турар эди. Қурбон ота унга қараб қолганини кўриб Сидиқжон:

— Мактаб,— деди.

— Мактаб! — деди Қурбон ота ҳам беихтиёр,— мактаб! Сидиқжон хайрлашиб кетди.

Қурбон ота хийла ергача хаёл суреб кетди. Янги қишлоқ, унинг кўчалари, уйлари, одамлари унинг кўз олдидан ўтар эди.

— Қурбонбой,— деди маҳсум,— бомдод намози қазо бўлди-да. Яхши бўлмади.

— Капсанчиларда мачит йўқ,— деди Қурбон ота.

— Сабаб?

— Сабабки намоз ўқийдиган одам йўқ.

Маҳсум чаққонроқ юриб унинг олдига ўтди.

— Мачит бўлса намозхон бўлади-да.

Қурбон отанинг аччиғи келди.

— Ажаб бетамиз одамнинг гапирирасиз, маҳсум!

Одамларни мачит намозхон қилганми, намозхон одамлар мачит солганми?

Маҳсум чўчиган товуқдай бўйини чўзиб, юмaloқ кўзларини катта очиб секинлади ва орқада қолди.

Қурбон ота икки қўлини белига қўйиб, битта-битта қадам ташлаб борар, унинг кўз олдидан янги қишлоқ манзараси кетмас эди.

8

Сидиқжон кўкрагини сандалга бериб хат машқ қилас, Канизак унинг рўпарасида китоб ўқиб ўтирар эди. Деворга орқасини бериб дарчадан ташқарига, тушиб келаётган қорни тили билан олмоқчи бўлиб у ёқдан-бу ёққа югуриб юрган Ҳошимжонга қараб ўтирган Анзират хола ҳўплаган чойини ютмасдан пиқ этиб кулиб юборган эди, бурнида пуфак ёрилди. Буни ҳеч ким пайқамаган бўлса ҳам кампир қаттиқ хижолат тортди ва шошиб-пишиб бурнини артар экан:

— Бўлди-да, Сидиқжон, болам...— деди.

Канизак Сидиқжонга кўз қирини ташлаб кулимсиради.

— Қўйинг, хола, алақситманг, дарсларини қиласинлар.

Сидиқжон акам бугун мажлисдан ўтадилар. Битта-яримта одам дарсдан сўраб қолса... Ҳеч ким сўрамаса ҳам Ўрмонжон акам сўрайдилар.

— Ҳа-я, бугун мажлисдан ўтасан... майли, ёз, каттакатта ёз... Майли, гапирмайман. Ма, бир пиёла чой ичиб ол. Айтдим-а, уч кундан бери хатдан бош кўтармай қўйди деб... Эз, ёз, болам... Мажлисдан қўрқиш керак эмас, ҳаммамиз ҳам мажлисдан ўтганмиз. Сени ҳамма билади, бирпасда ўтасан кетасан. Бўлди, гапирмайман, ёза бер... Сенга ким тўсқинлик қилар әди? Бир-икки оғиз гап сўрашар...

Сидиқжон кулиб қаламини давотга суяб қўйди.

— Мен мажлисдан ўтишимга бирор тўсқинлик қилишидан, бирор гап сўраши-ю жавоб беролмай гаранг бўлиб қолишимдан илгари, бундан беш-олти ой бурун қўрқар әдим. Ҳозир мен ҳеч нарсадан чўчимайман. Мажлисдан ўтказишмаса хафа ҳам бўлмайман, ғабабки, колхозга аъзо бўлиш — колхозга хўжайн бўлиш деган гап. Мен нима қилибманки, колхозни опичлаб катта қилган одамлар қатори «Қўшчинор»нинг хўжайини бўламан? Ҳали эрта... Башарти мажлисдан ўтказишса бўйнимга катта қарз тушиди, бу қарзни узиш учун кўп тер тўкишим керак бўлади. Ўтказишмаса, ҳали аъзоликка муносиб эмассан дейинса ўша терни муносиб бўлиш учун тўкаман. Гапимни йўқотиб қўйишдан ҳеч чўчимайман. Мен адашсам ўнглайдиган одам кўп, ҳамма ўнглайди.

— Юрагинг сал увишгандай бўлганига айтиётибмада, болам.

— Юрагим увишаетганлиги рост, лекин бир нимадан қўрқанимдан, чўчиганимдан эмас.

— Бўлмаса нимадан?

— Нимадан әканлигини айттолмайман, тилимнинг учи-

да турганга ўхшайди-ю лекин айтотмайман,— деди Сидиқжон ва бирпас жим қолганидан кейин Канизакка қараб давом этди:— Шу ёшимгача бирон киши менинг афтиимга қараган эмас, бирон киши менинг номимни тилга олган ё бўлмаса менинг тўғримда бирпасгина ўйлаган эмас. Бирон киши, ҳаттоки, бир ёстиққа бош қўйған хотиним ҳам мендан кимсан, дунёга нима деб келгансан, нима қилиб юрибсан, нима қилмоқчисан, қандай орзу-армонларинг бор деб сўрагани, шу ҳам одам-ку деб гапимга қулоқ солгани йўқ. Ўйлаб қарасам орзу-армонларим бўлмаган экан ҳам. Мана энди, ҳали бир эмас, ўн эмас, юздан ортиқ киши менинг юзимга қарайди; кимсан, нима қилиб юрибсан, муродинг нима дейди! Шунча одам менинг номимни тилга олади, менинг тўғримда ўйлаб юрган гапини гапиради, мени гапга солади, кулмасдан, мени қалака қилмасдан, мени ўзига тенг кўриб гапимга қулоқ солади... Мана шуни ўйласам аллақандай бўлиб кетаман, юрагим увишади. Йўқ, буни юрагим увишади деб бўлмайди; бунинг бошқа оти бўлса керак... Мен бу ерга келганимда қорним тўқ, устим бутун, чўнтағимда беш-ён танга беминнат харжим бўлишини кўзлаган эдим, кейинчалик булардан ҳам каттароқ менга, айниқса менга, булардан ҳам зарурроқ нарса чиқиб қолди. Бунинг олдида янги тўну чўнтақдаги бир тутам шалдироқ қоғоз жуда ҳам арзимас бир орзу бўлиб қолди. Мени мажлисдан ўтказишадими, ўтказишмайдими гап бунда эмас, гап шундаки, шунча одамга, бутун бошлиқ бир мажлисга масала бўлиб турибман.

Анзират хола, унинг сўзига унча қулоқ солмаган бўлса керак, оғзини катта очиб өснади, инқиллаб ўрнидан турар экан:

— Майли, болам, майли, ҳар нима бўлса ҳам мажлисдан ўтасан,— деди ва Ҳошимжонни тергагани ташқарига чиқди.

Сидиқжон, Аңзират хола гапга тушунмаганидан шикоят қилгандай Канизакка қаради. Канизак китобни ёпиб чуқур хўрсинди.

— Шунақа, Сидиқжон ака, одам ўзини-ўзи танимай қоладиган вақт ҳам бўлар экан.

— Лаббай? — деди Сидиқжон.

— Бу ерга келганимда менинг ҳам ҳеч нарсадан умидим, ҳеч қанақа орзу-армоним йўқ әди. Бир кун келиб мен ҳам мана шунақа, худди сизга ўхшаб, ўзимни танимай қолган әдим.

Сидиқжон қувониб кетди.

— Мана, мана шу! Мана шуни айтмоқчи әдим! Тилимнинг учida турган нарса шу әди! Мен сизга өскидан қолган бир эртакни айтиб берай. Худо бутун жониворларни яратиб бўлиб ҳар қайсисига умр улашадиган бўлипти. Умр олгани ҳаммадан бурун ит борипти. «Ҳўш, сизга қанча умр берсак бўлади, қирқ йил етадими?» депти худо. Ит ўйлаб туриб: «Бу қирқ йилни нима қилиб ўтказаман?» депти. Худо: «Одамларнинг эшигига юрасан, сук ташласа ейсан», депти. Худо шундоқ деган экан, ит: «Ундоқ бўлса менга йигирма йил бас», депти. Худо унга йигирма йил бериб, қолган йигирма йилини халтасига солиб қўйипти. Ундан кейин эшак борипти. «Сизга қанча умр керак, қирқ йил етадими?» депти худо. Эшак: «Бу қирқ йилни нима қилиб ўтказаман?» деган экан, худо: «Одамлар устингга юк ортади, ўзи ҳам минади, халачўп тиқади», депти. Эшак ҳам умрнинг йигирма йилини олиб, қолган йигирма йилини қайтариб берипти. Булардан кейин одам борипти. «Ҳўш, сизга қанча умр керак, қирқ йил етадими?» депти худо. «Қирқ йилни нима қилиб ўтказаман?» «Хотин оласан, маишат қиласан, бутун дунё сеники», депти худо. Одам шошиб қолипти: «Ундоқ бўлса,— депти,— бизга саксон йил умр берасан, саксон йилдан ками кам!» Худо кўнипти, лекин яна қирқ йилни ёнидан бер-

мапти-ю ҳали ит билан әшакдан қолган йигирма йилдан қирқ йил умрни қўшиб берипти. Шунинг учун одам аввал бошлаб қирқ йил ўз умрини, ундан кейин қирқ йил ит билан әшакнинг умрини кўтар әкан. Ўйлаб қарасам мен умрни ит билан әшакнинг умридан бошлаган әканман: аввал бирорларнинг әшигига юриб улар ташлайдиган сүякка зор бўлганман, ундан кейин бирорнинг юкини, ўзини кўтарғанман. Энди бу ёғида ўз умрим бошланди, ўз умримни, одам умрини кўраман.

Канизак завқ қилиб кулди.

— Мажлисда гап сўрашса худди шу гапни айтинг, Сидиқжон ака! Айтасизми?

— Айтаман.

— Айтсангиз хўп кулги бўлар эди. Мондалаб айттолмайсиз. Одам шошиб қолади.

— Шошиб қолмайман.

— Шошасиз.

— Ҳеч!

— Қани, қанақа қилиб бошлайсиз?

— Қанақа қилиб бошлар эдим? Үрнимдан тураман, мана...— Сидиқжон ўрнидан турди.— Мана шундоқ туриб: «Ўртоқлар» дейман...

Шу пайт одамларни мажлисга чақираётган жарчининг товуши әшитилди. Сидиқжон беихтиёр дарров ўтирди.

9

Мажлис қишлоқнинг планига мувофиқ маданият ва истироҳат боғининг ўртасига — канал бўйига солинган қизил чойхонанинг қишлоқ биносида бўлиши керак эди. Бинонинг ички пардози ҳали унча битмагани, ундан ҳам кўра ҳали бузилмаган тўқай ичидаги бўлиб, одамлар кечалари бу томонга ўтгани бўридан қўрққани учун чойхона

ҳали бу ерга кўчмаган, бино ҳозирча клуб вазифасини ўтаб турар эди.

Уч маҳалладан чиққан одамлар Бақақуруллоқнинг юқорисига — булдуруқдан оппоқ оқариб ётган тўқайга томон оқа бошлади. Ерни юмшатиб баҳорда тўқайни бувиш мақсадида қайта-қайта қўйилган сув әнди ерга сингмай музлаб қолган.

Сидиқжон билан Канизак келгандан залга одам тўлган, лекин президиум столи атрофида ҳеч ким йўқ эди. Қаердадир чақалоқ ингаламоқда. Шу яқин ўртада чилим қуриллади. Кимдир Канизакни чақирди. Канизак ўтирган одамларни оралаб нариги томонга ўтиб кетди. У кетгандан кейин Сидиқжон шу ернинг ўзида чўкка тушди. Бу ерда Болтабой, Зокир ота, Абдусамадқори ва яна учтўрт аёл бир тўп бўлиб ўтиришар эди. Кимдир Сидиқжонни туртди. Сидиқжон орқасига қараб, Тўлаган акани кўрди. У тикандай қаттиқ соқолини Сидиқжоннинг юзиға ишқаб: «Ошна, бугун икковимизнинг тўйимиз әканда», деб пичирлади. Сидиқжон унинг гапига яхши тушумаган бўлса ҳам бош иргатиб илжайиб қўйди.

Президиумга правление аъзолари чиқди. Булар ўзаро нима тўғридадир сўзлашиб олгандан кейин мажлисни Иброҳимов очди ва кун тартибини эълон қилди. Биринчи масала давлатдан олинган узоқ муддатлик қарздан фойдаланиш ва колхознинг келаси йилги хўжалик ва қурилиш плани ҳақида Бўтабойнинг доклади, навбатдаги масала правлениенинг қарорини тасдиқлаш эди. Иброҳимов яна қандай таклифлар борлигини сўраган эди, олдинда ўтирган Зокир ота ўрнидан туриб: «Кун тартибига мактаб масаласи ҳам киритилсинг», деди. Бу таклифни кўпчилик қувватлагани учун овозга қўйилмасдан кун тартибиға иккинчи масала қилиб ёзилди.

Биринчи масала юзасидан Бўтабой акага сўз берилди. У, Сидиқжоннинг назарида, сўзни чўзмаслиқ ва тезроқ

правлениенинг қарорини тасдиқлаш масаласига ўтиш учун гапни ўртасидан бошлади: ҳатто одатдагича «ўртоқлар» ҳам демасдан, тўғридан-тўғри: «Биз бу хўжалик йилида колхозимизни кattакон бақувват пахтакор колхозга айлантиришимиз, ўзимиз каламуш инидан ёрг дунёга қадам қўйишимиз керак», деди-да, бу икки вазифани бажариш юзасидан правление тузган плани батафсил сўзлаб берди. Бу колхоз бўйича тузилган беш йиллик планинг биринчи йили плани бўлиб, правление бутун эътиборни пахтанинг таннархини камайтиришга берган эди. Сидиқжон бунга диққат билан қулоқ солиб ўтирган бўлса ҳам одамлар тез-тез чапак чалганда «сўзи тамом бўлди, энди бошқа масалага ўтилади» деган ваҳм билан қулогига гап кирмас әди. Бўтабой сўзининг охирида желаси йилги хўжалик плани ҳар бир колхозчининг зиммасига қандай ва қанча оғир меҳнат юклашини айтиб колхозчиларни яна ҳам фидокорона меҳнат қилишга чақирганда, мажлис аҳли гулдурос олқиш билан бу чақириққа ўзининг тайёр эканлигини билдири.

Докладдан кейин қизғин музокара бошланиб кетди. Музокарага чиққан одамларнинг ҳаммаси правлениенинг тадбирларини маъқуллаб гапирди. Бу масала юзасидан қарор қабул қилингандан кейин иккинчи масалага ўтилди.

Зокир ота ўрнидан туриб гап бошламоқчи бўлган эди, Үрмонжон уни минбарга тажлиф қилди. Зокир ота минбарга чиқди.

— Яхшилар! Мен боя музокарага чиқиб правление ва унинг раиси Бўтабойнинг ишларидаги камчиликларни танқид қилганимда мактаб масаласини ҳам қистириб ўтсан бўлар эди, лекин бу масала алоҳида қўйилганлиги учун қистирмадим. Правление хўжалик, қурилиш ишларига

берилиб кетиб мактабга унча қарамай қўйди; қарайди, қараётитти, шундай чиройли, райондаги мактаб бинолари билан бўй ўлчашадиган мактаб биноси солдик, лекин бу билан иш битмайди. Чинни товоқ яхши, лекин қазиси билан бўлса яна яхшироқ бўлади. Раҳматилла Обидий домлаликка ярамаслиги кўп ўртоқларга маълум бўлса керак.

Ўрмонжон луқма солди:

— Нима жиҳатдан ярамайди, илми етмайдими?

Зокир ота нима дейишини билмай бир оз туриб қолгач давом әтди:

— Илми болаларни ўқитишга етса етар, лекин катталарни ўқитишга етмайди. Тўғри, Иброҳимов келгандан бери Раҳматилла домла катталарни ўқитмайдиган бўлди, фақат болаларни ўқитади, лекин катталарни ўқитишга ярамайдиган одам болаларни ўқитишга ярайдими, йўқми? Шундоқ әкан, нима учун шу чоққача бирон чора кўрилмайди? Мен мажлисдан талаб қиласр әдим: бу масала тўғрисида тегишли қарор чиқариб район маорифидан бошқа муаллим сўралсин.

Зокир ота минбардан тушиб кетмоқчи бўлган эди, Ўрмонжон сўз қотди:

— Шундай фикрга келишингизга нима сабаб бўлди?
Нималар сабаб бўлди?

Зокир ота тўхтади.

— Мен бу ерда ўз фикримни айтиётубман...

Пастдан Ўрмонжоннинг саволини маъқуллаган товушлар эшитилди. Иброҳимов ғовурни босиш учун қўнғироқ чалиб ўрнидан турди.

— Бунга шубҳа йўқ, Зокир ота,— деди у,— далилнингизни айтинг демоқчи Ўрмонжон акам.

Зокир ота қайтиб минбарнинг олдига борди, дўпписини бошидан олиб унинг устига қўйди-да, бошининг орқасини силаб ўйланиб қолди.

— Унда қила олсангиз сўзга чиқинг-да! — деди олдинги бурчакда ўтирган кимдир.

— Раҳматилла областдан юборилган, осонми... — деди яна кимдир заҳарханда қилиб.

— Областдан юборилган бўлса нима! — деди Зокир ота бирдан бошини кўтариб.— Мен сизга айтсам катта кўрмаганинни кичик кўради, кичик кўрмаганинни катта кўради, иккаласи биргалашиб қараса ҳеч нарса кўздан қочмайди дейди халқ... Раҳматилла домла катталарни ўқита олмаса, болаларни ҳам ўқита олмайди демоқчи бўлдим. Сабаб? Сабабки менга бирон нотўғри гапни айтса-ю, бу гапнинг тўғрисигига гумонсирасам бошқалардан суриштириб тўғрисини билиб оламан. Мана, Ўрмонжон бор, Рауфжон бор... Лекин ўша нотўғри гап болага айтилса нима бўлади? Бола домланинг гапига ишонади, суриштирумайди... Энди гапирсам гапира қолай. Мен чоршанба куни кампирим билан уришиб қолдим. Аввали уриш бўлмасин, уриш бўлгандан кейин тил ўлгурнинг суяги йўқ. Биттани у айтди, биттани мен айтдим. Бундан Раҳматилла домла хабардор бўлиб орага тушдилар, яраштириб қўйдилар. Бунисига қуллиқ, нимага десангиз, уришишга уришиб қўйиб, иккавимиз ҳам ярашгани баҳона тополмай турган эдик. Шундан кейин у киши мени ҳужраларига олиб кирдилар. Гаплашиб ўтирик. Шунда домла: «Хотинларга озодлик бериш яхши-ку, лекин мана шуниси ёмон-да», деб қолдилар. Бу гап менга унча ўтирмади, нимага десангиз, кампирим озодликка чиққани учун мен билан уришгани йўқ. Хотинлар озодликка чиқмаган вақтда эри билан уришмабдими? Домланинг катталарни ўқитишга илми етмаганлигига биринчи далил қилиб шуни кўрсатаман. Эҳтимол бу нарса илмга кирмас, лекин одамлар катта илмлардан бебаҳра қолган қишлоқ жойда мана шунаقا нарсалар ҳам илмга кириши керак. Ундан кейин гап озодлик тўғрисида кетди. Озодлик ўзи нима? Бу киши озодлик тўғрисида ҳам ғалати гаплар

гапирдилар. Бу гапларни эшитганимда дарров бригадам кўз олдимга келди. Агар бригада аъзолари шу кишининг гапларини эшитса-ю, шунга амал қиласа нима бўлар эди? Хоҳласа ишга чиқади, хоҳламаса чиқмайди; хоҳласа кетмон чопади, хоҳламаса бозорга бориб балиқ сотади... Бу қанақа озодлик бўлди? Йўқ, оғзида илми бўлса ҳам бу одам озодлик нима эканини билмас экан. Лекин бу тўғрида у кишидан ўпкаlamадим, сабабки, озодлик нима эканини озодликдан маҳрум бўлган одам билади. Катақда семириб ётган товуқ учишнинг фойда-зиёнини қаёқдан билсин? Биз князъ, эшон ва бойлар замонида ээилиб, янчилик юрган вақтларимизда домла эҳтимол катакда семириб ётган бўлса.

Қийқириқ кулги кўтарилди. Зокир ота минбардан шошмай тушди, бориб жойига ўтирди. Иброҳимов ўриндан туриб қўл ишораси билан ғовурни босди, «Яна ким гапиради?» деган эди бир неча киши баравар қўл кўтарди. Олдинда ўтирган Рўзимат минбарга чиқди.

— Масала равshan... Зокир отам «Нима учун шу чоқ-қача бирон чора кўрилмади?» дедилар. Бу саволга аввал боши Бўтабой акам жавоб беришлари керак. Эҳтимол, бунинг сабаби кўпdir. Агар беадабгарчилик бўлmasa шу сабаблардан биттасини айтиб бермоқчиман. Станциядан фанер олиб келаётган эдим. Қоронги тушган, ой энди чиқиб келаётган эди. Кўприкдан ўтганимда «ҳай-ҳай-ҳай, ой ҳеч бир колхозда бундай чиройли чиқмайди» деган товушни эшишиб қолдим. Қарасам Раҳматилла домла. Аравага чиқариб олдим, «Домла, ой бошқа колхозларда бунақа чиройли чиқмайдими?» дедим. Шундоқ десам, «чиқади, қаҷонки Бўтабойдай раис бўлса» деб жавоб бердилар. Бўтабой акам тўғрисида орқаворатдан шундоқ деб юрган одам бу кишининг ўзларига нималар дер экан? Лаганбардор одамлар бўлади, лекин бунақа лаганбардорни энди кўришим!..

Ҳамма гуриллаб кулди. Бўтабой, қип-қизарганича илжайиб бош чайқар·эди. Кулги босилмасдан Рўзимат давом этди:

— Зокир отам тўғри айтдилар, ҳақиқатан бизни мактабдагина әмас, чойхонада, кўчада, далада, ҳамма ерда ўқитишига илми етадиган муаллим керак. Масалан, мана, ўртоқ Иброҳимовни олайлик. Бу киши ўзлари ҳосилот, касблари агроном, кечки мактабда муаллимлик ҳам қиласидилар. Бу киши бизга ҳар томондан устод бўлиб қолдилар. Ой куядими, фашистлар ўз уясига ўзи ўт қўйиб, ўзи дод соладими — нима ҳодиса бўлса бизга тушунтириб берадилар. Ўртоқ Иброҳимовнинг уйлари ҳам бир мактаб бўлиб қолди. Деҳқончилик бундай катта илм әкан, бу илмнинг қўлидан шунча иш келар әкан, партия, ҳукуматимиз мамлакатни бундоқ йўлдан олиб бораётган әкан... Қани энди қишлоғимизда шунақа муаллимдан иккита бўлса! Мен Зокир отанинг таклифига қўшиламан... Шу билан бирга яна бир нарсани айтмоқчиман. Зокир ота нуқул «илми етмайди» дедилар. Йўқ, отахон, домла бу гапларни илми камлигидан айтган әмасдир. Илмда ҳам илм бор. Эҳтимол, унинг илми шунақа илмдир. Мана, ўртоқ Иброҳимов бир дарсда айтиб берган әдилар: ўртоқ Лениндай донишманд одамга қарши чиққан одамлар бўлган әкан. Ўшалар илми камлигидан қарши чиқишиптими? Мен Зокир отанинг бошқа муаллим сўраш тўғрисидаги фикрига қўшилиш билан бирга Раҳматилла домлани текшириш керак деб таклиф қиласман.

Рўзимат сўзини тамом қилас-қилмас Абдусамадқори иргиб ўрнидан турди ва сўз берилишини ҳам кутмасдан минбарга чиқди.

— Бу масала жуда тўғри ва ўз вақтида қўйилди. Бу тўғрисида раисимизни танқид қилиш бир томондан тўғри бўлса, иккинчи томондан тўғри әмас. Биз, раисимиз айтмоқчи, энди эсини таниган боладаймиз: кўп нарсага қизи-

қамиз, кўп нарсани билгимиз келади... Раҳматилла домладан куйганларнинг бири ўзимман. Сабаб? Мен бир озөскича ўқиганман, янгичага ҳали машқим роса бўлган эмас. Раисимиз Бўтабой ака мени ўз вақтида қаттиқ танқид қилиб кўзимни очганларидан кейин... Бўтабой акага чин кўнгилдан ташаккур билдираман... Бўтабой ака кўзимиизни очганларидан кейин янгичасига ҳам машқимни роса қилиш мақсадида астойдил ўқидим. Дарсга ҳам қаноат қилмай домлага яқин бўлдим, уйига қатнадим, уйимга чақирдим... Лекин домладан етарли баҳра олдимми? Етарли баҳра олганим йўқ. Тўғри, Зокир ота айтмоқчи, ҳақиқатан илми кам, камгина эмас, йўқ ҳисоби. Иккиси томондан эрта қариган. Лекин гап бунда эмас... Рўзимат айтмоқчи, гап бошқа ерда бўлиши ҳам мумкин. Мен Ўрмонжон акамдан, Бўтабой акамдан, қолаверса бутун правлениедан талаб қиласр әдим, бу ишга, бу масалага жиддийроқ қараб тегишли чора кўришлари керак. Мен бу ерда Зокир отани танқид қилмоқчи әдим, лекин ўйлаб қарасам, танқидни ўзимдан бошлашим керак экан. Нима учун? Чунки Раҳматилла озодлик тўғрисида гапирган гапини менга ҳам гапирган әди. Мендан ўтган хатолик шу бўлдики, бу гапни дарров раҳбарларимизга етказиб, чора кўрилишини талаб қилмадим. Бундай жинояткорона бепарвонлик қилишимга нима сабаб бўлди? Узимнинг гўллигим, бефаҳмлигим сабаб бўлди! Домла бу гапни менга айтганида дарров унинг ёқасидан ушлагундай бўлибман. Ани шу чакки бўлган экан. Шундан кейин домла нима қилди? Ҳазилга ўтди: «Э, қори, қирқ тўққиз йилдан берин бирон оғиз бемаъни гап гапирган эмасман — авваллари ёш әдим, кейин бирданига қариб қолдим», деди. Мен кулиб қўя қолибман. Менинг ўрнимда бошқа одам бўлса, албатта, кулиб қўя қолмас әди. Ҳўп, мени-ку, ҳазил билан чалғитипти. Зокир отага нима жин урган әди? Уни ҳазил ёки бошқа бирон нарса билан чалғитмаган экан-ку! Нима учун Зокир

ота бу гапни дарров раҳбарларимизга маълум қилмапти? Нима учун мажлис бўлишини кутиб юрипти? Ҳудди шу, гапни Рӯзимат тўғрисида ҳам айтиш мумкин. Лекин бу билан мен Зокир ота билан Рӯзиматни қоралаб ўзимни оқламоқчи эмасман. Шулар қатори мен ҳам гуноҳкорман. Ўзини билган одам бу гуноҳни катта жиноят деб баҳолайди. Шу билан бирга мен Раҳматилла Обидийни бетўхтов ҳайдаш керак деб таклиф қиласман.

Қори жойига ўтирди. Иброҳимов яна ким сўзга чиқмоқчи әканини сўраган эди, ҳеч ким қўл кўтартмади. Ундан-бундан: «Ҳайдалсин! Бошқа таклиф йўқ!» деган говушлар эшитилди.

Бу ҳақда бошқа фикр бўлмагани учун маорифдан бошқа муаллим сўрашга қарор қилинди.

Иброҳимов навбатдаги масалага ўтиб, бу тўғрида сўёни правление секретари Зиёдахонга берар әкан, Сидиқжонга қараб кулимсираб қўйди. Сидиқжоннинг юраги жиг этиб кетди: «Наҳот балхтут остида бўлган ўша гапни шу мажлисга асраб юрган бўлса...»

Зиёдахон Тўлаган Сулаймонов билан Сидиқжон Соҳибжоновларни колхозга олиш тўғрисида правлениенинг қарорини ўқиб берди.

Тўлаган деворнинг остидан юриб бориб Бўтабойнинг рўпарасида тўхтади.

— Энди, Бўтабой, ўзингдан ўтар гап йўқ... Утган гапга салавот...

Бўтабой мўйловини икки бармоғи билан силаб кулимсиради.

— Қайси гапга?

— Нима қиласан әсимга солиб? Колхозга кирмайман деб мен хато қилган әканман, товуқдай қийқиллатиб олиб кираман деб сен ҳам хато қилган әкансан.

— Менга нега гапирасан, халойиқча гапир!

Тўлаган aka халойиқча юзланди.

— У вақтда от, сигир... тушунмаслик оёғимга кишан бўлган экан... Ўзларингдан ўтар гап йўқ... Ҳеч ким ишга чиқ деган бўлмаса ҳам каналда ишладим. Мана, Ўрмонжон айтсин... Отхона, оғил солган усталарга доим қарашдим, лекин бирордан бир чақа сўраганим йўқ, сўрамайман ҳам. Тўқай бузилади, қўриқ очилади, мана шунча қурилиш кетаётитти, саломатлик бўлса, ишда қўрасизлар... Ўқиётибман, мана, ёзиб тўққизта дафтарни тўлдирдим.

Шу пайт Канизак келиб Сидиқжонни секин туртди ва «Гапирасизми? Зиёдахон опам ҳам гапирсин деяптилар, гапиринг» деди. Сидиқжон Зиёдахонга қаради. Зиёдахон унга қараб жилмайиб турар эди. Бу орада Ўрмонжон сўзлади, правлениенинг қарорини тасдиқлаш тўғрисида таклиф киргиэди шекилли, «Тўғри, олинсин» деган товушлар өшитилди.

— Сидиқжон Соҳибжонов! — деди Иброҳимов бирдан,— қани ўзингизни кўрсатинг!

Сидиқжон, тўсатдан уйқудан уйғонгандай, гаранг бир аҳволда ўрнидан турди. Ҳар томондан товушлар өшитилди:

— Кўрганмиз! Биламиз! Сидиқжонни биламиз.

— Қани, гапиринг,— деди Иброҳимов.

— Мен нима дейман?..

Канизак уни секин туртди.

— Гапиринг... Ҳа, худо жонворларни яратиб бўлиб...

Сидиқжон унинг туртганини пайқамас, гапи қулоғига кирмас эди.

— Нима дейман?.. Мен илгари колхоз деганда одамлар кўплашиб ишлайди-ю ҳосилини бўлишиб олади, колхоз шу деб ўйлар эдим. Йўқ, колхоз бошқача бўлар экан...

— Қанақа бўлар экан? — деди Ўрмонжон.

— Колхозда одам ўз қадрини билар экан... Одам ҳам колхознинг қадрини билиши керак. Мен умримда гапирган әмасман... кечирасизлар.

Сидиқжон бошқа сўз тополмай қолгандан кейин Иброҳимов «ўтирииг» деб ишора қилди.

Правлениенинг қарори тасдиқ қилинди.

Мажлис тугар-тугамас Сидиқжон лип этиб чиқиб кетди, унинг чиқиб кетганини ҳатто Канизак ҳам пайқамай қолди. Уни «қуллуқ бўлсин» қилмоқчи бўлган ёр-жўралари қидиришар, чақиришар әди.

10

Раҳматилла Обидий таги қўқонлик бўлиб, Қўқон мухторияти вақтида «Ўрдада ўн олтига большевик қолган, шуларни ўлдирсан ҳукумат ўзимизни бўлади» деб жарсолган газетхон бойваччалардан бири әди. Уруш бошланди. Бироқ большевик ўн олтига эмас, кўпроқ, фақат ўрдада эмас бутун шаҳарда, ҳар бир маҳаллада, ҳар бир уйда бор экан. Унинг отаси Обидхўжа вофурушни дегрезлик уста Түрдиали деган бир маҳсидўз белча билан чавақлаб ўлдирди. Бир зарбадан мухторият ҳукумати тирқираб кетди: бири мухторият байробгини қўйнига тиқиб чет элга қочди, бири «Амиралмуслимин» — босмачи Эргашнинг отига мингашиб Бачқирга қочди, бири оқ гвардиячилар паноҳига сифинди, бири қўл кўтариб таслим бўлди... Раҳматилла Обидий ҳайрон әди: «Нима бўлди, нега мухторият палафда тухумдек оқиб кетди; бирон тасодиф, англашилмовчилик рўй бердими?» Йўқ, тасодиф ҳам, англашилмовчилик ҳам; революция бўрони унинг бутун умид ва ишончини куз хазонидай учирив алланга бағрига урган әди. Раҳматилла, қути учиб, бекингани ковак излаб қолди. Ундан ақллироқ, ундан әпчилроқ ёр-дўстлари шундай ковакни аллақачои топишган әди, уни ҳам тортишиди. Ҳали ҳаробаларнинг

чанги, ёнғинларнинг тутуни босилмасдан вужудга келгандыкта жишилди. Жуда тез тармоқ ўймоқда бўлган маориф — сонсаноқсиз мактаблар, интернатлар, катталар учун кечки курслар бир оз бўлса ҳам ўқиган одамларга муҳтоҷ әди. Раҳматилла Обидий интернатга муаллим ва мураббий бўлди. У, ўзига келиб, қўзини очиб атрофга қараса ҳали «чиқмаган жондан умид» қилиш мумкин: турли мавқеда туриб бир мақсад билан совет ҳукуматига қарши қўл кўтарган, лекин қўли қайрилган одамлар топишиб бир куч ҳолига келаётитти ва бу одамларнинг бир кўзи Бачқиода бўлса бир кўзи Истамбулда, Лондонда... У янги умид, янги ишонч, зўр гайрат билан «жўжуқларни саодати абадия» йўлига бошлаб тарбия қилишга киришди: кечасию кундузи мактабдан, ётоқхонадан чиқмай қўйди, ҳадемай интернатга мудир бўлиб олди.

Иплар ўтди. Раҳматилла Обидийнинг жўшқин фаолияти авжига чиқиб ўз самарасини бера бошлаган бир вақтда фалокат рўй берди.

Шарқий Бухорода Анвар бандасини тугатишида қатнашиб қайтган бир қизил аскар уйига келиб қараса, қизил фас кийган, ўнг елкасидан чап биқининг кўк лента тортиб олган бир одамнинг каттакон портрети тўрдаги токчада унга, чўчиган каламушга ўхшаб, бақрайиб қараб туриди. Бунга отасининг диққати жалб бўлганидан суюниб, ўз қилмишига гердайиб турган бола бирдан: «Анварбек афанди! Турк ўғли, турк!» деб қичқирди ва «Турк ўғли, тур, ёвга югур» деб шарқий айтиб юборди. Қизил аскар портретни девордан юлиб олди, ўглини етаклаб мактабга борди-да, тўғри «мудир афандимиз» Раҳматилла Обийдининг олдига кирди.

Бу учрашувнинг натижаси шу бўлдики, Раҳматилла Обидийни касалхонага олиб кетишиди. Унинг қўрқиб кетган ёр-дўстлари, пир ва устодлари ғалаёнга келган жамоатчиликни босиш, унинг диққатини фақат Раҳматиллага қара-

тиш учун шаҳар маорифи ходимларининг мажлисида уни маориф соҳасидан ҳайдашди. У, бирон ҳафта касалхонада ётиб чиққандан кейин, бир неча кун лунжини боғлаб юрдида, ёр-жўралари тўплаб берган пулни белига туғиб бир шўнғиди; шу шўнғиганича хийла вақт бедом-дарак бўлиб кетди-ю, ниҳоят, Бухородан чиқди. Бу ерда уни жуда яхши қарши олишди, маориф назоратидан каттагина бир вазифани беришди. У ўз ишидан, машнатидан мамнун эди: обрў жойида, пул кўп, улфатлар сара... жиндаккина табъи наэм пайдо қилиб, «бир кеча ёнимда ётсанг на бўлур?» қабилидаги шеърлар ҳам ёзадиган бўлиб қолди. Бироқ бу ерда ҳам бир фалокат рўй берди. Раҳматилла Бухорога янги келган кунларида давлат арбобларидан бирининг уйида ётиб юргач, бу одам билан қиёматлик дўст тутинган бўлиб, бири бўлмаса бирининг томоғидан бир қултум май ўтмас эди. Бу одамнинг чиройликина хотини бўлиб, Раҳматилла кўпдан шунга ҳиқиллаб юрар эди. Ниҳоят хотин рўйхуш бергандай бўлди: бир ичкилик мажлисида буларнинг олдига кабоб келтириб қўйиб, Раҳматиллаға ғамза қилди. Тамом! Раҳматилла унинг эрини учирив қўйишга ҳаракат қилди ва шунга муваффақ ҳам бўлди. Бироқ бу одам Раҳматилланинг ниятини билиб ўзини жўрттага мастлика соглан экан...

Раҳматилла қиёматлик дўстининг уйидан ярим кечаси сарпойчанг қочиб чиққанича тўғри станцияга борди ва поездга чиқиб Жалолободга йўл солди; бу ерда бир оз турганидан кейин Андижонга, ундан Наманганга ўтиб, шу ерда туриб қолди. Наманганда унинг ота томондан қариндошлари бор эди. Раҳматилла бу ерда бирмунча вақт хуфия савдогарчилик қилиб юрганидан кейин, шаҳар маориф бўлимига инспектор бўлиб кирди; аста-секин ўзини ўнгарди, уй-жой қилди, хотин олди. Бу ерда учинчи мартаға фалокат рўй ерди: Раҳматилла Обидий ҳеч кимнинг

хаёлига келмаган, жуда-жуда хунук бир шаҳвоний жиноят қилиб қўйиб беш йилга кесилиб кетди.

У қамоқдан совет ҳукуматига қарши ғазаб ва нафрат заҳрига тўлиб, нақд ўлим хавфида қолган машукдай, ўнг келиши биланоқ ҳамла қилишга тайёр бўлиб чиқди. Бироқ, қарасаки, шароит ҳамладан кўра кўпроқ мудофаани талаб қиласди: у айтган катта толлар қулапти, бош тиқмоқчи бўлган мактаб — маориф соҳасига тамоман янги одамлар, олов нафасли ёшлар келипти, матбуот мамлакат янги даврга, муттасил зўр курашлар даврига киргани тўғрисида ёзаётитти ва бу даврда катта қийинчиликлар рўй беришини очиқдан-очиқ айтиб, халқни кураш ва галабага сафарбар қилаётитти...

У тақдирга тан берди: заҳрини дилига солиб, асалини тилига чиқариб китоб магазинига ишга кирди; кунларни китоб сотиш, бўш вақтларини ўзи таниган ва танимаган масъул ходимларга шеърий мадҳиялар ёзиш ва бу мадҳияларни учраган одамга ўқиб бериш билан ўтказа бошлади. У, бирмунча вақт шундай шеър машқ қилиб юрганидан кейин, бир гурӯҳ суд ходимларн устидан бўлаётган судга бағишлиб ёзган шеърини бир журналга юборди. Бу шеър бошдан-оёқ совет ҳукуматига мадҳия бўлиб ҳар тўрт сатрдан кейин шу икки сатр қайтарилар эди:

Бўлди шўро барқарору ҳосил ўлди орзу
Давр меҳнаткашни давринда жиноят яхшими?

Орадан икки кун ўтгач, унинг ҳужрасига озгин, рангги заҳил, ўзи ёш бўлса ҳам кўз атрофини ажин босган бир йигит кириб келди. У, салом йўқ, алик йўқ, дабдурустдан: «Нима қиласиз юзага чиққани интилиб, юзада пишириб қўйиптими? Бунақа шеърлар ҳеч кимнинг кўзини бўймайди. Кетинг бу ердан. Область ижрокомининг секретарига учранг, сизга иш топиб беради», деди; шундоқ деди-ю, чиқди кетди.

Раҳматилла гаранг бўлиб қолди: бу одам ким ва нима мақсадда келди? Бу гапларни айтишдан муроди нима?

Раҳматилла, бир томондан юрагига гулгула тушиб ва бир томондан кўнглининг бир бурчида алланимадан бир умид пайдо бўлиб, областга борди. Секретарь ўзининг «саодати абадия» йўлига бошлаб тарбия қилган жўжуқларидан бири Жавдот Найм бўлиб чиқди. Раҳматилла унинг хуш қабул қилишидан, муомилаларидан кўп саволларига жавоб топди, дунёси равшан бўлди, лекин сұхбатидан унча рози бўлмади. «Жўжуқ» ўз устодидан асосий гапни яширас, юпқа лабидан аримайдиган табассум, думи хуржунда гаплари билан гўё: «Билиб нима қиласан? Сен кўрган елкан аллақачонлар гарқ бўлган. Бизнинг қайиқда моҳир эшқакчи бўлмаган одам ортиқча юк. Бундан ташқари сен пистони чақилган одамсан, бизнинг қўлимизда узун косов бўлиб хизмат қилишдан бошқа ишга ярамайсан» демоқчи бўлар эди.

Устод йигирма кунча ўз «жўжуғидан» янги алифбени ўргангандан кейин қишлоқ муалими бўлиб Хўжақишлиқка жўнади. «Жўжуқ» уни кузатаркан, «қўрқманг, ҳар қанча калтак бўлса хўжаларнинг бошидан ортмайди, лекин бўри бўлгандан безгакпашша бўлган яхшироқ, чунки уни қопқон билан тутиб бўлмайди» деди.

Раҳматилла, марказда ҳужрасига келган одамнинг сўзиага ва шогирдининг таълимотига амал қилиб, юзага чиққани интилмасдан безгакпашшадай ғинғиллаб юрди. Ойлар ўтди. Дастребки кунларда қишлоқ аҳолисининг диққати жалб бўлган янги домла бора-бора назардан тушиб қолди. У кўп вақтини ҳужрасида ўтказар, аҳёнда қизил чойхонага чиқиб қолса рўпара келган одамга касаллигидан, умри оз қолганидан ҳасрат қиласан эди. Ҳақиқатан ҳам, бўйнини боғлаб ва битта-битта қадам босиб ҳужрасига кириб кетаётган Раҳматиллани кўрган киши «шу кирганича тобутда чиқса керак» деб ўйлар, бирпас ёнида ўтиро-

ган киши, доринниг ҳидидан кўнгли озиб, бутун бошлиқ бир касалхонани ютиб юборгандай бўлар әди.

Аҳолининг ғашига тегадиган турли миш-мислар тарқатишда, Жавдот Наим кўзлаган «Жиҳоди акбар»¹ кунида иш берадиган одамларни таниб олишда, ўргимчакдай буларнинг орасига тўр тортишда Раҳматилла катта иш қилди-ю, лекин воқеаларнинг моҳиятини англамасдан, буларнинг бир-бирига муносабатини, сабаб ва натижаларини яхши билмасдан фақат узун косов бўлиб хизмат қилгани учун Ҳўжақишлоқда колхозга қарши чиққан тўполон кўзига жуда катта кўринидики, назарида совет ҳукуматининг тақдирни шу ерда, хўжалар қўлида ҳал бўлаётгандай бўлиб, бир-икки ножӯя қадам қўйди. Сталиннинг «Муваффақиятлар олдида эсанқираш» мақоласи чиқиб сув тингандан кейин ўша босган ножӯя қадами бошига бало бўладиган кўриниб қолди. Агар бунинг олди олинмаса узун косов ҳам қўлни куйдириши мумкин әди. Жавдот Наим уни дарров чақиририб олди.

Раҳматилла бирмунча вақт шаҳар маорифи бўлимидаги, бу ер нотинчроқ бўлгандан кейин музейда ишлади; бироқ, разм солиб қараса, әнди унга шаҳарда ишлаш тўғри келмай қолипти: нотинч, жуда ҳам нотинч! Унинг бу мулоҳазаси Жавдот Наимга ҳам маъқул тушди. Жавдот уни чуқурроққа кўмиш мақсадида узоқ Капсанчилар қишлоғига юборар экан, шундай деди: «Қиличингиз синди, қалқонингиз тешилди, домла сичқон бўлиб ковакка кириб кетаётисиз. Лекин болалигимда айтган бир гапингиз эсимга тушди: «Сичқон ожиз маҳлуқ, лекин Ҳазрати Нуҳнинг қайиқларини тешганлиги тарихда машҳурдир», деган әдингиз. Ҳар бир колхоз бир қайиқ, домла, лекин Темир қайиқ! Темир қайиқни тиш билан кемириб бўлмайди. Уни занг бўлиб ейиш керак. Капсанчиларда Абдусамадқори деган

¹ Катта жанг, уруш.

одам бор, менинг божам. Ўша билан бирга иш кўрасиз. Қо-
рига мендан салом айтинг. Шу ойнинг охирларида бир ке-
либ кетсин».

Раҳматилла Қўшчинорга жўнади.

Колхоз «облаостдан келган кекса, тажрибали ўқитув-
чи»ни қулоч ёзиб қарши олди. Бўтабой ака унга яхши
ҳужра қилиб берди, иши ва майшати учун айрим шароит
туғдирди.

Раҳматилланинг бу ерга келиши колхозда Жавдот
Наимнинг қули бўлиб турган қорининг фаолияти учун
кенгроқ имконият туғдириши керак эди, бироқ бугун маж-
лисда бўлган ва бундан кейин яна ҳам жиддийроқ бўладиган
гаплар қорининг юрагига ғулғула солиб қўйди: Раҳматилла
ҳақида бўлган ва бундан кейин бўладиган гаплар Жавдот-
нинг ёқасига узатилган қўл демакдир, бу қўлга Раҳматилла-
нинг этагини тутқазиб қутулиш мусассар бўладими, йўқми?

Қори мажлисдан чиқиб уйига, тунни яримлатиб Раҳма-
тилланинг ҳужрасига борди.

Раҳматилла қоридан бу гапларни әшитиб ҳанг-манг бў-
либ қолди.

— Кетинг, домла, кетинг! — деди қори аввал ёлворган,
кейин сабри тугаган бир оҳангда,— бетўхтов кетинг!

Раҳматилла бирдан бошини кўтариб қорига қаради.

— Қочинг демоқчимисиз? Йўқ!

Эртасига Раҳматиллани қули синган, боши ёрилган
ва ҳушсиз бир ҳолатда мактаб ёнидаги бир чуқурликдан
топиб касалхонага жўнатишди. Ўша куни кечаси Раҳма-
тилла Обидий оламдан ўтди.

11

Февралнинг ўрталарида ҳаво юмшаб дала-тошни,
тўқайларни босиб ётган қалин қор ёпиги тешила бош-
лади.

Баҳор ҳидидан бесаранжом бўлган қаргалар қағиллаб, қатиқ тўкилгандай олачипар бўлиб, буғланиб турган далаар устида у ёқдан-бу ёққа учар, қор кетганидан бехабар ҳануз қунишиб ётган тўқай устида айланар эди.

Об-ҳавонинг бундай келиши, кузда қайта-қайта сув тоширилган тўқайлик ернинг кўпчиб, баъзи жойларда кекса толларнинг анчайин шамолдан ағнаши Капсанчиларни типирчилатиб қўйди: булар бўлажак қишлоқ марказини яққол кўришга, ҳозирча бирдан-бир қад кўтариб турган мактаб биноси қаторига ярим доира ташкил этиб тушадиган иморатларни, марказдан ҳар томонга кетадиган кўчаларни тасаввур қилишга ҳалал бериб турган тўқайнин тезроқ ўриб, юлиб ташлашга шошилар эди.

Тўқай бузиш иши мўлжалдан ўн беш кун бурун бошлиниб кетди. Тўқайда ишлагани хилланган одамлардан маҳсус бригадалар тузилди ва бу бригадаларнинг ҳар бирiga биттадан гусеницили трактор берилди. Бу бригадаларга қарашгани ёшу қари, эркак-аёл бутун қишлоқ кўчиб чиқди. Тракторлар гуриллаб-вариллаб ёввойи жийда, чангаль, туронғу, тол, дўлана сингари бута ва майдадарахтларни таг-томири билан қўпориб ташлар, кесилган катта дараҳтларнинг тўнкасига занжир боғлаб тортар, арра, болта кўтарган одамлар буларни кесиб-қирқиб араваларга юклашар эди. Ҳаш-паш дегунча уччала маҳалланинг майдонида ўтин тоф-тоф бўлиб кетди.

Мана шу кунларнинг бирида Зокир отанинг бригадасига чимматсиз қизил паранжи ёпинган, хонатлас кўйлак ва амиркон кавуш-маҳси кийган, болалик бир жувон келиб Сидиқжонни сўради. Сидиқжон ҳали бузилмаган тўқайнинг нариги томонида арракашлик қиласи ҳади. Шу ерда аравага шох юклётган Абдусамадқори дарров йўргалаб чиқиб жувонни гапга солди. Канизак Сидиқжоннинг хотини билан қўйди-чиқди бўлганини эшитган эди, шунинг учун бу хабарни эшитса хурсаид бўлади деган хаёл билан

чопқиллаганича Сидиқжоннинг олдига борди. Сидиқжон бу хабарни әшитиб ҳайрон бўлди, кейин Зуннунхўжанинг уйидан ўғлини бағрига босиб чиқиб кетганини, хотини кўчада болани қўлидан тортиб олганида бола инраганини әслади; шу инграш қулоғига әшитилиб кетди-ю, тўсатдан кўнгли юмшади.

— Ҳўш, Канизакхон, әнди нима қиласми?

— Нима қиласар әдингиз,— деди Канизак кулимсираб,— ўз оёғи билан келганидан кейин... гаплашасиз-да! Эгилган бошни қилич кесмайди.

— Йўқ, мен бошқа тўғрида... Буларни қаёққа олиб борамиз?

— Ҳовлига олиб борасиз!

— Бошқа жой йўқми, Канизакхон? Дурустроқ жой бўлса деган әдим...

— Ҳа, бу уйга нима қипти? — деди Канизак ва бирдан аччиғи келди.— Ҳа, мунча!.. Хотинингиз осмондан тушилтими? Биз ҳам одам боласи, турибмиз. Одамлар бутун умрини ўтказган жойда у киши бир кеча ётсалар ҳеч нима қилмас! Оббо! Унақа олифта бўлса келмасин әди! Ярашгани келганми, уй кўргани келганми?

Канизак лабини буриб Сидиқжондан юзини ўгирида яна нимадир демоқчи бўлиб икки-уч кўз қирини ташлади-ю, айтмади.

— Йўқ Канизакхон, сиз тушунмаётисиз,— деди Сидиқжон шошиб,— гап унда эмас, унинг олифталиги ўзида... Ростини айтмайми? Менинг сиздан яширадиган сирим йўқ. Менинг туриш-турмушимни кўриб: «Ўл-а, аҳволинг шу өкан-ку», деб кетмасин дейман. Шу гапни юзимга айтишдан тоймайди. Мен буларни биламан.

Канизак унга ялт әтиб қаради.

— Ярашгани келган эмасми?

— Йўқ. Билмайман, нима учун келганини билмайман.

лекин, ҳар қалай, ярашгани келган эмас. Ё болани ташлаб кетгани, ё нафақа сўрагани келган.

Канизак Сидиқжоннинг юзидағи зўр ташвиш ифодасини кўриб унга раҳми, атлас кўйлак кийган олифта жувонга ғазаби келди.

— Ҳафа бўлманг, Сидиқжон ака! — деди.— Болани ташлаб кетса бир гап бўлар. Қундуз куни яслида бўлади, кечқурун холам қарайдилар, мен бор...

— Энди Анзират холанинг бир қилмагани менинг боламга қарап эди!

— Қандоқ қиласиз, ташлаб кетса қараймиз-да. Ташлаб кетмас...

— Менинг туриш-турмушимни кўрса жўрттага ташлаб кетади...

Канизак, худди шу ташвиш ўз бошига тушгандай, ти-пирчилаб қолди.

— Ўрмонжон акамнинг уйларига олиб борсакмикин-а? Пишиқ ғиштдан, томи унча-мунча тунука, деразаси бор... Мен бориб Тўпанисо опамга айтай, у ёқ-бу ёқдан нарса топиб уйини ясатайлик.

— Ўзингиз биласиз,— деди Сидиқжон унга маъюс на-вар ташлаб. Унинг бу қарashiда чексиз миннатдорчилик бор эди.

Канизак чопқиллаганича тўқайга кириб кўздан ғойиб бўлди. Сидиқжон бошқа яктак-лозим кийгани ғизиллаганича уйга қараб кетди.

У, йўлни қисқа қилиш учун тўқайдан ўтиб, ўтин ғарамларини оралаб, катта йўлга тушганида кимнингдир:

— Ҳа, нима қилиб юрибсан? — деган товушини ёшилди.

Сидиқжон орқасига қараб бир неча қадам нарида жадаллаб келаётган Ўрмонжонни кўрди-да, бутун мушкули осон бўлгандай, қувониб кетди.

— Арава бордими? — деди Ўрмонжон каттакон рўғ:

молчаси билан юзини, бўйнини артиб.— Нечта арава борди?

— Учта...

— Тентак бўлдингми, нега яктакчан юрибсан? Бор, тўнингни кий!

— Хотиним келган экан...

— А? Нимага келипти? — деди Ўрмонжон ўзини йўл бўйидаги каттакон саданинг соясига олиб,— қани, бери кел-чи. Ярашгани келиптими.

— Йўқ. Билмадим. Ҳали кўрганим йўқ.

Ўрмонжон рўмолнаси билан бўйнини аста-секин артиб, ўйланиб қолди-да, бирдан:

— Ярашасанми? — деди,— ярашаман деб келган бўлса-ю ярашгинг келса яраш. Лекин хотин бўладиган бўлса шу ерда бўлсин. Шуни бўйнига қўй. Туриш-турмушингни кўрсат, айт, лекин юрагини ёриб юбормагин, ҳозир бундоқ бўлса йилдан-йилга қанақа бўлишини ҳам кўзига кўрсат. Мана, канал битди, мана бу тўқайларни бузиб янги ер очаётимиз... Е ярашсанг кетишинг керак бўладими? Агар кетишинг керак бўлса... кўнглинг шунга мойил бўлса, тўгрисини айта бер.

— Ҳали ҳам шунақа дейсизми, Ўрмонжон ака,— деди Сидиқжон оғриниб,— қўйинг энди шунақа гапларни!

Ўрмонжон унинг ранжиганини кўриб изоҳ беришга шошилди:

— Йўқ, йўқ, мен бошқа нарса демоқчи әдим. Менинг гапимни нотўғри тушунма демоқчиман. Менинг гапидан «Агар бу ердан кетадиган бўлсанг ярашма» деган маъно чиқмасин. Эр-хотиннинг орасига тушишни ёмон кўраман. Эр-хотиннинг орасига тушган киши баъзан ўша тобда, аксари кейинчалик сўкиш эшитади. Бу тўғрида ўз ақлинг билан иш қил демоқчиман.

— Ярашгани келгани маълум әмас, Ўрмонжон ака.

— Нега келипти бўлмаса? Болангни кўрсатганими?
Ҳеч!

— Мен шундоқ гумон қиласанки, ё болани ташлаб кетгани келган ё нафақа сўрагани.

— Йў-йў-йўқ! Сен берадиган нафақага зор эмас. Болани ташлаб кетгани ҳам келган эмас! Она!.. Яна бу ёғини назарга ол: сенинг қаерда эканлигингни сўроқлаган, билган хотининг эмас, қайнатанг... Оти нима эди... Зуннунхўжа! Шундай эмасми?

— Ҳа шундай.

— Ҳа, баракалла! Ундан кейин, хотининг ўзича келганимикин? Йўқ! Бундан чиқдики, Зуннунхўжа сени сўроқлаб топган, ундан кейин қизини юборган. Бу аниқ. Ҳўши, нафақа ундириш, ё болани ташлаб кетиш учун юборганимикин? Йўқ! Мана шуларни ўйлаганда хотинингни нима учун келган деса бўлади? Ярашиш тўғрисида қўйинингга қўл солиб кўргани келган. Жуда яхши! Кўнгилдагидек! Битиша олсаларинг соз бўлар эди. Туриш-турмушингни кўрсат, яширма! Шу билан бирга қўйинини пуч ёнгоққа ҳам тўлдирма!

— Мен ҳам шундоқ деб ўйлаган эдим,— деди Сидиқжон хийла қизариб,— лекин Канизак ҳеч кўнмади: қўйинг, ўша уйга олиб бормайлик деб сизнинг уйингизни ясатгани кетди.

Ўрмонжон кулди.

— Сўқир кўзга сурма... Нима қиласизлар, нима қиласан алдаб? Айтдим-ку...

— Йўқ, алдаш важидан эмас, «ўл-а, аҳволинг шу эканку» деб кетмасин деб... Ким билади, хотин кишининг тилига хотин киши тушунади...

— Аҳволингга нима қилипти? Деса дея берсин. Гувалак қуяётганимизни кўрмасдан қўлимизнинг лойлигини кўриб куладиган бўлса кулаверсин. Ҳўп, бор, кечаси кўришамиа.

Ўрмонжон жадаллаганича кетди.

Сидиқжон югурганича Ўрмонжоннинг уйига бориб Канизакни огоҳлантириди, ундан уйга ўтиб бошқа яктаклозим кийди-да, тўқайга қараб кетди. Ўрмонжонга учрашмасдан бурун, сордан қочган жўжадай бошини қаерга тиқишини билмай қолган Сидиқжон энди даканг хўроздай мағрур қадам ташлаб борар эди; шундоқ бўлса ҳам узоқдан ўзига маълум қизил паранжини кўрганида юраги гунгуп урди-ю, қадами сусайди. У ҳозир хотинига қандай рўпара бўлишини, рўпара бўлганида нима дейишини, у нима дейишини тасаввур қилолмас эди. Узоқ кутиб зериккан ва толиқкан бир вазиятда турган Шарофат эри келаётганини кўриб дарров болани қўлига олди ва у яқин келганида яна ерга қўйди-да, ундан қочишини ҳам, қочмасликни ҳам билмагандай, тараддуздланиб, юзини паранжиси билан салгина тўсди. Сидиқжон ариқдан ҳатлаб ўтар өкан:

— Келинглар, яхшимисизлар? — деганини ўзи ҳам билмай қолди ва хотинидан бир неча қадам берида чўнқайиб болага қучорини очди.

— Келдик дегин, ўзингиздан сўрасак дегин, сиз йўқламасангиз ҳам мен йўқлаб келдим дегин,— деди Шарофат этагига маҳкам тармашиб олган болани отасига йўллаб.— Ана даданг, бор энди! Дада-дада деб қулоқмиямни еган эдинг-ку, жувонмарг, энди нега ўшшайиб турибсан? Танимаётибсанми? Даданг озиб қолиптиларми?

Сидиқжон худди туш кўраётгандай, унинг гапини барада эшитиб турган бўлса ҳам, лекин нима деяётганини англамас эди. У ўғлининг ётсираётганини кўриб икки қадам олға босди-ю, бундан ортиқ яқин борса худди бир нарса портлаб кетадигандай, энгашиб боланинг кўкрагига чиқиб кетган қийиқчасидан ушлаб тортди ва кўтариб олди. Бола ингради-ю йиғламади, ҳайрон бўлиб отасининг

оғзига, бурнига, иягига, яна оғзига қаради-да, ширин-шўртак бармоғини унинг оғзига тиқди.

— Қани, юринглар... — деди Сидиқжон,— қалай... юришиптими?

Сидиқжон бирор гап гапирса әшитмай қолишдан хавотир тортгандай бир қадам ҳам кейинда қолмасликка тиришиб бораётган Шарофат шуни кутиб турган экан шекилли, дарров:

— Кўпдан-кўп сўраб қўйишиди,— деди.

Шу билан гап тамом бўлди. Бола Сидиқжоннинг елкасига бошини қўйиб ухлаб қолди. Шундан кейин жуда ўнгайсиз жимлик чўқди. Сидиқжон гапирмаётганига сабаб гўё бутун эс-ҳуши болада, йўлда әканини кўрсатиш учун дам-бадам оёқ остига, йўл бўйидаги буталарга қараб, болани авайлаган бўлиб баланд шохлар остидан ҳам энгашиб, әҳтиёт бўлиш керак бўлмаган жойлардан ҳам минг әҳтиёт билан ўтар әди. Катта йўлга чиқиб олингандан кейин Сидиқжон бир нима дейишга мажбур бўлиб:

— Қалай, қишлоқлар қалай? — деди.

— Собиржонқори ўлди,— деди Шарофат ва бу гапни шундай ғамгин товуш билан айтдики, Сидиқжон беихтиёр тўхтади ва унга қайрилиб қаради. Кўз-кўзга тушди. Шарофат бошини бир томонга қийшайтириб маъюс бир қиёфада илжайиб турар әди.

— Ким? — деди Сидиқжон нима дейишини билмай.

— Собиржонқори... Эсингииздан чиқдими? Дарров эсингииздан чиқипти-да.

Унинг афти «Собиржонқорининг чорвоғида ўтказған дамларимиз қандай дамлар әди, наҳотки ўша кунлар, ўша чорвоғ, ўша жингуллар эсингииздан чиққан, бўлса» деб турар әди. Сидиқжон буни фаҳмлаб жилмайди-да, унинг шамасига шама билан жавоб берди:

— Эсимдан чиққани йўқ... Раҳматлик яхши одам әди,— деди.

Шарофат дамни совутмай яна шама қилди:

— Дунё шу экан-да, шу экан дунё! — деди.

Сидиқжон бу шамага жавоб қилмади. Эзтан, қандай жавоб қилишни билмас ҳам әди.

Йўлда давом этишди. Яна жимлик чўкди, лекин бу жимлик боягидай ўнғайсиз, толиқтирадиган жимлик әмас әди: Шарофат Сидиқжондан шамасига жавоб ёки ҳар иккаласининг ҳам тилини боғлаб турган андишага барҳам берадиган бирон нарса кутар; Сидиқжон әса хотини ярашгани келганлигига амин бўлиб, унга ўзининг туриштurmушини кўрсатишдан бурун колхознинг келажагини кўрсатиш учун нималар дейишни ва гапни нимадан бошлашни ўйлар әди.

Сидиқжон ниҳоят гап бошламоқчи бўлиб:

— Қалай,— деди ва сап-сариқ қамишзорнинг у томонида оқаришиб турган дарёни кўрсатди,— баҳаво жойлар өканми?

Шарофат бу гапни Сидиқжон бирон бошқа маънода айтди деган хаёлда ўйланиб тўхтаб қолди ва бунинг тагида бошқа ҳеч гап йўқлигини билганидан кейин бир оз бўшашиб:

— Ҳа, жуда ҳам... қаранг, дарё... бирам чиройли, оппоқ,— деди ва бирдан жонланиб кетди,— мен ёшлигимда дарёда сут оқади дейишса ишонар әдим. Кап-катта қизлигимда ҳам ишонар әдим. Ўша йиллари ҳам ишонар әдим...

Шарофат «Ўша йиллари» деб Собиржонқорининг чорвогига девор ошиб тушиб юрган чоғларини айтмоқчи ва шу билан Сидиқжонга яна ўша дамларни эслатмоқчи бўлди. Бироқ Сидиқжон ўзи билан ўзи овора бўлиб бунга эътибор қилмади. У ўн томондаги қалин тўқайнинг очиқ ерида қорайиб турган тупроқ тепани кўрсатиб:

— Ҳу... кўраяпсизми? — деди —Канал! Катта канал...

Ўтган йил чиқардик. Ҳозир тўқайни бузиб ёр очаётимиз, қўриқ ҳам очамиз...

Шарофат Сидиқжон кўрсатган томонга бир қаради-ю тупроқ тепага эътибор қилмасдाह, яна ўзининг гапини гапирди:

— Кап-қатта қиз шунга ишонар әканман-а! Собиржонқорининг катта хотини бир йили бизни қумга олиб борган эди. Дарёни шунда кўрган әдим. Туз конига борганимизда ҳам кўрган әдим. Ўшандада ҳам сут оқади дейишича ишонибман. Гўл әканманми? Ҳеч-да! Гўл әмас әдим. Ўтоқларимнинг ичидан мендан шайтон қиз йўқ әди...

Яна йўлда давом этишиди. Шарофат ҳамон дарё, сут, ўзининг ўша вақтларида, «ўшандада» гўл әмаслиги тўғрисида гапириб борар, афтидан, ўша маъсум чоқларини Сидиқжонга эслатмоқчи ва унинг қўлига тушувига гўллик әмас, муҳаббат сабаб бўлганини айтмоқчи әди.

«Йўқ, канал, тўқай тўғрисида мен гапни мондалаб гапиролмадим,— деди Сидиқжон ичидаги,— одам ёқасини ушлайдиган шундай катта иш менинг оғзимдан кичкинагина бўлиб чиқди. Бу қандоқ бўлди, тайёр турган шундай катта нарсани уddaаб айттолмаётиману, ҳали йўқ нарсаларни бунинг кўзига қандоқ кўрсатаман?»

Сидиқжон йўлни қисқа қилиш учун қалин тўқайни оралаб ўтган сўқмоққа бурилганда, Шарофат тўхтади.

— Қаёққа бораётимиз?

Сидиқжон болани иккинчи елкасига олиб унга ўғирилди ва бораётган ерини нима деб аташини билмасдан:

— Дам олинглар,— деди.

— Қаерда? Ким бор?

— Бир кампир... онамиз борлар.

— Яна ким бор?

— Яна бир хотин киши... У ҳозир ишда.

— Канизакхонми?— деди Шарофат кулимсираб. Унинг

юзида «борсам балбага қолмайманми?» деган маъно ётар әди.

Сидиқжон негадир, худди бир сири фош бўлгандай, гангиг қолди.

— Сизга ким айтди? У хотин.. мен.. ҳеч... ким айтди сизга?

Шарофатнинг юраги шув этиб кетди: «Э, ўзини оқлаётитти-ку. Бундан чиқдики, мендан буткул кўнгил узмаган экан-да. Кўнгил узган бўлса тўғрисини айтиб, шу жувонни оламан ёки сенинг нима ишинг бор демасмиди?» Шу гап кўнглидан ўтди-ю, тўсатдан қовоғини солиб:

— Нима қиласиз бизни у ерга олиб бориб? — деди ва болага қўл узатди.

Сидиқжон болани бермади.

— Худо урсин агар,—деди Сидиқжон қўзларини катта очиб,— ким айтди сизга?

— Битта киши айтди... Нега қасам ичасиа, ҳар кимнинг майли ўзида,— деди Шарофат ва лабини буриб четга қаради.— Биз бормаймиз. Бир оғиз гапимиз бор, шуни сизга айтгани келган эдик. Исомиддин акам бизни бу ерга ташлаб Ҳўжақишлоққа ўтиб кетдилар, қайтишда олиб кетадилар. Биз ўша ерга бориб туришимиз керак.

Унинг мўлжалига кўра Сидиқжон яна қасам ичиши, юр деб қисташи, ҳол-жонига қўймаслиги керак әди. Бирорқ Сидиқжон унинг гапига чиппа-чин ишонди, ярашиш учун келганлиги ҳақидаги ўзининг тахмини нотўғри чиққанини кўриб бўшгина:

— Ўша ерга бориб гаплашсак ҳам бўлар әди-ку,— деди.

Унинг бундай дейиши Шарофатга жуда қаттиқ тегди, ҳатто ғашини келтирди, шундоқ бўлса ҳам Сидиқжоннинг кўкрагига, сўнгра юзига қараб илжайди-да, қийшанглаб:

— Йўқ, шу ерда, шу ерда гаплаша қолайлик,— деди.

— Бу ер йўл усти-ку.

Шарофат ерга қараб кавушининг учи билан ер чизар әкан, эшитилар-эшитилмас:

— Ичкарироққа кириб бўлмайдими? — деди.

Сидиқжон, болани бағрига босганича, бир-бирига киришиб кетган буталар, шохлар орасидан оёғи ва елкаси билан йўл очиб тўқайнинг ичкарисига бошлади. Шарофат дам-бадам «вой ўлай» деб унинг жетидан юрди. Сидиқжон каттакон ёввойи жийда тагида тўхтаб Шарофатни кутди. Шарофат етиб келгач, унинг бошидан паранжасини бир қўли билан олди, тиззасидан келадиган қуруқ ўт-ўлан устига ташлади-да, болани ётқизмоқчи бўлди. Бироқ Шарофат дарров болани унинг қўлидан олди, бағрига босиб паранжининг устига ўтириди-да, жилмайиб, Сидиқжонга ўзидан икки-уч қадам наридан жой кўрсатди.

— Номаҳрамсиз... Уч талоқ деб ўзимга айтмаган бўлсангиз ҳам номаҳрамсиз...

— Биламан,— деди Сидиқжон ундан икки-уч қадам нарига ўтириб,— яхши биламан. Эслатишнинг ҳожати йўқ...

Шарофат ундан бошқа гап кутган әди, дами ичига тушиб кетди-да, бир оздан кейин:

— Менга бегона бўлсангиз ўғлингизга бегона әмасиз-ку,— деди.

— Буни ҳам биламан,— деди Сидиқжон.

— Шуми билганингиз?

— Нима қылсам бўлар әди?

— Нима қылсам бўлар әди әмиш! Ҳамма ишни мендан сўраб қиласмидингиз? Сўрамаган әдингиз-ку. Сўрашлик у ёқда турсин бир оғиз гапирмаган әдингиз-ку. Кўнглингизда шунчалик гапингиз бор әкан, ота-онам шунчалик жонингизга теккан әкан бироғизгина «ҳой, хотин, мен сиқилиб кетдим, уй ажратиб чиқиб кетайлик» десангиз бўлмасмиди? Утиб кетган гап, энди гапириб ўтиришнинг ҳожати йўғу, сирасини айтаман. Кўнглингизда қўйиш бор әкан ўзим билан уришсангиз бўлмасмиди? Е мен одам

әмасмидим? Ўзим билан уришинг, уч талоқ деб ўзимга айтинг эди. Мен у уч талоқ ўринга ўтмайди деяётганим йўқ, ўтса-ўтмаса майли... Сирасини айтаман.

— Ўзингиз йўлинг очиқ, кета бер, мен ота-онамни дейман деган әдингиз-ку.

Шарофат кўзларини катта очиб ёқасини ушлади.

— Е қудратингдан! Қачон? Қачон мен кета беринг дедим? Бунақа ёлғон гапирадиган одатингиз ўйқ эди-ку! Ўй ажратамиз дедингизу мен йўқ дедимми?

— Сизга у вақтда бунақа гапни гапириб бўлармиди?

— Ҳа, нега гапириб бўлмас әкан? Сиз эр әдингиз, мен хотин, хотин әдим, холос.

Сидиқжон кулди.

— Билмабмиз-да бўлмаса. Гапириб бўлса ҳали ҳам гапирсак бўлади... Колхозимиз сал оёққа босгандан кейин ўзим бориб сизни олиб келмоқчи әдим.

Шарофат ёлғондан қийқириб кулди.

— Қаёққа? Вой-ей, мунча яхши! Шунча ер-сув, шундай ҳовли-жойни ташлаб келар эминшманми? Ўша қилингизга ҳеч ҳам ярашмайману, сирасини айтаман-да. Отам қариб қолдилар, онам дардчил, буларнинг неча кунлиги қолганини ким билади? Улардан ер-сув, уй-жой кимга қолади? Мен сизга ўҳшаган эмасман: ер-сув ўзимга керак бўлмаса ташлаб кета бермайман, боламни ўйлайман. Ер-сув, уй-жой менга керак бўлмаса боламга керак. Шу бечора ҳам умид билан дунёга келган, ҳадемай катта бўлади, бола-чақа қиласди... Ўзингиз отангиздан ҳеч нарса қолмай, қаттиқчилик кўриб ўсансиз, қаттиқчилик нима әканлигини яхши биласиз. Отангиздан бир парча ер қолганда ўша қаттиқчиликни кўрмас әдингиз. Нажот ўғлимга ўшандоқ қаттиқчиликни раво кўрсам! Сиз раво кўрасиз, сизга ўҳшаган меҳри қаттиқ оталар раво кўярар! Мен ўғлимни ўйлайман, болагинамнинг пешонасини ўйлайман.

Ерга қараб чўп синдириб, унинг сўзларига жимгина қулоқ солиб ўтирган Сидиқжон ер остидан унга кўз ташлади-ю, жилмайиб:

— Бу тўғрида мен сиздан кўпроқ ўйлаб юрган бўлсам нима дейсиз?— деди ва шу билан «Мен ҳозир нима қилиб юрган бўлсам ҳаммасини ўғлим учун қилиб юрибман» демоқчи эди. Бироқ Шарофат буни ўзича тушунди: «Аччиқ устида шундоқ бўлиб кетди-ю, ўшандан бери нима қилишимни билмай юрибман», демоқчи деб ўйлади. Ў, сипогарчилликни қўлдан бериб қўймаслик учун бирпас жим қолди-да, кейин қошини бир оз чимириб, сўз бошлади:

— Чол-кампирнииг шу боладан бошқа миросхўри йўқ, ҳозирги замонда ерни сотиб бўлмаса... Ё сотиб бўладими? Удда қилсангиз сотинг; агар шунча йил туз ичган қишлоғингизнинг суви энди сизга ҳаром бўлса сотингу кўнглингиз тортган жойдан ўғлингизга атаб бошқа ер олиб қўйинг. Ихтиёр ўзингизда... Дадамни ўзингиз биласиз! оғир ишга ярамайдилар. Замонни кўриб турибсиз: бирор учун бирор тўртдан бирга әмас, шерикликка ҳам бир кетмон уромайди. Колхоз ҳозирданоқ шоликорликка кўз тиккан. Дадамни икки марта жамоа чақиртиди. Дадам «Куёвимнинг ўзи жавоб қиласди, менинг ҳаддим сигмайди», деб жавоб бериптилар. Жамоа сизнинг бу ёқларда юрганингизни ҳали билмайди... Янаги йилга ер экувсиз қолса колхоз ҳеч кимдан сўраб ҳам ўтирасдан қўш солиб юборади. Бечора болагинам ерсиз қолади...

Сидиқжон ҳамон ерга қараб чўп синдирап экан:

— Бечора болагина-ку ерсиз қолмайди, лекин... бечора отагинангизни қулоқ қилишаётган бўлмасин тагин? Қулоқ қилишмоқчими?— деди.

— Вой, нега қулоқ қилишар экан? Ҳеч-да...

— Ҳўш, нима қиламис бўлмаса?— деди Сидиқжон бир оз жим қолганидан кейин.

— Ўзингиз биласиз... Менга бари бир... Ишқилиб шу бола...

— Боришим керакми, ахир?

Шарофат ранги бўзариб, Сидиқжоннинг юзига бақ-райганича қараб қолди-ю, анчадан кейин:

— Билмасам...— деди.

— Сиз билмасангиз, мен билмасам.

— Борсангиз... майли, бошқа хотин оласизми, бошқа иш қиласизми... Ерни сотиб бўлса жон кошки эди!

Сидиқжон яна кулимсиради.

— Борсам ер учун бораманми?

— Болангиз учун борасиз.

— Мен болам учун борадиган бўлсам сиз болангиз учун шу ерга келиб қўя қолсангиз қалай бўлади? Лекин мен сизнинг қўйнингизни пуч ёнғоққа тўлғиэмайман..: Борини кўрасиз... лекин менинг ҳозирги туриш-турмушими кўриб юрагингиз ёримасин... Биз гувалак қуяётганимизда келдингиз... Қўлимиз лой... Бу гувалакдан иморат бино бўлгунча мана бунаقا атлас қўйлагу амиркон маҳси-кавуш кия олмайсиз. Баланд охурдан ем еб ўрганган киши аввал боши қўрқиб кетади...

— Вой, ғалатисиз-а, мен сиз билан ярашаман деяётибманми? Безорман...

— Йўқ, мен ҳам сирасини айтәтибман-да. Сиз ҳам «сирасини» кўп айтдингиз-ку. Кўраман десангиз туриш-турмушимни кўрсатаман. Лекин ҳозир шундоқ бўлса йилдан-йилга қандоқ бўлишини ҳам айтиб бераман. Мана, янги ер очаётимиз...

Шарофат билагини қўзига қўйиб беҳосдан йиғлаб юборди.

— Шўргинам қурсин... Ўғлимни беватан қиласар экансиз-да. Ўзингизга ўхшаган беватан бўлар экан-да... Ота ҳам шундоқ бағритош бўладими?.. Тайёр ерни, тайёр уй-жойни ташлаб... Одамлар фарзандини деб йўқни бор

қилади-ю сиз бўлсангиз борни ҳам йўқ қиласман дейсиз!

— Йўқ, бундоқ дейлмайсиз. Мен ҳозир нима қилаёт-
ған бўлсан ҳаммасини ўғлим учун қилаётибман; ўғлим
менга ўхшамасин деб қилаётибман. Сиз болангизни кўр-
гани, менинг онамга ўхшаб жийда, беҳи, арава мих кўта-
риб келманг деб қилаётибман.

Шарофат Сидиқжоннинг пичингига тушунмади шекилли:

— Нима қилибсиз, нима қилдингиз? — деди.

— Энди қилаётибман. Ўғлимга ер-сув керакми? Ер-сув
тайёр. Ўғлимга уй-жой керакми?..

Шарофат унинг сўзини бўлди:

— Мунча яхши, ҳукуматнинг хазинасини ҳам инъом
қила қолинг!.. Ҳукуматнинг ерига мунча бино қўйишлик!
Қачондан бери ҳукуматга суюниб қолдингиз?

— Ақлим киргандан бери...

— Беришнинг олиши ҳам бўлади...

— Нимани, ерними? Ери тортиб олади демоқчими-
сиз? — деди Сидиқжон заҳарханда қилиб,— нима қила-
ди тортиб олиб, темир сандиққа солиб қўядими? Биздан
тортиб олиб кимга беради? Мана шу жойлар бурун Аб-
дувақос деган бир әшонга қарашли экан, ҳукумат биз-
дан тортиб олиб ўшонга берадими? Аммо Охунбобоев-
нинг ўрнига Собиржонқорига ўхшаган одам ўтириб қолса
шундоқ қиласми? Сизнинг дадангиз ўтириб қолса ҳам
шундоқ қиласми?

Шарофат яна кўзига ёш олди.

— Сизга қолса дадамни ёт унсур ҳам дейсиз. Билма-
дим дадам бечора сизга нима ёмонлик қилган эканлар.
Сизни деб шунча куяди, шунча куяди... Ўғлим йўқ әди,
худо ўғил берди дер әди. Аччиқ устида сизга ўша гап-
ларни айтиб кейин нима аҳволга тушганларини билмай-
сиз. Йиглаб, ўзларини уриб... әслари кетди. Сиз нуқул

ёмонлайсиз... Ҳеч инсофингиз йўқ. Бағри тош! Сизнинг ўрнингизда бўлак одам бўлганда, минг ёмон кўрса ҳам, аччиғидан тушганидан кейин бир бориб ўша бечорани юпатиб, кўз ёшини тиндириб келар эди. Нуқул «қанотим синди» деб йиглайдилар... Ӯшандан бери бир кун сор бўлсалар уч кун касал... Ҳар куни аямни уришадилар, икки марта ўласи қилиб урдилар. Мен билан келмоқчи әдилар, дармонлари етмади, йиглаб қолдилар...

— Менинг бу ерда әканлигимни ким айтди? — деди Сидиқжон бирпас жимликдан сўнг, — ўзингиз сўроқлаб билдингизми? Кимдан сўрадингиз?

Шарофат Сидиқжон рашқ қилаётитти деган хаёлда ўзини жуда қўрққанга солди.

— Мен ҳеч қаерга борганим йўқ. Сиз кетганингиздан бери остонаядан ҳатлаган бўлсан оёғим синсин. Сизга барibir-ку, сирасини айтаман-да... Дадам билиб келдилар.

Унинг ҳамма гапи ва муомаласидан Ўрмонжоннинг тахмини тўғри чиққанлиги очиқ-оидин кўриниб турса ҳам Сидиқжон яна:

— Дадангиз бориб олиб келгин деб юбордиларми? — деди ва бу гапни жуда қўпол тарзда айтганини сезиб се-кин Шарофатга қаради. Шарофат, паранжининг попуги-ни эшиб, ерга қараганича ўтирар, афтидан, бу саволга жавоб бермоқчи эмас эди.— Дадангиз шунчалик деган бўлсалар худо хайр берсин,— деди Сидиқжон қўпол ра-вишда айтган гапини силлиқлаш учун,— у киши менга қандай бўлсалар, мен ҳам у кишига шундай... Онангиздан ҳам хафа эмасман. Лекин орага бир совуқчилик тушган-дан кейин менинг ўша уйга қайтиб боришим тўғри кел-майди. Гап совуқчиликда ҳам эмас.

— Нимада бўлмаса? — деди Шарофат бирдан боши-ни кўтариб.

— Нимада? Ҳар нарса қилсангиз ҳам ўзингизни гўл-ликка солманг, хафа бўламан. Ҳалигина мен қиэлигимда

гўл өмас әдим, ўртоқларим ичидан мендан шайтон қиз йўқ әди демадингизми? Энди гўл бўлиб қолдингизми? Нимага бўлар әди, мен ўзимга ўхшаган одамлар ичига тушиб қолдим. Мен шуларни кўриб ўзимни танидим. Кўр ҳассасини бир марта йўқотади. Мен бу ердан кетмайман. Шуни бориб дадангизга айтинг. Агар ота-онангиз мен билан шу ерда умр қилишингизга рози бўлишса, ўзингиз ҳам шуни ҳоҳласангиз шариат-тариқат деб ўтирамаймиз... Шариатнинг йўли кўп әкан, биттаси берк бўлса тўрттаси очиқ...

Шарофатнинг юпқа лаблари кўкариб пирпиради, бурни оқариб, катаклари керилди. Сидиқжоннинг назаридаги, у ҳозир ҳеч оғизга олиб бўлмайдиган бир гап айтиши, бақириши, сўнгра болани олиб жўнаб кетиши керак эди. Бироқ Шарофат ундан қилмади. У ўзини ерга отиб урди-ю, худди илон чаққандай, тўлғониб йиги бошлади.

— Мен кўчада қолганимдан бу ерга келибманми?.. Шу болам тирик етим бўлмасин, шу боламнинг пешонасига ер битсин деб келганман... Мен эрсираб келибманми? Эрсираган бўлсан бўйни йўғон сон мингта. Болам тирик етим бўлмасин деб келдим... Болам дарбадар бўлмасин деб келдим.

— Ҳар қанча дарбадарлик бўлса мен кўрганман, ўғлимга қолгани йўқ,— деди Сидиқжон.

Шарофат бирдан бошини кўтариб Сидиқжонга қаради ва туриб ўтириди. Унинг ранги ўчиб, кўзлари қизарган, лекин қуруқ эди.

— Бормайсизми? — деди худди ҳозир юладиган бир важкоҳатда,— бормайсизми?!!

— Шовқин солманг, бирор әшиитса нима дейди! Айтдим-ку...

— Шу гапингиз гапми? Шу гапингиздан қайтмайсизми?

— Уй қиладиган бўлсангиз менинг кўнглимга ҳам қаранг-да.

— Қайтмайсизми? Уч марта айтаман: Қайтмайсизми? Қайтмайсизми?... А? Қайтмайсизми! Хўп, бўпти! Менга нима, бола бир меникими! Мен қўлимдан келганини қилдим, энди уволи сизнинг бўйнингизга... Ерсиз қоладими, етим бўладими... Етим бўлганда ҳам шундай етим бўлсин, шундай ҳам етимча қиласин! Бошига бир мушт уриб, бир бурда қаттиқ нон берадиган бир бўйни йўғонга тегмасам мен ҳам юрган эканман!

Шарофат шу гапни айтди-ю иргиб ўрнидан турди ва болани худди ердан юлиб олгандай, силтаб кўтарди. Бола қўрқиб уйғонди ва чинқириб йиғлади. Сидиқжоннинг унга айтадиган бошқа гапи йўқ эди, бироқ шу кайфиятда кетишини хоҳламади; назарида, агар шу кайфиятда кетса, шу ердан борибоқ жўрттага бир бўйни йўғонга тегадиган, бу бўйни йўғон дарров боланинг бошига бир мушт уриб, қўлига бир бурда қаттиқ нон тутқазадигандай бўлди; шунинг учун, юпатиш баҳонаси билан болани унинг қўлидан олар экан, (Шарофат болани дарров берди) мумкин қадар мулоҳимлик билан:

— Бугун қолинг, кеч кирди, эртага ўзим арава топиб жўнатаман. Исомиддин амакингиз аллақачон кетиб қолгандир,— деди.

— Вой ўлай! — деди Шарофат кунга қараб,— албатта кетиб қолдилар-да, менга қараб ўтирармидилар! Вой, ўлганим яхши... Вой шўргинам...

Шарофат отаси ўргатган, ўзи билган ҳамма гап, ҳамма йўлларни ишлатиб натижага чиқара олмаганидан кейин бу кеча шу ерда қолиб Сидиқжонни бу ерга боғлаган, унинг димогини шиширган нарсани яхшилаб билмоқчи ва шунга қараб тош қўймоқчи бўлди. У, Анзират холанинг уйига етгунча, аравадан қолгани учун ўзини дам-бадам товуш чиқариб қарғаб борган бўлса ҳам, кўп ўйлади ва турли-туман тахминлар қилди. Унинг назарида бу тахминлардан ҳақиқатга яқинроғи Сидиқжоннинг «шу жу-

вон ўлгур» Канизакка айланишиб қолганлиги әди. «Бояғи семиз одам айтган гаплар рост экан,— деди ичида,— лекин буни маҳлиё қилган унинг қора кўзигина әмасдир. Яна нимаси экан? Кўмиб қўйған тилласи йўқдир, кўмиб қўйған тилласи бўлганда бўйдоқ йигитга тегар әди. Бўлса уй-жой, илгариги әридан қолган рўзғори бордир. Бу безотнинг димоғини шиширган шу нарса! Бу безот-ку унинг уй-жойига учитти, у манжалақи бунинг нимасига учди экан? У ҳам бунинг қуруқ ҳуснигагина учмагандир. Нимасига учди әкан? Бу безот унга нима деб мақтанди әкан? Аввали шуки, ҳеч кимим йўқ, ёлғиз бошим дегандир; шум укаси, илоннинг ёғини еган мўлтони онаси борлигини яширгандир...»

Шарофат Анзират холанинг остонасидан ичкарига қадам босганда заҳарга тўлган чаёндай ўз заҳаридан ўзи караҳт әди; бироқ ҳовли ва уйларининг аҳволини, ҳовлида ошқовоқ пўчоқ судраб ўйнаб юрган бола ва кўришгани қучоқ ёзиб келаётган кампирнинг уст-бошини кўриб заҳри бир оз тарқалди; Анзират хола Сидиқжонга: «Вой, садқай одам кетинг, наҳот киши шундай хотинни, шундай болани қўйиб бу ёқларда юрса!» деганидан кейин ҳатто чеҳраси очилди. Анзират хола уни нариги уйга олиб кирди. Шарофат, мезбонни назари илмаган меҳмондай ҳеч кимнинг таклифини кутмасдан, тўғри тўрга ўтиб, якандознинг ўртасига ўтироди-да, рўмолини қайта боғлар экан, уйнинг у ёқ-бу ёғига қаради. Сидиқжон бўсағадан бир қадам ичкарида чўнқайди-да, болани ерга қўйиб онасиға йўллади ва болага қараб у-бу деб турган бўлса ҳам, кўзи ва бутун диққати Шарофатда әди. У Шарофатнинг қўйнини пуч ёнгоқقا тўлғазмаслиги, туриш-турмушини кўрсатиши керак әкани тўғрисида ўйлаганида бу туриш-турмуши туфайли оз бўлса-да хижолат тортишни хаёлига ҳам келтирмаган әди. Бироқ энди, Шарофат уйнинг у ёқ-бу ёғига қараб ўтирганда хижолатлик сеза бошлади.

Унинг назарида, ҳовли илгариғидан ҳам хароброқ, уй ва ундаги ҳар бир нарса кўзига абадий қашшоқлик нишонаси бўлиб кўринар эди. Анзират хола дастурхон олиб кирди. Сидиқжон чойни кутмай ишга кетди.

Шарофат кечгача Анзират холани гапга солиб ҳамма нарсани батафсил билиб олди, лекин бу гаплардан Сидиқжонни бу ерга нима учун бунчалик боғланганига жавоб тополмади. У ўйлаб-ўйлаб Канизакка ёпишди: «Бу имонсиз кампир ёлгон айттаётгандир. Бунинг ҳам ҳеч кими йўқ әкан, икковининг орқасидан кун кўриб юрган бўлса, буларнинг сирини менга албатта айтмайди-да. Мен содда шунинг гапига ишониб ўтирибман. Худо ургани йўқки, бир ҳовлида туриб у кўзини сузмасаю, бу ипини узмаса! Бу жувон ўлгур кўзини сузган! Бу безот хуштор бўлиб қолган! Наҳот шунчалик хуштор бўлсаки, кўзига мол-дунё ҳам кўринмаса-я! Шунаقا хушторлик ҳам бўлармикин? Бунаقا хушторлик-ку бўлмайди, бу манжалаки бир бало қилган, ўзига иситиб олган бўлса ажаб әмас. Рост, бу гапни худо кўнглимга солди, ўзига иситиб олган. Эссиизгина, буни билганимда ўша ердан қайтарма қилдирив келар эканман... Э, энди билдим: онаси ўлгур ҳам бир илм-амал қилган, уни мендан совутган; совутмаган бўлса шундай ювош одам бирданига бунаقا бўлиб қолмас эди. Онаси ўлгур ўша келишида беҳи олиб келган эди, шу беҳида бир гап бор әкан. Бу гапни ҳам худо кўнглимга солди... Шу ерга келадиган бўлсанг ярашаман дегани ҳам бир ҳийла: Канизакни олар экан деб ўйламасин, ўча-кишиб болани ташлаб кетмасин деб айтди. Бу — иккови бамаслаҳат қилган иш. Бамаслаҳат бўлмаса мени бу ерга олиб келмас эди. Биладики, мен бунаقا юзта әрнинг баҳридан ўтаман, лекин бу ерга келмайман...»

Шарофат мана шундай фикр-хాёллар билан бўлиб, кечқурун Канизак келганида яна заҳарга тўлиб ўтирган эди; бироқ уни чўчитмаслик, ғафлатга солиб туриб бир-

дан қўлга тушириш учун авзойини сира билдирамасликка ҳаракат қилди: у билан ўрнидан туриб, қучоқлашиб, ҳатто «опангиз ўргилсан» деб кўришди. Канизак, унинг бундай қарши олишини кутмаган бўлса ҳам, ҳайрон бўлмади, у билан хандон-хушдон гаплашди, боласини сўйди. Шарофат Капсанчилар қишлоғининг бод-ҳавоси, «бирам чиройлик» тўйайлари, дарёси тўғрисида гапириб туриб тўсатдан:

— Мен ҳам шу ерлик бўлмоқчиман,— деди-ю Канизак-нинг кўзига қаради.

Шу пайт Сидиқжон келиб айвондаги ўчоқ бошига — Анзират холанинг олдига ўтиб кетди. Канизак ўша томонга қараб паришон ҳолда:

— Жуда яхши бўлади, аяча, яхши бўлади... Бу ерлар ҳам обод бўлиб кетади,— деди-ю ўрнидан туриб, югурагича Сидиқжоннинг олдига борди ва пичирлаб, звенонинг бир арава пахтаси пахта пунктидан қайтганлигини айтди. Сидиқжон бир нима деб дўнгиллади. Анзират хола кулди.

Шарофатга шунинг ўзи кифоя қилган эди, бунинг устига Канизак «ўлсин» деди. Бу гап Шарофатнинг қулоғига өркалаб, йигламсираб айтилгандай бўлиб кирди. Ғазабдан вужуди қақшаб ақли қочган Шарофат «наинки Канизак Сидиқжонга хотининг қоламан деяётитпи деб ҳозирнинг ўзидаёқ арз қила қолса» деган нарсани ўйламади. Канизак қайтиб келганда у, ўлим хавфи остида қолган мушукдай, кўзлари чақнаб тикка унинг юзига чанг соладиган бир важоҳатда ўтирас эди. У чироқقا ёнбош ўтиргани учун Канизак буни пайқамади.

— Ким ўлсин? — деди Шарофат энтикиб.

— Вой, аяча, сизга нима бўлди?.. — деди Канизак ва унинг афтига қарашга улгурмади: Шарофат олдида турган чойнак билан унинг башарасига туширди. Канизак қичқирди-ю ағдарилиб тушди, лекин дарров ўрнидан туриб ўзини четга олди. У ўнг кўзини юзи аралаш ушлаб, нима бўлганини ва яна нима бўлишини билмай, гаранг бўлиб қолди.

Шарофат ҳайҳайлаб югуриб қелган Аңзират холанинг бошига шокоса билан урди; Сидиқжонга пиёла, кавуш, обдаста отди; яна Канизакка ҳамла қилди. Канизак нариги уйга кириб кетди. Нариги уйда Канизак, ўчоқ бозида Аңзират хола войвойлар, бола чинқириб йиғлар әди. Ҳаял ўтмай Канизак оқ тугун кўтариб, юз-кўзини ушлаганича йиғлаб, кўчага чиқиб кетди. Шарофат ҳамон шовқин солар, Сидиқжонга отгани нарса ивлаб у ёқ-бу ёққа югурап, топганини отар, лекин әнди газабидан әмас, отилаётган нарсаларга чап бермай тахт турган Сидиқжоннинг олов сочаётган кўзларини кўриб қўрққанидан отар әди. Сидиқжон номусга ўлиб, газабидан кўзига қон тўлиб, нима қилишини билмай хийла туриб қолди-ю, охирги ўзини тутолмай, «Ҳе отангни...» деб Шарофатга томон интилган әди, кимдир орқасидан тутиб қолди. Сидиқжон қайрилиб қараб Зиёдахонни кўрди.

— Бу нимаси, урмоқчимисиз? Хотин кишини-я!— деди Зиёдахон.

Сидиқжон бошини қуи солиб:

— Келинг, Зиёдахон опа,— деб четланди.

Шарофат бидирлаб кетди:

— Мен у ёқда итвачча боқиб ўтирибману, бу киши бу ерда мегажинларнинг этагини ўпиб юрадилар! Аввал битта хотинни әплаб ундан кейин бошқасига қўл чўэ! Озодлик душмани! Ёт унсур! Руҳоний! Мени хотин қилмайдиган бўлсанг жавобимни бер!

— Жавобингни берганим йўқми?— деди Сидиқжон илжайишга ҳаракат қилиб.

— Берганимассан!

— Ҳа, хўп, бошқатдан: роса, роса уч талоқ қўйдим! Қутулдимми?

— Нега қутулар экансан! Дадамнинг ҳақларини бериб ундан кейин қутуласан?

— Дадангизнинг менда яна ҳақлари қолган эканми?

— Эшигимиэга увада тўну чилвир белбоғ билан келган эдинг!

— Нима билан чиқиб кетдим?

— Қўйинглар бунаقا гапларни! — деди Зиёдахон, — қани юринг, ўртоқ, бугун бизникида ётинг, әртага икковларинг ҳам жаҳлдан тушганларингдан кейин гаплашасизлар. Олинг болангизни.

— Олмайман! Олсин ўзи итваччасини!

Бола ҳануз чирқираб йиглар эди.

Шарофат паранжасини ёпиниб уйдан чиқди. Сидикжон Зиёдахонни секин туртди.

— Зиёдахон опа, бир нима қилинг, болани олиб кетсин. Жон опа! Мен нима қиласман, қандай қиласман?

— Колхозчилик, Сидикжон, битта бола бўлса юмалаб-сумалаб ўсади, ҳеч ташвиш тортманг, колхознинг бағри кенг.

Зиёдахон йигидан хириллаб қолган болани олиб Шарофатнинг кетидан югурди ва бўсағада етиб олди.

— Ўртоқ, ўртоқжон, манг бола бечорада нима гуноҳ! Олинг.

— Итваччасини ўзи боқсин! — деди Шарофат ва Зиёдахонни итариб ташлади. Бола унинг қўлидан тушиб кетаёзди.

Зиёдахон Анзират холани чақириб болани берди. Кампир бир қўли билан бошини ушлаб, иккинчи қўли билан болани бағрига босди ва юзини юзига қўйди. Шарофат унга жуда яқин келиб ўшқирди:

— Қўшмачи! Қўшмачиликнинг ионини еганингдан кейин бунаقا ишини ҳам қиласми!

— Майли, болам, майли, — деди Анзират хола болани олиб кетар экан. — Ҳар нима десанг ҳам умринг узоқ бўлсин, шу боланинг катта бўлганини кўргин... Илоҳим кўргин!..

Зиёдахон Шарофатни анча ергача суриб олиб кетди. Ичкаридан боланинг ҳиқиллаши, Анзират холанинг бола-

ни аллалаган товуши ва ора-сира инқиллаши әшитилар әди.

Сидиқжон ичкарига киришни ҳам, кўчага чиқиб кетишни ҳам билмай остонада туриб қолди. Ичкарига кириб кампирга қайси юзи билан қарайди-ю, қайси тили билан унга бир нима дейди ва нима дейди? Энёдахон нима деб ўйлади? Шарофат ҳозир унга нималар деб кетаётган әкан? Эртага бу можаро бутун колхозга маълум бўлганда одамлар нима дейди? Бунинг туҳмат әканлиги-га бу одамларнинг қайси бирини ишонтиради-ю, нима деб ишонтиради? Бечора Канизак одамларнинг кўзига қандай қилиб кўринади? Нима дейди?

Сидиқжон остонада ўтириб қолди. Хийла вақтдан кеийин Анзират холанинг оёқ шарпаси әшитилди. Сидиқжон дарров ўрнидан турди. Анзират хола эшикка томон келар әди. Сидиқжон йўталиб ичкарига кирди ва икки қадам босмасдан Анзират холага тўқнаш келди.

— Ҳа, болам, қаёқда қолдинг? — деди кампир, — юр, овқатингни еб олгин, эсинг кетди.

Анзират хола ўчоқ бошига кетди. Сидиқжон уйга кирди. Бола ухлаб ётар әди. Анзират хола бир шокоса ширгурунч келтириб Сидиқжоннинг олдига қўйди.

— Егин, болам, егин... Майли, хафа бўлма, шунаقا бўлади. Енгилоқ жувон әкан...

— Хола, — деди Сидиқжон товуши хиёл титраб, — әнди мен буни сизнинг кўнглингиздан қандай қилиб чиқараман? Мен туфайли шунча... умрингизда әшитмаган гапларни әшитдингиз...

— Майли, болам, майли, әшитсан сен туфайли әшитибман, у туфайли әшитганим йўқ... Боланг уч-тўрт кун қийналади, кейин ўрганиб кетади. Мен Канизакдан бир хабар олиб келай. Марусянинг уйида бўлса керак.

Қалтис йиңқилиб бирон жойи майиб бўлган киши бунинг оғриғини ўша тобда эмас, кейин билганидек, Сидиқ-

жон бу можаронинг бутун даҳшатини шу кечаси кўрпага кирганидан кейин билди. Унинг назарида ҳозир бутун қишлоқ фақат шу тўғрида,— бирор кулиб ва бирор тажанг бўлиб, бирор Шарофатни ва бирор Канизакни қоралаб, бирор «ҳамма иллат шу йигитнинг ўзида» деб шу можаро тўғрисидагина гапираётгандай бўлар әди. Унинг кўз олдига Эйёдахон келди. Шарофат унга нималар деди экан? Унинг сўзларига ҳеч ким ишонмаса ҳам Эйёдахон ишонади. Баҳорда балхтут остида бўлган ҳодиса ҳеч қачон унинг ёсидан чиқмайди.

Сидиқжон бундан ҳам кўра ҳозир боласини қўйнида олиб ётган Анзират холадан, бирорнинг уйида инқилаб ётган Канизакдан хижолат тортар эди.

Анзират холанинг қўйнида ётган бола тўсатдан қичқириб юборди. Сидиқжон уни албатта биро нима чақди деган хаёлда ўрнидан тура солиб югорди. То у етиб боргунча Анзират хола туриб болани қучогига олди ва силкитиб юпата бошлади:

— Йў-йў-йўқ... Вой, болагинам. Йў-йў-йўқ... Болам бечора тушида қўрқди, тушида қўрқди болагинам... Аллў аллау-алла...

Бола дарров жим бўлди. Сидиқжон нима қилишини билмай, Анзират холанинг орқасида бирпас туриб қолди-ю ниҳоят:

— Хола, менга берақолинг, сизни ухлатмайди,—деди.

— Вой, нима қилиб юрибсан, болам?— деди Анзират хола болани ётқизиб,— бор ухла. Эрта саҳарда ишга чиқадиган одамсан, бор, бор! Мен болани энди қўрибманми... Бола бечора ўшанда қўрқкан экан-да, қўрқса шунаقا бўлади. Бераҳмлар, наҳотки болани шунчалик қўрқитсаларинг! Сен ҳам шунинг товушига ўйғондингми?

— Уйгоқ әдим... Эртага олиб кетар, ҳар нима бўлганда ҳам кўкрагида оналик меҳри бордир.

— Олиб кетса олиб кетар, олиб кетмаса бу тўғрида

ҳеч ташвиш тортма, ўғлим. Умрини берса Ҳошимжон билан ака-ука бўлиб ўсади.

Сидиқжон Анзират холанинг фақат шу мазмунда бир нима дейишини кутган бўлса ҳам, бу гап қалбига иссиқ-қина тегди. Унинг бутун вужуди эригандай бўлди; кўкрагининг аллақаеридан шув этиб кўтарилган бир нима томоғида лип-лип этди-ю кўзига ёш келди.

— Қуллуқ, онажон! — деди эшистилар-эшистилмас.

— Хотининг, бунақа феъли тез экан, олиб кетмагани ҳам дуруст. Ёш нарса шундоқ баджаҳл бўлса-я! Хайрият ҳам Зиёдахон келиб қолди, бўлмаса ҳамма ёқни остин-устин қилар экан. Мен Зиёдахонни ҳам уармикин деган әдим. Хайрият урмади. Иккита нарса... Эридан балога қолар әдик... Эри қандоқ яхши кўрадики... Бечора бола кўрмай юриб-юриб энди кўрди. Ўтган йил қиши билан районга докторга қатнади. Эсон-омон қутулсан. Яхши жувон, ўқиган... У келганда Канизак чиқиб кетганмиди? Эсимда ҳам ийқ...

— Ҳа, Канизак чиқиб кетгандан кейин келди... Ҳола, Канизак Марусяникида ётиши чакки бўлади-да: билмаган одам айби бўйнида экан дейди. Шуни аzonда бориб олиб келинса, ишга шу ердан чиқса, билган билиб, билмаган билмай қўя қолса яхши бўлармиди дейман... Мен борсам гап кўпаярмикин. Бундан ташқари ҳозир мен унга бир нима дейишим ҳам қийин, мендан хафадир. Кўнглидан чиқарарман...

Анзират хола анчадан кейин жавоб берди:

— Ҳар қалай хотининг кетгандан кейин келгани яхши, болам.

Сидиқжон, гарчи Канизак қайтиб келмас деган ўйга бормаган бўлса ҳам, Анзират холанинг бу гапидан кейин у можаронинг энг хунук оқибати барҳам топгандай енгил торти.

— Рост айтасиз, хола,— деди ва бориб жойига чўзилди.

Дарҳақиқат бу можаронинг бошқа оқибатлари ҳозир унинг кўзига ўзидан-ўзи барҳам топган ва топадигандай кўринар әди: «Анзират хола мендан хафа эмас,— дер әди ўэича.— Нимага ҳам хафа бўлади? Ўзи кўриб билиб туритти; бундан ташқари ўз онамдай бўлиб қолган одам. Болани Шарофат ёртага албатта олиб кетади, олиб кетмай иложи йўқ — боласидан айрилса чумчуқ чирқирайди-ю! Лекин қайтиб кетишида у яна бир тўполон қилади, нафақа берасан деб тўполон қилади; мен хўп десам, қўлига бор-йўғимни тутқазсам ҳам тўполон қилади!»

Унинг кўз олдига шу жанжал манзараси келди: ранги, кўз жияклари оқарган, юпқа лаблари кўкариб кетган Шарофат оғзига келган гапни қайтармай шовқин солмоқда; ўртага тушмоқчи бўлган кимнидир юлади; ҳамма әркакларни ҳамиятсиз, ҳамма хотинларни бузук дейди. Бирор кулади, бирор тажанг бўлади... Шунда Зиёдахон келиб секин: «Сидиқжон, оғир бўлинг, ҳамма кўриб, билиб туритти; бундай шаллақи, бундай туҳматчи, бунингдай юэсиз хотинни умримда кўрганим йўқ», дейди. Шунда Канизак: «Вой, Сидиқжон ака, ўлмаган жонингиз, шундай хотин билан ўн йил қандай умр қилдингиз!» дейди...

Сидиқжон жиндак мизғигандай бўлди-ю кўзини очиб қараса тонг отиб қолипти; бет-қўлини ҳам ювмасдан тў-қайга чопди.

Ҳамма аллақачон ишга тушган. Тўлаган ака билан арра тортаётган Зокир ота Сидиқжонга хўмрайиб қаради. Сидиқжон, худди кеч қолганимнинг ҳиссасини чиқараман дегандай, дарров ишга тушди ва шитоб билан дараҳт бутар экан, Канизакни излаб атрофга кўз ташлади. Зокир ота ундан Канизакни сўради. Сидиқжон шундан билдики, Канизак ишга чиқмалти ва кечаги можародан бу ердагиларнинг хабари йўқ экан, шунинг учун «келиб қолар» деб жавоб берди. У, бир томондан Кани-

закка нима бўлди, кўэ-пўзига зиён етмадимикин деб ташвиш тортса, иккинчи томондан, Шарофат келиб яна жанжал бошлишини минут сайин кутгани учун, унинг ишга чиқмаганидан хурсанд әди.

Тушликка занг урилганда Зокир ота нон халтасини кўтариб, одатдагича, қўшни бригададаги ўртоғининг олдига ўтиб кетди-ю, ишга занг урилганда ўзидан-ўзи жовраб, сўкиниб келди. Унинг авзойини кўриб Сидиқжоннинг юраги шув әтиб кетди: «Ҳа, эшитипти, Канизак нега ишга чиқмаганини билипти. Кимни сўкаётипти — меними, Шарофатними? Мени сўкаётипти. Ҳозир келиб шовқин солади, дилимни сиёҳ қиласди. Ҳозир мен бунга қандоқ қилиб тушунираман? Гапимга қулоқ солармикин?..»

Зокир ота нон халтасини тўнининг устига қўйиб, болтани қўлига олар әкан:

— Канизакни кейин кўрдингми, дурустми, кўзига зиён қилмаптими? — деди.

Сидиқжон унинг бу хилда мулоимлик билан гапиришини кутмагани учун дафъатан тушунолмади.

— Лаббай? — деди-ю кейин тушуниб жавоб берди: — Дуруст, ҳеч нима қиласди йўқ... бети салгина...

— Бўлар иш бўлипти, энди ҳеч кимга оғзингдан чиқарма. Бости-бости... У фалокатдан билиб қочган әкансанда. Болага, ўз боласига меҳри шу бўлса, ундан нима умид қиласди киши? Майли, болага меҳри шу бўлса ташлаб жетгани яхши бўлипти. Ташлаб кетгани кўнгли бўлган онанинг бориу йўғи! Шундоқ әмасми?

— Менинг туриш-турмушимни кўрмасдан бурун «айланай-ўргилай» деб ўлаётган әди, кўрганидан кейин газак олиб шишиб кетди. Энди ташлаб кетаман деб мени қўрқитмоқчи.

— Ташлаб кетипти-ку, тағин нима?

— Ҳали кетгани йўқ, кечаси Эйёдахон опам олиб кетган әдилар.

— Ие, ҳали хабаринг йўқми? Хотининг аzonда жўнапти. Болтабой кузатиб қўйипти. Бола тўғрисида шунча гапиришипти, уч-тўрт киши шунча ўртага тушити...— унамапти. Нуқул итвачча дер әмиш. Астағфирулло, ўз боласини, ўзи туққан болани итвачча деса-я!

Зокир ота сўкиниб дараҳт бутай жетди. Сидиқжон гаранг бир аҳволда турив қолди. Унинг кўз олдига йиғлаб-йиғлаб ҳолдан тойган ва уйнинг бир бурчагида ҳиқиллаб, мунгайиб ўтирган ўғли ва хуноб бўлиб жовраб, дамбадам кўча эшигига бориб келаётган Анзират хола келди. Бу манзара кечгача унинг кўз ўнгидан кетмади; кечгача ўйлаб ўғлини Баҳрободга — онасига ташлаб келишга қарор берди-ю, шу тўғрида гаплашгани ишдан тўғри Үрмонжоннинг уйига борди. Үрмонжон унинг сўзини эшитиб кулади.

— Жуда эрка ўсган қиз болага ўхшайсан: сал бир нима бўлса дарров она деб қоласан! Салгина иситма чиқарсанг Баҳробод — она, хотининг болангни ташлаб кетса ҳам Баҳробод — она! Ким айтади сени қаттиқчилик кўриб ўсган йигит деб! Онанг бечорага отангдан иккита сагир билан қолиб кўрган кунлари ҳам етади. Ун йил онангга қарамабсану, энди бола боқиш керак бўлганда Баҳробод — онами? Қўлингдан ёрдам қилиш келганда ёрдам қилишинг керак әди, ҳозирча ёрдам қиломас экансан, ҳеч бўлмаса қўй, бечоралигини қиласин.

— Нима қиласман бўлмаса. Анзират холага ташлаб қўйиш ҳам инсофдан эмас. Мен у кишидан жуда жижолатда.

— Нега Анзират холага ташлаб қўясан? Унинг ҳам иши бор, невараси бор. Богчани нимага очиб қўйибмиз? Мен Марусяга тайинлаб қўйдим, әртадан бошлаб боғчага бер. Ҳар куни эрталаб ишга кетаётганингда элтиб қўясан, қайтишда олиб кетасан. Шундоқ қиласанг ўзингдан бошқа ҳеч кимга оғирлиги тушмайди.

Сидиқжон Ўрмонжоннинг олдидан таъби очилиб чиқиб кетди. У биринчи навбатда Канизакка узр айтиш учун йўлакай Марусяниг уйига томон бурилди. Ўнинг эшиги очиқ, ичкаридан хотин кишининг дам-бадам кулган товуши эшитилар эди. Сидиқжон орқа томонга ўтиб тепаликка чиқди ва ойна ўрнатилган туйнукдан ичкарига қаради. Маруся китоб ўқир, Канизак унга қулоқ солар экан, ҳадеб кулар, кимдир унинг сочини ўрап эди. Сидиқжон синчиклаб қараб бу хотинни таниди. У — Канизакнинг звено бошлиғига норози бўлиб Бўтабойнинг олдига арзга борган аёллардан бири — дўнг пешона жувон эди. Сидиқжон буни кўриб «ҳа, шу хотин кўргани келган бўлса Канизак туҳматга қолганини ҳамма билар экан» деб қўйди ва ҳозир унинг олдига киришни лозим кўрмай уйига кетди.

Бола ухлаб ётар эди. Анзират хола Сидиқжоннинг бемаҳал юришидан жиндай койиди, кейин боланинг бугун қилган шўхликлари, айтган гаплари тўғрисида кула-кула сўзлади. Унинг юзида ҳеч қандай малол аломати кўринмас, аксинча, ҳар кунгидан хуррамроқ эди.

- У касофат кетиб қолипти-ку,— деди Сидиқжон.
- Ҳа, эшитдим, болам, ҳамманинг лаънатига қолди.
- Кимдан эшитдингиз?
- Канизакни кўргани борган эдим. Зиёдахон ўша ерда экан.
- Канизак мендан қаттиқ хафадир?
- Ҳа, хафа бўлган экан, қайтиб бормайман деган экан. Зиёдахон уришипти.
- Энди хафа әмасми?
- Билмасам, нуқул қулади. Ҳўп кулишдик. Ўзи ҳам жуда қизиқ ишлар бўлди-да, болам.
- Канизак қачон келади?
- Келадиган эди, билмадим... Уяламан дейди. Эртага сен ишга кетганингдан кейин келар-да. Ҳа, болангни

сўради, йигламай ўтириптими, дейди. Кўнглим алла-
нечук бўлиб кетди. Худо умрини берсин, хўп жувон-да,
баҳоси йўқ жувон!

Сидиқжон бола тўғрисидаги ўзининг аввалги мўлжа-
лини ва Ўрмонжоннинг маслаҳатини айтиб берди. Анзи-
рат хола нима учун Ўрмонжон шундай маслаҳат бергани
тўғрисида гапириб боғчага кимларнинг боласи қатнаши-
ни, болалар кунни қандай ўтказишини, Маруся болалар-
га қандай қарашини сўзлаб берди. Сидиқжон бола тўғ-
рисида жуда хотиржам бўлди, шундоқ кўнгли тинчидики,
Шарофат уни ташлаб жетмоқчи бўлганда қўрқанига ва
бутун куни бўйи бу қадар ташвиш тортганига кулгиси
қистади. Бироқ, эрталаб Анзират хола кийинтираётганда
боланинг ғашлик қилиб йиглаганини, онасини йўқлагани-
ни кўриб кўнгли бузилиб кетди: назарида боласининг
бутун умри бундан кейин мана шу хилда йиглаб, онаси-
ни қўймасаш билан ўтадигандай бўлар әди. Унинг кўзига
ҳозир йиглаб ўзини у ёқдан-бу ёққа ташлаётган боладан
бошқа ҳеч нарса кўринмас әди.

У болани кўтариб қизил чойхонанинг муюлишидан
ўтганида рўпарадан келаётган Канизакни кўриб қолди.
Канизак кўк рўмолини томогининг тагидан боғлаб олган,
қўлида оқ тугун, ерга қараганича жадаллаб келар әди.
Сидиқжон тўхтади ва Канизак ўн қадамча яқин кел-
ганда:

— Канизакхон!— деди. Канизак бошини кўтариб уни
кўрди-ю, секин тўхтади ва яна бошини қуий солди.— Ка-
низакхон, меидан ҳар қанча ўтган бўлса... ўзингиз кўрди-
нгиз... ҳамма билади. Энди мен сизга нима ҳам дейман...
бир гарибингизман...

Канизак унга ер остидан қаради. Тонг қоронғисида
унинг юзи оппоқ, чўзиқ ва кўзлари ичига ботиб кетган-
дай кўринди. Бола унинг елкасига бошини қўйиб инграр
әди. Канизак, у билан бу яқин ўртада гаплашмоқчи

бўлмаса ҳам, ранги рўйини кўриб ва «Фарингиэман» деганида ўзгарган товушини эшитиб кўнгли юшаб кетди.

- Қаёққа олиб кетаётисиз?
- Боқчага...
- Докторга кўрсатдингизми?
- Йўқ.

— Аввал доктор кўриши керак, доктор кўриб қоғоз бермаса олмайди. Доктор чоршанба куни келар эмиш.

Канизак шу гапни айтиб, йўлга тушди. Сидиқжон унинг кетидан қараб қолди. Канизак пастликка тушиб кетганида орқасига бир қайрилиб қаради. Сидиқжон болани қайтариб олиб кетди.

Чоршанба куни Сидиқжон керосин олиб келгани МТС-га кетди-ю, болани докторга Канизак олиб бориши керак бўлиб қолди. У болани кўтариб чиқиб кетаётганида Анзират холага қараб илжайди:

- Хола, кўрган одам нима дейди...
- Анзират хола кулди.
- Нима дер эди, қизим, бола ярашипти дейди-да!
- Канизак ерга қараганича чиқиб кетди.

12

Далага трактор чиққандада колхоз территорииясида бир парча ҳам тўқай қолмаган, уфқдан-уфққа туташган бепоён саҳронинг ўртасида икки қаватлик оқ иморат — мактаб, ундан берироқда ёзлик ва қишлоқ қизил чойхона, унда-мунда колхоз хўжалигига керакли турли-туман биноларгина кўринар эди.

Ҳар бири бир янгилик келтираётган бу кунларнинг шавқидан маст бўлган ҳалойиқ ҳар қандай ишга мўр-

малаҳдай ёпишар, лозим бўлса, отини «кунжарарабазм» қўйиб, кечалари ойдинда ҳам ишлар эди.

Чигит экиш бошлангунча янги қишлоқнинг кўланкаси кўринниб қолди: канал кесиб ўтган янги қишлоқнинг марказидан ҳар томонга қараб кетган, лекин ҳали очилмаган кўчаларнинг икки юзига саксон беш мингдан ортиқ кўчат ўтқазилди.

Ер-сувни, тракторни, ҳукумат томонидан бериладётган моддий ва маънавий ёрдамни, колхоз кун сайин порлоқ келажакка катта-катта қадамлар ташлаб кетаётганини кўрган якка хўжаликлар тўп-тўп бўлиб колхозга кира бошлади. Колхоз, илгари ўтган паст-баланд гапларни унутиб, буларни хурсандлик билан ўз бағрига олар эди. Сўнгги уч ярим ой ичida якка хўжаликлардан эллиқ битта ариза тушди, буларнинг кўписи ўртаҳол дэҳқонлар эди. Колхоз чорвасига бир юз ўн тўққиз бош қўшилди.

Чигит экиш айни қизиб кетган кунларда бир фалокат рўй беди: уч-тўрт кун ичida колхознинг тўққиёта сигири ўлиб қолди. Райондан бутун отряди билан етиб келган ветврач бутун сельсоветни ва бу сельсоветга қўшини бўлган барча колхозларни текшириб, «Кўшчинор»-нинг ҳамма молини карантинга қўйди. Бу орада яна тўртта сигир ўлди.

Орадан бир неча кун ўтар-ўтмас райондан уч кишилик бир комиссия келди. Комиссия беш кун туриб колхознинг бутун хўжалигини, ишини, планларини кўздан кечирди; ҳамма звено бошлиқлари, бригадирлар ва бир мунча колхозчилар билан суҳбат қилди. Суҳбатда бўлган одамларнинг ҳеч бири комиссия асосан нима иш билан келганини билолмас эди: комиссия аъзоларининг бири бундан ўн-ўн беш йил бурун бўлиб ўтган воқеаларга қишиқади; бири ҳеч кимга маълум бўлмаган аллақандай зиёфатлар, бирор-бировни ургани, ким эканлиги номаъ-

лум суюқ әркаклар ва оёги енгил хотинлар тўғрисида гап айлантиради; бири колхозчиларнинг майший аҳволини суриштиради...

Комиссия кетган куни эртасига вақт ярим кечадан ошганда Ўрмонжоннинг уйига Абдусамадқори келди ва өшикда туриб жуда зўр мусибатдан дарак берадиган товшу什 билан чақирди. Ўрмонжон ичкарига таклиф қилган әди, қори кўзи билан Тўпанисога ишорә қилиб «холироқ жойда гаплашайлик» демоқчи бўлди. Ўрмонжон кўчага чиқди. Қори уни дарё бўйига олиб тушди-да, чўнқайиб ўтиради.

— Айтсам тилим куяди, айтмасам дилим куяди, жон ака! — деди қори бутун вужуди ўртаниб кетаётгандай тўлғаниб.— Мен бу сирни шу чоққача ичимда сақлаб келаётган әдим, энди айтмасам бўлмайди, чунки бу миш-миш оғизга тушиб бораётпти... Хотинингиз ҳалол хотин эмас! Сиздай одамга номуносиб хотин!

Ўрмонжон бир оз жим қолгандан кейин:

- Нима учун? — деди.
- Бирор билан ўйнашиб юрар әкан.
- Ким билан?
- Сўраманг! Энг яқин дўстингиз билан.

Ўрмонжон кулди.

- Бутун колхоз биланми?
- Бўтабой билан!..
- Ким айтди сизга?
- Гўрингдан тутун чиққур Раҳматилла домла айтган әди.
- Унга ким айтипти?
- Унисини сўрамабман, Ўрмонжон ака.
- Яна нима гап? — деди Ўрмонжон. Унинг гапга ишонмагани ва аччиғи келгани юзидан билиниб қолди.
- Кошкى әди шу гап ёлғон чиқса... — деди қори йиғламсираб.— Бўтабой хотинингиз билан ўйнашиб юрар

вкан, унинг қўймучида тангадай пес борлигини кўриб гаплашмай қўйинти.

Ўрмонжоннинг юраги «шув» этиб, дами ичига тушиб кетди.

Қори ўрнидан турди, бошқа ҳеч нарса демай, бошини қўйи согланича битта-битта қадам босиб юқорига чиқиб кетди.

Ўрмонжон уйига қайтар экан, йўл бўйи ўйлади, «наҳот шундай бўлса... шундоқ экан-да! Қўймучида тангадек песи бор... Пес әмас. Яранинг ўрни эди-ку. Нима фарқи бор? Песи бор... Рад қилиб бўлмайдиган далил...»

Тўпанисо айвонда қўлинин ўғилчасининг устига ташлаб ухлаб ётар әди. Ўрмонжон унинг устига келиб юзига тикилди. Чироғнинг сарғиш шуъласида унинг ранги кетган, қўя ослари ичига ботган, уйғоқ бўлса ҳам ўзини жўрттага уйқуга солиб ётгандай кўринди. Ўрмонжон энгашди. Унинг нафас олишига қулоқ солди, қўлинин юрагига қўйиб кўрди. Тўпанисо бир текисда нафас олиб маст уйқуда ётар әди. «Наҳот шундоқ бўлса? Рад қилиб бўлмайдиган далил!»

Ўрмонжон бориб курсига ўтириди. У Бўтабой билан хотини иккови бир-бирига қандай муомала қилганини, бир-бизига нималар деганини минг бир хил қилиб тасавур этар әди. Бир ўтиришда Бўтабой: «Нима учун биз бир гуноҳни хотин киши қиласа бошқа ном билан айтамизу, әркак киши қиласа бошқа ном билан айтамиз; нима учун айнан бир гуноҳ хотин кишини ерга, әркак кишини кўкка кўтариши керак?» деган әди. Демак, бу гапни бузуқ әркакларни қоралаш әмас, бузуқ хотинларни оқлаш учун айтган әкан-да!

Ўрмонжон курсида ўтириб тонг оттириди.

Тонг қоронғисида, одатдагича, Абдусамадқорининг хотини келиб эшикни қоқди. Ҳар куни шу маҳалда қори-

нинг хотини Тўпанисо билан сигир соққани Фермага борар әди. Үрмонжон эшикни очиб уйга кириб кетди ва чўзилди. Ҳаял ўтмай хотинининг қувноқ товуши, мактабга бориши керак бўлган ўғлиниң «довотим қани?» деб у ёқ-бу ёққа юргургани эшитилди, примус валиллари. Тўпанисо уйга кирди, әрининг ётганини кўриб оёқ учидаги ниманидир қидирди, чиқиб кетди. Орадан кўп ўтмай кўча эшиги ёпилди. Жимлик чўкди. Узоқда трактор тариллар әди. Үрмонжон айвонга чиқди. Столда ноён, жizzза, дастурхонга ўроғлиқ бир чойнак чой туарар әди. Душанба куни кечқурун Бўтабой «Үрмонжон ака, битта ош қилайлик» деб гўшт-ёғ кўтариб келган әди. Бу жizzза ўша ёғнинг жizzаси. Үрмонжоннинг кўкрагидан кўтарилган совуқ бир тўлқин томогига тиқилиб кўнглини оздириди. У ярим пиёла қуруқ чой ичди-ю далага чиқиб кетди.

Үрмонжон, одатда, иш сустроқ ёки ёмонроқ кетаётган участкаларга борар, у пайдо бўлганда одамлар дарров орқа-олдиларига қараб камчиликни ўзлари топишар ва бу камчиликни тездан йўқотиш пайига тушилар әди. Үрмонжон бугун, негадир, одамларни ҳайрат ва хавотирга солиб ҳамма участкага борди, кечга яқин шу қадар чарчадики, отлиқ юришга ҳам мажоли қолмай, уйига қайтди. У қишлоққа яқинлашар экан, кўнглидаги ғашлик борган сайин хуруж қилиб, қалбининг бир чеккасида омонсиз ғазаб, бир чеккасида одами кемириб, еб ташлайдиган ва аксари умидсизликка соладиган бир ғусса минут сайин авж ола бошлади. Нима қиласа экан? Бу давосиз дардни кимга айтса экан? Бўтабойнинг ёқасидан ушлаб бу гапларнинг ҳақиқатига биратўла етсаю шунга қараб иш қилсанмикан? Үрмонжон шунга жазм қилиб отининг бошини идорага томон бурди, бироқ ярим йўлга етганида Бўтабой ўтган куни бинокорлик бригадасининг бошлиғи Тўлаган ака билан областга кетганини эслаб орқага қайтди, уйига қараб кетди.

Ўрмонжон айвонга чиқиб, оёқ остида ётган чойнак-пиёла, коса-товоқларнинг синифини, стол ва каравотда турган бир неча катта-кичиқ тугунларни кўриб ҳайрон бўлди. Уйдан Тўпанисонинг йифиси, уни юпатаётган хотин кишининг товуши әшитилар эди. Ўрмонжон эшик олдига келганда унинг ёнидан қорининг хотини ўтиб, йўргалаганича кўчага чиқиб кетди. Ичкаридан Тўпанисо чиқди.

— Шарманда! Ўртоқ Аҳмедов сизни «Қўшчинорга» шу умид билан юборганими? Колхозчилар сизни шу умид билан қучоқ ёзиб қарши олганими!

Ўрмонжон «Қўрқан олдин мушт кўтараётитти» деган хаёлда вужудига титроқ кириб секин курсига ўтирас әкан, унинг юзига тикилди. Бироқ Тўпанисонинг юзида бутун вужудини талвасага солаётган алам, юрак-бағрини ўртаб бораётган мусибат аломатидан бошқа ҳеч нарса йўқ эди.

— Шошманг, ҳовлиқманг, нима гап ўзи? — деди Ўрмонжон.

— Канизак билан ўйнашганинг ўйнашган, Сидиқжоннинг хотинини чақиришиб икковини уриштирганинг, Анзират хола бечорани урдирганинг нимаси? Шу йўл билан сирингни ёпмоқчи бўлдингми? Ёполмайсан! Безбет!..

У ўзини уриб, сочини юлиб, инграганича уйга кириб кетди. Ўрмонжон шошиб қолди.

— Кимдан әшитдингиз бу гапларни?

— Айтмайман! — деди Тўпанисо бирдан йигидан тўхтаб. — Энди бир бечорани колхоздан ҳайдамоқчимисан!?

Ўрмонжон уни мумкин қадар босишга ҳаракат қилди.

— Ҳовлиқманг... гапираман, гаплашамиз десам менда ҳам гап топилади... Шу гапларни аввал ўзимга айтиб, ҳақиқат бўлса юзимга бир тарсаки уриб, ундан кейин овова қилсангиз ҳам бўлар әди-ку.

— Бир тарсаки урадиган одам топилади. Мендан қўра партия мажлисининг қўли узунроқ! Бу ерда гапимга ҳеч ким қулоқ солмаса рајкомга бораман!

Тўпанисо шу гапни айтди-ю, рўмолини бошига солиб, уйдан чиқди кетди. Ўрмонжон унинг йўлини тўсмади.

Қоронғи туша бошлади. Ўрмонжон Тўпанисонинг бирон жойга бориб гапни кўпайтиришидан ташвишланди ва уни қидиришга, топиб ҳар йўл билан бўлса ҳам уйга олиб келишга қарор берди. Бироқ Тўпанисо ҳеч қаерда, ҳеч бир дугонасининг уйида йўқ эди. Унинг жаҳл устида районга кетганлиги аниқ бўлиб қолди, чунки ўз қишлоғига бу хилда ва боласини ташлаб кетмас эди.

Ўрмонжон, таъби хира бўлди-ю, отланиб районга жўнади.

13

Райком бюроси ҳозиргина тамом бўлган, қабулхона ҳавоси папирос тутунидан кўкариб кетган эди. Ўрмонжон ҳеч кимга қарамай тўғри секретарнинг олдига борди. Унинг ўйича, агар хотини қелган бўлса секретарь билиши ва дарров айтиши, айтмаган тақдирда ҳам бирон гапи ёки муомаласи билан билдириши керак эди. Секретарь одат, дагича очиқ чеҳра билан сўрашди. Ҳеч нарса демади. Шу пайт кимдир орқадан иссиқ ва юмшоқ қўли билан Ўрмонжоннинг кўзини бекитди. Ўрмонжон орқасига ўгирилиб кулиб турган Мавлонбековни кўрди.

— Одамларнинг кўзини ёғ босипти-ку,— деди Мавлонбеков қулиб ва кўjkрак чўнтагидан бир қоғоз олиб унга берди.— Мана, Бўтабойингиз олам-жаҳон ёғоч олипти. Йиғирма етти минг сўмни эплаштириб юбордик, фойдаси билан берасизлар-да...

Ўрмонжон Мавлонбековга раҳмат айтиб, телеграммани чўнтағига солди. Шу чоқ Аҳмедов чиқди, секретарга нималар деди-ю Ўрмонжонни кўриб қолди.

— Э-э-э, Ўрмонжон ака... келинг,— деди сўрашгани иккала қўлини чўзиб,— ўҳё, ўзингизни жуда олдириб қўйибсиз-ку? Иш қўпми! Қани, киринг...

Кабинетда район газетасининг муҳаррири ўтирган ёкан. Ўрмонжон эшик олдига қўйилган диванга ўтириди. Аҳмедов ҳозиргина босмахонадан келтирилган, ҳали нами қочмаган газета саҳифасини муҳаррирнинг қўлидан олди ва Ўрмонжон зерикиб қолмасин деди шекилли, уни ҳам сұҳбатга тортди:

— Районимизда чигит экишнинг бориши тўғрисида бир саҳифа ташкил қилишни сўраган эдик, кўрайлик-чи, қандай чиқипти. Сиз ҳам берироқ келинг.

Ўрмонжон яқинроқ бориб столнинг чап томонига қўйилган креслога ўтириди.

Аҳмедов саҳифадаги материалларни кўздан кечиргач, умумий сарлавҳани товуш чиқариб ўқиди:

«Районимизда чигит экиш қизғин бормоқда»... Хўп... «Қизғин бормоқда»... Менимча бу сарлавҳада нимадир етишмайди. Узи яхши, лекин... нима десам экан? Еруғи бору иссиғи йўқроқ! Нима дедингиз, Ўрмонжон ака?

Ўрмонжон нима дейишини билмай илжайди ва Аҳмедов жавоб кутиб турганини кўриб ноилож:

— Билмадим энди, газета бўлгандан кейин шунаقا дейиш керакдир-да,— деди.

— Ана, ҳамма гап шунда!— деди Аҳмедов,— газета бўлгандан кейин шунаقا дейиш керак! Қўйма гаплар... «Қизғин бораётитпи», «Ўз ҳиссаларини қўшадилар...»

Муҳаррир хижолат бўлиб ўзини оқлашга тиришди.

— Баъзан кетиб қолади-да...

— Йўқ, баъзан кетиб қолмайди, ўзларинг атайлаб қиласизлар. Янгишсангиз майли, лекин ёлғон гапирманг.

Чўнталингизда бир ҳовуч сўзингиз бор, шу сўзларни шу қадар кўп ишлатасиз, шу сўзларга шу қадар ўрганибсизки, бошқа ҳамма сўз кўзингизга ғалати кўринади, қулоғингизга эриш эшитилади. Хўп денг, ўртоқ муҳаррир, хўп денг! Хўш... «Қизғин бормоқда»... Мен сиз бўлсан биласизми, нима деб сарлавча қўяр эдим. «Бирлашган», «Қизил қўшин», «Ишчи», Ворошилов номли қолхозлар...

Муҳаррир унинг сўзини оғзидан олди:

— Чигит экишини тугалладилар!

— Йўқ, «чигитни экиб бўлди» дер эдим.

Муҳаррир ўйлаб туриб рози бўлди ва саҳифани олиб чиқиб кетаётган эди, Аҳмедов тўхтатди.

— Кечирасиз... Нуриддинов иши тўғрисидаги текшириш натижасини нима учун босмайсизлар? — деди ва Ўрмонжонга изоҳ берди:— Булар «Бирлашган» колхозининг ферма мудирини газетада ўғридан олиб ўғрига солишли, текшириш натижасида, айrim кичик фактларни эътиборга олмаганда, газетада босиб чиқарилган материал нотўғри чиқди.

— Мухбирга жазо бердик, ўртоқ Аҳмедов,— деди муҳаррир.

— Бундан Нуриддиновга нима фойда? Ўша мухбир Нуриддинов тўғрисида энди ёлғон материал бермайди демоқчимисиз?

— Ўзи билан гаплашдим...

Аҳмедов кулади.

— Нимани гаплашдингиз? Узр айтдингизми? У бечорани бутун район олдида ҳақорат қилинг-да, қулоғига узр айтинг... Қизиқ бўлипти-да. Газетанинг обрўий тушади деб қўрқасизми? Газета ўз хатосини очиқ айтиб ўқувчилардан узр сўраса обрўий тушар эмишми? Аксинча, қилган хатоси орқасида тўкилган обрўси яна жойига келади, ўқувчиларнинг ихлосини ортиради.

Муҳаррир чиқиб кетди. Аҳмедов столни айланиб ўтиб, диванга ўтириди ва Ўрмонжонни ҳам таклиф қилди.

— Қани, ўтиринг-чи... нега мунча рангингиз кетиб қолди?

Ўрмонжон чуқур хўрсинди-да, ерга қараб нимадир демоқчи бўлган әди, Аҳмедов давом этди:

— Рауф Иброҳимов боргандан бери оғирингиз анча енгил бўлди, лекин, шундоқ бўлса ҳам, иш кўп. Биламан, биламан. Колхозда партия ташкилоти ҳали ёш... лекин бу ёш партия ташкилоти тез вояга етадитти. Ҳўш, ишлар қалай?

Ўрмонжон узоқ жим қолгандан кейин хўрсиниб:

— Жуда ғалати гаплар бўлаётитти, ҳайронман...— деди.

Аҳмедов чекаётган папиросининг чўғига қараб:

— Коммунист ҳеч нарсага ҳайрон бўлмаслиги керак, Ўрмонжон ака,— деди.— Сизнинг устингизда бўлган, бўлаётган ва бундан кейин ҳам бўладиган ҳамма гаплардан хабардорман.

Ўрмонжон беихтиёр қулиб юборди.

— Ҳали бўлмагани ҳам борми?

— Бор! Майли, ҳозир бўлаётганига ишонманг, энди бўладиганини әшитиб гангид қолманг.

— Қандай ишонмайман, ахир,— деди Ўрмонжон кујониб,— жуда хунук... Ҳеч рад қилиб бўлмайдиган оғир, жуда оғир далил...

Аҳмедов унинг сўзини бўлди:

— Биламан, биламан, бутун тафсилотини биламан.

Пес тўғрисида гапирмоқчимисиз? Бу гапни кимдан әшитдингиз?

— Абдусамадқоридан.

— Унга ким айтитти?

— Унга Раҳматилла Обидий айтган экан.

Аҳмедов бир оз ўйланиб қолгандан кейин:

— Шундоқми? — деди, — бу гаплар ўзидан чиққан бўлса ҳам энди Раҳматиллага тўнкайди-да, ўлган одам... Раҳматилланинг қишлоққа оралashi, бирмунча вақт кун кўриши кўнгилсиз бир факт, албатта. Бизнинг баъзи маориф ходимларимиз орасида бу одамга ғалати бир қараш бор экан: Раҳматилла гўё ўз гояларининг амалга ошувидан умид узган ва бу гояларни кўнгилдан чиқариб ташланган, шу билан бирга бошқа ҳеч қандай гояни қабул қиласан эмас; гўё энди қолган тўрт кунлик умрини бир нав ўтказиш кўйига тушиб қолган эмиш! Ана бемаза гап! Лекин мен бир нарсага курсандман: кечагина ҳар кимга қўй қовуштириб юрган, ҳеч кимнинг юзига тик қаролмаган Қапсанчилар бугун... кўрдингиҳизми, ҳеч кимдан тап тортмайди. Буларда сиёсий активлик кундан кун кўтарилиб бораётитпи. Бу, шубҳасиз, бизнинг ютуғимиз. Лекин иккинчи томонини ҳам эсдан чиқармаслик керак: буни душман ҳам назарда тутади, шунга қараб, шароитни ҳисобга олиб қадам қўяди. Хўп, бу гапларнинг таги чиқиб қолар, чиқаётитпи. Энди хотинингиз билан Бўтабой масаласи. Сиз шу гапларнинг ҳаммасига ишондингиҳизми?

— Мен ишонмаган эдим, ишонгим қелмайди, лекин... рад қилиб бўлмайдиган далил!

Аҳмедов кулади.

— Хотинингизнинг қўймичини ўзингиз неча йилдан кейин қўргансиз? Иккинчидан, агар шу гап ҳақиқат бўлса Бўтабой хотинингиз билан неча мартаба ва қаерда учрашиди экан? Агар бутун шарт-шароит имкон берган тақдирда ҳам Бўтабой нима учун бу жинояти тўғрисида Раҳматиллага гапиришни, гапиришнигина эмас, ҳатто исбот қилишни лозим кўрипти? Агар Бўтабой шуни лозим кўрган бўлса, нима учун лозим кўрипти, мақсади нима?

Ўрмонжон нучук бўлиб шундай оддий, шундоққина

куриниб турган нарсалар тўғрисида ўйлаб кўрмаганидан хижолат бўлди.

— Мен-ку унча ишонганим йўқ, лекин бизнинг хотин Канизак билан менинг тўғримда бир гап әшиитипти-ю шунга чиппа-чин ишониб сизга менинг устимдан арз қилгани келган эди.

— Шундоқми? — деди Аҳмедов, лекин бунга унча әътибор қилмади.— Бу гаплар, бу миш-мишларнинг ҳаммаси йиртиб ташланган суратнинг алоҳида парчаларига ўхшайди, то буларни бир-бирига ямаштириб кўрмагуни мизча бу қандай сурат эканини, нима мақсадда ва ким чизганлигини билишимиз қийин. Қийин, лекин билишимиз шарт! Қандай сурат ва нима мақсадда чизилганлиги маълум бўлиб бораётитти, бироқ ким чизган? Ҳамма гап мана шунда? Сизнинг устингиздан бизга, бошқа идораларга имзосиз аризалар ёғилаётитти. Мен боя сизнинг устингизда яна гаплар бўлади деганимда шу аризаларни кўзда тутган эдим.

Ўрмонжоннинг қути учди.

— Қанақа гаплар, ўртоқ Аҳмедов, мумкинми?.. Агар менга ишонсангиз...

— Сўрасангиз сўрамасангиз айтаман, чунки олдиндан билмасангиз мана бунақа югуриб, ишдан қоласиз.

Аҳмедов папкасидан бир қоғоз олиб, Ўрмонжон устидан тушган аризаларнинг мазмунини айтиб берди. Бу аризаларда Ўрмонжонга ортилмаган жиноят қолмаган: Ўрмонжон аксилиниқилобчи Раҳматилла Обидийнинг хотин-қизлар озодлигига қарши айтган гапларини хаспўшлаган ва уни ҳамиша қўллаб-қўлтиқлаган; Ўрмонжон бешсеркалик Ғиёсiddин махсумни чақириб, колхоз ҳисобидан виёфат қилган ва ундан битта ғунажин олиб ўрнига фермадан каттакон сигир берган, шу ғунажиндан оқсил касали тарқалиб колхоз молларидан бир қанчаси ўлган; Ўрмонжон Абдусамадқори билан тил бириктириб икки юз йи-

гирма беш саржин ўтин сотган ва пулини иккови бўлашиб олган; Ўрмонжон Канизак билан ўйнашиб юргани ошкора бўла бошлагандан кейин, одамларнинг кўзини чалғитиш учун, Сидиқжоннинг хотинини атайин чақириб Канизакни урдирган ва ҳоказо ва ҳоказо.

— Вой-вуй...— деди Ўрмонжон кайфи учиб,— агар шуларнинг ҳаммаси рост бўлса...

— Ҳаммаси эмас, биронтаси рост бўлган тақдирда ҳам мен бу гапларни сизга айтмас эдим. Ҳўп, энди мен сизга битта айбингизни айтиб берай. Зоқир ота, шубҳасиз, жуда тажрибали пахтакор, қўли гул одам. Унга айрим эътибор қилиш, шубҳасиз, яхши. Лекин, Ўрмонжон ака, халқ тажрибаси билан илм бир-бирига зид келиб қолган пайтларда илмни қўллаш, илмга йўл очиб бериш керак. Бўтабой ака баъзан муроса йўлини тутганда сиз бунга бармоқ орасидан қараётисиз. Натижада баъзан Рауф Иброҳимовнинг обрўйига зиён етәтипти. Бу тўғри эмас, мутлақо тўғри эмас. Халқ жуда кўп шишларни пахтадоғ билан даволайди. Агар бу шиш газак шиши бўлса пахтадоғ фойда қиласди, лекин рак шиши бўлса авж олдиди. Бундай ҳолларда тажриба билан келишиб бўлмайди. Бизнинг вазифамиз илмни халқ тажрибаси билан бойитиш ва шу билан бирга халқ тажрибасини илмнинг элагидан ўтказишдир. Шуни унутмаслик керак.

Деворий соат бирга занг урди. Ўрмонжон, бу соатнинг тўғрилигига шубҳаланди шекилли, ўз соатига қаради.

— Ҳўш, яна бир масала,— деди Аҳмедов ўрнидан туриб,— водокачканни нима қилмоқчисизлар?

Ўрмонжон ҳам ўрнидан турди.

— Водокачканни тегирмон қисакмикан деб турибмиз.

— Тегирмон қиссаларинг катта тегирмон бўлади, катта даромад беради. Лекин, канал очилган куни әсингизда борми? Каналдан оқсан чироғлар әсингизда борми? Шу чироғлар кўз олдимдан сира кетмайди. Бу ўйин эмас, халқ-

нинг орзуси эди! Мен водокачкани электростанция қилиш тарафдориман. Ленин номли колхознинг электростанцияси кечаси чироғ беради, кундузи тегирмон юргизади. Агар сизлар шуни электростанция қилсаларинг уч колхоз чароғон бўлади. Мен пахта заводининг директори билан гаплашган өдим. У, агар «Қўшчинор» шу ишни бошласа завод оталикка олади деб мени суюнтири.

— Хўп бўлади, ўртоқ Аҳмедов,— деди Ўрмонжон,— имкониятимизни чўтлаб, правлениеда бир ўйлашиб кўрамиз. Агар шу станциядан уч колхоз баҳра оладиган бўлса улар билан ҳам гаплашамиз, кенгашамиз.

— Лекин биринчи навбатдаги вазифа бу эмас,— деди Аҳмедов хайрлашгани қўл узатиб,— биринчи навбатдаги вазифа — экин. Ҳамма иш учун зарур бўлган замин шундан туғилади.

Ўрмонжон хайрлашиб чиқар әкан:

— Ўзингиз юрагимга ўт солиб яна бундоқ дейсиз,— деб кулди.

Секретарь әшикнинг рўпарасидаги деразада ўтирган ёшгина бир йигитга «киринг» деб ишора қилди. Йигит наридан-бери сочини таради, галстугини тузатди, уйнинг ўртасида ўйланиб турган Ўрмонжоннинг яна қайтиб киришидан хавотир олди шекилли, шошиб кабинетга кириб кетди.

Ўрмонжон бир гапини унутгандай хийла ўйланиб турганидан кейин, Аҳмедовнинг суҳбатидан чиққанида ҳамиша шундоқ бўлишини хотирлаб, чиқиб кетди, бироқ отлангани узангига оёқ қўяётганида эслади: хотинига ҳозир нима дейиш, унинг ҳовуруни қандай босиш тўғрисида гаплашмабди; лекин, ўйлаб қараса, районга деб йўлга чиққанида кўзига жуда катта кўринган бу ташвиш ҳозир кундаклик икир-чикирлар қаторига кириб қолибди.

Ўрмонжон отланиб жўнади. У қишлоққа яқинлашган сайин ташвишлана бошлади. Тўпанисо унга-бунга учраб,

у-бу билан уришиб гапни кўпайтирмадимикин? Жаҳл устида қишлоққа кетмоқчи бўлиб, арава сўраб, кўч ортиб бутун қишлоққа довруқ қилмадимикин? Унда кўп ёмон бўлади.

Ўрмонжон бутазорнинг муюлишидан ўтганида эшик олдида турган Тўпанисонинг қорасини кўриб қолди. Тўпанисо уни кўриб ичкарига кириб кетди. Ўрмонжон отини эшик олдига боғлаб айвонга чиқди. Айвон йиғиширилган, ҳамма нарса жой-жойида эди. Ўрмонжон, кўнгли таскин топиб стол ёнига ўтирди. Столда дастурхонга ўроғлиқ овқат турар эди. Буни кўриб Ўрмонжон: «Ҳа, демак ҳовуридан тушипти» деб ўйлади-да, эшик олдига бориб:

— Қаерда әдингиз? — деб сўради.

Тўпанисо кулимсираб жавоб берди.

— Нима ишингиз бор?

— Суриштириб билдингизми?

— Ҳайронман...

— Мен ҳеч нарсага ҳайрон бўлмайман, сизга ҳам маслаҳат шу. Нимага ҳайронсиз?

Ўрмонжон бўлаётган бу иғволарнинг сабабини хотинига батафсил гапириб берди.

14

Биринчи май арафасида Сидиқжон Қўғазор кўчасидағи (бу кўчага биринчи бўлиб Қўғазордан тўрт хонадон кўчгани учун кўча Қўғазор деб аталган, ҳали от қўйилмаган эди) уйлардан бирига кўчган Ғўзиматни табриклагани борди. Қайтишда уни Ғўзимат кузатиб чиқди. Булар клуб майдонида хайрлашиб, Сидиқжон ўз кўчасига бурилганда, унинг йўлинни чимматсиз паранжи ёпингган бир хотин

тўсди. Буни Рўзимат ҳам кўрди ва қишлоқда паранжи ёпи-надиган биронта ҳам хотин бўлмагани учун «ким экан бу» дегандай қараб қолди. Сидиқжон синчилаб қараб бу хотин Шарофат эканини таниди-да, юраги орқасига тортиб кетди.

— Хўш?

Шарофат орага бошқа гап сиғмаслигини кўриб:

— Боламни олиб кетгани келдим,— деди ва йиглам-сиради.

— Қайси болангизни, қанақа болангизни?

— Нечта болам бор?..

Сидиқжон заҳарханда қилди.

— Ҳа, Насибали «итвачча»ними? Қачондан бери уни «болам» дейдиган бўлиб қолдингиз? Қачондан бери унга меҳрингиз тушиб қолди?

— Нима бўлса ҳам онаман.

— Сиз она бўлсангиз мен отаман. Насибали сизга әнди қанчалик азиз бўлиб қолганини билмайман, лекин менга азиз, жуда ҳам азиз.

— Шундоқ бўлса ҳам беринг.

— Бермайман.

Шарофат ёлғондан кулди.

— Товуқ семирса туғиши қийин бўлади... Қўрқманг, нафақа сўрамайман. Ҳиммат қилиб нима берсангиз олиб, қуллуқ қиласман.

— Говуқнинг тушига дон киради. Нафақа керак бўлса даромадимнинг ярмини олинг, лекин болани тинч қўйинг. Бермайман, овора бўлманг!

— Нега? Болани онага буюради-ку...

— Ким?

— Шариат, закон...

— Мен шариатни танимайман, закон буюрадиган бўлса буюргандан кейин гаплашамиз.

Рўзимат орада ўтган гапларни барала эшишиб турган бўлса ҳам яна:

- Нима гап, Сидиқжон ака? — деб сўради.
- Бу киши Насибалини олиб кетгани келибдилар..
- Олиб кетаман! — деди Шарофат дўғайиб.
- Қўйинглар,— деди Рўзимат жанжалнинг олдини олмоқчи бўлиб,— бу гапни кундузи гаплашинглар. Юринг, опажон, бугун бизникида ётинг.

Сидиқжон индамай кетаверди. Шарофат унинг кетидан қичқирди:

- Суддан повестка келса бетўхтов боринг!
- Сидиқжон жавоб бермади.
- Қани, юринг, опа,— деди Рўзимат.
- Йўқ, ука, мен биронвикига тушганман. Қўшчиноргача әлтиб қўйинг, у ёғини ўзим топаман.

Рўзимат уни Қўшчинорга әлтиб қўйди. Шарофат Абдусамадқорининг қўчасига бурилди.

Сидиқжон воқеани Канизакка айтди; бироқ судда ютиб чиқишига шу қадар амин эдики, Канизак бу ҳақда қонунни биладиган бирон одам билан маслаҳатлашиш, судда нималар дейиш тўғрисида пишиқроқ ўйлаш, Шарофат болани қандай ташлаб кетганига гувоҳлик берадиган одамлар билан сўзлашиш кераклигини айтганда қаҳқаҳа уриб кулди.

Шундоқ бўлса ҳам Канизак бу ишга жиддий қараб, Сидиқжоннинг «овоза қилиш керак эмас» деб қарши туришига қарамай, районга бориб суд ишини биладиган одамларга учради, уларнинг маслаҳатини Сидиқжонга айтди, уқтириди, биринчи навбатда Эйёдахон билан Анзират холадан, қолаверса Шарофат можаросидан хабардор бўлган бошқа одамлардан судда гувоҳлик беришларини сўради.

Саккизинчи майда Сидиқжонга суддан повестка келди. Суд ўн бешинчи майда бўлиши керак эди. Шу куни Си-

диқжон судда нима дейишдан ҳам кўра Шарофатга рўпара бўлишни кўпроқ ўйлаб хўп ясанди: сариқ хиром этигини, бекасам тўнини, чуст нусха дўпписини кийди; соқолини қирдириб, мўйловини икки томонга шопдай қилиб бураб қўйди; колхознинг энг яхши отларидан бири — боши кинчик, бели узун, сағриси ярқираган, ҳамиша гижинглаб турадиган саман отини минди.

Сидиқжон ўн бир гувоҳни ёнига олиб районга жўнади.

Булар районга суд бошланишидан икки соат бурун етиб келишди. Гувоҳлар ҳар қайсиси ўз иши билан тарқалиб кетди. Сидиқжон ўзини қаерга қўйишини билмай судга кирди. Эшикдан кириши билан унинг кўзи коридорда деразанинг тубида ўтирган Шарофатга тушди. У, эгнида жигар ранг эски гуппи чопон, сариқ кўйлак, бошнда гажимлик қора рўмол, бир елкаси билан деворга сұлниб, оёқларини осилтириб, маъюс бир қиёфада ўтирасада. Сидиқжон уни кўриб кўрмагандай ўтиб кетаётган эди. Шарофат бирдан қаддини ростлаб:

— Ўл бу кунингдан! Ҳали бу нима әкан мен сени маймундай ўйнатаман! — деди.

Сидиқжон тўхтади ва унга еб қўйгундай бўлиб қаради-да:

— Нима қиласан, қўлингдан нима келади? — деди.

— Қўлимдан ҳар нима келади! — деди Шарофат рўмолини қайта боғлаб.

— Менга қилмаган ёмонлигинг қолган әмас! Мени тўпимдан айрдинг, ўн йиллик гулдай умримни қурт бўлиб единг! Менинг ўн йиллик гулдай умримни ўғирладинг! Яна нима қиласан?

Шарофат қаттиқ шивирлади:

— Қаматаман! Хотин кишини урган, унинг озодликка чиқишига қарши бўлган одамни совет қонуни қамоқча буюради. Сенинг муштингни ея бериб жонимда жон қол-

тан әмас. Сенинг озодликка қаршилигинг туфайли мен ўн йил ҳаққимни таниёлган әмасман.

— Шундоқми! Яна нима дейсан? — деди Сидиқжон севуқонлик билан.

— Сен мени бузуқчиликка бошлар әдинг... Сен әркак әмасссан!

Шарофат, афтидан, бунақа гаплар билан Сидиқжоннинг ғашига тегмоқчи, шу ерда бирон можаро бошлаб дод солмоқчи әди. Сидиқжон буни пайқаб қолди. Шу пайт коридорнинг охиридаги эшик секин очилди. Шарофат иргиб деразадан тушди, худди Сидиқжон унга ҳамла қилгандай эшикка томон қочди. Эшикдан чиққан бир кампир унга әътибор қилмай ҳассасини дўқиллатганича кўча эшикка томон юрди-да, Сидиқжондан соат неча бўлганини сўраб, чиқиб кетди. Уз гумони тўғри чиққанини кўриб унинг кетидан Сидиқжон ҳам чиқди ва бориб воқеани Зиёдахонга айтиб берди.

Суд соат тўртда бошланди. Шарофат олдинги курси-ларнинг бирида мунгайиб, тез-тез бурнини, кўзини артиб, дам-бадам хўрсиниб ўтирап әди. Суднинг саволига жавобан Сидиқжон ўн бир гувоҳнинг номини айтганда Шарофат рўймолининг учини тишлаб донг қотиб қолди. У бутун суд давомида ўзини ўнглолмай, суднинг ҳамма саволига «майли, бошқа даъвом йўқ, болами берсин» деб жавоб қайтараверди.

Суд Насибалини Сидиқжон Соҳибжоновга ҳукм қилди ва ҳукмдан норози бўлиб шикоят қилиш учун Шарофат Зуннунхўжаевага ўн беш кун муҳлат берди.

Сидиқжон суднинг ҳукмидан жуда хурсанд бўлди-ю, лекин Шарофатнинг шикоят қила олиш ҳуқуқидан хавотирга тушди. Зиёдахон ва бошқалар область суди бу ҳукмни ўз кучида қолдиришига амин әканликларини айтиб ҳарчанд таскин беришса ҳам, Шарофатнинг коридордаги қилмишини кўрган, ёвуз ниятини пайқаган Сидиқжон

унинг мунгайиб айтган ҳар бир сўзи, ўзини муштипар, ожиз кўрсатиб қилган ҳар бир ҳаракати остида бир фалоскат кўрар эди.

Уни узил-кесил тинчтиш учун Эиёдахон юридик консультацияга бориб әнг яхши юристга учрашишни маслаҳат берди. Бу маслаҳат Сидиқжонга ҳам маъқул тушди.

Бошқалар қишлоққа кетишиди.

Юрист Эиёдахондан ишнинг тафсилотини, суднинг ҳукмини эшитиб: «Ҳукм мустаҳкам» деди. Сидиқжоннинг кўнгли шундан кейингина жойига тушди.

— Мен суд залида бир таниш кишини кўрдим,— деди Эиёдахон отга миниб тизгинни Сидиқжоннинг қўлидан олар экан.— Унинг айтишига қараганда, Зуннунхўжа қулоқ қилингипти.

Сидиқжон ялт этиб унга қаради.

— Ростми?.. Яшанг-э, оғзингизга мой!

Сидиқжон эгарга яхшироқ ўрнашиб отнинг жиловини силкиди.

15

Қурбон ота МТСдан жавоб олиб Капсанчиларга бутунлай кўчиб келди. Бўтабой ака правление аъзолари билан маслаҳатлашиб, уни янги қизил чойхонага мудир қилиб тайинлади.

Бу кунларда колхозчилар биринчи чопиқдан бўшаб, буларнинг кўпи янги қишлоқнинг марказидан ҳар томонга кетган йўл-кўча чиқариш, бу кўчаларнинг икки томонига ариқ қазиш, бинокорлик бригадасига ёрдам бериб гишт қўйиш, тахта тилиш, биринчи навбатда солинадиган иморатларнинг пойдеворини қазиш ва бошқа ишлар билан

машғул әди. Кўз олдида бўлаётган ишларни, одамлардаги шавқ-завқни кўриб ғайратга кирган Қурбон ота елиб-югуриб сал кунда қишки ва ёзги қизил чойхонанинг кам-кўстини тўғрилаб олди; кўзига бўшроқ кўринган ҳар бир одамни ишга солиб, ҳашарга чақириб ёзги бинонинг олди ва атрофига гуллар экди, катта-кичик супалар қилди. Чолнинг ҳафсаласига, дидига қойил бўлган ва бунчалик куйиб-пишиб уринишни кўрган ҳар бир киши нима билан бўлса ҳам унга бирон ёрдам беришни хоҳлар әди.

Кечқурунлари кўпинча чойхонада одамлар билан гурунглашиб ўтирадиган Иброҳимов Қурбон ота айтмоқчи гулларни ўз илмидан баҳраманд қилди: ҳадемай каннай-гуллар жуда ҳафсала билан чиройли қилиб тортилган ипларга чирмашиб катта-катта япроқлар отди,райҳонлар қад кўтариб ҳид сочди, бирин-кетин очилган ранг-баранг гуллар устида капалаклар қанот қоқа бошлади. Гул, сонсаноқсиз ниҳол, буларнинг орасидан кўриниб турган бепоён кўм-кўк дала, дарё адирлар манзараси, қулқиллаб оқаётган каналдан өслган ёқимли салқин шабада ҳар қандай одамни ҳам маҳлиё қилар әди. Иброҳимов ўзининг ҳар пайшанба бўладиган агрономия тўгарагини шу ерга кўчирди. У чигит экилган тўққизта яшикни, турли нав чигитнинг ҳосили бўлган пахта толаларини кўрсатадиган жадвалларини, турли-туман диаграмма ва плакатларини келтириб чойхонанинг бир бурчагини эгаллаб олди.

Раҳматилланинг ўрнига келган ёш ўқитувчи Салим Собиров район ва шаҳардаги ёр-дўстларининг ёрдами билан кичикроқ бир кутубхона, қизил бурчак ташкил қилди ва мактаб комсомолларидан бир неча кишини қизил бурчакка навбатчи қилиб қўйди. Бу комсомоллар навбат билан ҳар куни кечқурун келиб чойхўрларни янги китоблар билан танишишар, газета, журналлар ўқиб беришар әди. Салим Собиров катталар мактабини шу ерга кўчирди. Чойхонада дутор, чанг, детекторлик радиоприёмник, шахмат,

девор соати пайдо бўлди, комсомолларнинг ташаббуси билан деворий газета чиқа бошлади.

Аллаким қаердадир кўрганига тақлид қилиб, бинокорлик бригадасининг бошлиғи Тўлаган аканинг ёрдами билан почтахона ташкил қилди. Почтахона орқага қияроқ ўрнатилган узун газета витринасидан иборат бўлиб, унга алифбе тартибида яшиклар ўрнатилган, кимнинг номига хат ёки бошқа нарса келса почталъон адресат номининг бош ҳарфи ёзилган ящикка қўйиб, юбориладиган хат бўлса олиб кетар эди. Район алоқа бўлими бу ишни жуда қулай ва маъқул кўриб, кейинчалик бирмунча колхозларда шундай почтахоналар ташкил қилди.

Ўрмонжон бу нарсаларнинг ҳаммасига бўлажак лаборатория, бўлажак клуб, кутубхона, дам олиш уйи, радиотелефон, умуман янги қишлоқнинг куртаги деб қарап ва бу куртакларниң япроқ отишига катта аҳамият берар эди.

Қурбон ота ўз ишидан, одамларнинг ташаббусидан ниҳоятда хурсанд; ҳар бир фойдали нарсани чумолидай ўз чойхонасига ташиб билан куни ўтганини, ҳориганини билмас эди. Энди унинг хаёlinи банд қилган нарса мактабнинг ўнг томонидан чиқиб катта йўлга туташган кўчанинг охирида қишлоқнинг ҳуснини бузиб турган эски гўристонни кўчириш муаммоси эди. У ўтган йил кузда бу ҳақда Ўрмонжон билан гаплашганида бу иш кўзига жуда осон кўринган, бутун қийинчиллик бирон одамнинг бошлаб беришида деб билган ва шунинг учун ўзи бошлаб беришини ваъда қилган эди; бироқ энди разм солиб қараса бу нарса унчалик ҳам осон әмас, бирорвонинг бошлаб бериши билангина иш битмас экан. Дарҳақиқат, бултур Ўрмонжон айтгандай, бу гапнинг уни чиқарилса хотинлар сочини юлади, хотинларгина әмас, кўпгина эркаклар ҳам тезда рози бўла қолмайди.

Қурбон ота шу ҳақда ўз тенгқурларининг қўйнига қўл солиб кўрмоқчи ва ўз атрофига қарияларни тўпламоқчи бўлиб, бу кўчага иморатлар туша бошлагунча айтишининг ҳожати бўлмаган бу гапни ошкора қилиб қўйди. Бунинг зарари шу бўлдики, арвоҳ, ўликнинг тирилиши, мункарнакир, қиёмат ва ҳоказолар тўғрисида гап кўпайди, ўликлар хизматида кун кўриб юрганлар жонланиб қолди; фойдаси шу бўлдики, шу чоққача бу тўғрида ўйламаган одамлар ўйлаб, дарҳақиқат, гўристонни эртами-кечми бу ердан кўтариш зарур әканлигини англашди ва Қурбон ота шу ишни бошлаган вақтда унинг ёнига кирадиган одамлар пайдо бўлди. Бу ишда Қурбон отага биринчи бўлиб қўл бермоқчи бўлган одамларнинг әнг биринчиси Абдусамадқори әди.

Ўрмонжон Қурбон отанинг бу ишни бемаслаҳат — бемаврид бошлаганига аввал хафа бўлди; Абдусамадқорининг бу ишга бош қўшганидан шубҳага тушди: бу тулки тумшугидан илинаётганини сезиб шунақа йўллар билан чап бермоқчи ёки бу ишда жоҳил одамларнинг жигига тегиб бирбалони бошламоқчи әмасмикин?

Иброҳимовнинг мушоҳадасига кўра, Абдусамадқорининг сўнгги кунлардаги қадам олиши Ўрмонжоннинг ҳар иккала тахмини ҳам тўғри эканинни аниқ кўрсатиб турад әди.

Ўрмонжон бир куни районга бориб жуда кеч қайтди. У ечиниб әнди ювинаётган әди, эшик тақиллади ва Ўрмонжон товуш бергунча эшик қия очилди-да, қорининг товуши эшитилди:

— Ўрмонжон ака...

— Киринг, киринг, — деди Ўрмонжон.

Қори кирди. У узоқ йўлдан бениҳоя чарчаб келгандай оёқ устида зўрга турад, юзи янги касалдан тургандай, сўлғин ва оқарган бўлиб, чироғининг хира шуъласида қўрқинч-

ли кўринар эди. У, қўлинин қовуштириб, бошини қўйи солиб ҳазин бир товуш билан узр сўради:

— Бемаҳалда сизни бевозта қилдим.

— Майли, майли,— деди Ўрмонжон ва столнинг ёнига курси суриб берди, — ўтиринг, иш бўлганда bemahal деган гап йўқ.

Қори ерга қараб ўтирар экан, чинчилоги билан кўзининг икки бурчини артди, «қилт» этиб ютинди-да, ёшли кўз билан Ўрмонжонга қаради. Унинг томоғи пирпираб учар, қовоғи шишинқирагандай кўринар эди.

— Ким хафа қилди, қори ака?— деди Ўрмонжон.

Қори бирдан иккала қўли билан бошига урди-ю, ҳўнграб, ўзини Ўрмонжоннинг оёғига ташлади. Ўрмонжон дарҳол уни ушлаб кўтарди.

— Қора ака! Девона бўлдингизми... Бу нимаси!

Қори ўзини у ёққа-бу ёққа отиб, бошини столга урмоқчи бўлди ва ҳеч тоқат қилиб бўлмайдиган бир дардан бутун вужуди қақшаб, тин ололмаёттандай хириллади: сўнгра, бирдан қаддини ростлади-да, этигининг қўнжидан дандон соплик пичоғини олиб Ўрмонжонга берди ва бўйини тутди.

— Ўринг, Ўрмонжон ака! Сўйинг! Қоним оёғингизга тўкилсан... Вой десам инсон эмасман!..

Ўрмонжон пичноқни олиб столнинг устига ташлади ва қорини турғизмоқчи бўлди. Бироқ қори ўзини ёнбошга ташлаб бошини столга гурсиллатиб урди ва яна урмоқчи бўлган эди, Ўрмонжон тутиб қолди.

— Тўхтанг! Нима гап ўзи? Гапиринг!

— Айтсам тилим куяди, айтмасам дилим куяди,— деди қори йиглаб. Унинг чаккасидан қон оқар эди.— Менга шунча яхшилик қилдингиз... Янги келган вақтингизда мени ёмон йўлдан қайтардингиз... Бутун звено олдида таъзир бериб одам бўл дедингиз... Мен, шу яхшиликларингизни тушунмасдан кўнглимда сизга қарши кек сақладим...

Ўрмонжон унинг қаршиисига ўтириди.

— Нима қилдингиз кек сақлаб?

— Душманларингиз Канизак тўғрисида ҳар хил гап тарқатганда, мен ҳам душманларингиз қаторига бир қадам қўйдим. Сизни Зиёдахон билан гап қилдим.

— Зиёдахон билан? Бундан ҳеч хабарим йўқ.

— Зиёдахон билан,— деди қори чаккасининг қонини этагига артиб,— шу гапни чиқаришга чиқардиму, қилган яхшиликларингиз әсимга тушиб пушаймон бўлдим.

Ўрмонжон унинг кўкрагига қараб тепиб юбормаслик учун ўрнидан туриб нарироқ борди ва вужудини ларзага солаётган титроқни босгандан кейин мумкин қадар мулоийм товуш билан:

— Фақат шуми? — деб сўради.

— Шу... Нега фақат шуми дейсиз, бу озми? — деди қори йиглаб.— Сиздай одамга бундай бўътон қилгандай кўра ерга кирганим яхши әмасми?

— Хўп майли,— деди Ўрмонжон,— бўлар иш бўлиб ўтиппи. Энди бемалол, бехавотир ишлай беринг. Бу гап шу ерда қолади. Мана, ҳадемай иккинчи чопиқ бошланади, кетмоннинг каттарогини қайраб туринг. Менга бошқа сўзингиз бўлмаса сизга жавоб.

Қори этаги билан юз-кўзини артиб ўрнидан турди.

— Қуллуқ... раҳмат! Энди бир шаҳарга тушиб, уч-тўрт кун ёзилиб келсан... жуда-жуда сиқилиб кетдим.

— Буни Бўтабой акадан сўранг,— деди Ўрмонжон.

— Хўп... Ҳа, айтгандай, хабарингиз бор, Қурбон ота ҳеч кимнинг әсиға келмаган бир яхши ишни бошладилар. Шу тўғрида мен шу яқин йилларда ўлик кўмган беш-олти киши билан гаплашдим. Ҳаммаси рози. Мен аввал анча даҳмаза бўлармикин деб ўйлаган әдим, йўқ, қийин әмас әкан. Қурбон ота бошлаб берсалар, у ёғи ҳеч гап әмас. Агар

ижозат берсангиз, шаҳардан қайтиб келганимдан кейин шу ишни бажариб қўя қолсак. Чўзишнинг ҳожати йўқ, сабаб десангиз, одамлар тайёр... Беш-олти кечалик гап. Ҳўп десангиз ўликларнинг әгаларини ёнимга оламану кўпи билан уч-тўрт кечада саранжомлаб ташлайман. Бу иш кечаси бўлгани маъқул. Кундузи бўлса, ўзингиздан ўтар гап йўқ, кунукроқ кўринади. Йиғи-сиғи бўлиши мумкин, одамлар ишдан қолади...

— Гўристон билан сизнинг ишингиз бўлмасин. Ҳозир бу нарса жуда зарур ҳам эмас... Зарур бўлганда халқнинг ўзи талаб қиласди.

Қори таъзим қилиб чиқиб кетди.

Ўрмонжон ўйлаб ўйига етолмас әди. Эйёдахон тўғрисида ҳеч қандай гап йўқ әди-ку, нега қори бундай деди? Ҳақиқатан шундай гап чиқарганми ёки шу билан ўзининг юрагини менга очган ва садоқат кўрсатган бўлиб, Канизак тўғрисидаги гаплар бошқалардан чиққанлигини исбот қилмоқчими?

Эртасига Ўрмонжон бу воқеа ва ўзининг мулоҳазаларини Иброҳимовга айтди. Иброҳимовнинг фикрича, қорининг бу қилмиши унинг ҳадиксираб қолганинигина эмас, талвасага тушганини кўрсатар әди.

Курбон ота қўлидан самоварчиликдан бошқа иш ҳам келаётганига, Ўрмонжон айтгандай, янги қишлоқни буни ёдга келтиришда қатнашаётганига бениҳоя хурсанд бўлиб, гўристонни кўчириш ҳақида ўз тенгқурларини йиғиб ишни қачон ва қандай бошлаш тўғрисида маслаҳат қилди. Унинг назарида, ҳозир шундан зарурроқ иш йўқдай кўринар әди. Абдусамадқорининг айтишига қараганда, әгаларнинг қаттиқ талабига кўра янги гўристонга кўчирилиши зарур бўлган қабрларнинг сони саккизта бўлиб, бундан ташқари яна ўн бир киши ҳали тайнинли бир гап айтмаяпти. Қори ишни кўпайтирмаслик учун шу одамлар билан гаплашишни, агар илож топилса бу қабрларни кўчирмасликни лозим кўрар әди.

Мана шу кунларнинг бирида саҳар чоғи Ўрмонжоннинг әшигини кимдир қоғди. Ўрмонжон чиқди. Самандаровнинг товуши әштиилди.

— Туринг, гафлатда ёта берасизми? — деди у тегишиб.

Ўрмонжон уни уйга олиб кириб чироғни ёқди.

— Тинчликми? — деди Ўрмонжон кўзини ишқалаб.

— Мана әнди тинчлик бўлади,— деди Самандаров кулиб.

— Бу нима деганингиз?

— Қорини кузатиб келаётубман.

Ўрмонжон унинг қамоққа олинганлигини дарров сезган бўлса ҳам яна сўради:

— Қаёққа?

— Қурбон отангиз ғалати зийраклик қилипти-да, чолгэ қойил қолиш керак. Гўристондан ўн саккизта беш отар, ўттиз битта ўн бир отар, олтига берданка; икки сандиқ ўқчиқди.

Ўрмонжоннинг кайфи учиб кетди.

— Милтиқ? Ўқ? Гўристонни кўчириш ишига қори шунинг учун бунчалик жон-жаҳди билан киришган эканда? Мен бу ишга фақат иғвогарлик мақсадида, халқнинг жигига тегиши мақсадида қўл ураётитпи деб ўйлаган эдим. Демак, бу яроқларни янги гўристонга кўчириш пайида юрган экан-да.

— Кечаси яна икки киши тутилди, бири қорининг божаси Жавдот Наим, иккинчиси Хўжақишлоқдан. Бу одамини танигандай бўлдиму лекин өслолмадим. Мирҳомидхўжанинг ўғлига ўхшатдим. Милтиқларни олиб автомобилга юклашаётганда: «Майли, олинглар, милтиқ керак бўлганда яна топамиз», дейди. Буларнинг бошқа шериклари ҳам бўлса керак.

Самандаров кун тиф тортганда Ўрмонжон билан хайрлашиб чиқиб кетди.

Икки кундан бери гоҳ севалаб, гоҳ шиддат билан ёғаётган ёмғир ҳамма ёқни увитиб юборди. Капсанчиларда чакка ўтмаган уй кам қолди. Омонат турган кўп деворлар қулади. Ариқлардан, торкӯча ва кўчалардан лойқа сув оқа бошлади.

Сидиқжон овқатдан кейин қўлига гавета олган өди, бир мақолани яримлатмасдан кўзи сузилди, боши қуийи солинди, узун хуррак тортди-да, ўзининг хуррагига ўзи уйғониб, бирдан бошини кўтарди ва Канизакка қаради. Ҳошимжонга алифбе ўргатаётган Канизак кўз қирини ташлаб жилмайди.

— Жўхори қўрияпсизми?

Сидиқжон хижолат бўлиб ташқарига қаради.

— Нима бало бўлди, осмоннинг таги тешилдими!

— Шуни айтинг! Чопиқни бошламай турсак ҳам бўлар әкан. Юрагингиз мунча ҳам кенг бўлмаса, кўзингизга уйқу келганига ҳайронман!

— Аввали шуки, ухлаганим йўқ, ундан кейин...

— Хуррак-чи?

— Мушукмижозман: жоним роҳат қиласа ухламасам ҳам хуррак торта бераман.

— Мунча яхши... Ҳа, ундан кейин нима демоқчи әдингиз?

— Ундан кейин ухласам-ухласам бояги гапингиз хаёлимдан кетмаётитти. Бу нарсани мен ҳам кўрганман — ҳақиқатан йўл бўйидаги баъзи ғўзалар шохлайди. Лекин бунга әътибор қилмаган әканман. Нима учун шундоқ? Бунинг тагига етсак аломат иш бўлар эди!

— Рауф акамнинг олдиларига бормаймизми? Айтамиз, сиз ҳам кўрганингизни айтасиз. У кишидан бир гап чиқади.

Сидиқжон бу тақлифга кўнди, лекин ўрнидан туриши жуда қийин бўлди; турганидан кейин ҳам шошилмасдан дарчанинг олдига борди ва осмонга қараб:

— Емғир жуда қаттиқ қуядиганга ўхшайди-ку, ҳавонинг авзойи бузук,— деди.

— Туз әдикки, әриб кетамиэми?

— Эриб-ку кетмаймиз, лекин... ҳозир ўртоқ Иброҳимовнинг ишидан қўймасагу, әртага айта қолсакмикин дейман.

— Сизга нима бўлди, Сидиқжон ака? Наҳот шу нарса юрагингизга жиндеккина бўлса ҳам ўт солмаса! Ҳозиргина «бунинг тагига етсак аломат иш бўлар әди» демадингизми? Тил учida айтган әкансиз-да бу гапни.

— Нега тил учida бўлади?

— Бўлмаса бунинг тагига ўзимиз етмасак ким етади? Бирор келиб бизга рапорт берадими? «Эртага» әмиш! Қандоқ сабрингиз чидайди?

Сидиқжон этигини кийди. Унинг бу тарҳашлигига сабаб Канизак пайқаган нарса юрагига ўт солмагани әмас әди,

Сидиқжоннинг собиқ хотини Шарофат келиб қилган можаро ўша вақтда одамларнинг эътиборини унча тортмаган бўлса ҳам, бу можаро қорининг минг бир қилимишдан бири әканлиги маълум бўлгандан кейин оғизга тушиб кетди: мажлисларда, хусусий суҳбатларда қоридан сўз очган ҳар бир киши «Канизак билан Сидиқжон можароси»ни айтмасдан қўймас әди. Номлари доим бирга айтилиши, одамлар иккаласига «жабрдийдалар» деб қараши Сидиқжон билан Канизакни бир-бирига жуда яқин қилиб қўйди. Буларнинг ҳар бири гапда, муомалада әнди ҳаммага маълум бўлиб қолган ҳақиқатни таъкидлашга тиришар, бир-бирига муносабатда одамларга гўё: «Мана, кўрдиларингми, орамиэда ҳеч қандай сир йўқ», демоқчи бўлар әди.

‘Анзират хола қизи Кимсанойнинг кўз ёришига кетганича бедом-дарак бўлди. Бир ҳовлида ёлғиз туриш ноқулай бўлмасмикин деган андишани на Канизак хаёлига келтирар әди, на Сидиқжон. Булар энди бир ҳовлида туриш әмас, бир уйда ётиб қолишни ҳам бироннинг диққатини жалб қиласиган ҳодиса деб билишмас әди. Бир куни Сидиқжон ҳаммом қурилишига ҳашарга бориб жуда чарчаб келди-ю, шу уйда ухлаб қолди. Канизак уни уйғотгани кўнгли бўлмай устига кўрпа ташлади қўйди. Яна бир куни, қаттиқ шамол кечаси, Канизак унга: «Шамол жуда ваҳимали гувиллаётитпи, қўрқаман, шу ерда ётақолинг», деди. Сидиқжон дарчанинг олдида, Канизак икки бола — Сидиқжоннинг ўғли Насибали билан Ҳошимжонни олиб тўрда ётди.

Булар орасидаги бетакаллуф муомала ва муносабатга одамлар ўрганиб қолди. Буларнинг бири бўлмаса иккинчиси, доим кўвойнак тақиб юрадиган одам бирдан кўвойнагини ташласа ғалати кўрингандай, одамларнинг кўзига әриш кўринар әди.

Бироқ бу муомала ва муносабатларга, бу яқинликка иккови ҳам бир ҳовлида турган, айниқса қуруқ туҳмат билан бир келида туйилган икки бегуноҳ орасида пайдо бўлган табиий бир муносабат, табиий бир яқинлик деб қарап, бошқа бирон маъно беришни хаёлига ҳам келтирмас әди. Бир куни икки орадаги бу муносабатга тўсатдан ўзгача бир маъно кириб қолди.

Бундан бир неча ҳафта бурун Мавлонбеков икки әркак ва бир қиз билан келди. Булар колхоз идораси, клуб, магазин, меҳмонхона қурилишларини кўздан кечиришди, сўнгра, Бақақуруллоққа келиб электростанция бўлаётган водокачкани кўришди. Эркакларнинг бири марказий газетанинг мухбири, иккинчиси инженер, қиз ёса Москвада институтни битириб ҳозир шу инженернинг қўлида тажриба кўриб юрган әкан. «Электростанцияни тезроқ бити-

риш учун ўртоқ Мавлонбеков катта инженер олиб келиптилар» деган хабар бирпасда бутун қишлоққа тарқалди-да, бир талай одам йигилди.

Сидиқжон Москвада инженерликка ўқиб келган бояғы ўзбек қизга зўр ҳавас билан тикилиб ўзининг зое кетган болалиги ва ёшлигига афсусланиб турган эди, Канизак уни секин туртиб: «Ҳа, Сидиқжон ака, мунча тикилиб қолдингиз, чиройли эканми?» деди. Сидиқжон негадир, худди хиёнат устида қўлга тушгандай, гангиги қолди ва беихтиёр: «Сизга ўхшар экан» деб юборди. Сидиқжон бу гапни қандай беихтиёр айтган бўлса, Канизак ҳам шундай бир гап айтди: «Ундоқ бўлса ўзимга қарай қолинг-да» деб кулди. Шу-шу бўлди-ю, икки орадаги муносабатда янги ёки аслида бўлиб ҳозир юзага чиқсан иккови ҳам сўз билан ифода килолмайдиган бир нарса пайдо бўлди.

Мана шу кунларнинг бирида кечқурун ишдан қайтишда Канизак Сидиқжонни Йброҳимовнинг уйига бошлади. Йброҳимовнинг қизил чойхонада мунтазам ўтказадиган агрономия машғулотига Сидиқжон қатнашиб турса ҳам, уйига кам кирап эди. Уч томони қамиш билан ўралган ҳовлига аввал Сидиқжон кирган эди, унинг эшиги олдида узала тушиб оғзи билан пашша тутиб ётган каттакон сариқ ит бошини қўтариб ириллади. Канизак дарров олдинга ўтиб «Барбос, Барбос» деган эди, ит думини қимирлатди. Унинг оёғини, әтагини ҳидлади, қўлинин ялади; Канизакнинг орқасидан секин ўтиб кетган Сидиқжонга бир қарди-ю, индамади. Сидиқжоннинг кўнгли бир оз ғаш бўлди, лекин бу ғашликнинг сабабини ўзи ҳам аниқ билмас эди. Бироқ бу ғашликнинг сабаби ҳаял ўтмай маълум бўлди: Йброҳимов сабзи тўғраётган экан, унинг: «Қани, азиз меҳмонларим, ош қилиб берайми, шовла?» деган саволига қарши Канизак: «Қозонингиз биттами?» деб хандон ташлаб кулганда икковининг хийлагина яқин эканлигини кўр-

сатадиган бу ҳазил Сидиқжоннинг юрак-бағрини ўртаб юборди. Бу — рашк, ҳақиқий рашк әди.

Шундай қилиб икки орадаги муносабатда инженер қиз туфайли пайдо бўлган ёки юзага чиқсан янги нарса кун сайин тўлароқ мазмун касб этар, ҳар иккаласи учун ҳам табиий, зарурый тусга кириб борар, лекин ҳеч бири бу тўғрида очиқ гапирмас әди.

Канизак «Юринг, Рауф акамнинг олдиларига борамиз» деганда Сидиқжоннинг оғир қўчишига, тарҳашлик қилишига сабаб Канизак пайқаган нарса юрагига ўт солмаганлиги әмас, Канизакнинг ҳар баҳона билан Иброҳимовнинг уйига бораверишни хушламаганлиги әди.

Булар Иброҳимовнинг ҳовлисига кирганда, уйдан кўп кишининг қаҳқаҳаси эшитилди, очиқ турган бир қанотли деразадан Энёдахоннинг боши кўринди.

Ичкарида Каромат, Манзура, Рўзимат, Эргашбой, Қамбарали, Рисолат ва Болтабойлар ўтиришган экан. Иброҳимов китоблар тахланиб ётган стол орқасида папирос чекиб оғзидан ҳалқа-ҳалқа тутун чиқариб илжайиб ўтирас, унинг рўпарасида Энёдахон кўкрагини столга бериб журналдан ниманидир ўқир әди. Канизак оёқ учида юриб Болтабойнинг ёнига — скамейкага, Сидиқжон әса Рўзиматнинг ёнига — сандиққа ўтириди. Булар кирганда ўқишдан тўхтаган Энёдахон давом этмоқчи бўлган әди, Иброҳимов Канизак билан Сидиқжонга изоҳ берди:

— Қуръон бўйича одамнинг яратилиши тўғрисида ҳикоя ўқиётимиз,— деди.

Энёдахон давом этди:

— ...Самовий кунларнинг бири. Офтоб тиккага келиб, қайси томонга ботиш тўғрисида худодан амр кутмоқда. Арши аъло одатдагича жимжит. Посбон малаклар худонинг амри билан мудрамоқда, эснамоқда. Онда-сонда хира кўланкадай кўринган малаклар әринибгина қанот қоқмоқда. «Пардайи асрор» олдида ағнаб ётган Исропил

учиб юрган малакларга қараб хаёл сурмоқда: «худойи таоло биз фаришталарни қанот қоқмай учадиган қилса..

Ундан ҳам яхшироғи — борадиган еримиз ўзи кела қолса...»

Эргашбой пик этиб кулиб юборди ва Болтабойга қараб:

— Фариштанинг дангасаси Қутбиддиндан ҳам данга-сароқ бўлар экан-а! — деди.

Қутбиддин дангасаликда ҳаммага маълум бўлса керак, кулги кўтарилади.

Зиёдахон давом этди:

— ...«Пардайи асрор»нинг бир чеккаси кўтарилиб, худонинг олдидан Жабраил чиқди. У ҳаддан ташқари хомуш, касал товўқдай қанотлари осилган эди. Исрофил уни ҳеч қачон бу аҳволда кўрмагани учун шошиб: «Ё Жабраил, бу паришонликнинг боиси надир?» деб сўради. Жабраил ҳилпираб турган оппоқ булатнинг бир чеккасига бурнини артар экан: «Ҳаллоқи олам Одам яратмоқни ихтиёр эгиди. Унинг хоҳиши будирким, Одамни яратиб бизни унга сажда қилдирса», деди. Бу хабар бирпастда бутун арши аълога тарқалди. Фаришталар уяси бузилган аридай тўзиди. Ҳамманинг юзидан, ҳаракатидан зўр бир мусибат акс этар эди. Эртасига худо ўз ниятини амалга оширишга киришди. Унинг амири билан Жабраил ерга тушиб икки қанотида бир замбил тупроқ олиб чиқди. Яна бир фаришта қора булатдан бир парчасини йиртиб олиб тупроқнинг устига сиқди...»

Зиёдахон баъзи эски сўзларга тили келишмай ва баъзи жумлаларни маъносига мос келмайдиган оҳангда ўқиб тингловчиларга уқтира олмагани учун ҳикоянинг давомини Иброҳимовнинг ўзи ўқиди. У ўқиганда ҳикоя жуда ҳам жонланиб кетди; хусусан одамнинг лойдан ясалишини, унга жон бағишланишини, шайтоннинг Одамга сажда қилишдан бош тортиб айтган сўзларини, Одам кўзини очи-

ши билан хотин талаб қилганини, унинг чап қовурғасидан Ҳавво яратилгандан кейин иккovi қўл ушлашиб жаннатга тушиб кетганини шундай қизиқ қилиб ўқидики, ўтирганлар кула бериб қотиб қолиши. У, ҳикояни ўқиб бўлганидан кейин, Одамнинг бино бўлиши тўғрисида фан нима дейишини сўзлаб берди ва Қамбарали акага қараб:

— Саволингизга жавоб бердимми, йўқми? — деди.

— Тўла жавоб бердингиз, қониқдик, ука,— деди Қамбарали ака.

Унинг сўзини ҳамма тасдиқлади.

— Мумкинми? — деди Каромат,— қуръон бўйича Одамнинг яратилиши ҳақиқатан шундай кулгилими ёки ёзувчи кулиб ёзганми?

Иброҳимов жавоб берди:

— Дин ҳамма нарса худонинг хоҳиши билан бўлади деб таълим беради. Чингизхон ўн икки миллион одамнинг ўлимига сабаб бўлган. Демак, диннинг таълимотига кўра, Чингизхоннинг инсониятга қарши қилган бу жинояти жиност әмас, худонинг хоҳиши бўлиб чиқади. Агар бирои ёзувчи диннинг шу таълимоти тўғрисида ҳикоя ёзмоқчи бўлса кулмасдан ёза оладими? Иёқ, чунки ўзи кулгили. Яна кимда савол бор?

— Менда,— деди Манзура,— ўртоқ Дарвиннинг қилган ишларини гапириб берсангиз...

Унинг ёнида ўтирган Рўзимат тирсаги билан секин туртиб:

— «Ўртоқ Дарвин» әмас, Дарвин инглиз олими,— деди.

Манзура, бир оз қизариб, Иброҳимовга қаради.

— Шундоқми, Рауф ака? Инглиз олими бўлса ҳам ҳақиқатни гапиргандан кейин... ўртоқ дейилса бўлаверади әмасми?

— Бўлади, бўлади,— деди Иброҳимов.

— Саволим шуки, нима учун ҳамма ҳукуматлар Дар-

вии қолдириб кетган илмни ўз халқига тушунтириб динга қарши ташвиқот юргизмайди?

— Жуда яхши савол! — деди Иброҳимов, — қани, бу саволга ким жавоб беради? Талабгор борми? Дин халқ учун афюн бўлгани ҳолда нима учун ер юзидан ҳамма ҳукуматлар, айниқса Англиядек мамлакатларнинг ҳукуматлари динга қарши ташвиқот юргизмайди?

Болтабой қўл кўтарди.

— Дин эксплуатация қуроли. Ўша мамлакатларда ҳукумат эксплуататорлар қўлида.

— Тўғри, — деди Иброҳимов, — бир мисол: Ҳиндистонда ҳиндилар бор, мусулмонлар бор. Ҳиндилар ҳўкизга топинади, мусулмонлар шу ҳўкизни қурбонликка сўяди. Шу асосда бу икки халқ бир-бирига душман. Бу душманлик бу икки халққа ўзининг ҳақиқий душманини кўргани, бу икки халқни бирлашгани, бирлашиб ўз озодлиги учун курашгани қўймайди. Шундоқ әкан, Англия ҳукуматининг Ҳиндистонда динга қарши ташвиқот юргизиши — Ҳиндистон халқларининг оёқ-қўлини боғлаган арқонлардан бирини ўз қўли билан қирқиши бўлар эди.

Суҳбат тугагандан кейин одамлар тарқалди. Иброҳимов буларни кузатгач, Сидиқжонни столга яқинроқ таклиф қилди. Сидиқжоннинг юзида бу ерга келаётган вақтидаги кўнгил ғашлигидан асар қолмаган, аксинча, нимандир хурсанд кўринар эди.

Канизак столда турган каттакон бир китобни варақлар әкан, әркаланган товуш билан:

— Рауф ака, шунаقا китобларга қачон тишим ўтадиган бўламан? — деди.

Сидиқжон шу китобларни «шариллатиб ўқийдиган» Иброҳимовга шундай ҳавас билан қараб турган эди, Канизакнинг товушидаги әркалиқ оҳангини пайқамади.

— Ўзингизга боғлиқ, — деди Иброҳимов, — гап фақат шундай китобларни ўқий бошлашдагина әмас. Агар гап

Фақат шундай бўлса, бунаقا китоблар ўзбек тилида ҳам бор, яна бўлади. Рус тилини ўрганиш керак. Менимча рус тили бизнинг учун она кўкраги! Она кўкраги! Рус тилини ўрганаман десангиз, ўрганамиз десаларинг, ташкил қилишимиз мумкин. Сиз унча-мунча биласиз, қаерда ўргангансиз?

— Наманганда, Надежда Павловна деган тутинган опам бор эдилар, ўша киши ўргатгандар.

— Аслингиз Наманганданми? — деди Иброҳимов.

— Йўқ, ўша ерда эсимни танигандар,— деди Канизак ва ўйчан давом этди,— мени Надежда Павловна Тошкентга ўқишига юборган эдилар, кетаётин нима хаёлга бордиму, шу ерда поезддан тушиб қолдим. Кета берсам бўлар экан... Ўқиши керак эди... Ўқийман, Рауф ака! Менга рус тилини ўқитинг. Сидиқжон ака, сиз ҳам ўқийсизми?

— Ўқийман! — деди Сидиқжон.

— Бўпти! Ўқиймиз! Ўқийман деган одам кўп. Сизга рўйхат қилиб бераман. Энди, Рауф ака, биз сизнинг олдингизга бир иш билан келган эдик.

Канизак аксари йўл бўйидаги ғўзалардан баъзилари шохлаб кетиши тўғрисидаги ўзининг мушоҳадаларини ба-тафсил сўзлаб берди. Иброҳимов унинг сўзига жуда диққат билан қулоқ солди, икковига кўп саволлар берди, нималарнидир ёзиб олди. Бироқ Канизак боя уйда кўзига жуда катта кўринган бу нарса ҳозир Иброҳимовга сўзлаб берганида, жуда кичкина, ҳовлиқишига арзимайдиган нарсадай бўлиб чиққанини пайқаб бир оз хижолат тортди. Буни Сидиқжон ҳам сезди-да:

— Эҳтимол бундан ҳеч нарса чиқмас, шундоқ бўлса ҳам сизга айтгимиз келди,— деб қўйди.

Иброҳимов, қаламнинг орқаси билан бурнининг учини қашлар экан, ўйчан жавоб берди:

— Гап бундан бир нима чиқиши-чиқмаслигида әмас.

Буни, албатта, кўрамиз, текширамиз, ўрганамиз, тагига етамиз, ўзимизнинг кучимиз етмаса Иван Петровичга арз қиласмиз... Ҳа, айтгандай, устод шу яқин кунларда уруғчилик совхозига келар эканлар. Ҳат олдим. Ҳўш... гап шохлаган ғўзани текширишдан бир нима чиқиш-чиқмаслигида эмас, гап илгари сарисоб солмаган, илгари пайқамаган нарсаларимиизга ҳозир сарисоб соладиган бўлганимиэда. Бу жуда-жуда муҳим нарса. Ҳамма гап бизда мана шундай кўз пайдо бўлганлигида. Модомики, бизда шундай кўз пайдо бўлиптими, бу сафар пайқаганимииздан бир нарса чиқмаса, янаги сафар пайқаганимииздан чиқади, албатта чиқади, жуда катта нарсалар чиқади.

Дарҳақиқат Йброҳимов булар айтган бир неча туп ғўздан ҳам кўра буларнинг шунга эътибор қилишганига кўпроқ аҳамият бергани, ўша ғўзани текширишдан чиқадиган ҳар қандай яхши натижадан ҳам кўра буларда «шундай кўз» пайдо бўлганига хурсанд эканлиги кўриниб турар эди. У одамларда пайдо бўлган ва пайдо бўлаётган «шундай кўз»нинг моҳияти, бунинг сабаблари, натижалари тўғрисида узоқ ва зўр шавқ-завқ билан сўзлади. Унинг сўзларидан кейин, ҳар иккаласининг ҳам назарида, бу мушоҳада тамоман янги, икковининг ҳам хаёлида бўлмаган жуда катта бир мазмун касб әтди. Ҳар иккаласи ҳам пахта майдонида бу кунгача кўрган ҳар бир икирчикирни хаёлидан кечириб, булар орасидан яна шундай, шу чоққача пайқалмаган бирон нарса топишга уринар эди.

Булар кетмоқчи бўлиб қўзғалган пайтда Ўрмонжон кириб келди. У, айтидан, Йброҳимовга бир оғиз гап айтгани йўлакай кирган экан, буларни кўриб ўтироди ва Сидиқжон билан гаплашадиган гапи борлигини айтиб, унинг қолишини сўради. Унинг ҳамма ва ҳар ким билан ҳамма вақт ва ҳар хил мавзуда лозим бўлса ошкора, лозим бўлса холи гаплашуви одатдаги бир нарса бўлгани учун ик-

кови ҳам бунга айрим эътибор бермади. Канизак чиқиб кетди.

Ўрмонжон стол ёнига ўтириб китобларни бир-бир кўрди ва булардан бирини Сидиқжонга кўрсатиб:

— Буни ўқидингми? — деди.

— Йўқ, Ўрмонжон ака.

— Ўқигин, яхши китоб, муҳаббат нима эканини билаб оласан.

— Сидиқжон акам муҳаббат нима эканини билсалар керак,— деди Иброҳимов кулиб.

— Шунақами, биласанми? — деди Ўрмонжон ҳам кулиб.— Қаёқдан биласан? Шарофатни яхши кўриб олмаган экансан, ундан кейин хотин кўрган әмассан...

— Шарофатни яхши кўрмаганлигим муҳаббат нима эканини билганим әмасми? — деди Сидиқжон ерга қараб.

— Эҳтимол... хўп, ҳозир имтиҳон қилиб кўрамиз. Менинг иккита танишим бор, иккови, нима десам экан, бир-бирига ниҳоятда меҳрибон, бир-бирига содиқ, бир-бирига ишонади, бир-бирининг кўнглига қарайди, бир-бирини тенг кўради; бирга ишлайди, бирга юради, туради; бир-бирига жуда муносиб... Қалай дейсан, шулар бир-бирини яхши кўрадими, йўқми?

Сидиқжон бу гапнинг замирига тушунди-да, билинрабилинмас қизариб:

— Шундоқ бўлса ҳам тўғриликча гаплашиб юрган бўлса ажаб әмас,— деди.

— Бир-бирини жиндай рашк ҳам қилса-чи?

Сидиқжон Канизакни ҳаммадан, айниқса ўзидан қизғаниб юрганини Иброҳимов сезар, лекин бундан Ўрмонжон хабардор эканини билмас әди; Ўрмонжон шу тўғрида гап очиб унга бирон насиҳат қилмоқчи бўлганини сезиб суҳбатдан четланди, уйнинг бурчагида валиллаб турган примуснинг устидаги идишдан бир қошиқ куйдирилган тупроқни олиб оппоқ қофозга ёйди,

ҳидлади, қошиқ билан нари-бери сурди, яна ҳидлади...

Сукут қилиб қолган Сидиқжон, ниҳоят. бошини кўтарди.

— Очиғини айта беринг, Ўрмонжон ака, бизнинг тўғримизда гапираётисиз. Бизнинг орамизда ҳеч гап йўқ, қасам ичаман. Ҳеч гап йўқ! Ҳеч гап бўлмаганидан кейин рашк ҳам бўлмайди.

— Рашк тўғрисида кейин гаплашамиз. Шу чоққача ораларингда ҳеч гап бўлмаган бўлса, энди бўлиши керак. Бунга нима тўсқинчлик қиласди? Менимча, фақат бир нарса: «Мен сени яхши кўраман» дегани Канизак тортинади, сен... сен, билмадим нимани андиша қиласан. Бирон андишанг бўлса ўйлаб, салмоқлаб кўр. Шуни ҳам айтиб қўйай: ҳозирги замонда хотин баҳтини эрдан кутмай, ўз баҳтини ўзи яратади. Канизак шундай хотинлардан. Энди рашк тўғрисида. Икки жинс бир ёстиққа бош қўйиши билан, масаланинг бир томонини олиб айтганда, ўтмиш ва келажак наслни бир-бирига боғлайдиган ҳалқа вужудга келтиради ва бу ҳалқани вужудга келтирадиган ҳар икки томон ҳам ўзини ўз жинсининг әнг мукаммали деб билади. Орага бошқа бирорвинг суқилиб кириши «бу жинснинг әнг мукаммали сен эмас, мен» дегани бўлади. Бу, албатта ҳақорат бўлади. Ҳар бир ҳақоратнинг алами бўлади. Рашк, менимча, мана шу ҳақоратнинг алами ва шундан келиб чиқадиган туйғу. Модомики, шундоқ әкан, рашк тўғрисида бирорга айб тақиши қийин. Лекин худди шундай рашк, масалан, хўрозда ҳам бор. Рашкка очиқ кўз билан қараш учун ақл-идроқи бўлмаган ва шунинг учун бу туйғуга қул бўлган хўрозвинг рашки билан ақл-идроқи бўлган, демак, ҳар нарсага очиқ кўз билан қарай оладиган, демак, ҳамма нарсани, ҳатто туйғуларини ҳам ўзига бўйсундиришга қодир бўлган инсоннинг, айниқса ўқиган, ўқиётган, ян-

ги ҳаёт йўлига кирган Сидиқжон аканинг рашки орасида фарқ бўлиши керакми, йўқми?

Сидиқжоннинг кўзлари олайиб кетди.

— Ахир, мен... Канизакка бир нима деган бўлсам тилим кесилсан!

— Сабр қил,— деди Үрмонжон қўлини кўтариб,— бир нима демаганингга, демаслигингга ишонаман. Лекин рашк қитиқлаган кезларда чеҳранг ўзгаради. Мен буни ўз кўзим билан кўрганман. Эсингда борми, райондан театр кўриб келаётган кечамиз аравада Сотиболди ашула айтамиз деб Канизакни қистади, кўнмагандан кейин сочидан тортди. Шунда қандай аҳволга тушганлигинг ўтиришингдан маълум бўлиб турган эди.

Сидиқжон ҳарчанд ўзини тутишга ҳаракат қилса ҳам бўлмади — пиқиллаб кулиб юборди.

— Мен рашк қилганим йўқ... Хотин кишининг сочидан тортиш тўғри әмас-да, ахир!

— Эҳтимол, лекин Сотиболди бошқа хотиннинг сочидан тортса, бунинг тўғри-нотўғрилиги сени унча ҳам ташвишга солмас эди. Ҳўш... шунаقا, чеҳранг ўзгаради. Канизак зийрак жувон, хусусан сенга келганда яна ҳам зийракроқ — буни пайқайди, пайқаганидан кейин кўнглингга қараб иш тутади... Кейинги вақтларда мана шу нарса сезилаётитпи, сезилаётитпи әмас, очиқ кўринаётитпи. Канизак илгари мажлисларда рўпара келган жойга ўтира берар эди, ҳозир ўзини хотинлар тўпига уради; ударникларнинг район слётига вакил қилиб сайлаётганимизда сенга қараб кўзи жовдираб қолди; тўгаракка сен келмаган кунинг у ҳам келмайди... Канизакни сен, Зиёдахонни Болтабой, Еқутойни Эгамберди, Адолатхонни Қодирали, қисқаси ҳамма әрлар хотинларини, ҳамма ошиқлар маъшуқларини шу хилда қизганишса, бу хотин-қизларнинг ҳаммаси бири эрининг, бири хушторининг кўнглига қараб иш тутса нималар бўлар эди? Ҳолбуки булар,

кўриб турибсан, колхозимиэда катта куч. Шундоқ эмасми?

Сидиқжон бошини қуёй солди ва чуқур нафас олиб:

— Тўғри, Ўрмонжон ака,— деди,— ҳамма гапингиз тўғри. Кўп нарсаларни кўзимга кўрсатдингиз, яна кўп нарсаларни кўргани қўлимга чироф бердингиз. Мен Канизакни орқага тортаётган эканман, ҳақиқатда унга әргашибим керак. Катта гуноҳ қилиб юрган эканман.

Ўрмонжон унга ер остидан қаради ва юзидан бу гапни самимий айтиётганини англаб:

— Эҳтимол, жуда ҳам катта гуноҳ эмасди, чунки билмасдан, тушунмасдан қилинган иш,— деди.— Аммо кулги, жуда кулги дейиш мумкин. Бунинг кулги эканлигини ҳозир билмасанг кейинчалик биласан. Бу ерга янги келган вақтингда «ударник» дейилганда кўз олдингга қандай одам келгани өсингда борми? Кимдир менга айтиб берган әди, бир ударник тўғрисида сўз кетганда «бу одам битта қўйни калла-почаси билан еб, терисини нонуштага олиб қўяди» дейишса ишонган экансан. Мана, ҳозир ўзинг ударник...

Сидиқжон қизариб кетди.

— У вақтда мен янги бир оламга кирган әдим.

— Тўғри. Бу оламга ҳамма ҳам янги кирган. Янги оламга кирган одамларнинг ҳаммаси оёғида эски оламнинг лойи билан кирган. Бирида кўп, бирида оз... Мана шу лой баъзан тойилтиради, баъзан йиқитади. Биз оёғимиэнни ма-на шу лойдан тозалашимиз керак. Қанча яхшироқ тозала-сак, шунча илдамроқ юрамиз.

Сидиқжон Ўрмонжонга миннатдорчилик билдири ва хайрлашиб чиқиб кетди.

У нимадандир бениҳоя хурсанд, нимадандир хижолат, бошидачувалиб кетган фикрлардан гаранг бўлиб уйга кетди.

Эртасига Иброҳимов Канизак билан Сидиқжон айт-

ган гўзаларни кўздан кечирди, дала айланиб ўзи ҳам шу хилдаги гўзалардан бир талайини топди, ҳаммасини айрим эътибор билан текшириди, кўпининг ёнига таёқ тиқиб белгилар осди-да, ҳосилот кенгашининг навбатдаги мажлисида текшириш натижаларини қисқача сўзлаб берди. Мажлиснинг охири шу хилдаги гўзалар кўпроқ бўлган Қамбарали ака бригадасининг учинчи картасига кўчирилди.

Мажлисда ҳар хил фикрлар бўлди: Болтабой агар бунинг тагига етилсаю гўзани кўпроқ шохлатиш имкониятига эга бўлинса қўсак кўпайиши, демак ҳосил ортишини айтиб Иброҳимовнинг фикрини ёқлади. Зокир ота гўза шохласа қўсак кўпаяди деган фикрга қўшилди, лекин ҳосил ортади деган фикри рад қилди. Унинг фикрича сунъий шохлатилган гўзанинг юзта сунъий қўсагидан кўра, шохлагилмаган гўзанинг ўнта табиий қўсаги афзалроқ — оғир ва пахтасининг толаси узун бўлиши керак эди.

Шу икки фикр атрофида мунозара жуда қизиб кетди. Гапирмаган, тортишмаган одам қолмади. Зокир ота кўп йиллик тажрибасини пеш қилиб, Болтабойга ботадиган пичинглар қилди. Болтабой омоч замонида ортирилган тажриба трактор замонасида камлик қилишини айтиб Зокир отанинг қайсарлигини жоҳиллик деб атади. Иккови хийла қизишиб олди.

Иброҳимов ҳамманинг сўзига диққат билан қулоқ солди, ўртага ташланган фикрларни ва буларнинг тўғри ё нотўғри эканлигини исбот қилиш учун кўрсатилган далилларни ўлчаб, салмоқлаб кўрди, сарагини саракка, пучагини пучакка ажратиб ёзиб олди.

Мажлис тайинли бир фикрга келмасдан тарқалди. Зотан, Иброҳимовнинг бу масалани қўйишидан мақсади бирон қарорга келиш эмас, одамларнинг фикр-мулоҳазаларини эшлиши эди. Мунозара мажлисдан кейин уйлар-

да, чойхонада, тўгаракларда, кўча-кўйда, далада — ҳамма ерда давом әтди. Иброҳимов қаерга бормасин шундан гап очилиб, ҳар ким ўз фикр-мулоҳазасини айтар, Ўрмонжон айтмоқчи, масалани бутун халқ муҳокама қилар әди.

Иброҳимов домласи Иван Петровичнинг уруғчилик совхозига келганини әшитиши биланоқ бутун материалларни, шохлаган ғўздан уч тупини олиб жўнади.

Иван Петрович, доим хатлашиб турган бўлса ҳам, яна унинг иши, колхози тўғрисида одати бўйича шошиб-пизишиб қисқа-қисқа саволлар берди; агрономияга оид китоблар, янги романлар, «Большевик» журналининг сўнгги сонларидан бирида босилган фалсафий бир мақола тўғрисида сўз очиб, зимдан уни имтиҳон қилди. Иброҳимов ҳеч тутилмагандан кейин кўзойнагини бирдан пешонасига сурди-да, оппоқ чўққи соқолининг учини икки бармоги орасига олиб унинг афтига тикилди. У бирордан хурсанд бўлса шундоқ қарап әди. Иброҳимов устод хурсанд бўлганини кўриб ғўза тўғрисидаги гапини бошлади.

Иван Петрович унинг сўзи давомида тез-тез қадам босиб уйда нари-бери юриб турди; Иброҳимов сўзини тутгатгач креслога ўтиаркан, кўзойнагини пешонасига суриб:

— Ҳўш,— деди яна соқолининг учини икки бармоги орасига олиб.— Яна нима гап?

— Бутун гап шу, устод,— деди Иброҳимов тавозе билан.

— Елғон! Елғон! — деди Иван Петрович ва стаканда совиб қолган чойни унинг олдига суриб қўйди,— нега ўз фикрингни айтмайсан? Янглиш чиқишидан қўрқасанми?

Иброҳимов бу тўғрида маълум бир қарорга келиб қўйган, лекин домласининг фикрини әшитмасдан бурун айтгани, дарҳақиқат, тортиниб турган әди.

— Айтишим мумкин,— деди дадил ва фикрини домлага маъқул келадиган бир тарзда қисқа ва равшан қилиб ифодалаб берди.— Биринчи: бу ғўзаларнинг шохлаб

кетиши асосий шохнинг бирон сабаб орқасида синганлиги ёки мол-ҳол текканлиги натижаси, бу илмга маълум, иккинчи: тажрибакорларнинг шохлаган ғўза қўшимча қўсакларни етиштириш учун ердан етарли озиқ ололмайди деган даъвоси пуч, чунки ғўза ололмаса биз берамиз; учинчи: тажриба ишини бошлашимиз мумкин.

Иван Петрович ўрнидан туриб шитоб қадамлар билан бир айланиб келди-да, Иброҳимовнинг рўпарасида тўхтади.

— Тўғри, илмга маълум,— деди ва креслога ўтириди,— маълум! Шохлатиш, озиқ бериш мумкин. Хўш, сен ўтказадиган тажриба нимани исбот қилиши керак?

— Шу йўл билан ҳосилни ошириш мумкин эканлигини исбот қилишимиз керак.

— Бу турган гап, лекин, бундан ташқари яна бир саволга жавоб топишинг керак: ғўзани қачон ва қайси шароитда чилпиш яхшироқ натижа беради? Сен айтган икки нарса илмга маълум эканлигини эътиборга олсак, сен ўтказадиган тажрибанинг асосий вазифаси мана шу саволга жавоб бериш. Демак, сенинг бугундан бошлаб қиладиган ишларинг... Ёз! Биринчи: ҳозир назорат остида бўлган ғўзаларни текшириб, буларнинг асосий шохи қачон зарарланганини белгила. Иккинчи: бугун ўн тўртинчи числодан то ғўзанинг ўсиш даври тамом бўлгунича, ҳар ўн кунда лоақал бирон акр ғўзани чилпишга етадиган тажриба участкаси ажрат. Тажрибани бу ерда ўтказиш ҳам мумкин эди, лекин колхозда ўтказилгани яхшироқ, қулай бўлса ўша Канизакнинг ерида ўтказ. Менга ёзган хатларингдан бирида Ўрмонжон илмга сажда қилган одам деган эдинг, демак, колхозда сенга ҳамма шарт-шароит тахт әканига шубҳа йўқ. Учинчи: ўзинг айтмоқчи, одамларда пайдо бўлаётган кўз... Яхши, жуда яхши таъбири! Бу кўз янги шароитда, колхоз шароитида юзага чиқаётган улуғ бир кучнинг нишонаси. Фунча! Сенинг учинчи ва энг му-

ҳим вазифанг, ҳаммамизнинг ҳам вазифамиз мана шу фунчанинг бағрида ажойиб бир гул, ажойиб бир мева ҳаёти борлигини ҳар бир колхозчининг кўзига кўрсатиш, томчилардан кучли бир оқим вужудга келтиришдир!

Бир хотин кириб тушлик тайёр әканидан хабар берди. Иван Петрович Иброҳимовни тушликка таклиф қилди. Ошхонага чиқишиди. Столда учта прибор туарар эди. Совхознинг партия ташкилотчиси Аминов келиши керак әкан, келмади — иши чиқиб, бирордан узр айтиб юборипти. Иван Петрович шумшайди, бир нималар деб дўнгиллади, лекин бутун тушлик давомида фақат шу одам тўғрисида сўзлади. Унинг сон-саноқсиз хислатларини айтиб берди. У, Аминовнинг ҳар бир хислати тўғрисида сўзлар әкан, бу хислатни ғоят мураккаб ва ақлни ҳайратга соладиган бир механизмнинг әнг муҳим бир деталидай таърифлар әкан, бирдан: «Менга қара, коммунизмда партия ташкилотчиси бўладими, йўқми?» деб сўради ва яна ўзи жавоб берди: «Бўлиши керак! Бўлади!» деди.

Иброҳимов тушликдан кейин жўнайдиган бўлди. Иван Петрович уни кузатар әкан, келтирган совфаси — уч тупғўзага жуда хурсандлик изҳор қилди ва ўзи ҳам унга озроқ совға олиб келганини айтиб, икки яшик китоб берди; Үрмонжонга, Бўтабойга, Канизакка кўпдан-кўп салом айтди ва «Қўшчинор»га шу ҳафта ичи, яъни ваъдасидан буруроқ боришини билдириди.

Эртасига бу хабар бутун колхозга тарқалди. Колхозда ёш-қари, әркак-аёл ҳамма катта олимни, «домламизнинг домласи»ни кўришга, унинг бирон оғиз сўзини эшитишга муштоқ бўлиб шу соатни сабрсизлик билан кутди.

Тажриба участкаси Канизак звеносидан, яъни ўз бригадасининг еридан ажратилишига Зокир ота сира кўнмай туриб олди. Иброҳимов унга тушунтиришга ҳаракат қилди, чол қулоқ солмади. Бўтабой ака аввал яхши га-

пирди, кейин шовқин солиб «бригадирликдан туширамиз» деди, чол ундан баландроқ келди: «Бригадирликдан тушмайман» деб әшикни қаттиқ ёпиб чиқиб кетди. Шундан кейин уни Үрмонжон чақирди. Чол унинг олдига ҳам шовқин солиб кирди:

— Тайини йўқ иш! Мен гўзани нобуд қилгани қўймайман! Пахта нима әканини бола ҳам билади: кўчада тўртта ёнғоғу бир сиқим пахта тушиб ётган бўлса аввал пахтага қўл узатади.

— Тўғри, отахон, бу гапларингиз тўғри,— Үрмонжон икки елкасидан ушлаб креслога ўтқазди,— лекин бир нарсани эътиборга олайлик. Сиз шу ишдан натижа чиқмайди деяпсиз. Мен сизнинг фикрингизни рад қилолмайман, чунки қўлимда далилим йўқ...

— Ҳа, баракалла,— деди Зокир ота бирдан чеҳраси очилиб.

— Иброҳимов натижа чиқади деяпти. Биз унинг фикрини ҳам рад қилолмаймиз, чунки қўлимиэда далилимиз йўқ. Шундоқми?

— Тўғри.

— Демак, бу қарама-қарши икки фикрнинг қайси бини тўғри эканини фақат тажриба қилиб билиш мумкин. Якка хўжалик, албатта, бунақа таваккаллик ишга қадам қўёлмайди, қўрқади. Биз-чи? Биз колхозда бундан каттароқ таваккаллик ишга ҳам дадил қўл уришимиз мумкин. Нимадан қўрқамиз? Йирик хўжаликнинг мана шу имкониятидан фойдаланишимиз керакми, йўқми? Менимча керак, зарур! Нима дедингиз? Зарур-а?

Зокир ота бўшаши.

— Бунга қанча ер ажратамиз?

Үрмонжон унинг саволига жавоб бермади.

— Иброҳимовнинг домласи Иван Петрович келганида биринчи навбатда сиз ва сизга ўхшаган тажрибакор қарияларимиз билан гаплашади...

Зокир ота шошиб унинг сўзини бўлди.

— Менинг қарши турганимни Иброҳимов домласига айтганмикин?

— Билмадим,— деди Ўрмонжон Бўтабойга кўз қисиб. Бўтабой шовқин солди:

— Уятни биласизми!.. Колхозимида илмга қарши одамлар бор дегани кимнинг тили боради!..

Зокир ота хижолат бўлди.

— Мен илмга қарши эмасман, илм ёруғлиқ, илмсизлик қоронгилик, биламан...

— Илмсизлик қоронгилик өканини билсангиз, ўқинг деганда менинг олдимга ёғоч от миниб келармидингиз!

Зокир ота бўйинни қашлади.

— Ўтган гапга саловот... Илмга әнди қарши эмасману, лекин шу Иброҳимовга қарши бўлгим келаверади... Тўғри, илми бор, яхши илми бор! Баъзан ҳеч хаёлга келмаган, ақл етмайдиган нарсаларни айтади, лекин ёш! Гаплари ўзидан катта, алланечук ярашмаганга ўхшайди. Шу илмiga мўйсафиid бўлса, шу гаплар бир мўйсафиid одамнинг оғзидан чиқса...

Бўтабой кулиб қотиб қолди.

— Ақл ёшда әмас, бошда деган-ку, ахир,— деди кулги ёшини артиб.

— Шунчалиги ҳам бор,— деди Зокир ота кетгани қўзғалиб,— майли, билганини қиссин. Лекин яхши йигит!

Ўрмонжон кула-кула уни куватиб чиқди.

17

Тўлаган партия аъзолигига кандидат бўлиб ўтаётганида Энёдахон унинг колхоз ташкил бўлаётган вақтда Бўтабой ака билан жанжаллашганини өслатиб бир савол берганда бунга Ўрмонжон жавоб қайтариб: «Ўтган гаплар ўтди кетди, Тўлаган аканинг колхозга киргандан кейин

қилган ишларини, айниқса бинокорлик бригадасига бошлиқ бўлиб қилган ва қилаётган ишларини кўёда тутиш керак», деган әди.

Маблағ ҳисоблик, бинокорлик материаллари танқис, ишчи кучи йил — ўн икки ой дала иши ва бошқа юмушлардан бўшамайди, транспорт етишмайди; бунинг устига Тўлаганинг ўзи бу ишда ҳали янги, ўзи айтмоқчи, умрида «битта капа ҳам қурган әмас»... Буларнинг ҳар бири, албатта, бир қийинчилик туғдирар әди. Бироқ Тўлаган, бу қийинчиликларнинг ҳар бири бир қайроқ бўлиб ақлинни, қобилиятини, файратини қайрагандай, кун сайин янгидан-янги ташаббус кўрсата бошлади. Унинг таклифи билан правление, транспорт етишмаганлиги сабабли, ҳанув сотилмай маҳаллаларда тоғ-тоғ бўлиб ётган ўтинни сотиш учун Оқкўлдаги ташкилотлар билан шартнома қилишга ва дарёдан сол оқизишга қарор қилди. Бу тадбир колхозга талай даромад берди. Бинокорликка четдан пишиқ ғишт келтириш жуда мушқул ва ўта қимматга тушар әди. Тўлаган ғиштни шу ернинг ўзида хумдонсиз пишириш усулини таклиф қилди. Бу усул қулай келди ва кейинчалик «Капсанчилар усули», «Уста Тўлаган усули» номи билан шу атрофдаги бошқа колхозларга ҳам тарқалди. Ўрмонжон айтмоқчи, «ашаддий бинокор» уста Тўлаган бинокорликка шу қадар жон-жаҳди билан берилиб кетдики, бу иш билан бўлганида вақт ўтганини, ҳориганини билмас, димогига лой ва пайраҳа ҳиди уриб турмаса кўнгли жойига тушмас, қаерга борса шундан сўз очишини, кимни кўрмасин шу ҳақда бирон янги гап әшитишни, қандай мажлис бўлмасин шу тўғрида масала қўйилишини хоҳлар ва ўнг келганда фурсатни қўлдан бермас әди. Бир куни райондан доктор келиб кундалик турмушда гигиена мавзуида лекция ўқиди. Тўлаган ҳатто шунда ҳам бинокорликка дахлдор савол берди: «Николай пошшонинг Қишки саройида уйларни

шамоллатадиган туйнуклар йўқ әкан деб эшитдим, шу тўғрими?» деди.

Шундай қилиб бинокорлик бригадаси колхознинг бошқа хўжалик тармоқларидағи әнг сара ва муҳим бригадалар қаторига кириб олди. Бу бригада билан фақат унинг аъзоларигина эмас, колхозда катта-кичик ҳамма ифтихор қиласидиган, ҳар бир киши бирпас бўш қолса, унга қарашишни ўзининг бурчи ҳисобладиган бўлиб қолди. Натижада қурилиш иши қишин-ёзин тўхтамади, жадал суръат билан кетиб, биринчи навбатда қурилиши зарур бўлган хўжаликка керакли бинолар, ҳаммом, қишлиқ болалар боғчаси, қишлиқ қизил чойхона муддатдан анча бурун битди. Бу колхоз идораси, клуб ва биринчи навбатда қурилиши керак бўлган ўн икки уйни мўлжалдан бурунроқ битказишга имкон берди. Колхоз идораси билан клуб янги йилнинг май ойига, ўн икки уй эса шу бу йил кеч кузакда битиши керак әди, бироқ бинокорлик бригадаси буларнинг битганлиги ҳақида октябрнинг охиридаёқ правлениега рапорт берди.

Колхоз клубининг очилиш маросими бешинчи ноябрь кеч соат саккизга белгиланган әди.

Канални бўйлаб ўтган кўччанинг кун юриш томонига парка қаратса солинган ва кварталнинг қарийб тўртдан бирини әнлаб ётган клуб ва колхоз идораси биносининг олди ҳали қоронғи тушмасданоқ одамга лиқ тўлди. Ҳамма, ҳатто кўрган одамлар ҳам клубни яна кўришга шошилар әди. Бинонинг фасадига осилган жуда ҳам ёруғ «дамчироф» унинг тўрт колоннасига тикилган қизил байроқларни, әшик олдидা ва кенг зинада тиқилишиб турган одамларнинг бошларини, елкаларини ёритиб турар әди.

Бинонинг кенг ва оғир икки әшиги очилди. Ҳалойиқ гуриллаб фасаддаги сингари чироғлар билан ёритилган фойега ва ундан уч әшик орқали залга кирди. Фойе, зал ва саҳна ҳали йиғиширилмаган, әртаги мажлисга безати-лаётганлиги шундоқ кўриниб турар әди.

- Соат роса саккизда мажлис очилди. Президиумга Бўтабой бошлиқ правление аъзолари, буларнинг кетидан Аҳмедов сочига оқ оралаган бир рус хотин билан чиқди. Бўтабой қисқача бир муқаддимадан кейин мажлисни очиб, бинокорлик бригадасининг бошлиғи Тўлаганга сўз берди. Тўлаган ҳам қисқача муқаддимадан кейин бригаданинг правлениега берган рапортини ўқиб бериши керак эди, бироқ у, минбар текканидан ва қулай фурсатдан фойдаланишини лозим кўрди шекилли, қисқача муқаддимасини бутун бошлиқ докладга айлантириб юборди: колхозда бинокорлик иши хўжалик тараққиётидан кейинда қолмаётган бўлса ҳам, бу ишда ҳали катта камчиликлар борлиги, бутун колхоз ва ҳар бир колхозчи олдида катта вазифалар турганлиги, колхозда мавжуд бўлган имкониятлардан тўла фойдаланишга ва йўқ имкониятларни яратишга нималар тўсқинчилик қилаётгани тўғрисида гапириб кетди. Унинг бу гаплари керакли, ҳозир бўлмаса қачондир айтилиши керак гаплар бўлгани, вал диққат билан қулоқ солаётгани, зотан Тўлаган бинокорлик тўғрисида бир гапг тушиб кетса уни тўхтатиш хийла қийин өканини билгаф учун Бўтабой ҳам қўйиб берди.

Бу орада бояги нотаниш рус хотин Аҳмедовнинг қулогига бир нима деди. Аҳмедов бир нима ёзиб, орқада ўтирган Рӯзиматга узатди. Рӯзимат саҳнадан чиқиб кетди-ю, ҳаял ўтмай залда пайдо бўлди ва Канизакнинг олдига келиб қулогига секин: «ўртоқ Аҳмедов йўқлаётитпилар» деди. Канизак қўлидаги рўмолчасини ёнида ўтирган Сидиқжонга беихтиёр тутқазиб ўрнидан турди, ҳеч лозим бўлмагани ҳолда әнгашиб қатордан чиқди-да, әнгашганича деворнинг тагидан юриб әшикка кириб кетди ва ҳаял ўтмай саҳнанинг ёнбошидан қизил кўйлагининг өтаги кўринди. Аҳмедов имо билан уни чақирди ва ёнига ўтиризиб хотинни таништириди: «Известия» газетасининг мухбири, деди. Хотин унга: «Мария Федоровна Новикова»,

деб қўл узатди. Канизак индамай қўл бераётган эди, Аҳмедов секин: «Отингни айт», деб тургандан кейин: «Канизак Фармонқулова», деди.

Бу орада Тўлаган бинокорлик ишига бинокорлик бригадасининг иши деб қарайдиган баъзи бригадирлар, электростанция қурилишига етарли эътибор қилмаётган правление тўғрисида гапириб тантанали мажлисни одатдаги мажлисга айлантириб юборди. Аҳмедов унинг сўзига диққат билан қулоқ солиб қўйин дафтарчасига бир нималар ёзиб ўтирас эди. Новикова буни кўриб имо билан «гапирасизми?» деб сўраган эди, Аҳмедов бош иргатди. Шундан кейин Новикова Канизакни пастдаги уйга таклиф қилди.

— Аввало сизга Иван Петровичдан салом,— деди у. столдаги пастлатиб қўйилган қирқинчи чироғнинг пилинги кўтариб,— ўтиринг... Иван Петровични биласиз-а?

Канизак русчалаб: «яхши биламан» демоқчи бўлиб, «яхши биласиз» деб қўйди ва Новикова тўғрилагандан кейин бурро қилиб:

— Мен Иван Петровични яхши биламан,— деди.

— Иван Петрович колхозларингда ўтказилган тажриба якуни тўғрисида мақола ёзётитти. Ўртоқ Аҳмедов бу тажриба пахта агротехникасида олга қўйилган катта қадам дейди. Катта иш қилибсизлар. Мен бу гапни эшитганимда сизни ўрта ёшлардаги бир хотин деб ўйлаган эдим. Еш экансиз, турмушингиз тўғрисида гапириб бермайсизми?

Канизак ўзи билгани бутун рус калималарини эслаб ва ишлатиб, билмаганини Новиковадан имо-ишора билан сўраб, танг келганда ўзбек калималарини ҳам қистириб жумла туза бошлади.

— Иш: Эокир ота бригадаси, учинчи звенога бошлиқман. Звено бўйича мажбурият ҳар гектардан ўн бир центнер эди, ҳозир ўн тўрт бердик, қолган пактамиз кўсак би-

лан яна икки центнердан беришга етади. Ўқиётипман. Звено аъзоларининг ҳаммаси ҳам ўқийди. Рус тили ўрганаётубмиз. Анзират холанинг кибиткасида тураман. Ҳозирнинг ўзида беш юэга яқин меҳнат куни ишлаб қўйдим. Колхозга янги келган йилим меҳнат куни йигирма олти тийиндан тушган эди, бу йил камида ўн икки сўмдан тушса керак дейишаётитпи.

Новикова қўйин дафтариға тез-тез ёзар әкан, Канизак зерикиб қолмасин учун уни гапга солди:

— Бу пулларни нима қиласиз? — деб сўради.

Канизак ўйчан жавоб берди:

— Москвага борсам... Ленинни кўрсам деган орзум бор...

— Яхши,— деди Новикова ва бир оз ўйланиб қолдида, дафтарини тез-тез варақлаб давом этди,— сиэнинг тўғриңгида ўртоқ Аҳмедов гапириб берган эди. Аслингиз шу ерлик, ота-онангиз болалингизда ўлиб кетган, Наманганда ўсган әкансиз. Агар мумкин бўлса Намангандаги ҳаётингиз, бу ерга келишингизга нима сабаб бўлгани тўғрисида қисқача бўлса ҳам гапириб берсангиз эди. Батафсил бўлиши шарт әмас. Тасаввур ҳосил қилсан бас.

— Наманганда Надежда Павловна деган тутинган опам бор әдилар, менинг бу ерга келишимга ўша киши сабаб бўлганлар.

— Ким эди у киши, нима иш қиласиз әди, нега у киши сабаб бўлган?

— У киши терговчи әдилар. У киши мени Тошкентга ўқигани юборган әдилар, кетаётиб Яккатутда поезддан тушиб қолдим.

— У киши билан нима бўлиб танишгансиз?

Ҳамма саволларга бошини қуи солиб тез-тез жавоб бериб ўтирган Канизак бу саволга тезда жавоб бермади ва бирдан бошини кўтариб Новиковага қаради; афтидан, бу саволга жавоб бермоқчи әмас эди. Новикова унинг тез-

да жавоб бермаганига чандон әътибор қилмаган әди, кейин, унинг ўзгариб кетган авзойини қўриб таажжубланди ва саволни қайтарди. Канизак яна ерга қараб жим қолгандан кейин секин:

— Бошқа гап сўранг,— деди.

Новикова ортиқ қистамади.

Шу аснода, мажлис тамом бўлди шекилли, зал томондан қаттиқ қарсак ва ғовур вшитилди. Ҳаял ўтмай Аҳмедов, унинг кетидан Ўрмонжон билан Иброҳимов, Зокир ота кириб келиши. Аҳмедовнинг вақти чоғ әди.

— Ана тантанаю мана тантана! — деди Ўрмонжонга ва кулиб Новиковага юзланди,— тантанали мажлис жуда ажойиб танқид ва ўз-ўзини танқид мажлисига айланиб кетса бўладими! Тўққиз киши музокарага чиқса-я! Демак халқ қўлга киргизганимиз ўзимизники, ҳеч қаёққа қочиб кетмайди, ҳали қўлга киритмаганимиз тўғрисида гаплашайлик деяётитпи! Ҳўш, Мария Федоровна, суҳбатлашиб бўлдиларингми?

— Йўқ, ўртоқ Аҳмедов,— деди Новикова,— суҳбатимиз энди бошланаётитпи шекилли.

Аҳмедов соатига қаради.

— Ҳўп, ундоқ бўлса сиз қолинг. Мен Наймандан энди соат бирларда қайтсан керак. Унгача суҳбатлашиб бўларсиз.

— Ўртоқ Аҳмедов,— деди Ўрмонжон,— эртага байрам олди мажлисимиш бўлади. Мария Федоровна шу мажлисда қатнашсинлар. Эртадан кейин қай маҳалда десалар ўзимиз элтиб қўямиз. Зиёдахон доклад қилади, миллӣ чолғу тўғарагимиз яхши концерт тайёрлаган, ударникларни мукофотлаймиз.

Новикова бу тақлифни мамнуният билан қабул қилди.

— Шошма, ука,— деди Зокир ота,— мукофот дедингу, өсимга тушди... Янги уйларни ударникларга бериш яхши албатта; ишлапти, кўпни депти — кўпдан кўрсин. Лекин

шу уйлардан биттасини Анизиратга берилса қандоқ бўлар экан? Бу ҳам бир маслаҳат-да. Унинг ўғли неча йилдан бери қизил аскарда... Ҳозир командир бўлипти. Шу бола ҳам кўпни деб юрипти-ку!

Аҳмедов ялат әтиб Ўрмонжонга қаради. Иброҳимов Зокир отанинг сўйини Новиковага таржима қилиб берди. Новикова Зокир отани бошдан оёқ кузатиб чиқди.

— Яхши, жуда яхши,— деди Ўрмонжон,— правление да кўрамиз.

Аҳмедовни ҳамма кузатиб чиқди. У жўнагандан кейин Ўрмонжон ҳаммани ўз уйига кечки овқатга таклиф қилди. Зокир ота боришдан бош тортган әди, Новикова қистаб қўймади.

Кечки овқат жуда узоқ давом әтди. Новикова Зокир ота билан бошқа вақтда гаплашишни кўнглига туғиб қўйган бўлса ҳам, овқат маҳалида унинг ўтмиш ҳаётига қизиқиб сон-саноқсиз саволлар берди. Маълум бўлишича, Зокир ота водокачкаларнинг эгаси князининг итбоқари бўлган экан. У шу тўғрида гапириб туриб:

— Ўша вақтда орим йўқ эканми, итбоқар бўлибман-а!— деди.

Овқатдан кейин Ўрмонжон Новикова билан Канизакни ётоққа кузатиб қўйди.

18

Янги уйлардан бирига иккита каравот қўйилиб жой қилинган әди.

Канизак меҳмонни алиф ҳиди анқиб турган уйга бошлаб кирди, пастлатиб қўйилган осма чироқнинг пилигини кўтарди-да, бир неча қаватдан лас кўрпа солинган икки каравотни кўрсатиб:

— Марҳамат, Мария Педоровна,— деди.

Новикова шляпаси билан сумкасини столга қўяр экан:

— Педоровна эмас, Федоровна, «п» эмас, «ф»,— деди.

Канизак тўғрилаб айтди, лекин шу оннинг ўзида яна хато қилди: Иван Петрович мақоласини қачон ёзиб та- мом қилишини сўраганида «Иван Фетрович» деб қўйди: лекин хато қилганини ўзи фаҳмлаб кулиб юборди-да, уя- либ, Новиковани қучоқлаб олди.

Ечиниб ётишди. Канизак каравот устида туриб чироқ- ни пастлатар экан:

— Янаги келишингизга битта ҳам хато қилмай гапи- радиган бўламан,— деди.

— Зеҳнингиз тез, тил ўрганишга қобилиятингиз ях- ши экан. Шу бугун мендан учта янги сўз ўргандингиз, уч- чаласини ҳам ишлатишга ҳаракат қилаётисиз, жуда ях- ши. Бунақада рус тилини тез ўрганасиз. Сизга рус тилини дастлаб боя айтганингиз Надежда Павловна ўргатган бўлса керак-да? Кечирасиз, бу саволимга жавоб бермасли- гингиз мумкин...

— Йўқ, нега...— деди Канизак,— рус тилини ўша ки- шидан ўрганганман. Боя клубда берган саволингизга жа- воб бермаганим учун хафа бўлдингизми?

— Сизни хафа қилмадиммикин?

— Йўқ, опажон, кўнглингизга бошқа гап келмасин, айтиб қўя қолай: мен одам ўлдиришда айбланиб судга тушганимда танишган эдим.

Новикова ўрнидан туриб тирсаги, билан ёстиққа су- янди.

— Туҳматми?

— Ҳа, туҳматга қолган эдим.

— Нақадар даҳшат!

— Йўқ опажон, бу даҳшат эмас. Ўн икки яшар қиз боланинг шундай туҳматга қолишидан ҳам даҳшатлироқ

бир ҳақиқатни гапириб берсам әшитасиэм? Қани энди рус тилини яхши билсаму...

— Майли, майли,— деди Новикова,— жуда яхши тушунаяпман.

— Ҳа, мен ёмон гапирсам ҳам сиз яхши тушунасиз. Надежда Павловна ҳам шундоқ дер әдилар...

Канизак бола әди, әс-әс билади: қишлоқни босмачи босди, уруш бўлди, ота-онасини йўқотиб қўйди. Кўп уйларга, шулар қатори буларнинг ҳам уйига босмачилар ўт қўйишиди. Уни шу ерлик Мирсаид деган бир бой уйига олиб кетди-да, орадан кўп ўтмай искобиллик бир қариндошига бериб юборди. Бу одам хийла бадавлат бўлиб, хотини йўқ, Канизак тенги ва ундан катта тўртта қизи, буларга қарайдиган бир оқсочи бор әкан. Ҳар замон ота-онасини соғиниб йиглашини әътиборга олмаса, Канизак бу одамнинг уйида яхши турди. Яхши овқат, кийим-кечак... Орадан уч-тўрт йил ўтди.

Киш, жуда қалин қор ёққан кун әди. Оқсоч хотин қизларни ювинтириб, тарантириб, яхши кийимларини кийгизиб меҳмонхонага олиб чиқди. Меҳмонхонада новча, йўғон, қошлари ўсиқ, мош-гурунч соқоли кўкрагига тушган бир чол сандалда каттакон пўстинни елкасига ташлаб ўтирган әди. «Ота» қизларини сандалга ўтқизди. Чол буларни бироғ гапга соганидан кейин бирига чанговуз, бирига нағма, бирига билагузук, бирига исирға, Канизакка эса бозвонт берди. Қизлар чиқиб кетишиди. Кечаси «ота» Канизакнч ўзининг уйига чақириб: «Ота-онанг Наманганда әкан, кўраман десанг сени шу одамга қўшиб юбораман» деди. Бу гапни әшитиб Канизак узун қиш кечасини киприк қоқмай тонг оттириди. Эрталаб Канизакнинг назарига бу чол уни олиб кетгиси келмаётгандай кўринди. Канизак йиглади, унинг бўйнига осилди... Чол кулди-ю, уни кўтариб извоншига ўтқизди. Станцияга чиқишиди. Поездга тушиб Наманганга жўнашди. Чол уни уйига олиб борди, каттакон

ҳовлидаги бир талай уйлардан югуришиб чиққан жувонларга қараб: «Мен сизларга канизак олиб келдим», деди. Шунда унинг юраги орқасига уриб кетди: нега бу «мен сизларга олиб келдим» деяётпилти? Ота-онам-чи? Ҳакниқатан, кейин билса, чол уни алдаб олиб келган әкан. Канизак қочиб кетмоқчи бўлди. Қочиб қаёққа боради? Чолнинг тўртта хотини бор әкан, шуларнинг хизматини қилиб юрди. Хотинлар ҳам, чолнинг ўзи ҳам уни «канизак» дейишар әди.

— Бу отни сизга шулар қўйғанми, асл отингиз бошқами? — деди Новикова шошиб.

— Ҳа, менинг асл отим Ҳанифа әди.

— Шундоқми? Мен ҳам ҳайрон бўлган әдим: Ўзбекларда бунақа отни учратганим йўқ. «Канизак» деган сўзи мен «Минг бир кечада» учратганман. Бунда «чўри», «қул» маъноларида келар әди.

— Билмайман, — деди Канизак чуқур нафас олиб, — мен бу сўзининг маъносини билмайман!

Чол, ўзининг тахминига кўра, Канизак ўн бир ёшга кирганида унга паранжи ёпинтириди; паранжи ёпинганидан кейин «катта қиз бўлдинг, энди уй тутишни ўрган» деб уйларидан бирини ясатиб берди. Шундан кейин у бошқаларнинг хизматидан озод бўлди. Орадан бир неча ой ўтди. Бир куни чолнинг катта хотини уни ҳаммомга олиб борди. Кечқурун уйга салласи қозондай бир домла, яна бир неча киши келди. Ош-овқат қилинди. Қоронги тушгандан кейин иккита кампир уни хўп ясантириб чолнинг ёш хотинларидан бирининг уйига олиб киришди-ю, қия турган әшикнинг олдига ўтқазишиди. Ҳаял ўтмай әшикнинг нарёғидан бояги домланинг қуръон ўқиган товуши әшитилди. Домла қуръон ўқиб бўлганидан кейин тожикилаб бир нима деди, шу гапни уч мартаба айтди; учинчи мартаба айганида кампирлар икки томондан «ҳа дегин» деб унинг биқинига туришиди. Канизак нима бўлганини билмай «ҳа» деди. Эшик-

винг у томонидан бир неча кишининг «әшийтдик, әшийтдик» деган товуши әшитилди. Шунда у чолнинг никоҳига ўтган эди, буни бирон соатдан кейин билди.

— Нақадар даҳшат! — деди Новикова сабри тугаб ва ўрнидан туриб, чироғнинг пилигини кўтариб қўйди.

Канизак юзини ўнг билагига қўйиб маъюс табассум қилиб ётар эди.

— Йўқ, Мария Федоровна, у вақтларда буни даҳшат дейилмас эди. Нимани даҳшат деяётисиз? Ўн бир яшар қизни эллик беш ёшларга бориб қолган бир чолга никоҳ қилинишиними? Бу чолга хотин бўлиб қолганимни ўзим ҳам билмай қолганимни? Буни у вақтларда даҳшат эмас, бурундан қолган одат дейилар эди. Мен етим, кимсанисиз, гариб бўлганим учун шундай кунга қолибманми? Совет ҳукумати бўлгунча, ҳатто совет ҳукуматининг дастлабки йилларида ҳам ота-онаси бор, ота-онасига әрка қизларнинг ҳам куни шу эди.

Олма деб отган отам,
Беҳи деб сотган отам,
Қари чолга қиз бериб,
Жабрини тортган отам.

Қора қумгон қўйдилар,
Қайнамасин дейдилар,
Қари чолга қиз бериб
Яйрамасин дейдилар.

Усма өкилмасмиди,
Таги чопилмасмиди,
Нега қарига бердинг
Тенгим топилмасмиди?..

— Бу ашулаларни мен чиқарганим йўқ, бу ашулаларни бир мен айтган эмасман. Бурунги ўзбек қизлари фақат шундан нолишптими? Йўқ, опажон!

Зардевору зардевор,
Зардеворнинг гарди бор,
Юрагимнинг бошида
Кундошликнинг дарди бор.

Андижонда ўт ёқсам, Ўшда тутун
Бу дунёда бормикин бағри бутун?

— Эҳе, Мария опа, бунақа ашулаларни айта берсанм каттакон китоб бўлади.

Шунақа қилиб Канизак әрга текканини ўзи ҳам билмай қолди. Ярим кечаси эшик гийт этиб очилди-ю, чол бошига оқ авра тўн ёпишиб, кириб келди... Мария Федоровна клубда «Надежда Павловна билан нима бўлиб танишган әдинг?» деб сўраганда Канизакнинг кўзига мана шу оқ авра тўн, ялатироқ калла, жун арқонга ўхшаган қош, тўрвадай соқол, пўстакнинг йиртиғига ўхшаган оғиз, сапсариқ сўйлоқ икки тиш, ўша тун кўриниб кетган әди. Одам боласи нималарни кўрмайди, нималарни бошдан кечирмайди — ҳаммаси әртами-кечми, озми-кўпми эсдан чиқади, лекин бу кечани Канизак сира унута олмас әди... Шундан кейин у йигирма кунга яқин касал бўлиб ётди, тузалди, лекин кўпинча «тузалмай ўлай» деб дод дер әди... Шу аҳволда икки йилга яқин кун кечирди.

Бир куни, баҳор пайти әди, чол беҳосдан ўлиб қолди: ёнгоқнинг тагидаги супада бўза ичиб ўтирган әди, бирдан чалқанча кетдию, икки-уч ияқ қоқди, холос — жон берди. Катта хотини уйдан югуриб чиқди, унинг устига ўзини ташлаб дод солди. Бошқа хотинлари ҳам чиқишиди. Ҳаммаси бир-биридан қаттиқроқ дод солар, сочини юлар, Канизак қўрқувдан гаранг бир аҳволда қотиб турад әди. Қўни-

қўшни йиғилади. Чолнинг катта хотини югуриб келиб Канизакнинг кўкрагига бир тепди. У, кўнгли озиб, ҳушдан кетди; бир вақт кўзини очиб қараса, извошда битта милиция билан кетаётитти. Кечаси сўроқ берди. Ўша Надежда Павловна сўради. У ўзбекчани жуда яхши билар экан, Канизак бутун кўрган-кечирганларини йиглаб-йиглаб гапириб берди. Шундан кейин Надежда Павловна уни ўз уйига олиб кетди. Чол воқеаси нима бўлганини бу ҳам сўрамади, у ҳам айтмади. Надежда Павловна уни интернатга жойлаб қўйди. Канизак ўқий бошлади; ҳар пайшанба куни қизлар ота-оналари ёки қариндошлариникига кетганда, у Надежда Павловнанинг уйига келиб ётиб қолар әди. Надежда Павловна унга тутинган опа бўлиб қолди. Канизак бир пайшанба куни келганида Надежда Павловна «Тошкентга бориб ўқийсанми?» деб сўради. Канизак суюниб кетди. Надежда Павловна кийим-кечак қилди, қўлига тул, мактабга киргани қоғоз, бир танишининг адресини берди. Канизак жўнади, лекин Яккатутга келганида кўзига Капсанчилар, ота-онаси кўрина берди, поезддан тушиб қолгиси келди. Тушди. Поезд жўнади. Станцияда уруғчилик совхозининг аравалари турган экан, шулардан бирига тушиб Бешсеркага, ундан, худди уни бирор кутиб тургандай, пиёда Капсанчиларга келди. Қишлоғини айланниб кўрди. Уйларининг ўрнини ҳам тополмади. У келишга келди-ю, нима қилишини ва қаерда туришини ўйламаган экан, ҳайрон бўлиб қолди.

— Бу ерда қариндошларингиз йўқмиди? — деди Новикова.

— Йўқ. Биз аслда бу ерлик әмас әдик-да. Бувайдалик бўлсак керак. Эс-эс биламан: онам шу ерлик Фармонқул деган кишига теккан, мен бу одамнинг қариндоши бор-йўқлигини билмас әдим.

— Фармонқурова сизнинг ўз фамилиянгиз әмасми?

— Йўқ, ўз отамнинг отини билмайман. Отамнинг оти

ё Курбон, ё Усмон бўлса керак. Болалигимда шу икки от қулоғимга кўп кирав әди. Катта әнам айтар әдилар.

— Ўзингизни танитсангиз әҳтимол бирон қариндо-шингиз чиқиб қолар әди.

Канизак кулимсиради.

— О, опажоним, у вақтда ўзимни бирорга танитиш әмас, бирор таниса ҳам тонар әдим. Менга ит теккан әди...

Канизак ўша куни Бешсеркага қайтди; ўйлаб-ўйлаб, нима қилишни билмай совхозга борди, ишга кирди; икки йилга яқин ишлади, лекин уни ҳамон Капсанчилар тортар әди. Ахири бўлмади — яна Капсанчиларга келди. Бу ерда колхоз ташкил бўлган экан. Шу ерда қолиб кетди. Шу-шу бўлди-ю, Надежда Павловнани йўқотиб қўйди, Авваллари, уялиб, хат ёзмади; хат ёзганида Надежда Павловна Намангандан кетиб қолган экан, хати қайтиб келди.

— Мана шу,— деди Канизак,— сизни уйқудан қўйдим, Мария Федоровна. Қандоқ қиласай, бу гапларни шу вақтгача ҳеч кимга айтолмай тўлиб-тошиб юрган әдим. Юрагим бўшади. Чироғни ўчирайми?

— Пастлатиб қўя қолинг,— деди Новикова.

Канизак чироғни пастлатди ва бир оздан кейин уйқуга кетди. У тонг қоронғисида уйғонди. Новикова аллақачон турган, столда шитоб билан бир нима ёзмоқда әди. Канизак унга ҳалал бермаслик учун аста кийиниб ташқарига чиқди. Курбон ота айвоннинг пастида самовар қўймоқда әди.

19

Капсанчиларнинг қингир-қийшиқ әшиклари, паст-ланд томлари, янги қишлоқ марказидаги мактаб, клуб ва колхоз идорасига, ясли ва болалар боғчаси, хусусан қизил

чойхона биноси, марказдан олти томонга қараб кетган кўчалардаги битган, чала, энди пойдевор қўйилаётган уйлар устида тикилган байроқ ва байроқчалардан бутун қишлоқ лолазор бўлиб кетди.

Кечки пайт уч маҳалладан ясан-тусан қилиб чиққан сон-саноқсиз одамлар марказга оқа бошлади.

Куни бўйи эски ва янги қишлоқни айланиб, кўп уйларга кириб, сон-саноқсиз одамлар билан суҳбатлашиб чарчамаган Новикова у ёқдан-бу ёққа югуриб сурат олар эди. У айниқса клуб саҳнида кўп сурат олди. Майдонга кириб келаётган, клубга кириб кетаётган одамлар, даврада ўйинга тушаётган йигитлар, қизлар, чапак чалаётган чоллар, кампирлар, пахта топширишда илғор бригадалар, ударниклар, байроқ кўтариб ўзларича «намойиш» қилиб юрган болалар...

Клубнинг эшиклари катта очиқ. Эшик олдида турган Нишонбой ичкарига кирмоқчи бўлган ҳар бир кишини тўхтатиб оёғини арттирас, баъзан, янглишиб, ичкаридан чиққан одамни ҳам тўхтатар эди.

Ўнг ва сўл фойенинг деворларига ҳар хил шиорлар, колхоз хўжалигининг йилдан-йилга ўсиб бораётганини кўрсатадиган диаграммалар, бригада ва звенолар орасида тузилган социалистик мусобақа шартномалари қандай бажарилаетганини кўрсатадиган маълумотлар, меҳмонхона, лаборатория ва турар жойларнинг эскилари, ҳар хил платалар қоқилган; витриналарга янги чиққан китоблар, журналлар қўйилган; залда тўқ яшил парда тутилган ва атрофи қизил алвон билан безатилган саҳнанинг тепасига раҳбарларнинг портретлари, ўнг ва сўл деворларга эса бошдан-оёқ ударникларнинг портретлари осилган. Болалар деворлар остида чуғуралишиб, портретлари осилган кишиларнинг номларини айтиб қичқиришар эди.

Халқ залга кириб ўрнаша бошлади.

Қаердандир пайдо бўлган Иброҳимов олдинги қатор-

да ўтирган Новикова билан Канизакни ичкарига таклиф қилди. Бу ерда правление аъзолари, президиумга чиқадиган ударниклар ўтиришар әди. Ҳамманинг юзида зўр тантана ифодаси. Ударниклардан кўпи бир неча минутдан кейин ҳаётларида рўй берадиган зўр ҳодисадан ҳаяжонда, лекин ҳар бири бу ҳаяжонни яшириш учун ўзини әркин тутишга, мумкин қадар кўпроқ гапиришга, кулишга тиришар әди. Новикованинг диққати буларнинг ичидаги ташвишманд кўринган Энёдахонга жалб бўлди-да, унинг олдига бормоқчи әди, Иброҳимов кўз қисиб берироқса курси қўйиб берди. Энёдахон кўк муқовали блокнотини дам у чўнтагига, дам бу чўнтагига солар, дам варақлар; ўзи одамлар билан гаплашиб ўтиргандай кўринса ҳам, фикри ёди блокнотда әкани, бир оз оқаришган юзида ҳаяжон автомати барада кўриниб турар әди.

Бўтабой Новикованинг ёнига ўтириб, бугун уй билан мукофотланадиган ударникларнинг рўйхатини ўқиб берди ва керак бўлса ёзиб олишини сўради. Новикова блокнотига ударникларнинг номини ёзар әкан, Канизакка келгандада:

— «Канизак» нима деган сўз әканини биласизми?— деб сўради.

Бўтабой ўйлаб қолди ва аниқ жавоб беролмаслигига кўзи етиб, Иброҳимовни ёрдамга чақирди. Бу сўзининг маъносини у ҳам аниқ билмас әди. Шу аснода Қурбон ота каттакон патнусда чой олиб кирди. Иброҳимов бу сўзининг маъносини қариялар билишса керак деган ўйда Қурбон отага мурожаат қилди. Қурбон ота патнусни столга қўйиб чиқиб кетар әкан:

— «Далла билан Мухтор» ҳикоясини әшиитганларнинг йўқми?— деди,— шунда Далла деган бир айёр хотин Ҳорун-ар-Рашиднинг канизини әrimдан қолган каниз деб бир савдогарвоздага сотади. Бундан чиқдики, канизак дегани олди-сотди қилинадиган хотин ё қиз.

Канизак сўз ўзи тўғрисида кетаётганини пайқаб, Новиковага қаради ва қошини чимирди. Новикова бу имога тушуниб, «Айтмайман, хотиржам бўл», деб ишора қилди.

— Демак,— деди у Иброҳимовга қараб,— «канизак» «қул», «чўри» маъноларида экан. Менда бир таклиф бор: бугун Канизакни янги уй билан бирга янги ном билан ҳам мукофотласак — отини Ҳанифа қўйсак.

— Яхши, жуда яхши таклиф,— деди Бўтабой кулиб,— лекин янги номни бира тўла ЗАГСда қўяди. Йигим-теримни олганимиздан кейин тўйини ўтказмоқчимиз, Мария Федоровна.

Қўнғироқ чалинди.

Зал жим, халқ парда очилишини кутар әди. Парда бир силкинди-ю, икки томонга аста шувиб кетди. Қизил алвон ёпилган узун столнинг олди томони гуллар билан безатилган, саҳнанинг орқасига янги қишлоқнинг каттакон плани осилган әди. Парда очилганда бошланган гулдурос қарсак президиум чиқиб ўрнашгунча тўхтамади. Иброҳимов қисқа муқаддимадан кейин Октябрь байрамига бағишлиган мажлисни очди ва доклад учун Зиёдахонга сўз берди. Ранги хийла оқаришган Зиёдахон, худди гангиг қолмаганини кўрсатмоқчи бўлгандай, дарров ўрнидан турди, шахдам қадамлар ташлаб минбарга келди-да, хиёл титраёрган қўли билан блокнотини очиб залга қаради. Зал жим. Кимдир секин йўталди. Шу жимлик ва буни писандада қилгандай туюлган йўтал Зиёдахонни шошириб қўйди. У, фикричувалиб, сўз бошламай туриб қолди. Ҳар бири бир соатдай туюлган бир неча секунд ўтди. Вақт ўтган сайин Зиёдахоннинг кўзи тиниб боши ғовлаб борар әди. Ўрмонжон буни сеади-да, графиндан стаканга сув қўйиб минбарга келтириб қўяр экан, секин: «Ҳаммаси ўзимизнинг капсанчилар», деб шивирлади. Зиёдахон, худди шу сўзни унутгану, Ўрмонжоннинг эслатишига маҳтал бўлиб тур-

гандай, дарров илиб олди: «Капсанчи... собиқ Капсанчи ўртоқлар! Ўртоқ колхозчилар!» деди. У, тузган тезисга кўра, бирон соатлик докладининг қарийб ярмини Октябрь революциясининг моҳиятига, унинг оламшумул аҳамиятига бағишлиши, сўнгра, колхоз тузумининг ғалабаси тўғрисида гапириб «Қўшчинор»нинг ютуқларини санаб бериши керак әди. Бироқ нутқни «собиқ Капсанчи ўртоқлар!» деб бошлагандан кейин, асосий мавзуга ўтмасдан бурун, «Биз бугун қишлоғимиз устига иккинчи қуёш болқиган кунни байрам қилмоқдамиз; бу қуёш бизга бошқача ҳаёт, одам боласига муносиб ҳаёт борлигини, бу ҳаёт учун кураш йўлини кўрсатди» деган мазмунда қисқача муқаддима қилишни лозим кўрди. Бироқ нутқ давомида бу муқаддима Капсанчилар қишлоғининг ўтмишини, бугунги кунини ва яққол кўриниб турган келажагини ўз ичига олган бир мавзуга — Октябрь революцияси бизга нима берди, деган мавзуга айланиб кетди. Тезис у ёқда қолди.

Зал унинг сўзига тин олмай қулоқ солар, ҳар замон: «Ҳақ гап», «тўғри» деган товушлар әшитилар, қарсак кўтарилар әди. Зиёдахон бир ярим соатдан ортиқроқ гапириди. У нутқини иккинчи қуёшни яратган Коммунистик партияга миннатдорлик сўзлари билан тугатганда бутун зал оёққа туриб, гулдурос қарсак чалди.

Қарсак босилгандан кейин Иброҳимов илфор ударникларни мукофотлаш тўғрисида правлениенинг қарорини әшииттириш учун секретарга сўз берди. Шу пайт пастан президиумга хат тушди. Хатни Самандаров олиб ўқиди.

«Ўғлим Ўрмонжон!

Эзиёдахоннинг докладига қўшимча қилиб мен ҳам иккни оғиз гапирсан бўладими?

Қурбон отанг».

Самандаров мийигида кулиб хатни Ўрмонжонга узатди. Ўрмонжон ҳам мийигида кулди ва хатни ёнида ўтирган Новиковага таржима қилиб берди-да, залда учинчи қаторда бўйини чўзиб қараб турган Қурбон отани кўрсатди. Ажаб, бу чол докладга қўшимча қилиб нима демоқчи экан? Новикова бунга жуда қизиқиб қолди. Унинг илтимосига кўра Ўрмонжон имлаб Қурбон отани ичкарига чақирди. Қурбон ота дарров ўринидан турди, бироннинг бошини, бироннинг елкасини ушлаб қатордан чиқди-да, оқсоқлаб, жадаллаганича ичкарига кириб кетди. Ўрмонжон билан Новикова кутиб туришар эди.

— Хўш, отахон,— деди Ўрмонжон унга курси қўйиб бериб,— докладга қанақа қўшимчангиз бор эди? Докладдан қаноатланмадингизми?

Қурбон ота ўтиргди, столга ёпилган мовутнинг тивитини юлқиб бир оз жим қолди-да, сўнг, титроқ товуш билан:

— Қаноатландим, лекин мен ҳам гапирмоқчиман,— деди ва яна жим қолганидан кейин ўпкасини тутолмай илова қилди,— жуда тўлиб кетдим, тўлиб-тошиб кетдим, ўғлим... Икки оғиз гапирай, юрагимда қатма-қат бўлиб ётган дард-ҳасратимни әлга айтай!

— Э-э, отагинам, шундоқ улуғ айёмда йиғлайдими киши? Нима дардингиз, қандай ҳасратингиз бор?

Қурбон ота ўзини дарров тутиб олди.

— Зиёдахон ёш, князъ, эшон замонаси тўғрисида эшитганларини айтди. Мен элликбоши, юзбоши, князъ, эшон замонасида кўрганларимни, акамни ўлдирган, онами доғ-ҳасратда адо қилган зиндан замонда бошимдан ўтган кунларни айтиб бермоқчиман.

— Тўғри, гапириш керак. Тушуниб турибман, ўлгарнинг ўрни мана шунаقا улуғ айёмда йўқланади. Лекин, отахон, ҳозир гапириш қалай бўлар экан? Ана, одамлар

чапак чалайтипти... Ҳамма курсанд... Бошқа мавриди келиб қолар.

Қурбон ота оёгини тираб туриб олди. Орага Новикова тушгандан кейин, ниҳоят, муросага келинди: Қурбон ота зиндон замонада кўрганларини, бошдан кечирганларини Мария Федоровнага айтиб берадиган, бу киши Капсанчилар қишлоғи тўғрисида китоб ёзганида унинг айтганларини алоҳида боб қиладиган бўлди.

Мажлиснинг расмий қисми тугади. Танаффус вақтида ҳамма мукофотланганларни, мукофотланганлар бир-бирларини табриклаб зал ва фойелар ғовур бўлиб кетди.

Ҳадемай «Қўшчинор» миллий чолгу ҳаваскорлар тўгараги «Ишчи» колхозининг чапдаст кетмончиси Тешабоев иштироки билан берадиган концерт бошланди. Томошабинларнинг таклифи, томошабинлар ичидан талабгор бўлиб чиққан ашулачи, ўйинчи йигит-қизларнинг ташаббуси билан концерт программыси жуда катта бўлиб кетди.

Қурбон ота кимдантир Новикова әрталаб барвақт кетади деган гапни әшитдию, Ўрмонжонни ҳол-жонига қўймади: «Ҳозир мени бу хотин билан гаплаштирасан» деб туриб олди. Новикова концертни охиригача кўришни жуда истаса ҳам, бир томондан чолнинг кўнглини олгуси келгани, иккинчи томондан у билан суҳбат қилишга ўзи ҳам жуда қизиққанлиги учун дарров ўрнидан турди.

Концерт жуда кеч тамом бўлди. Клубдан қувноқ сурон кўтариб чиққан халойиқ пастда, сутдай ойдинда оқаришиб турган дарё бўйида қунишиб ётган Қўшчинор, Бақақуруллоқ, Қўғазор томонга оқа бошлади. Болалар у ёқдан-бу ёққа чопар, ҳайқирав, ёш-яланг ашула айтиб, асқия қилиб, бир-бирини қувалашиб борар, қариялар ёшлик чоқларини қўмсаб бир-бирларига ҳар хил ҳазиллар қилишар эди.

Канизак бугун ҳам Новикова билан ётиши керак эди, баланд пошналик туфлини умрида биринчи мартаба кийганидан юришга қийналгани учун уйига бориб паст пошналик туфли киймоқчи бўлди. Сидиқжон Анзират холанинг қўлида ухлаб қолган Насибалини опичлаб, Ҳошимжонни етаклаб олди. Анзират хола, худди ҳамма ўйинни ёлғиз ўзи кўрган ва ҳамма ашулани ёлғиз ўзи эшитгандай уйига етгунча буварнинг таъриф-тасвирини қилиб борди.

Канизак бошқа туфлисини кийди. Сидиқжон уни кузатиб қўядиган бўлди.

Булар йўлни қисқа қилиш учун марказдан әмас, Қўшчинор устидан ўтадиган эски йўлдан юришди. Одамлар ҳануз ухламаган, ҳар томондан қувноқ ҳайқириқ, кулни эшитилар эди. Булар Қўшчинорнинг устига келганда узоқдан қизларнинг ашуласи эшитилди:

Районингни ёшиги
Очилса ёпилмайди,
Бу замоннинг қизлари
Червонга сотилмайди.

Канизак тўхтади ва Қўшчинор томонга қаради. Ашула товуши Қўшчинорнинг у томонидан, ойдинда жимиirlаб турган дарё бўйидан келар эди.

Осмондаги самолёт
Қанотингни пастлаб ўт,
Қанотингга хат ёзай,
Кремлга ташлаб ўт.

Йўлда давом этишди. Сидиқжон ойдинда жимиirlаб, тўлқинлари ойнинг аксини минг куйга солаётган дарёдан кўзини олмай борар экан:

— Кечаси дарё шунаقا чиройли бўладими, Канизак-хон! — деди.

Ўйчан қадам ташлаб бораётган Канизак дарёга қаради.

— Ҳа, Сидиқжон ака,— деди чуқур нафас олиб,— шунаقا чиройли бўлар экан, буни әнди пайқаётибмиз. Жуда кўп нарсани пайқамас эканмиз, Сидиқжон ака.

Жимлик чўкди. Сидиқжоннинг кўзи дарёning у томонида, узоқ уфқда милтиллаб турган сон-саноқсиз чирогларга тушди. У, худди фавқулодда бир нарса кашф этгандай, ҳовлиқиб:

— Чироф! Электр! — деди.

Буни Канизак ҳам кўрди ва у ҳам суюниб:

— Электр! «Янги турмуш» гидростанциясини юргизипти! — деди.

Узоқдан икки кишининг қораси кўринди, иккови ҳам шу томонга жадаллаб келар әди. Канизак буларни кўриб бирдан тўхтади ва Сидиқжонни елкасидан ушлаб торти.

— Бирор... четга чиқайлик, Сидиқжон ака...

Сидиқжон тўхтаб унга ўгирилди ва елкасига қўлинни ташлаб:

— Нега? — деди.

— Вой... кечаси юрганимизни кўришса нима дейишади?

— Нима дейишар әди, кечаси юрипти дейишади-да, ҳали ҳам шунаقا экан-да....

Канизак Сидиқжонни пастга, бутанинг орқасига торти. Сидиқжон қаршилик қилмади.

Келаётган одамларнинг бири Қурбон ота, иккинчиси Йброҳимов экан. Қурбон ота бир оз энгашиб жадаллаб келар, Йброҳимов унинг кетидан зўрға етиб юрар әди. Иккови бутанинг олдидан шамолдай ўтиб кетди. Сал нарироққа борганда Қурбон ота бир нима деди ва бу гапни бир неча мартаба қайтарди. У, афтидан, йиғлаб борар

әди. Иброҳимов унга бир нима деб тасалли берәётганга ўхшарди.

Булар кўздан ғойиб бўлгандан кейин Канизак билан Сидиқжон бутанинг орқасидан чиқишиди.

— Нима гап? — деди Сидиқжон буларнинг кетидан қараб.

Канизак ҳам ҳайрон әди.

— Билмадим... Мария Федоровнадан сўраймиз. Қурбон ота ўша киши билан гаплашгани Иброҳимовни олиб кетган әдилар.

Булар боргандада Мария Федоровна айвонда турган экан. Канизакни кўриб дарров «йўлда ҳеч кимни кўрмадиларингми?» деб сўради ва саволига жавоб кутмасдан икковини ичкарига таклиф қилди. Мария Федоровна қаттиқ ҳаяжонда әди. Канизак буни пайқади.

— Нима бўлди, Мария Федоровна, нега менга аллақандай қараётибсиз?

Мария Федоровна гоҳ ўтирас, гоҳ турар, гоҳ Канизакка, гоҳ Сидиқжонга бир нима демоқчи бўлар, лекин айттолмас әди; ниҳоят ҳайрон бўлиб турган Канизакка қараб:

— Амакингизни кўрсангиз танийсизми? — деди ва уни бағрига босиб йиғлаб юборди.

Шу пайт ташқаридан Қурбон отанинг товуши әши-тилди. У: «Ҳанифа! Жигарим!» деб йиғлаб келар әди...

21

Декабрнинг охирларида марказий газеталарнинг бирида «Колхоз далаларининг ударниклари» деган бош мақола чиқди. Бош мақола Бухоро, Наманган, Сурхондарё, Самарқанд, Фарғона областларидаги «Янги ҳаёт», «Коммунизм», «Қўшчинор», «Оқ олтин», «Илдам», Сталин номли колхоз далаларидаги новаторлар тўғрисида галириб пах-

тани экиш, сугориш, парвариш қилиш, териш ишида бу одамлар яратган ва яратадиган, тажрибадан ўтган ва ўтадиган янгиликларни бирма-бир санаб, республика қишлоқ хўжалик ходимлари ва илм аҳиллари олдига бу новаторларни қўллаш, уларга кенг йўл очиб бериш вазифасини қўяр эди.

Ундан кейин пахта далалари ударникларининг область кенгаши бўлди. Кенгашда Ҳанифа президиумга сайландин. Ҳанифа ўзининг бир кичик мушоҳадасидан бундай катта натижа чиқишини, ўз звеносининг кичик бир муваффақияти шундай катта мажлисда оғизга тушадиган бир воқеага айланиб кетишини сира кутмагани учун атрофини мухбирлар, фотографлар ўраб олганда қаттиқ хижолат торти. У ўз мушоҳадасида туғилган Фикрни йўргаклаб олган Ўрмонжон билан Иброҳимов, бу фикрни вояга етказган Иван Петрович, звенонинг муваффақиятини таъмин қилган звено аъзолари — оддий колхозчилар тўғрисида гапири ва бу оддий колхозчиларни ном-баном айтганида Сидиқжон Соҳибжоновни ҳам тилга олди. Бу суҳбат область газетасида босилиб чиқди.

Орадан икки кун ўтгач, Сидиқжоннинг номига бирдан учта табрик телеграммаси келди. Бунинг бири укаси билан онасидан, иккинчиси Баҳрободдаги «Октябрь» колхозининг раиси Сатторқулдан, учинчиси Собиржонқорининг собиқ аравакаши ва ҳозир сельсовет раиси бўлган Ҳайдаралидан эди.

Январнинг ўрталарида Москва журналларидан биринча Новикованинг «Қўшчинор» деган каттакон бир очерки босилиб чиқди. Очерк әшон ва князъ замонасидағи Капсанчилар қишлоғи, қорни ҳам тўймаган, очдан ҳам ўлмаган қул қатори капсанчилар, Азизтепа урушининг сабаби ва натижалари, Фармонқул ва унинг хотини, ҳозирги Қўшчинор ва унинг одамлари тўғрисида ёзилгани бўлиб, Ҳанифа билан Қурбон отанинг саргузаштларига,

буларнинг топишувиға хийлагина ўрин берилган, бошдан-оёқ зўр әҳтирос ва жўшқин илҳом билан ёзилган әди. Бунда ҳамма ўзини, ўз ҳаётини, ўзи ва колхознинг порлоқ келажагини кўрар әди. Ғақат Эокир отагина ундан битта камчилик топди: «Умридан барака топсин, ҳаммасини боплати, ҳаммасини ўз кўзи билан кўргандай ёзипти-ю, лекин менинг итбоқар бўлганимни оламга ошкора қилгани чакки бўлипти» деди.

Тўй даромад тақсимотидан кейин бўлиши керак әди, лекин тўй боши Тўлаган аканинг маслаҳати, маслаҳат ҳам эмас, талабига кўра электростанция ишга тушгандан кейин, яъни, Февралнинг бошларида ўтказиладиган бўлди. Шундай қарорга келингани ҳам дуруст бўлган әкан, даромад тақсимотдан кейин келин билан куёвнинг иши жуда кўпайиб кетди. Бошда буларнинг назарига энг катта ва муҳим иш тўй кўринган әди, маслаҳат ошидан кейин энг катта ва муҳим иш тўй эмас, янги уйга кўчиб кириш бўлиб қолди. Ўрмонжон тўй қилиш учун әр-хотин бўлинмайди, әр-хотин бўлиш учун тўй қилинади, орзу-ҳавасни тўйда бир мартаба эмас, тўйдан кейин ҳар куни кўриш керак деб тўй харажатини, қариyb уч ҳисса камайтиришини ва бунга яна шунча қўшиб янги уйга янги рўзгоо олишни таклиф қилди. Бунинг ҳаммасини райондан, бавзиларини шаҳардан ташиб келтириш керак әди. Келин билан куёв бунга анча овора бўлишиди. Сидиқжон Ҳанифа билан қўл ушлашиб район ёки шаҳарда магазинмагазин юрган чоқларида: «Мен янги ударник бўлган кунларимда битта одамнинг қўлидан шунча иш келишини кўриб ҳайрон бўлган әдим, энди яна бу нарсага ҳайрон бўлиб турибман: агар одам одам боласига ўшшаб умр кечираман деса, унга шунча кўп нарса керак бўлар әкан!» деб кулар әди.

Бу ишлар бир қадар битгандан кейин Сидиқжон онасини олиб келгани Баҳрободга борди. У ҳар келганда,

ҳатто шу бу йил баҳорда келганда ҳам Бақрободдан кўчиб кетишга, хусусан ўғлиниг бошқа хотин олишига ҳар баҳона билан норозилик билдирган **Ҳадича** хола бу сафар, сўз билан бўлмаса ҳам, бутун рафтори билан изму ихтиёр ўзингда деган ишорани қилди. Унинг Қўшчинорга кўчгани мойил бўлиб қолишига сабаб ўғлиниг ўша ерда кўкараётгани, айниқса унинг кўнгли ўша ерда эканини кўриб турганлиги дейиш мумкин әди. Бироқ унинг янги келин тўғрисида бундай тўсатдан ўзгариб қолганига, ҳатто ўзи колхозда ишлаб топган ва Сидиқжон юбориб турган пулу молни тўйга асраб бисот қилиб юрганига тушубниб бўлмас әди.

Ҳадича хола ғойибона опа-сингил тутингани **Анзират** холага, **Ҳошимжонга** совға-салом олиб жўнади. **Сидиқжон Насибалини Шарофат** ташлаб кетганини онасидан ҳануза яшириб юрган әди, әнди яширишни лозим кўрмай. Йўлда айтди. Шундан кейин **Ҳадича** холанинг қулфи дили очилиб кетди. Маълум бўлишибча, ёзда **Шарофат** келиб бутун ҳовлини бошига кўтарган, уни сочидан судраб урган, қўшнилар чиқиб ажратмаганда майиб қиладиган бўлган экан.

Икки кампир қўни-қўшниларни ҳашарга чақириб яқин ўн беш кунни шитоб билан кўрпа қоплаш, куёв-келин ва лозим бўлган бошқа одамларга сарпо тиктириш, «янги турмуш уй»ни «янги турмушчасига» ясатиш, янги тўйнинг расм-таомилларини билган одамлардан сўраб, Ўрмонжон билан Иброҳимовга маслаҳат солиб, шунга мувофиқ иш кўриш билан ўтказишиди.

Бу орада электростанция битиб, унинг очилиш маросими иккинчи февралга белгиланди. Гадойтопмасда қурилётган ва шу атрофдаги ўн етти колхозни электр қуввати билан таъминлаши керак бўлган катта гидроэлектростанция, Тўлаган aka айтмоқчи бу электростанциянинг обрўйни тушириб юборган, одамлар ҳозир бу электростанцияга:

«от бўлмаса той» деб қарадиган бўлса ҳам, ҳозир электростанция майдони деб аталадиган Бақақуруллоқ майдонига одам сифишишмай кетди. Қаттиқ совуқ, майда қор ёғиб турар эди. Қисқагина митинг бўлди. Митингни Бўтабой очиб, қисқа нутқ сўзлагандан кейин колхозчиларни Ильич чироғлари билан табриклади. Эски ва янги қишлоқнинг кўчаларидан, ҳовли ва уйларидан қоронгилик агадий ҳайдалди. Қавм-қариндошлар, ёр-биродарлар, қўни-қўшнилар, бутун қишлоқ уйдан уйга юриб бир-бирини табриклар эди.

Тўй якшанба кунига тайинланди. Сидиқжон яна қолган-қутган нарсаларни олиш учун жума куни район марказига борди. У, районжроком олдидан ўтиб борар экан, Зиёдахоннинг каттакон саман отини кўриб қолди. Сидиқжон Райижрокомга кирди. Мавлонбековнинг қабулхонасида одам кўп, ҳамма кабинетга қарашга интилар эди. Телефонда гаплашаётган Зиёдахон Сидиқжонни кўриб трубкани қўйди-ю шошиб:

— Ҳанифа, Ҳанифа келмадими? — деди ва жавоб кутмай уни кабинетга бошлади. Ҳамма буларга йўл берди.

Сидиқжон нима бўлганини ва нима бўлаётганини тушуна олмай кабинетга кирди. Кабинетда Мавлонбеков билан жуда барваста, қулоқларини қоплаб ётган сочи ва кенг кўкрагини энлаган соқоли оппоқ, русча кийинган бир чолдан бошқа кимса йўқ эди.

— Сидиқжон Соҳибжонов,— деди Мавлонбеков чолга қараб.

Чол чекиб турган трубкасини беихтиёр кулдонга қўяр экан, кўзларини катта очиб, тарағ ва қип-қизил юзи хиёл оқаришиб, ўрнидан турди-да, қулочини кенг ёзиб Сидиқжонга ташланди, уни узоқ қучоқлаб юз-кўзидан ўпгач, соф ўзбек тилида:

— Ниятим холис әкан, тўйларингга етиб келдим! — деди.

45. Қайнатангизни танимадингизми? — деди Эйёдахон гаранг бўлиб турган Сидиқжонга. — Усмон ота — Ҳанифанинг отаси!..

Сидиқжон Усмон ота билан қайтадан қучоқлашиб кўришди.

Бир неча минутдан кейин булар Қўшчинорга жўнашгани қўзалишди. Буларни бутун идора кўчага кузатиб чиқди. Ҳамманинг оғзида Канизак — Ҳанифа, Қурбон ота, Новикова!.. Усмон ота салмоқли қадам ташлаб бораар экан, ён-верида уймалашиб бораётган одамларнинг елкасига қўлини ташлар, бошини силар, гоҳ бир қўли, гоҳ иккинчи қўли билан қучоқлар, ўпар эди.

Эшик олдида бешта от қатор турар эди. Булардан бирiga Усмон отанинг икки чамадони, икки яшик ортилган эди, унга Бўтабой ўзининг жийрон отини рўпара қилди. Сидиқжон ўзи миниб келган отни Бўтабой акага берди-да, кўримсиэроқ отни миниб, юқ ортилган отни етаклаб олди. Эйёдахон олдинга тушди.

Жўнашди.

Усмон ота, қизи ва укаси билан кўришиш пайтини тасаввур қилиб ич-ичидан тўлқинланиб келаётган ҳаяжонини яшириш ёки босиш учун бўлса керак, йўл бўйи ўтган-кетгандан гапириб борди: Бувайдадаги юэбоши воқеаси, ўзининг сибирь қилингани, ўн олтинчи йилда Бувайдадан борган бир одамдан бола-чақаси ва укаси йўқ бўлиб кетганлиги ҳақида хабар эшитгани, Сибирда гражданлар урушида қандай қатнашганлиги, ҳозир Киштав район ижроия комитетининг раиси бўлиб ишлаётганини, Новикованинг очеркини ўқиганидан кейин Москвага борганини, Новикова қандай қарши олгани ва у билан нималар тўғрисида гаплашганини гапириб берди.

Булар канал кўпригидан ўтганда қош қорайган эди, бир оздан кейин узоқ дарё бўйи ва унинг тепасидаги оқ уйлар орасида сон-саноқсиз чироқлар ёнди.

— Бизнинг колхоз! — деди Сидиқжон.

Усмон ота отининг бошини торти.

— Ўҳў, Капсанчилар қишлоғи шунақа чиройлими!

— Ҳа, Усмон ота,— деди Бўтабой,— бир вақтлар мен шу атрофдан қишлоғимизга қараб: «Ўҳў, қишлоғимиз шунақа хунукми?» деган өдим. У вақтларда қишлоғимиз гўристонга ўхшар әди.

— Бу янги қишлоқ,— деди Зиёдахон.— Бу чироқлар «Қўшчинор» чироқлари. Энди Капсанчилар деган гап йўқ.

Усмон ота дийдор кўришиш иштиёқида сабри тугаб отига қамчи босди. Унинг кетидан бошқалар ҳам отларини йўрттиришди. «Қўшчинор» чироқлари порлар әди.

1951 йил, май.

На узбекском языке

АБДУЛЛА КАХХАР

СОЧИНЕНИЯ В 6 ТОМАХ

т о м IV.

«Огни Кошчинара». Роман

Редактор Тўлқин Алимов

Рассом П. Хапилин

Расмлар редактори Н. Калентьев

техн. редактор В. Шуклинова

Корректорлар И. Қобилов ва М. Жўраева

Босмаконага берилди 28/VI-1967 й. Босншга руҳсат этилди 28/XI 1967 й. Формати $70 \times 108\frac{1}{2}$, Босма л. 10,25, Шартли босма л. 14,35. Нашр л. 14,58. Тиражи 30000, Гафур Руом номидаги бадий адабиёт нашриёти, Тошкент, Навоий кӯчаси, 30. Шартнома № 45—67.

Узбекистон ССР Министрлар Совети Матбуот Давлат комитетининг 3-босмахонасида № 1 қаровга босилди, Тошкент, Навоий кӯчаси, 30. 1967 й. Заказ № 656, Баҳоси 62 т.

**УЛУФ ОКТЯБРЬ
СОЦИАЛИСТИК РЕВОЛЮЦИЯСИННИГ
50 ЙИЛЛИГИ МУНОСАБАТИ БИЛАН
ҒАФУР ҒУЛОМ НОМИДАГИ
БАДИИЙ АДАБИЕТ НАШРИЕТИ
ҚУЙИДАГИ КИТОБЛАРНИ БОСИБ
ЧИҚАРДИ:**

Ойбек. Улуг йўл, роман, ўзб. тилида.

**Ғофур Ғулом. Встречая будущее,
шеврлар, рус тилида.**

**Шайхзода М. Хиёбон, шеврлар, ўзб.
тилида.**

**Зулуфия. Сердце в пути, шеврлар, рус
тилида.**

**Ғулом Ҳ. Тошкентликлар, роман, ўзб,
тилида.**

**Нуъмонов Ҳ., Шорадмедов А.
Отец, роман, рус тилида.**

**Султонов Қ. Оқ дарё, роман, ўзб, ти-
лида.**

**Маяковский В. Жуда соз, поэма, ўзб.
тилида.**

**Фурманов Д. Чапаев, роман, ўзб. ти-
лида.**

**Серафимович А. Темир оқим, роман
ўзб. тилида.**

**Пармазин Б. Весна ждет на перевалом,
роман, рус тилида.**

**Тұплам. Ўзбек адабиёти антологияси,
3 томлик, III том, шеърлар, рус ти-
лида.**

**Тұплам. Ярим аср ичидә. (Адабий-тан-
қидий мақолалар), ўзб. тилида.**

*Сиз бу китобларни барчыл
китоб магазинларидан сотиб
ва «Книга-почтой» орқали
заказ қилиб олишингиз мум-
кин.*

Ўз2
К35

Қаҳҳор Абдулла.

Асарлар. 6 т. (Редколлегия: И. Султонов ва бошқ.) Т. 4.
Т., Ғафур Ғулом номидаги бадний адабиёт нашриёти, 1967.
Т. 4. Қўшчинор чироғлари. Роман. 328 бет. Тиражи 30000.

Каххар А. Сочинения. Т. 4.

Индекс 7—3—3

Ўз2